


सौन्य प्रज्ञथ

(कौशर्यन बटन हुंघ बंड्य दूह)



सन्तोश शाह 'जावान'


To Respected Kari Sahab.

With regards.

Chh Sah Nadar

14-12-2019.

A1 → R2



Dr. B. S. Deshmukh

Dr. B. S. Deshmukh
Rajmukh
Rajmukh

Dr. B. S. Deshmukh



सौन्य प्रजनथ

(कौशर्यन बटन हुंघ बॅड्य दूह)

नमः समस्तभूतानामादिभूताय भूभृते ।
अनेकरूपरूपाय विष्णवे प्रभविष्णवे ॥

संतोश शाह 'नादान'

(सॉरी हकूक छि म्यानिस महाराज
श्री महाराज कृष्ण बम्बरू सुंदि नावु महफूज)

किताबि हुंद नाव	:	सॉन्य प्रज्ञनथ
लिखॉर्य	:	संतोश शाह 'नादान'
		फोन - 9419113193
कम्प्यूटर डी०टी०पी० :		IILS D.T.P. Centre
		471/2, Muthi, Jammu 181205
		Rinku Koul # 9419136369
म्वल	:	₹ 200.00
छपन वॅरी	:	2017
छाप खानु	:	

किताब मेलनुक पताह :

1. पोशि गोंद रूप अरजुन दायुत
मोहला गुजराल, लेन० 1, मुनशीचक, ओलड चुंगी,
चैमा रोड, तलाब तिल्लू, जम्मू।
2. चंजी आश्रम, (देवका के नज़दीक) उद्मपुर।
3. अजय रैणा, क्षीरभवानी पीठ, भवानी नगर, जम्मू।
फोन - 9419136545
4. बादशाह कलंदर आश्रम, पटोली, जम्मू।

कथा तु कथ सफस प्यठ

	ग्वड कथ : संतोष शाह 'नादान'	1
1.	नवरेह तु जंग त्रैय	5
2.	नवरात्रा	9
3.	नवदुर्गा अष्टमी	12
4.	रामनवम या राम जियुन ज़ा दोह	13
5.	शिवाभगवैती	19
6.	कामदा एकादशी	21
7.	हनुमान जयन्ती	22
8.	बेसाखी	25
9.	वरुथनी एकादशी	28
10.	परशुराम जयन्ती	28
11.	अक्षय त्रितिया या अच्छ्यन त्रय	32
12.	नारद काह / डुम्टुबल यात्रा	33
13.	गणेश चर्तुदशी	35
14.	नारद जयन्ती तु बुद्ध पूरणिमा	35
15.	ज्येष्ठा देवी	39
16.	शीतला भगवती ऑठुम	44
17.	सोमावती अमावसी	45
18.	नन्दकीश्वर यात्रा	47
19.	ज़ेठु ऑठुम	52
20.	निज़ला काह	59
21.	हार सतम	61

22.	हार नवम	62
23.	देवशयनी काह	64
24.	लुकुभवन यात्रा तु हारुबाह	65
25.	माता ज्वाला जी तु अमिच महिमा तु पूजा	70
26.	गुरु पूणिर्मा तु हारु पुनिम	75
27.	कमला काह	79
28.	श्रावनु बाह तु कपाल मोचन तीर्थ	79
29.	श्रावनु पुणिम	83
30.	नवदल	88
31.	चन्द्रशेठ	89
32.	जन्म अष्टमी तु ज़रमु सतम	90
33.	दर्भि मावस तु पवन संध्या	95
34.	वेनायक चोरम	97
35.	वराह पाँचम	108
36.	गंगु आँठुम, शारदा आँठुम तु ल्लेश्वरी जयन्ती	118
37.	गौतम काह तु गौतम नाग	141
38.	व्यथु वुवाह	144
39.	अन्नत च्वदाह तु पाप हरण नाग	146
40.	कामबुर्य पछ	150
41.	महानवमी तु भद्रकॉली जयन्ती	151
42.	विजय दशमी या दसेरा	156
43.	रमा एकादशी	159
44.	आँशदु पुनिम	161

45.	दीवाली	164
46.	गौपाल अष्टमी	167
47.	हरी प्रबोदनी काह	168
48.	कार्तिक पुनिम	171
49.	महाकाल भैरव अष्टमी	177
50.	उत्पन्ना काह	177
51.	मोक्षदा एकादशी तु गीता जयन्ती	180
52.	मंजहोर पुनिम	181
53.	मंजहोर तँहर	182
54.	दयत राजुन गाडु बतु	183
55.	खेचि मावस	185
56.	शिशर साँक्रात या मकर साँक्रात	188
57.	पुत्रदा एकादशी	189
58.	नवशीन	190
59.	माघनि रेत्युक बजर	191
60.	मौनी मावस	192
61.	साहिबन हुंज सतम	193
62.	षटतिला काह	204
63.	शिव चर्तुदशी हुंघ त्रे दोह	204
64.	गौरी त्रितया गोरु त्रेय	206
65.	त्रिपुरा चर्तुथी तु बसंत पाँचम	207
66.	सिर्यि सतम तु मटन तिर्थ	213
67.	भिष्म आँठुम	218

68.	मागु पोह गटुपट आँठम	218
69.	बुमसिन काह	219
70.	लोहरी	220
71.	काव पुनिम	222
72.	विजया काह	224
73.	हेरथ शिवरात्री	225
74.	डून्य मावस	231
75.	तीलु आँठम	233
76.	होलीका देहन या होली	235
77.	सोथ थाल बरुन	239
78.	पिशाच चोतुरदशी	242
79.	नवरेह मावस तु वरनाग यात्रा	242

याद थैविव

1.	द्रठ पौंचुक (पंचक)	245
2.	मलमास तु बानुमास	246
3.	सन्धा चोंग क्याज़ि छि ज़ालान	248
4.	पाँचन कन्यायन हुंज त्वता	254
5.	कुम्भ क्याज़ि छि दिवान	255
6.	दोह कति प्यठ छु गंजरनु यिवान	256
7.	श्राद तु ज़न्म दोह कमि तेथि गछि मानुन	256
8.	आचमन	256
9.	आँठमु गछन दरनि	257
10.	आँठमु मावसु तु पुनिम दोह क्याज़ि गछि व्रत थावुन	258
11.	सौंदब्रॉरय या वुसंधा	259
12.	अख ज़ान	261

ग्वडु कथ

कौशिर्य बटु छि पथकालि प्यठ पनुन्य बॅड्य दोह बडु शोकु
सान मनावान । कॅशीरि मंज कडनु पतु गॅयि असि सारिनय छलुछांगुर ।
कॅह लॅग्य लार तु कॅह लॅग्य दार । अमि सुत्य पेयि यिम बॅड्य द्वहें
तमि आयि मनावनस मंज स्यठा फर्क, मगर दयि नाव ओस सुत्य
सौनिस ज़ेवि पेतिस प्यठ । येमि सुत्य अँस्य पनुन्य शुर्य परनावनस
तु बाकुय गरिक्य मसलु अन्द वातुनावनस मंज स्यठा इम्तिहान
पास करनु पतु सफल सपदेयि । सौन्य ज़िठ्य यिम तकरीबन 60
या 70 वाँसि हुंघन हेरपाव्यन खसनुय अँस्य, गॅयि यकदम बिहिथ ।
सानि वाँसि हुंघ लुख यिम 40 तु 50 वॅरिय वाँसि हुंघ अँस्य तिमन
प्यव स्यठा जखुन । यिम रीचु तीच बॅड्य द्वह सुत्य सुत्य निबोविथ
दियुत नु असि पानय शुर्यन प्यठ अम्युक मतलब मकसद
समजावनस प्यठ कांह खास ध्यान । येमि सुत्य तिम रूद्य सिर्फि
डिग्री हौसिल करान । मगर योसु असली डिग्री छे, तमि निश रूद्य
महरूम । यि छु पोज़ जि सौन्य शुर्य छि यूग डंडु पनुन सेहत ठीक
थवनु बापथ करान, मगर कर्मयूग पनुन दर्म किथु छु बुथि पकनावुन,
तमिनिश छि अंज्ञान । न हौव तिमवुय कांह रुचि नु हेछिनाँव्य असिय ।
सान्यन ज़िठ्यन ति अँस नु यिमन बड्यन द्वहन हुंज महिमा कॅह
पता । तमि सातु ओस गरु गंड, यथ तहत तिमव ति ओस हेछमुत तु
ब्रौहकुन ति अँस्य रीचु पकनावान । खांदर पतु न्वशन तु खांदर
ब्रौठ कोर्यन ओस यिहय गरुगंड यिमन बड्यन द्वहन हुंद आय तु
आसुन हेछिनावनस मंज सहायक बनान । ज़बरदस्ती ओस दिलस

मंज वेशवास बेहनावनु यिवान जि कांह ति बोड द्वह छु गरस मंज
 ग्वडु लिवनु सुत्य शोरु करनु यिवान, तिक्याजि अमि दोह छि तिम
 दीवि तु दिवता सोन गरु जरूर यिवान, येमि सुंजि वेरि यि बोड द्वह
 अँस्य छि मनावान। न्वश कूर ऑस लिविथ डुविथ बानु मांजान तु
 नाना प्रकॉर्य बूजन बनाविथ मंत्रवु सुत्य ग्वडु दयि सुंघ नॉव्य थवान
 तु पतु ऑस्य पानस नँवीद रूप तम्युक आहार करान। अमि बडि
 द्वहुक बूजन छु आम द्वहव ख्वतु स्यठा अँजीब, कॉफी मेकदारस
 मंज तु स्यठा मजुदार बनावनु यिवान। मे छि पनुन्य किन्य यि अख
 लोकुट कूशिश कॅरमॅच जि योद बिलतरतीब यिमन सारिनुय त्योहारन
 हुंद फिरिस्त यियिहे बनावनु, सौन्य बचि ति परुहन पनुनि समयि
 यिमन बड्यन द्वहन हुंज महिमा तु यिम द्वह धर्म तु कर्म पॉलिथ
 बनुहन तिम मनु, अनु तु दनु दनुवान।

नीलमत पुरान अनुसार छु पानु विष्णु भगवानन नीलुराजस
 निश यिमन बड्यन द्वहन हुंज निशानदीही कॅरिथ वोनमुत जि “योद
 कॅशीरि हुंघ बॅस्कीनदर यिमव रीचव तु रेवाजव सुत्य यिम बॅड्य
 द्वह मनावन, तिमन यियि नु बुथि पनुनि क्रेयि मंज कांह ति वेग्न,
 योद यियख ति तिम हेकन पनुनि हेमन्न तु होसलु सुत्य खुशी खुशी
 तार लॅबिथ। तिहुंदि वनुनु अनुसार मनोव असि कॉशिरयव बटव
 कश्मीरा दीवी हुंद व्वहरवोद म्वंजुहोर ओकदोह द्वह तु तमि पतु
 हेत्य सॉरी बॅड्य द्वह तिहुंदि आईनु हिसाबु मनावुन्य। सँतीसर युस
 ग्वडु पॉनिस मंज फोटमुत ओस या यथ मंज पानु भगवान शंकर
 वेराजमान ओस, येलि “जल उदभव” देवस निश मुछि करनु
 आव, तति ऑस्य वन्दुक्यन शेन रेतन सिर्फि भूत पिशाच रोजान तु

गेश्मु शेन रेतन ऑस्य लुख रोजान। अमि मसलुकिस सिलसिल
मंज गव चन्द्रदीव ब्रह्मन, युस लुख तति नेरनु पतु ति ततिय रूद
राजु नीलनागस निश।

सु प्यव ग्वडु माजि दरती परन, पतु त्राव्यन राजु नीलस
प्रशंसायि रुफ शलूकन हुंजु पोशिमालु तु कोरुन प्रसन्न। चन्द्रदीवन
वोन राजु नीलस: “बु छुस मनशन मंज ब्रह्मन, मे रछ तु पनुन्यन
पद्यन तल। यिम मनुश कशमीर छि यिवान, तिमन छु प्यवान शोयि
रेत्य बेयि वापस नेरुन। अमि यितु गछि सुत्य छि तिम चीरनु यिथ
पस्त गौमुत्य। तिम छि योत वापस वहिकु गटपछ ओकदोह यिवान।
येतियोर येलि तिम यिन, तिम गँछ्य हमेशि खॉतरु रोजनि यिन्य।”

यि व्यनथ बूजिथ ओन नीलु राजन ब्रह्मन पनुन गरु। आदर
सत्कार रुफ कॅरन ग्वडु तस पूजा, पतु वनिनस तिम सारेय रीचु,
यिम पॉलिथ अख मनुश हेकि कशीरि मंज रूजिथ। शोयि रेत्य
चित्र पुनिम पगाह वहिक ओकदोह दोह आयि लुख प्रथ कुनि अन्दु
प्यठ कशमीर दीशस मंज रोजनि। तिमन सुत्य आव राजु विरोदया
हस्यत्यव तु गुर्यव सान। चन्द्रदीव म्यूल राजु विरोदयस पानय।
स्यठाह दन पेश कॅरिथ वॅनिनस तिम सारेय कथु, यिम राजु नीलन
आसु तस वॅनिमचु। राजु नीलन ओस दियुतमुत ब्रह्मनस वेशनु
भगवान सुंद हवालु, येम्य यिम रीच पालनु खॉतरु ओस कशीरि
हुंघन बस्कीनदरन हुकुम दियुमुत।

व्वन्य प्रछन सौन्य शुर्य, “अँस्य छि व्वन्य कॅशीरि नेबर
रोजान, असि कथ किचु छि यिम रीच तीच निबावन्य।” मे छि आश
तिम हेन यि जवाब बूजिथ पनुनिस अन्तर आत्माहस मशवरु तु हेन

सानि ख्वतु तु ज्यादु श्रदायि सुत्य यिम द्वह मनावुन्य । यि छु पोज अँस्य छि वुन्यक्यन पनुनि प्रालब्ध अनुसार सौरिसुय जगतस छँकरिथ, मगर सौन्य मूल छि तँतिय । अँस्य छि तिम कुल्य यिम कँशीरि मंज कँडिथ आयि जबरदस्ती नेबर छकनु तु कँरिख बेकरार । योद तोत बैयि गछनुच सँबील बनि, असि यियि करार तु द्वहन मंज फब्बन सौन्य मूल । अँस्य छि जामुत्य तु प्रथेमुत्य तँतिय । तोहि छु तमिय मादरि वतनुक हवा पोन्थ चोमुत, यथ मंज असि वुनि ति छु जुव । लिहाजा छु सान्यन शुर्यन प्यठ ति फर्ज आँयिद सपदान जि तिम ति पकनावन वेश्वास तु श्रदायि यिम प्रथायि ब्रौहकुन येमि सुत्य सोन यथ संसारस मंज युन गछिहे स्वफल, तु तिमन ति दियिहे दय हुरेर पूरेर । द्वखव तु संकटव निश असान असान तार लँगिथ प्रावहन दिलुक करार । वुन्यक्यन छि सौन्य शुर्य स्यठा दनॉड्य, मगर परुगिय छख ब्वदि हुंज । योद तिम प्रथ कुनि कर्मस दय सुत्य थवुहन, तिमन बसिहे नु पनुन पान परछ्योन केँह ! पनुनि दर्मु अनुसार कर्मव प्रावहन तिम सन्तूश, येमिच परुगिय अँज्यक्यन शुर्यन मंज छि अँस्य सौरी अनुबव करान । दय रँछिनख पनुन्यन पद्यन तल हमेशि !

मे कोर यिमन बड्यन द्वहन या त्योहारन प्यठ स्यठा शोद याने रामायण, महाभारत, सँतीसर फौडैशनुक मेटीरियल, नीलमत पुराण, विष्णु पुराण, रजतरङ्गिणी किताब पँरिथ गँयस यिम द्वह किथु तु क्याजि छि मनावुन्य टापिक व्यछुनावनस मंज सफल । व्वन्य यि प्रयास म्योन क्युथ लगिवु तोहि, बु छेस हलम दोरिथ तुहंजन चिठ्यन प्रारान ।

संतोष शाह नादान

नवरेह तु जंग त्रेय

सहयज्ञा प्रजा सृष्ट्वा पुरोवाच प्रजापतिः ।

अनेन प्रसविष्यध्वमेष वोस्विष्टकामधुक ।।

(भगवत गीता अध्याय 3 श्लोक 10)

ग्वडु प्रज्ञापथ ब्रह्मनन सृष्टी तु दीव पौदु कॅर्य यॅग्य सान,

वौननख हवन सुत्य रुज्जिव बजा गॅछान ।

येमि यॅग्य सुत्यन यि येछिव ति रुज्जिनव बनान,

बूग सौरी रुज्जिनव मुहय्या गछान ।।

(कौशुर तर्जमु)

नवरेह : नव गव 'नविव' रेह गॅयि ज्यूत्य । येत्यन छु मे बासान यि शब्द मा छु त्यूत प्रोन तु परातन येलि ज्ञन चित्र जून पछि ओकदोह ब्रह्मा जियन सृष्टी रुफ मायाजाल वाहरोव तु नेष्काम कर्म रुफ यॅग्य कॅरिथ दियुतुन ज्यूत्य रुफ बुतरौच आशिर्वाद जि तोहि ति येछिनव नेष्काम कर्म रुफ यॅग्य करुन्य येमि सुत्य तोह्य फॅवलिव तु नविव । यिम बूग तु सादन छाँडिव तिम तिम रुज्जिनव वेग्नव रोस मुहय्या सपुदान । अमिय छि अथ दोहस नवरेह वनान । अँस्य कौशिर्य बटु छि अथ दोहस वॅरियुक ग्वडुन्युक दोह माँनिथ प्रथ वरियि जोकु तु शोकु सान मनावान । चकि छु यि सु रुत दोह येमि दोह प्रज्ञापथ ब्रह्माहन सृष्टी हुंज रचना छि कॅरमुत्र । दोयिम छु अमिय ओकदोह सत्यायोगस मंज पानु विष्णु भगवानन मतस्य रुफ अवतार दोरमुत । येमिकिन्य अँस्य अमिदोह ब्रह्मा मुर्हूथस मंज बाकी चीजव अलावु जन्थरी प्यठ विष्णु भगवान सुंज मूर्च सान थाल सजाविथ छि थालस बुथ वुछान । येमि

सुत्य तिम छि असि क्युत रुत काँछान तु सोन हँलम छि स्वख तु
सम्पदा सुत्य बरान।



कलपाँत पतु येलि सोरुय मिसमार सपुद, ज़लु रूप सॉरिसुय
कायिनाँच मंज़ ओस महादीव पानय वेराजमान। येलि पृथ्वी पानि सुत्य
हेचुन फटुन्य, माता (सती) शैलपुत्री (हिमालय संज़ कूर) कोर नावि
रूप दारन, ब्रह्मा रूप विष्णु भगवानन व्वपुदॉव पनुनि माया शक्ती
सुत्य अथ मंज़ जुरयात। मतस्य रूप दॉरिथ ह्योत विष्णु भगवानन अथ
नावि लमुन, नाव लॉजिन बोठ तु थॉवुन थदिस कोहस कुन गँडिथ।
यिथु कॅन्य आयि सृष्टी बारसस। वीदव मुताँबिक छु कॅशीरि हुँदिस
मानसबलस मंज़ ग्वडुनुक्य आदमन ज़न्म ह्योतमुत।

रुद्र तंत्रकिस उमा मेहश सम्वादस मंज़ छि शंकर जियस पर्वती
प्रछान ज़ि ज़ीवन किथु पज़ि यि नवि वॅरयुक श्वब आरम्ब करुन, येमि
सुत्य तिम ख्वशहॉली प्रावन। शंकर जी छुस जवाब दिवान, 'ही

पर्वती चु छख म्याँन्य आत्मा तमि किन्य वनय बु अख छोट वथ तु
गुप्त वेदी येमि सुत्य नोव वॅरी फ़ॉसर दियि तु वॅरयुक वॅरी आनन्द
दायक तु स्वख दायक बनि। ब्रह्म मुहुँतस मंज गछि थालस बुथ वुछुन
युस ज़न यिमव चीज़व सुत्य आसि सजॉविथ :- तोमलु थाल, किताब,
इून्य, कल्म दवात या पेन, ईष्ट दीवी, रूवपय, स्वनु वॉज्य, चोट,
नून, वय, फुलयि पोशि लँड, ज़ामुत दूद, विष्णु तु लक्ष्मी हुंद
फोटू।'



बुथ सारिवुय चीज़व सान माता लक्ष्मी तु विष्णु भगवानस
वुछिथ गछि सुबहनस ज़ामुत दूदस सुत्य वय च़कुल ख्योन। फुलयि
पोशि लँड, पोश तु इून्य गछन क्वलि त्रावन्य तु तमि पतु गरु यिथ
ख्योन तु चोन। वॅरयुक वॅरी नेरि ह्योत तु फ़ूस। शंकर जी छु भैरवी
वनान ज़ि नॅवि वरियिच यि गुप्त वेदी बखशि सारिनुय ज़ीवन स्वख,
ख्वशहॉली तु आनन्द। अमी द्रह प्यठु छि नव दुगार्यि हुँघ द्रह ति शरू
सपदान। सान्यन गरन मंज छु पूजायि पाठु किन्य माता शैलपुत्री अमि

द्वह आवाहन करनु यिवान।

दपान सृष्टी हुँज रचना करनु विजि गव गणेश जियस आवाहन करुन मशिय, येमि किन्य अमिचि वति मंज आयि वेग्न। दीवी तु दीवता सपुदेय स्यठाह दिलमलूल। तिम रूद्य दौयिमिस दोहस तौन्य अथ मूरान तु दुयान। तवय छि अँस्य अथ नवरेह दौयि 'दुयवुन्य दौय' वनान। दीवन तु दिवताहन दियुत रुत मशवर दीवी पारवती तु वोननख 'श्री गणेश छि वेग्नहर्ती'। योदवय पजि लोलु तु मायि यियि गणेशस आवाहन करनु तिम सपुदन संत्वष्ट तु प्रसन्न सपुदिथ नेरन पौन्य पानय डेंजन खुर्य तु वेग्न दूर सपुदिथ बनन वतु आसान।' अमि नवरेह त्रैयि छि दीवी तु दिवता त्वतायि सुत्य गणेश जियस प्रसन्न करान तु फलु रूप छि वेग्न दूर सपुदिथ सृष्टी फवलुन्य तु नवुन्य ह्यवान।

माता पारवती छे प्रसन्न सपुदिथ पनुन माल्युन गछान। पनुन्य खुशी माल्यन्यन बोंगरिथ छे जंगि या शगुन रुफ दन तु नून अनान। अँमिय छि अथ दोहस 'जंगु त्रैय' वनान। दपान यि नून छु नज़रि आतश निश बचावान तु दन छुरुचन काम्यन दस तुलान। अमि अलाव



छि मालिनि च्वचि ति अनान । यिम च्वचि हखन हमसायन तु बांदवन
 बोंगरिथ ओंही सुत्य छि न्वश कूर पनुन मुर बरान । जंगु त्रेय प्यठ छि
 असि कौशिर बटन हुंजु कोरि, माजि, बेनि, न्वशि सारेय पनुन पनुन
 माल्युन गॅछिथ ख्यथ च्यथ शामन च्वचि नून तु अतुगथ (दन) अँनिथ
 पनुन वॉरिव गरु वापस यिवान । यि बटुन्य छि अमि दोह पारवती रुफ
 पनुनि मालिनि च्वचि तु मोहरु रुफ स्वख सावय मुरिस क्यथ अँनिथ
 खुशी खुशी पनुनिस वॉरिव गरस लोल बरान तु रुत व्यवहार कॅरिथ
 पनुन जन्म रथि खारान । कौशिर्य बटु छि अमि दोह सुब्हन तँहर
 कॅरिथ तथ पूजान तु पतु छि सु नँवीद ग्रहन करान । यि दोह मनावनु
 गर्जु छि अँस्य अमि दोह पोशि बागन मंज गॅछिथ ख्यन च्यन करान ।
 ब्रोंठ ब्रोंठ अँस्य चायि समावार निथ चाय बागस मंज च्यथ यि दोह
 खुशी खुशी पालान, ताकि वँहुर्य वॅरियस रोज़ि यिछुय खुशी बरकरार ।



नवरात्रा

नवरात्रा छि नवन द्वहन हुंद बोड द्वह । असली छि अँस्य यिमन
 दोहन शख्ती पूजा करान यस सॉरिसुय व्याप्त छि । यि छि कुलहम
 भारतस मंज लुख पनुनि पनुनि रीचु रेवायच हिसाब खुशी सुत्य मनावान ।
 यि दोह छि कलकत्ताहस, राजिस्तानस तु महाराष्ट्रस मंज अँकिस
 खास अंदाजस मंज मनावनु यिवान । अँस्य छि यिमन द्वहन वैशनव
 रूजिथ नववय द्वह फाकु थँविथ, पूजा, अर्चनायि तु सत्संगव सुत्य द्वह
 राथ गुजारान । यिम द्वह छि चित्र जूनपछ ओकदोह प्यठ नवम तान्य तु
 ओंशिदस मंज ओकदोह प्यठ नवम तान्य मनावनु यिवान । चित्रस मंज


छि ब्योल ववान तु ओंशदस मंज छि फसुल चटान । चित्रस मंज छि
 दयस व्यनथ करान जि मे दि हेमथ, युथ बु कर्म भूमी दर्मु बलु सुत्य
 सगुनोविथ हरुद वटु । ओंशदस मंज छि यिमन द्वहन खल तु खलियानु
 बैरिथ आसान । अस्य छि मातायि शुक्र करान जि सौन्य मेहनथ खेच
 बोठ । यिमन द्वहन छु पननिस पानस चिह चिह मनुश साम हैवान तु
 ज्ञानान जि क्वदरथ ति छु प्रोन जामु हरदु त्रावान तु सोंतस मंज छु नोव
 लागान । यि तब्दीली वुछिथ छु मनुश पायस प्यवान जि युस जाव तस
 छु मरुन । कर्मय योत छि अँकिस मनुशस सुत्य वसान । दय छु सथ
 बाक्य छु सोरुय अपजुय ।

यिमन नवन दोहन छि माता दुर्गायि हुंघन नवन रूपन अस्य
 पूजा करान । यिम यिथु पोंठ्य छि :-

प्रथम शैलपुत्री च दितियं ब्रह्मचारिणी
 तृतीयं चन्द्रघण्टेति कूष्माण्डेति चतुर्थकम्
 पञ्चमं स्कन्दमातेति षष्ठं कात्यायनीति च
 सप्तमं कालरात्रीति, महागौरीति चाष्टमम्

नवमं सिद्धि दात्री च नवदुर्गाः प्रकीर्तिता

माँ शैलपुत्री : छि हीमाल पर्वत राजु सुंज कूर । तँम्य कैर्य सौरिय
 वोंसि तफ तु आयि शंकर
 भगवानस बागुन्य । तस
 छि जु पथुर गणेश तु
 कोमार । गणेश छु
 वेगुहर्ता तु तँमि सुंजि
 वीरतायि फ्रँठ छु माता



सरस्वती तस ग्वडुन्य पूजि हुंद आदिकार वरदानस मंज दियुतमुत ।
कार्तिक छु योदुक भगवान । अम्युक मंत्र छु : ॐ ह्रीं श्रीं ऐं सौं : सौ
ऐं श्रीं ह्रीं शैल पुत्र्यै नमः (108 फिरि)

मौज ब्रह्मचारिणी : पजि प्रेयमुक तु मिलुचारुक पाठ छि अमि रूप
माता जगि हेछिनावान । अम्युक मंत्र छु : ॐ श्रीं ह्रीं क्लीं सः
ब्रह्मचारिणी ऐं फट स्वाहा (108 फिरि)

मौज्य चन्द्रघण्टा : अमी रूप छि माता डेकि चन्द्रम दोरिथ इन्साफ
करनुच दीवी माननु यिवान । अम्युक मंत्र छु : ॐ क्लीं सौं श्रीं ह्रीं ऐं
सौ चन्द्रघण्टाये नमः (108 फिरि)

मौज्य कुष्माण्डा : जिन्दगी जुवनुच नवि नवि वतु छि जगि हावान ।
अम्युक मंत्र छु : ॐ श्रीं ह्रीं क्लीं कुष्माण्डये नमः (108 फिरि)

मौज्य स्कन्ध माता : क्या छु जान, क्या छु नाकारु । क्या पजि करुन
तु क्या न करुन छि प्रजायि हेछिनावान । अम्युक मंत्र छु : ॐ ह्रीं श्रीं
हौः स्कन्दमात्रे हः हः फट स्वाहा (108 फिरि)

मौज्य कात्यायनी : छि राक्षसन गालनस सुत्य सुत्य अपजिस मात
दिवान । अम्युक मंत्र छु : ॐ ह्रीं कात्यायन्यै नमः (108 फिरि)

मौज्य कालरात्री : रखतबीज ओस सु देव, युस येलि मारनु यियिहे
तसुंदिस पथर पेमितिस खून फेरिस बनिहे ब्याख ब्याख राख्युस ।
मातायि येलि सु मोर, तसुंद प्रथ खून कतुर न्यून पनुनि माया शक्ति
सुत्य वथुरिथ । येमि सुत्य तैम्य सुंद खोफ हमेशि खौतर दूर गव ।
अम्युक मंत्र छु : ॐ श्रीं ह्रीं ह्रीं श्रीं ॐ कालरात्री क्लीं ऐं सः फट
स्वाहा (108 फिरि)

मौज्य महागौरी : अमि रूप मौर्य माजि सासुबेद्य राख्यस तु लुख

कैरिन तमि बयि निश आज़ाद। अम्युक मंत्र छु : श्रीं ऐं ओं सौ गां गूं
महागोर्ये नमः (108 फिरि)

मौज्य सिद्धदात्री : यंत्र मंत्र तु ज्ञानुच कुंज छि अमिय रूप बखुत्यन
बख़्शान। यस अटल तु शवद बख़्ती आसि, तस छि मौज्य प्रालब्दुव्य
खोदय अछर नाहनाविथ सेदी हुंद वरदान दिवान। अम्युक मंत्र छु :
ॐ ऐं कलीं सौः श्रीं ह्रीं देवदूती श्रीं फट ठः ठः ठः स्वाहा (108
फिरि)

युस यिमन द्वहन बावु सुत्य पूजा तु पाठ करि, तस बख़िस छि
त्रनवुय मल मौज्य दुर्गा पानु दूर करान। नवव रूपव नवन द्वहन छि
माता बख़ुत्य सुंघ वेग्न तु द्वख हरान। कठिनिस यथ भवसागरस मंज
फैटिमित्यन बख़ुत्यन छु यिहुंजि सुमरनि सुत्य तार मेलान तु ज्यन
मरनु बय दूर कैरिथ मूक्ष दिवान।



नवदुर्गा अष्टमी

चित्र ज़ून पछि ओठुम छि माजि
दुर्गायि हुंद ज़ा द्वह मनावनु यिवान। अमि
द्वह छि कैह लुख हवनु दैस्य, कैह पूजायि
किन्य माजि प्रसन्न करनुक यत्न करान।
कमजकम छि अमि द्वह ज़नि किहो मर्द
व्रत दरान। श्रीनगर, दुर्गानाग, त्रिपोर स्वंदरी,



मंजगाम तु तमाम आश्रमन मंज छि जगत कल्याण बापथ अमि द्वह
हवन करनु यिवान। चूँकि यि छु नवरात्रुक ओठिम द्वह, अमि द्वह छि

कंह कन्यकु पूजान तु हवन ति करान । हर हालस मंज छि यिमन नवन
 द्वहन सॉरी हैंद्य लोलु आराधना माजि भगवती करान तु पॉनस क्युत
 रुत तु ह्योत कांछान । योद नवुम द्वह रुच वार आसि, यवस वुश्कु
 ग्वडुनिकि दोह टॉकिस मंज ववनु आसि आमुच तथ यिमन द्वहन द्वद
 बॉविथ पोश लॉगिथ पूजा करनु आसि आमुच, छि नवम दोह पॉनिस
 मंज बावन्य आसान । योद नु वार रुच आसि तेलि छि देंहम द्वह यि
 माता क्वलि बावान । ग्वडनुकि दोह वेंविथ दोयिमि द्वह छि अथ अंकुर
 फटान पतु पूर नवन द्वहन, द्वह खोतु द्वह बडान, ज़न छु असि सुत्य
 गरसुय मंज सब्जा-सब्ज खाह डूर कथु करान बासान, यथ वुछिथुय
 दिलस मंज छि आनन्दुच लेंहर गरु करान ।



रामनवम या राम जियुन ज़ा दोह

राम नाव स्वरनु सुत्य छि मनुक्य
 सम्शय दूर सपदिथ मन श्वद सपदान ।
 अख मनुश छु योमि शरीरु रूप
 मँहलखानुक्य दारि बर त्रौपरिथ अथ पदस
 प्यठ वातान तु सोचान ज़ि यि सम्सार छु
 माया या अंदकारुक ज़ाल, बॉय बांदव,
 शुर्य मुर्य छि अपज़्य रिशतुदार । पोज़ छु सिरिफ दयि सुंद नाव
 ज़ेपिथ वेवहारस मंज सु अँनिथ पनुनि ज़िन्दगी हुंद्य यिम मोलुल्य दोह
 स्वफल करुन्य । श्री राम ओस विष्णु भगवान सुंद अवतार युस राज़ु
 दशरथ तु कौशलायि हुंदि स्यठाह ज़न्मन हुंदि तपु बलु या फलु सुत्य



राजु दशरतस निश जन्मस ओस आमुत । श्री राम सुंजि पूजायि सुत्य
छु मनुश यितु गछि बंदुनव मोकलिथ मूक्ष्य प्रावनुक हकुदार बनान ।
जेनु प्यठ अंदस तौन्य तिहुंज कथ तु रामायण ह्यु ग्रंथ बोजनस मंज छु
बैखुत्य अंदरिम खुशी अनुभव करान । सौरी बैखुत्य छि रामुन राज
पनुनि पनुनि तौरीकु व्यछुनौविथ हर जायि हर पौविस खँसिथ श्री रामु
सुंद राज आसनुच आश थवान । पँकिव व्वन्य करव अँस्य ज्ञान जि
यि राम जी कुस छु तु अँस्य क्याजि छि अँम्य सुंद जा दोह मनावान ।

राजु दशरथस आसु त्रे रौनियि । युस इक्खावाकु क्वलस सुत्य
ओस तोलुक थवान । राजु दशरथ ओस अयोध्यायि हुंद राजु तस ओस
नु यि क्वल ब्रौहकुन पकनावनु खौतर कांह ति शुर । आँखरस त्रौव
राजुन यि कथ पनुनिस क्वलु ग्वरस ब्रौहकनि । येमि अम्युक समादान
अख पुत्रकामेष्टी हवनु दँस्य छांडिथ राजस यि हवन करनुच आँग्यन्या
दिच । अमि हवनुच पूर्ण आहोच दिथ गव अमि अँगनु मंज अँगनु दिवता
जु खिरु टौक्य अथन मंज हेथ प्रकट । बराबर बराबर नँवीद त्रेशवुन्य
मंज बाँगरावनुच दिचुन राजस नँसीहेथ । राजन दित्य यिम टौक्य जु
कौशल्यायि तु कैकी ख्यनु खौतर सुती दोपनख पूर त्रेन हिस्सन मंज
बाँगरिथ गछि सुमित्रायि ति पनुन हिस्सु दियुन । यिमव दोशवुयव दियुत
पनुनि पनुनि टाकि मंज हना हना तुलिथ सुमित्रायि ति ख्यनु खौतर ।
वनु छु यिवान युस हिस्सु कौशल्यायि सुमित्रायि दियुत तम्युक फलु
रूप जाव तस लँक्ष्मिन जी तु युस हिस्सु माता कैकी दियुतुस तमिकि
फलु रूप जाव तस शोत्रुगन । कौशल्यायि मातायि निश आव राम जी
तु कैकी निश आव भरत जी जन्मस ।

त्रिनु जून पँडि नवम चँद्रवारि दोह पुनरुस सातु उत्तरायनस

सिंह लॅग्नस मंज ह्योत राम जियन जन्म । युस विजय दिनवोल समय
छु माननु यिवान । कैकी दियुत देहम दोह बालकस गंडु योगस बोमवारि
दोह जन्म । कौश्य दोह अथ्य पछस मंज जायि अशलेश नक्षत्रस मंज
सुमित्रायि जु बालक । राम जियनि थनु पेनु विजि पेठय कौरुख मँहल
खानस जूल तु कँहिमु दोह कोरहोख नामकर्ण संस्कार तिव्यजि देहन
दोहन छु यिनुक हेंछ आसान तु कँहमि दोह छु यि म्वकलान । राम
जियस सान आयि चोशवय यकजा पालनु । कुन्यसुय ग्वरु क्वलस
मंज आयख कुनी शोक्षा दिनु तु सौरी बनेयि प्वखतु तु पूर वेदवान ।

अकि दोह आव महात्मा विशवामित्र अयोध्या तु माँगुन राजस
यिमन चोशवनी हुंद मदद पनुन यँज अंद वातनावनु खॉतरु । राजन
कोर आंकार तु सौरी सूजिन सादस सुत्य । यँजिच रक्षा करनु खॉतरु
मॉर्य तिमव स्यठाह राक्षस तु यँज सम्पन गँछिथ निय तिम रेश्य
पानस सुत्य मिथला नरेश सुंदिस मँहलस मंज । येति राजु ज़नकन
ओस सु दोह मुकरर कोरमुत येमि दोह तसुंज कूर सीता तस सुत्य
खांदर करि युस शिव दनुश थोद तुलनस मंज सफल सपदि । श्री रामन
तुल नु कीवल दनशुय योत बॅल्कि फुटरुन ति, येमि किन्य सीता तस
नेथरि आयि । तसुंज लोकुट बेनि उर्मिला दिन्नख लॅक्ष्मन जियस । बाकुय
जु कोरि मान्दवी तु श्रूताकीता आयि भरतस तु शत्रुगनस बागुन्य ।
यिहुंदि खांदर पतु कोर राजन सँही जि पनुनिस बॅडिस पोत्रस श्री राम
जियस यियि ताज पूशी करनु । सौरी सपद्य यि शेछ बूजिथ प्रसन ।
मगर केंचव दोहव पतु उकसाँव कैकी पनुनि दाँसी मंथरायि तु वोननस
राम जियनि बदलु क्याजि यियि नु बरत जी राजु बनावनु । रॉनियव
मंज आँस राजस टाँठ रॉनिय कैकी । तस ओस तँम्य अकि दोह जु वर

मंगनु खॉतरु वोनमुत । रानी पेयि तिम जु वर याद तु शैतान ज़ेवि प्यठ
 बिहिथ मंगिन राज़स जु वर । अख रामु सुंद च्वदहान वॅरियन हुंद
 बनवास तु बेयि बरत जी युवराज बनावनु खॉतरु । राज़ु गव यि शैछ
 बूज़िथ हय बुंगु तु गव बेहेश । हना होश सम्बलिथ वोननस “रगु कुल
 रीत सदा चली आई, प्राण जाये पर वचन न जाये” । अमि फिकरि
 कोर राज़स टकुसूर अँन्दरी तु त्रॉवन्य राम जियनिस दोखस मंज़
 पनुन्य प्रान । पनुनिस मॉल्य सुंद वादु पूर करनुकि गर्जु द्रायि बुर्जु
 वॅलिथ सीता तु लॅक्ष्मन हेथ राम जंगल कुन । येलि बरत पनुनि मातामालु
 कैकी दीशि प्यठु वापस आव गरिच यि क्व शैछ बूज़िथ द्राव चित्रकूट
 कुन पनुनिस बॉयिस मनावनि । वापस यिनस इंकार कॅरिथ अँन्य बरत
 जियन राम जियिन्य खाव तु बेहनाँवनुन स्व तख्तस प्यठ । दॅहन वॅरियन
 हुँज़ि जलायि वतनी पतु गॅयि तिम डंडकवन येति तिमव पनुन बेठाल
 बनाँविथ मॉर्य सासु बॅद्य राक्षस । रावनन हेत्य हॅच्य त्रापुन्य तु सूज़न
 पनुन्य बेनि श्रूपनखा तिमन बदलु हेनु खातरु । लॅक्ष्मन जियन छुन्य
 तसुंज़ नस चॅटिथ । रावणन येलि तसुंद हाल वुछ सु गव स्यठाह कूदी ।
 तॅम्य सूज़ पनुन प्रोन वज़ीर मरीच तिमन मारनि । मरीचन कोर हिरन
 रूप दारन येमिस वुछिथ सीता तम्बलेयि । राम जियस वोननु सु रटनु
 खॉतरु । राम जी द्राव तॅस्य पतु पतु मगर अथि आस नु कैह । कैह
 समय गुज़रनु पतु द्राव लक्ष्मण जी बॉयिस छारनि । मौकुक फॉयिदु
 तुलिथ नियि रावणन सीता जी तुलिथ ।

जटायु हन (ग्रदन हुंद राज़) करेयि वाराह कूशिश सीता
 छुडावनुच, योस वैमानस मंज़ रावणन हॅरिथ ऑस निमुत्र । अडमोर
 जटायु प्यव राम जियनि क्वछि मंज़ । अडुकजि ज़बॉन्य मंज़ वोननस

सीता मातायि हुंद सोरुय हाल । सुती दियुतनस मशवरु जि सुग्रीवस
 योद मीलिव सौन्य कॉम नेरि । तोत वॉतिथ येलि सु सुग्रीवस म्यूल
 तसुंदि अथवासु सुत्य मोर तॅम्य सुग्रीवुन बोय बॉली तु किशकन्दुक
 राजु पाठ कोरुन सुग्रीवस हवालु । तॅम्यसुंज ज़नान योस बालियन
 नज़र बंद ऑस थावमुन्न अँनिन वापस । राजु सुग्रीवन कोर वानर सेना
 हुंदि मदद सुत्य तॅहिया जि अँस्य छ़ांडहोन सीता माता । हनुमान जियन
 कोर समुन्दर पार तु लंकायि मंज़ म्यूल अशोक वाटिकायि मंज़ बंद
 माता सीतायि हुंद पय । तसुंज पँहरदौरी ऑस त्रिजट्टा नावच राखसेन्य
 अशोक वाटिकायि मंज़ करान । हनुमान जी ओस ओत यिनु ब्रोंठ
 रावनुनिस बॉयिस विभीषन जियस म्यूलमुत । सीता जियि ब्रोंहकुन
 गँछिथ दिन्न तॅम्य राम जियिन्य वॉज्य निशॉन्य रूप तस । येलि तॅम्य
 वॉज्य प्रज़नॉव, तॅम्य दियुतनस पनुन गजरु राम जियस दिनु खॉतरु ।
 हनुमान जियन खेयि सॉरी मेवु अशोक वाटिकायि हुंघ तु बाकी कुल्य
 कँट्य नियन ग्वडु तलय फुटरिथ । हनुमान जियस प्यठ आव ब्रह्मअस्त्र
 सुत्य प्रहार करनु । अमि अस्त्रुक मान थवनु खॉतरु प्यव हनुमान जी
 पथुर तु पँहरुदरव रोट सु तु कोरुख रज़व सुत्य बंद । अमि पतु दितुहोस
 लचि नार । पनुनि दिव्य बलु ओन तॅम्य रज़न चार तु छुनिन रावणुन्य
 स्वन लंका लचि सुत्य जॉलिथ । यि रुन्न शेछ वॅन्य हनुमान जियन राम
 जियस । त्यूत कँरिथ सूज़ राम जियन बॉली सुंद पोथुर अंङ्गद रावणस
 निश तु कोरनस ज़ारुपार जंग टालनु बापथ । रावणन मानिनु ज़ु कथु तु
 ऑखरस बनोव राम जियन सुम सोथ वानर सेनायि हुंदि सहयोग सुत्य ।
 राम जी सुंद नाव ल्यूखुक कन्यन प्यठ यिम नु समुन्दरस मंज़ फचि
 कँह तु गव अख सोथ तैयार । यिथु पॉठ्य तॅर्य तिम सॉरी समन्दरु

अपोर लंकायि मंज तु गव जंग शोरू । ग्वडुन्यथ मोर लक्ष्मण जियन
 रावणुन बोय कौंबकरुण । अमि पतु बोथ मेघनाथ माँदानस मंज येम्य
 अकी प्रहार लक्ष्मण जी बेहोश न्युव कॅरिथ । तॅम्य त्रौव तिमन प्यठ
 सर्पन हुंद पाश युस पाश गरुड जियन न्युव चॅटिथ । मगर लक्ष्मण
 जियस ओस सर्पु जहरन स्यठाह असर कोरमुत । येमिकिन्य वैद्य जियनिस
 वननस प्यठ हनुमान जियन ओन सु बालुय नखस प्यठ तुलिथ यथ
 मंज संजीवनी बूटी आँस । संजीवनी बूटी सुत्य ओन वैद्य जियन लक्ष्मण
 जी पचि प्यठ वापस फीरिथ । येलि लक्ष्मण जी होशस मंज आव तॅम्य
 कोर बेयि अकि लटि मेघनाथस प्यठ प्रहार तु छुनुन मॉरिथ । रावणन
 छुन्य अथ इंतिकामस मंज राम जियिन्य सेना हदु रोस मॉरिथ । आँखर
 तस कोबू करनु बापथ दियुत विभीशन जियन राम जियस कुन इशाए
 जि रावनुनिस तूनिस अन्दर छु अमृत योद तथ तीर यियि लायिनु तेली
 प्रावि सु मूक्ष्य । राम जियन कोर तिय तु अमृतस छलु गछनु सुत्य कोर
 बाकयव तस प्रहार योतान्य सु मूद । यितु गछि बन्दुनव म्वकलनु बापथ
 आँस्य कॅर्यमित्य रावणन स्यठाह तफ ताकि सु गोछ राम जियनि
 दॅस्य मारनु युन, युथ सु प्राविहे मूक्ष्य ।

रावणुन्य मरनु पतु आव लंकायि हुंद राज पाठ विभीषन जियस
 सुर्पुद करनु । आँगी परीक्षा दिथ आयि सीता राम जियनि दॅस्य स्वीकारनु ।
 पोशि वेमानस मंज आयि अयोध्यायि च्वदहायि वॅहुर्य सॉरी वापस ।
 राम जियन कोर अयोध्यायि मंज तमि इमानदॉरी, पजियॉरी तु लोलु
 सुत्य राज युस थेकुवुन रूद । येत्यन ति आँस्य शांती हुंद वातावरन
 अनुभव करान छि असि छु ज़ेवि नीरिथ चलान जि 'जन ति छु रामुन
 राज ।' जिन्दगी छि रण भूमी योद आँस्य पनुनि जिन्दगी मंज आमुत्य

वेग्न, दोख तु वौतलबुज्यन हुंद पाश पनुनि बोदि बल तु होसल सुत्य
 चॅटिथ हैकव, असि गछि संसॉर्य व्यवहार सेद, येमि सुत्य असि दयि
 वतु पानय गछन साफ। राम जियन ओस अमिय खॉतरु अवतार
 दोरमुत ताकि असि लुकन बापथ बनि अख मिसाल जि असि कोताह
 छु येमि संसॉर्य चालुन। राम जी ओस विष्णु भगवानु सुंद अवतार।
 तस ऑस जन्म जन्मांतरन हुंज शोछ पानस खबर, मगर चोर लॉगिथ
 चोलुन सोरुय तु पनुनि यूग बलु थॉवुन संसॉर्य लुकन हुंदि बापथ यि
 अख मिसाल। अमी छि अँस्य राम जियुन वोहरवोद बडि शोकु सान
 मनावान ताकि असि गछि नु यि ज़ांह मँशिथ जि असि ति छु असुंघन
 नखशि कदमन प्यठ पकुन तु पनुन जन्म स्वफल बनावुन।



शिवा भगवती अकिनगाम

चक्रस्वामि समीपे च दृष्ट्वा देवी हारङ्गाम्।

सर्व पापविनर्मुक्तो रूद्र लोकमवचाप्नुयात् ॥

चक्रस्वामियस नज़दीक्य

छि दीवी शिवजी सुंद अंग या
 अर्धशरीर यस कुन वुछ्थिय सारिवुय
 पापव निश मनुश म्वकुलिथ छु रूद्र
 लूक प्रावान। अँस्य मानव यि छि
 पानु शिवा भगवती यस अकिनगामि
 छि वास करान। नीलमत पुराण
 1054 शलूक अनुसार वनान जि



चक्रस्वामी यस चाका नदी नावु किन्य छिन अँस्य ज्ञानान, द्रायि अण्डकार
फुटिथ श्री विष्णु भगवाननि चक्र चलावनु सुत्य येमिकिन्य यि चाका या
चक्रनदी तु देव नदी नावव जगि महशूर सपुज। अँथ्य क्वलि बैठिस
प्यठ छु पेत्रन श्राद हावनु यिवान। अथ छु पानु कश्यप रेशुन वरदान जि
यस ति अति श्राद हावनु यियि सु प्रावि मूक्ष।

चक्रस्वामियस नँजदीकुय छि शिव सुंद अर्धशरीर यथ
अकिन्युवगाम आँस्य वनान। दपान येलि अतिच अँकिस परमयूगनी
येमि संसॉर्य नेरनुच विज्र वॉच पनुन्यव प्वनि कर्मव सुत्य तोर तँम्य
सोरुय गाम पानस सुत्य अपोर, याने प्रोवुख सारिवुय मूक्ष। वारु वारु
हेतुख अथ गामस अकिनगोम वनुन। दन्तकथायि अनुसार येलि माता
सती अँग्नस मंज पान हुम, शंकर जियं सपुद स्यठा कूदी, तँम्य कोड
यि अडदौद शरीर दशिप्रज्ञापतनि यगि मंज तु ख्वनि मंज थँविथ हेतुन
सॉरिसुय संसारस अगोरी रूप फेरुन। येत्यन येत्यन तसुंघ शरीरुक्
अंग प्यव, तत्यन तत्यन बन्योव मातायि हुंद अस्थापन। अति छि
शिवा भगवती रूप माता पार्वती पानय व्यराजमान। अँमिस छु अथ
रूपस मंज अमि दोह वोहरवोद आसान। अँमिस छि अति शिला रूप
पूजा करान। अँस्य आँस्य कशीरि मंज अमि दोह सुब्हन श्रोचि श्रानि
तँहर बनॉविथ माजि तहरि चोट अर्पन करान यथ प्यठ कनि बाजॉब्यतु
शिशानोर ओस आसान तु माजि बोग दिथ पूजा अर्चनायि पतु आँस्य
पानु ति यि चरवन तँहर नँवीद रूप ग्रहन करान। अमि दोह आँस्य
अति स्वंदर दिवय लगान तु लुख आँस्य वोसि द्रोसि मंज नीरिथ पतु
अच्छबल बागस मंज बाग छावनि गछान। मॉज्य थविन स्व कृपा असि
प्यठ बरकार तु लगिन सेदि बुथि तार येमि संसॉर्य।

नीलमत पुराण 674 अनुसार गछि यि द्वह भेंद्रकॉली मातायि हुंघ नॉव्य दरनु युन। मातायि हुंज पूजा गछि मुशिकदार पोशव, अँतुरि, तोमलु, दालु अर्पन कॅरिथ करनु यिन्य। मॉज्य भेंद्रकॉली यस दिवताहन प्यठ छि राज करान, गछि वॅरयिचन सारिनुय नवमन पूजा कॅरिथ दनु, दॉन्य सम्पन थवनस मंज पानय पनुन सहायक बनुन।



कामदा एकादशी

नवरेह तु नव दुर्गायि पतु चित्र जूनपछ कौश्य छि कामदा एकादशी सारेय कामनायि पूर करन वाजेन्य काह माननु यिवान। अमि दोह छि कृष्ण भगवान सुंज पूजा करनु यिवान। राजु युदिष्ठरनिस प्रछुनस प्यठ वॅन्य यिथु पौठ्य श्री कृष्णन तस अमि कौश्य हुंज कथ : “तनु गव स्यठाह काल जि रत्नपुर नॅगरस मंज ओस डेगिज्यल अख राजि राज करान। येमिस नाव ओस राजु पुण्डरीक। तथ नॅगरस मंज ऑस्य किन्नर, गर्न्धब तु अफसरायि रोजान। तिमन मंज ओस ललित तु ललित नाव वॉल्य जु बाँच ति रोजान। तिमन ऑस पानुवन्य स्यठाह माय। अकि दोह ओस राजस ब्रौहकनि ललित गेवान तु सॉरी ऑस्य मस्ती मंज तसुंदिस गेवनस दाद दिवान। गेवान गेवान आव अमिस पनुनि त्रयि ललितायि हुंघ ध्यान येमि सुत्य गेवनुक सुर तु ताल बिगरोव। तमि सुंदि मनुक हाल जौनिथ वोन कारकोट नाव नागन राजस निश सुर बेगुर गछनुक कारण। राजु पुण्डरीक गव कूदी तु दियुतनस राख्यस यूनी मंज गछनुक शाप।

राजु सुंदि शाप कोर अमिय विजि ललित गर्न्धबन वेकराल रूप

धारन। तसुंघ मस्तन हेच पहाडन सुत्य कथु करनि। ओसु किन्य ओस
कीवल नार त्रावान। अमि सुत्य गैयि तसुंज टाँठ त्रय ति स्यठा परेशान।
ललितन ह्योत जंगलु जंगलु फेरुन। ललिता ति ओसुस पतु पतु मन्नि हुंघ
पाँठ्य दवान। पकान पकान वॉच स्व विन्ध्याचल पर्वतस प्यठ श्रंगी रेश्य
सुंदिस आश्रमस मंज। नमस्कार कॅरिथ पुछुस तॅम्य यिनुक कारन। ललितायि
वॅनिस सौरुय दॅलील। रेश्य वोनस चित्र जून पछ काँश्य हुंद व्रत थॅविथ
गछि अमि व्रतुक फल पनुनिस बरथा सुंदि नॉव्य दियुन। योद चु यि करख
सु गछि अख पनुनि शापु निश मुछि, दोयिम गछि यि दोख दूर। ललितायि
दोर काँश्य हुंद यि व्रत पतु बीठ ब्रह्मनन ब्रोंठकनि तु हेचन भगवान श्री
कृष्णन पूजा करुन्य। दासु बावु वोननस जि अमि काँश्य हुंदि व्रतुक फल
गोछ म्यानिस बरथाहस मेलुन। येमि सुत्य सु गछिहे राक्षस यूनी निशि
आजाद तु अँस्य करहाव बेयि प्रॉन्य पाँठ्य लोलु मायि हुंद व्यवहार। अमि
सुंज द्रडता वुछिथ मॉन्य तसुंज विनती श्री कृष्णन। ललित आव बेयि
गर्भव रूपस मंज स्वनु ज़ेवरव सँजिथ हेतुन पनुनि त्रयि सुत्य ख्वश
ख्वशहाल पाँठ्य रोजुन।



हनुमान जयन्ती

अकि दन्त कथायि अनुसार ओस श्रंगी रेश्य अख महान तपस्वी
यसुंजि त्रयि शान्ता ओस नाव। सुमेर नगरी हुंद माहराज केसरी सुंद
पथुर ओस हनुमान येमि सुंद असली बोय राम जी ओस। श्रंगी रेश्य
येलि पुत्र कामेशाटी यॅग्य राजु दशरथनि गरि कोर, हवन सपद्योव वेगु
रोस। यॅग्य क्वंडु मंजु द्रायि जु खिर टाँक्य। युस तिमन त्रेशवनी

रानियन दिनुक हुक्म ओस दिन
आमुत। रानी कोशल्यायि तुल
खिर टोक रानी कैकी ति तुल
ब्याख। द्वाशवयव तुज हना हना
तु दिचुख रानी सुमित्रायि ति ख्यन
खॉतरु। दपान येलि कौशल्या
माता खेवान ऑस तमि मंज न्युव



रछा पनुन्यन पंज्यन मंज गाँटि तुलिथ। गाँटि ओस सुमेरू नगरी मँज्य
पनुन सफर तय करुन, तस प्यव सुमेर नगरी हुंदिस शिव लिंग जायि
पनुन्यव पंजव मंज तु प्यव रानी अंजनी हुंघन अथन मंज योस तमि
विजि पोथरु दादि आस शंकर जियस ब्रोंहकनि अथु वेंहरिथ पनुन हचर
व्यछुनावान तु वरदान प्रावनुच कामना करान।

शक्ति रूप वोत खिर अंजनि हुंघन रगन मंज तु तानु तानु
असुंदिस शरीरस मंज, येमिकि प्रबावु अँमिस आव हनुमानजी गर्बस
मंज हेनु तु पनुनिस समयस प्यठ ह्योत हनुमान जियन माजि अंजनी
निश जन्म।

हनुमानजी छु बलशॉली, पराक्रमी, ज्ञानी, मानी येम्य पनुन ज्ञान
सिरयि दीवस निश प्रोव। राम नावुक तफ कोर अँम्य स्यठा। ब्रह्मचॉर्य
आसिथ ओस यि मक्कर ध्वज सुंद मोल। यि लोग अँमिस तेलि पता येलि
राम जी तु लक्ष्मन जी आयि पाताल लूकस मंज महिरावनुन्य दँस्य मारनु
खॉतरु अननु। तिम तमि जालु निशि बचावनु खॉतरु येलि हनुमान जी
पाताल लूक वोत, तति ओस तत्युक पँहरदार, येम्य सु अन्दर गछनु निश
रुकोव। राम जियुन नाव ह्यथ पुछ हनुमान जियन तस नाव तु वँनिनस

पहचान पनुन्य दिनु खॉतर। पहचान दिवान वौननस पॅहरदरन “बु छुस पराक्रमी हनुमान जियुन पोथुर तु नाव छुम मक्कर ध्वज।” पनुन्य पहचान दिवान वौनुस हनुमान जियन “बुय छुस हनुमान, राजु केसरी तु अंजिनी हुंद पोथुर। बु छुस ब्रह्मचॉर्य, चोन ज्योन कति छु सम्बव।” मक्कर ध्वजन वौनुस जवाबस मंज “येलि तोह्य ऑसिवु लंका जॉलिथ वापस यिवान, तुहुंद ऑरकु प्योर कोर म्यानि माजि मक्करन गर्बस मंज दारन, योस असली ऑस स्वर्गच अफसरा। युथुय बु ज़ास, स्व आयि असली रूपस मंज तु बु त्रौवनस पाताल लूकस मंज। आश्चर्य छु यि पॉचन दोहन मंज गोस बु त्यूत बोड युथ ज़न राजि महिरावनन लोगुस बु पाताल लूकस मंज पॅहरदार।” यि वॅनिथ प्यव हनुमान जियस परन तु नालु रॅटिथ दियुतनस तॅम्य ऑर्शिवाद।

चित्र जूनपछ पुनिम छु हनुमान जियुन वोहरवोद मनावन यिवान। अमि दोह छि लुख मन्दरन मंज हनुमान जियस ग्वडु दोद तु पानि सुत्य श्रान करान पतु छिस सेंद्र पानस मथान। दपान अमि सुत्य छु हनुमान जिय ख्वश गछान तु सानि कामनायि पूर करान। दपान अकि दोह ऑस सीता माता पनुनि सुमि सेन्द्र त्रावान। हनुमान जियन पुछनस ज़ि यि कमि बापथ छख सुमि त्रावान। मातायि बेहनोवुस ज़ेहनस मंज ज़ि अमि सुत्य छु श्री रामस आय हुरान। तॅम्य तुल सोरुय सेन्द्रि बानु तु छुनुन पनुनिस पानस हेर प्यठु बोन तॉन्य फिरिथ। ताकि श्री रामस हुरि स्यठाह ज़्यादु वाँस। दपान युस ति हनुमानस अमि दोह सेन्द्र मथि, तस छि वेग्न दूर गछिथ यछायि पूर सपदान।

अमि सुंदि वोहरवादि दोह गव रामजियुन अश्वमेध यज्ञ सम्पन तु राज फॅहलिथ ह्योत तॅम्य अयोध्यायि प्यठ राज करुन।

बैसाँखी

वहिकुन रथ छु सारिनुय
लुकन हुंद खुशी हुंद मोसम।
बैसाखी हुंद तेवहार छु बहारुच नॅव
शोरूवात माननु यिवान। अमी दोह
प्यठ छु ब्याँल्यकुक अँद्य पँख्य



कू कू आवाज़ि सुत्य असि बेदार करान तु वनान 'बहार' आव। अमि
वैरियिच बहारुच शोरूवात छि अमी दोह प्यठ पनुनि पनुनि मतु अनुसार
लुख मानान। येलि ब्याँल्य कुक बोलान ओस, कँशीरि मंज ओस्य
अँस्य वनान ज़ि यि छु वनान छको छको चूँकि नोव ब्योल छु अमि पतु
ववनु यिवान तमिकिन्य ओस यि ख्वश यिवुन परिन्दु माननु यिवान।
अँमी छि अँमिस मोसमु बहारुख खबरी परिन्दु ति वनान। अमि दोह छि
लुख तिलुग्वगुल या कुनकु फसल ग्वडनुचि लटि लोनान।

भगवात गीता परन वॉल्य हेकन वहिकुन थज़र गीतायि हुंदि
येमि शलूक सुत्य मीनिथ :

बृहत्साम तथा साम्नां गायत्री छन्दसामहम्।

मासानां मार्गशीर्षोऽहमृतूनां कुसुमाकरः॥३५॥

सामवीद रेच़ायन मंज ब्रहत्साम बुय।

छन्दन मंज गायत्री छन्द छुस बुय॥

छुस रयतन मंज मंजहोर रयथ ज़ान बुय।

कालन मंज छुस सोतकाल बुय॥

1699 मंज त्रॉव दँहिम सिख गुरु श्री गुरु गोविंद सिंह जियन

खालसा या सिख पंथच बुन्याद अमी दोह। पंच प्यारे या पनून्य पाँछ
 टाँठ्य ति चौर्य अमी दोह यिमव। पाँचव सादन हुंजि मेहनथ तु
 इमानदाराना यत्तु सुत्य आयि हेंद्यव मंजु स्यठा लुख तु पानिरोवुख
 सिख दर्म। हर वॅरियि छि डेरा संत नंगाली साहब, युस पुंछ शहरस
 निश चोर किलोमीटर दूर छु, बैसॉखी हुंद पर्व मनावनु यिवान। अँम्य
 अस्थापनन छु जोम तु कॅशीरि मंज सिख दर्म फॅहलावनस मंज स्यठाह
 योगदान दियुतमुत। तमिय छि येमि रियासॅन्न हेंद्यव सिखव अलावु
 बाकय दर्मन हेंद्य लुख ति यि दोह तोत मनावनि गछान। हेंद्य, मुस्लमान
 तु सिख पनुनि मकदूर मुताँबिक श्रदायि नियाज अति त्रावान। अखण्ड
 पाठ पतु शब्द कीतन अरदास बोग तु लंगर कार्यक्रम छि सिलसिलुवार
 आसान। यि दर्मुक कार्यक्रम छु मेलु रूप अति मनावनु यिवान। तिव्याजि
 सासु बॅद्य यात्री हेंद्य मुस्लमान छि अथ मेलस मंज शमूलियथ कॅरिथ
 आशीवाद प्रावान। अथ अस्थापनस प्यठ छि अमि दोह दुकान यिवान
 सजावनु, यथ मंज वानु थडन प्यठ ख्यन च्यनुक इतिजाम छु सस्तु
 न्यरकन प्यठ आसान। खेलु छि यिवान अति गिंदनु। 'गटका द वार
 गैम' छु अख दिलकश नज़ारु अमि मेलुक। यथ मंज पनुनि दर्मुक तु
 कौमु अनुसार छि हतु बॅद्य सिख नंगु तलवारव तलवार बाँजी कॅरिथ
 लुकन ब्रोंहकनि पनून्य कॉबलियथ हावान।

हेंद्य छि अथ दोहस ग्वडुनिकि मोसमुक ग्वडुन्युक दोह मॉनिथ
 बडु जोशि सान मनावान। गुजिर्य, पंजाँब्य ति छि यि दोह खुशीसान
 मनावान। यथ सम्सारस मंज जन्म हेथ छु अख मनुश पनुनिस पानस
 चिह्य चिह्य साम हेवान ताकि तसुंद वेवहार हैकि सेद सपदिथ। सु छु
 ग्वडु दयि सुंद बजर ग्यवान, पतु व्यनथ तु व्वपासनायि किन्य दयस

ख्वश करुनच सामरथ पानस मंज पौंदु करान । सु छु पनुनि व्वथु बेठि
तु वेवहारु सम्सार्य रूप बागस पोश फोलुरावान ।

दपान अमी दोह छि अँड्य लुख भगवानस शुकुर करान जि
पँत्यमि वँरियुक फसल दिथु ठीक पौँड्य ख्यनु तु येति योर ति दि
सौनिस फसलस ग्रख तु असि थव वारवति । वहकुनिस रेतस मंज छि
कुल्यन फुलय, थेर्यन पोश, बागस सब्जी, डारन कुनख तु खलन
तिलुगोगल फुलय बरजस्तु फँलिथ आसान आमुत्र । यपौर्य नज़र
त्रावव तपौर्य छु दिल इतिहाँयी खुशी मेहसूस कँरिथ व्वटु तुलान तु
व्वकुवचि चरि पोप करान । असि पजि अमि दोह तँहिया करुन जि
पानुवन्य दिलन मंज नफरत तु हस्दुक्य कुल्य चँटुन्य तु तथ जायि
मायि तु मोहब्बतुक्य कुल्य व्ववन्य ताकि तुहँदिस दिलुकिस बागस ति
फोलन गुल जल्दुय । यिथु पौँड्य अँकिस इंसानस छि जिन्दगी मंज
चोर हेरुपौँव्य खसुन्य मसलन त्वकुचारुक्य पुँचुह वँरी, जवौनी हुँद्य
पुँचुह वँरी, वान प्रसथुक्य पुँचुह वँरी तु आँखरस सँन्ययास आश्रम
यिवान, तिथुय पौँड्य छि अँकिस वँरियस मंज त्रेन त्रेन रेतन हुँद अख
अख मोसम चोरन हिसन मंज दयन बौँगरिथ थौँव्यमुत्य । यथ मंज
अँस्य छि वुछान जि हरदु छु कुल्यन पनु पथुर पेयथ ज़न कुल्य म्वरदु
बासान । वहिकुनि रेयतु कुल्यन बेयि बामुन वुछिथ छु असि समजस
मंज यिवान जि इंसान छु मरनु खौँतरु ज़न्म हेवान । असि पजि अमि
परिवर्तनु निश हेछुन जि यि प्रकृथ छि सौर्य दय पानय पकुनावान,
सोन अथु छुन अथ मंज किहीं । यि सु येछि ति छु सम्सार्य सपदान ।



वरुथनी एकादशी या काह

वहिकु गटु पछ एकादशी छि स्यठा पोन्त्य फल दिनु वाजेन्य तु सोबाग्य दिनु वाजेन्य माननु यिवान । येथ वरुथनी एकादशी छि वनान । अमि कौश्य हुंद व्रत दरनु सुत्य छु भगवान मधसूदन स्यठा ख्वश सपदान । येमिकिन्य सु रुत बोग छु सोज्ञान । राजु युदिष्ठरनिस प्रछुनस प्यठ कॅर श्री कृष्णन अमि कौश्य मुतलख येमि अन्दाजु पन्य कथ शोरू जि : “शास्त्रन मंज छि वनान हॅस्य दान, गुर्य दान, तेलु दान, सौनु दान ख्वतु छु अन्न दान श्रष्ठ माननु यिवान । अन्न दान सुत्य छि दिवता पेतुर तु मनुश त्रेश्वय त्रप्त सपदान । अमि दोह गछि व्रत थॅविथ अन्न दान करुन युस कन्यादानस बराबर छु माननु यिवान । वरुथनी एकादशी हुंदि व्रत थवनु सुत्य छु अन्नदान तु कन्यादान दोशवनी हुंद बराबर फल मेलान । यिम कोरि हुंद धन छि खर्चावान तिम लुख छि प्रलयि कालस तान्य नर्कस मंज वास करान । मगर युस लोलु मायि धनु सान कन्यादान छु करा । तिहुंद पोन्त्य फल लेखनस मंज छु चित्रगुप्त ति अर्समथ आसान । सारिवय पापव मुछि गॅछिथ छु कन्यादानुक फल ति अमि व्रत थवनु सुत्य मेलान ।



परशुरामुन ज़ा द्वह या जयन्ती

संस्कृतस मंज गव परशु 'मकुत्र', राम छु विष्णु भगवान सुंद अवतार । परशुराम छु विष्णु भगवान सुंद शेयिम अवतार यस अथस

कथ छि हमेशि मकुच आसान। अथ रूपस मंज छु यि दीव अमर।
 शास्त्र छि वनान जि परशुराम छु वुन्यक्यन ति महेन्द्रागिरी वनन मंज
 तपस्या करान। सौरिसुय भारतस मंज छि परशुराम जियिन्य मन्दर।
 अमिसुंद वुहरवोद छु द्रुसतिस भारतस मंज हज तु हावसु मनावनु
 यिवान। शास्त्रन पयुर दिवान छि
 अमिसुंद बजर तु कर्म व्यछुनावनु
 आमुत। युहुंद ज़ा द्वह छु वहिकु
 जूनपछि दौयि द्वह मनावनु यिवान।
 अमिय द्वह पगाह छि अक्षय त्रितिया
 ति आसान, योद अमिसुंद ज़ा द्वह
 पूजायि अर्चनायि सुत्य तु व्रत दैरिथ
 मनावनु यियि, तस छि सौरी अर्मान
 येमि संसौर्य नेरान, बैयि छुस दय
 पोत्रु स्वख ति नैसीबस लेखान।
 मान्यता छि अमि द्वह कमाविमित्य
 प्वन्य छिनु ज़ांह नाशस गछान। तिम
 छि मनशस सौरिसुय वौंसि पोशान।



पुरानन मंज छु लीखिथ जि तमि विजि ओस आसन राजन तु
 विभिन्न ज़ाँचन पानुवन्य जंग हर पेंहर जौरी। श्री परशुराम जी ओस्य
 'हयहाया' राजस मंज रोज़ान। यि राजु ओस नर्मदा नदि बैठिस प्यठ
 महेश्वर नावु राजदानि मंज वाका। यवगु यवगु चलुवन जंग ओस
 क्षेत्रिय 'हयहाया' ज़ाँचन ब्रह्मनन तु बारगव ज़ाँचन पानुवन्य तमिविजि
 ति जौरी येति परशुराम जी ओस रोज़ान। महाभारतुचि लडायि मंज

ओस मुजूद परशुराम बहिसति मुशीर कर्णस, भीषमस तु द्रोणस।
 यिहुंद सु ग्वर ति छु। यिम छि भारद्वाज गुथुरक्य क्वलु ब्रह्मन। पनुन
 ग्वर ओस अँमिस भगवान शिव। पुराणव अनुसार छु अकि द्वह परशुराम
 हीमाल पर्वतस प्यठ शिव जियस मेलनि गछान। येलि तोतन वोत
 ततिकु द्वारपाल ओस तमि विजि श्री गणेश। तँम्य येलि नु अन्दर
 अचन दियतुस, अँम्य तुज मकच लु कोरनस प्रहार। चूँकि गणेश जी
 ओस जॉनिथ जि मकच छि तँमिस म्यानिय बबन याने शिव जियन
 दिचमुच तम्युक मान थवनु खॉतरु दियुतनस पनुनिस खोवरिस दन्दस
 प्यठ प्रहार करनु। येमि सुत्य दन्द आव फुटिथ। अथ प्यठ सपुज माता
 पार्वती स्यठा क्रूधी, तँम्य कोर तहिया जि परशुरामस यिन नरि चटनु।
 माजि दोर दुर्गा रूप तु हेतुन तस प्रहार करुन। अँथ्य चिहिस मंज आव
 तोतन शिव जी तु अमि कथि करुन पार्वती शाँत जि परशुराम छु तस
 पनुन पोथुर। परशुराम प्यव माजि ख्वरन तल तु हेचुनस माँफी। गणेश
 जियन कॅर्य यिथिस हिविस जंगजू महात्मा सुंदर तॉरीफ, यथ प्यठ
 परशुरामन दिचस पनुन्य यिहय मकच तोफु रूप आर्शिवाद। अमि पतु
 आव गणेश जियस 'एकदन्त' वननु। अत्यन अथ मोकस प्यठ गॅयि
 माँज्य सरस्वती ति पाँदु, तँम्य दियुत गणेश जियस वरदान जि अजिकि
 प्यठु यियि हर पूजायि ग्वडुन्यथ चोन नाव हेनु। यथ शंकर जियन ति
 आंकार कोर। चानि पूजायि रोस यिन कारन मंज लुकन येमि संसॉर्य
 वेगन। अमिकिन्य छु अँमिस विग्नहर्ता ति नाव। पूजायि मंज ग्वडुन्यथ
 अँमिसुंद नाव हेनु सुत्य छु कारन वेग्न रोस तार लगान।

अकि द्वह उकसोव भगवान शंकरन परशुराम लडायि खॉतरु
 ताकि सु हेयिहे तसंजि हुनरि हुंज परीक्षा। यि जंग रूद 21 वुहन द्वहन

तान्य जॉरी। शिव जियनि त्रिशूलकि प्रहार निशि बचनु खाँतर तुज परशुरामन मकुच तु लायिन शिवजियस डेकस प्यठ। ज़ख्म थोव तँम्य उपचार रोस ताकि परशुरामुन्य जंगजू साद आसनुचि रोज़ि कथा। शिव जियस ओस यि बख्त स्यठाह टोठ, तमिकिन्य छु तस सासव नावव मंज़ अख नाव 'खण्ड परशुराम' ति।

महाभारतस मंज़ छु यि दर्ज जि हयहाया राजुक राज़ 'कर्ताविरया' गव जमदग्नि साद सुंदिस आश्रमस मंज़ अकि द्वह। जमदग्नि ओस परशुरामुन मोल। परशुराम ओस नु अति केह। सप्त रेश्य सादन अँनिस नाना प्रकार्य बूजन ब्रौहकुन। राज़ सुंदिस प्रछनस प्यठ जि यीतिस कम समयस मंज़ कति अनिथ चे यिथ्य भूजन। रेश्य होवुस कामदेनु वोछ, युस तमिस इन्द्र दीवन छु दियुतमुत पनुनिस ग्वरस प्रसन्न करनु खातर। चूँकि राज़ ओस लालची, तँम्य न्यूस चूरि यि वोछ। येलि परशुराम गुरु वोत, तँम्य बूज यि सौरुय कहानी तु द्राव राजस मेलनि। बुछिथुय छुनुन सासु नरेव वोल राज़ मॉरिथ। ग्वडु चचिनस सास नरि मकचि सुत्य अकि अकि, पतु कोरनस कलु दडु निश ब्योन। वोछ ओनुन पानस सुत्य वापस। यि वोछ बुछिथ गँयि बब तु रेश्य ततिक्क्य ख्वश। मगर सुतिय गँयि मकचि प्यठ खून बुछिथ दिलमलूल। बबन दोप परशुरामस चूँकि चॉन्य अथु आयि खून सुत्य रंगनु, चु गछ व्वन्य धर्म जायन प्यठ तफ सादनि। सुतिय दोपनस हेस कॅरिजि राज़ कर्ताविरया सुंद्य शुर्य यिनय मॉल्य सुंद बदलु हेनि। परशुरामन मॉन्य ऑग्यन्या बबु सुंज तु द्राव धर्म स्थलन हुंज यात्रा करनि। अँथ्य मंज़ आयि कर्ताविरया सुंद्य शुर्य आश्रमस मंज़ तु छुनुख जमदग्नि कल्ल कॅरिथ तु कलु न्यूहस पानस सुत्य। येलि परशुराम

गरु वापस आव, तॅम्य बूज यि सोरुय हाल रेशिस निश। सु द्राव जल्दुय तु छुनिन सारी राजु पोथुर मॉरिथ तु बबु सुंद कलु वापस अँनिथ कोरनस अँतिम संस्कार। अँमिस राजु सुंदिस ब्योल गालनस प्यठ गव इन्द्रदीव स्यठाह ख्वश तिक्याजि राजन ऑस पनुन्य प्रज्ञा स्यठा तंग अँनिमुच। परशुरामस प्यठ प्रसन्न सपुदिथ दियुत इन्द्रदीवन तस पनुन धनुष 'विजया' बतोरि तोफु। राजु सुंद फोज छुनुन सोरुय तीरव सुत्य नेस्त नाबूद कॅरिथ। प्रज्ञा सपुज स्यठा प्रसन्न राजु रूप शेतान गालनस प्यठ। अमिपतु छुन्य तॅम्य अमि दनुशि सुत्य अकवुहि फिरि क्षेत्रय रूप राख्यस मॉरिथ। अमिपतु दियुत श्री परशुरामन यि दनुष सूर्य पोथुर दानवीर कर्णस तसंजि बख्ती प्यठ प्रसन्न सपुदिथ। कुरुख्यत्रस मंज कोर यहोय 'वैजया' धनुश कर्णन इस्तेमाल, येमि सुत्य सु अजय रूद।



अछ्यन त्रय

अमि दोह छि वुशकु व्वपदेव मुचु धरती प्यठ। अमि वहिकु जून पछ त्रेयि दोह छि गंगा जी ब्रह्मलूक प्यठ दरती प्यठ वालनु आमच। अमि वहिकु जूनपछ त्रय छि वुशकु सुत्य विष्णु भगवानस तु गंगा जी सिन्धु नदि प्यठ पूजा करनु यिवान। अँस्य छि पूजायि किन्य गंगायि हुंघ हीतु विष्णु भगवानस शुक्रिया करान तु छिस पानस किच ओही मंगान। जेमिस मंज छि आम लुख अमि दोह स्वन सुंद जेवर जनानन हुंघ खौतरँ अनुन रुत शोगुन मानान।

अँस्य कौशिर्य छि अथ द्वहस अछिन त्रेय वनान। अमि द्वह

ऑस कूठ्येर नागस प्यठ दिवय लगान। यि नाग छु अच्छबल (अनन्तनाग) प्यठ तकरीबन डोड मील दूर कूठ्येर गामस मंज प्यवान। अथ कूठ्येर नागस अँकिस कूनस मंज छु अख बोड बारु ब्रमिजि कुल युस 1976 ई० मंज ओस अकिय अंदु प्योमुत। तम्युक ग्वड ओस ज़मीनि कुन जूरिथ तु लंजि आसस नागस मंज पेमचु। अज छि दपान, सु छुख पूर पॉठ्य चँटिथुय न्यूमुत। मगर नाग छु तिथुय शूभवुन तु लूबवुन। माजि दुर्गायि हुंज थापना ऑस कूठ्येर प्रखुट। अतिक्य मुस्लमान ति ऑस्य अम्युक आसुन मानान ति तु थ्यकुनावान ति। अथ नागस मंज ऑस्य अमि द्वह यात्री श्रान करान, पतु पोश तु द्वद बॉविथ पूजा करान।

रावनस प्यठ कुपित सपदिथ येलि मॉज पार्वती हनुमान जियनिस नखस प्यठ 365 नाग हेथ लंकायि प्यठ कशीरि वापस आयि, तिहुंदि सफरुकि प्रथ कुनि थकुपेजि प्यठ बन्योव अख नाग। यथ मंजस अख अख नाग ति मातायि हुंदि ऑग्यन्यायि अनुसार त्रावनु आव, तमि पतु आयि यिम ल्वकुट्य नाग दीवीबलन मंज गंजरनु, यथ मंज साक्षात पानु माता छि दुर्गा रूप व्यराजमान। अथ परिसरस मंज ऑस अख धर्मसाल ति यथ मंज साद संत तु यात्री ऑस्य बेफ्रोक बेहान।



नारद काह डुमटुबल यात्रा

वहिकु ज़ूनपछ काह छि नारद काह मनावनु यिवान। हागंगोंड प्यठ ऑस्य अँस्य 1990 तस तान्य पैदल ग्वडु 'नोर' गामस मंज वांतान, युस स्वाद किलोमीटर ओस हागंगोंड प्यठ दूर। नोर गामस

गछान ओस वति प्यठ दँछनि तरफु अख स्वंदर नाग यिवान, यथ 'नाराननाग' ओस्य वनान। ओत वॉतिथ वोतुनार बोनकुन ओस सेठहान क्वलन हुंद संगम, योत वॉतिथ बेयि श्रान करुन ओस पेवान, येमि सुत्य यात्रा स्वफल माननु ओस यिवान। अमि पतु ओस्य बेयि मील डोड़ा पकान तु ओस्य डुमटुबल वातान, येति अमिद्वह दिवय ओस लगान। अति ओस अख ओलीशान मन्दर, येति नारायण सुंज मूर्ती सुत्य बेयि ति दीवी दिवताहन हुंज मूर्ती ओसु वेराजमान, यिमन अति यात्री पूजा ओस्य करान। अथ डुमटुबल मन्दरस मंज ओस सिरयि नाथ ब्रह्मन सुब शाम पूजा करान। अमिस ओस अतिय गरु ति। यि ओस कुन बटु गरु तथ डुमटुबलस मंज। मगर 1990 तौन्य नु ओस खोचुन खोरुन तु नु ओस काँसि हुंद मुनुन दलुन। हांगलगोंड प्यठ तकरीबन डाय मील पैदल पँकिथ ओस्य ग्वड नाराननाग पतु संगम तु ओखरस प्यठ डुमटुबल वॉतिथ साक्षात जन नारायणस सुत्य यात्री कथु करान। तिथुय ओस वेशवास तु तिछय ओस श्रदा। श्री मूतीलाल हांगलुन्य वननु अनुसार येलि ति नाराननाग प्यठय संगम हेथ डुमटुबलस तौन्य कुनि ति जायि जमीन खनुहाव, तति ओस भगवान सुंघन मुख्तलिफ रूपन हुंज मूर्ती नेरान। अज छि क्वकर नाग प्यठ वेरनाग तान्य पकु सडकु बनेमुचु। येथ प्यठ बस सीवा तु बाकी सादनन हुंद आमदरफत छु आम। यस जमीन संग नाराननाग तु डुमटुबलुच छि, स्व छि हना सरकार सुंदि दँस्य, हना एकन हुंद दँस्य वोंचन आमच तु केंछा छि श्री सिरी नाथ ब्रह्मनु सुंघन शुर्यन अथि आमच। दय बूजिन असि रूजिन स्व श्रदा बरकरार ताकि तथ स्वकालस रोजव अमि द्वह हमेशि याद करान या फियुर दिवान।

गणिशि चोदाह

गणेश जियन छु भौद्र जूनपछि चोरम जन्म ह्योतमुत । मगर प्रथ रेतु छि अँस्य अमि सुंजि वेरि पूरय तु लँड्य करान । प्राँपिन हौविथ छि हखन हमसायन तु रिशतुदारन नवीद सूजिथ पानस ति नवीद करान । यि द्वह छु खासकर गणपतयार श्रीनगर मनावनु यिवान । केंचन हुंद वनुन छु जि अँकिस धर्मात्मा ज्ञानियस आव श्री गणेशजी स्वपनस मंज तु दोपनस बु छुसय वेथि मंज मे खार तु तमि मंज । तँम्य वँन्य यि शेछ बाक्यन लूकन तु खौरख मूर्ती तु कँरुख मन्दरस मंज स्थापित । तनु प्यठु छु अति अमि द्वह बडि बौड हवन करनु यिवान । मे छु बासान जि वहिकु जूनपछ चोदुश्य द्वह आसि गणेश जियनिस अथ मन्दरस याने गणपतयार श्रीनगरस मंज थव लोगमुत, तमि किन्य छि कँशीरि हुंघ साँरी लुख यि द्वह बडि चमुखमु मनावान । अमि अलावु छि हानन्द चवलगामुक्य लुख तु बेयि ति केंचन गामन हुंघ लुख जेमि गणेश मन्दरन मंज अमि दोह हवन करान ।



नारद जयन्ती तु बुद्ध पूर्णिमा

कपिलवस्तु लोम्बनी गामस मंज ओस राजु शुद्धोदन राज करान । तस निश ह्योत शाहजाद सिर्दथिन जन्म । अठोवुहन वँरियन रूद यि शुर पनुनि राज पादुक ऐशवर्य बूगनस सुत्य सुत्य अन्दुरी दय लोलस ल्वलु खोल करान । अठोवुह वुहरुय पतु त्रौव अँम्य पनुन राज पाठ । यि द्राव बोद गयायि येति अँम्य स्यठाह तपस्या कँर । अँकिस

बड कुलिस तल पनुन आसन बनाविथ कॅर अँम्य स्यठाहन वॅरियन
तपस्या, युस 'महाबोधि' वृक्ष नावु छु मशहूर। येमि किन्य अँमिस ज्ञान
तु पजरुच जितिन्य प्राप्त सपदेय। युस तस ज्ञान अति ओस प्राप्त
सपद्योमुत, तम्युक ग्वडुन्युक प्रवचन दियुत अँम्य सारनाथस मंज।

महात्मा बुद्ध ओस पतु अख बोड बारू रूहॉनी ग्वर लुकन हुंद
माननु यिवान। वॅहिकु ज़ूनपछ पुनिम छु अँम्य सुंद ज़ा दोह तु नारद जी
ति छु अमिय दोह ज़ामुत। बेयि अन्तर्ध्यान दोह ति यिथिस हिविस
गाशि च़ाँग्य सुंद माननु यिवान। यिमव त्रॉव्य 80 वहर्य अमिय पुनिम
दोह प्राण येमि दोह यि ज़ामुत ओस। यि दोह छु भारत किहो कुलहम
संसारस मंज बडि जोशि खरोशि सान मनावनु यिवान।

अमि अलावु ति छि बुद धर्म मानन वॉल्य अथ दोहस गौतम
बुदुन न्यरवान दिवस रूप 'जग' मनावान। यिम छि अथ दोहस मंज
पनुनि पानुक मंथन करान ज़ि पॅत्यमि वॅरियि यिम ति मे कमियि
रोज़, तिम गोछुस नु बु यथ वॅरियस बेयि दोहरावुन।



अमि दोह छि बुद्ध धर्मव्य सॉरी मन्दिर सजावन यिवान । जूल
कॅरिथ छि लुख मंत्र रक्षा रूप परान, यिम तॅम्य लुकन ब्रॉहकनि
व्यछुनॉविमच्च आसु । लुकन छु तिहुंघन पांचन नेमन प्यठ वेशवास,
यथ 'पंच शील' छि वनान । यिम नेयम छि यिथु पॉठ्य :

कांह नु मारुन ।

चूर नु करुन्य ।

अपुज नु वनुन ।

शराब या कांह नशि नु करुन ।

बेवफाई नु करुन्य ।

महात्मा बुद्धन दियुत लुकन मंज अथ कथि प्यठ ज़ोर जि
सारिनुय दोखन हुंद कारन छु राग येम्युक त्याग कॅरिथ बूगि मनुशाय
स्वख । यिम छि सानि खाहिशि, यिम अपुज पोज, क्वकार तु चूर
करनॉविथ छि मनुशस पत्यथ करनावान । युस रुति आचार व्यचार,
रुति वोथु बैठि, रुत्य कर्म करि तस मनशस यियि नु वेग्न कांह ति बुथि ।
तसुंद व्यवहार गछि सतुक व्यवहार बैनिथ । सेजर पजर तु श्वजर
युस पनुन्य जिन्दगी गुजारि सु करि शान्ती तु आनन्द अनुबव । यिमव
ग्वनव यियि नु मनुशाय त्रुग्वन मायाजालस मंज ज़ांह ति हेनु, बल्कि
पनुन अंदकार तु ज़ाल चटि सु दय लोलु तु ग्यान कि मेकुराजि सुत्य
पॉन्य पानय । तसुंद मन सपदि श्वद तु श्वद मनु हैकि सु कुलि जहानस
मंज दय सुंद रूप बुछिथ । येमिकिन्य लुकन ति वातुनावि स्वख तु पानु
ति रोज़ि स्वखी ।

सारनाथ बनारसस मंज येत्यन तॅम्य ग्वडुन्युक प्रवचन दियुत
तत्यन बन्योव लगभग 80 फुट थोद स्तूप यथ 'दैनिक स्तूप' छि

वनान। दपान तथ स्तूपस तल बिहिथ युस ति बावु सान पनुन्य इच्छा
 प्रकट करि स्व छि सपदान पूर। यि स्तूप छु लुकन खाँतरु स्यठाह
 अँहम, योस येञ्जिच जाय ति छि माननु यिवान। अथ जायि छि तीच
 महिमा जि जयन्ती दोह छु अख मेलु तिहुंजन मुकदस निशॉनियन हुंद
 लगान। जांकी छि जलूस किस सूरतस मंज लुकन दर्शन बापथ थवनु
 यिवान। अमि दोह छि बुद्ध भगवान सुंघ ब्रह्मचॉर्य भँखुत्य मंदरस मंज
 तसुंज ग्वन कीर्तन करान। तिम छि महात्मा बुद्ध सुंज मुर्ती पूजान तु
 तिहुंद ध्यान कॅरिथ तॅस्य सुत्य लीन गछान। तिम छि अंदरिम अंदकार
 दूर करनु बापथ ग्वडु जूल करान तु पतु अस्तोति प्रार्थना तु व्वापासनायि
 किन्य पनुन मन श्वद तु शान्त करान।

सानि रियासन्न यानि जोम तु कॅशीरि मंज ति छु यि दोह बडु
 श्रदायि सान मनावनु यिवान। खास कर लेह लदाकस मंज छि इकुवटु
 लुख सॅमिथ जलूस रूपस मंज बुद्ध मन्दरन मंज कलु गुहान तु मंत्र
 परान परान तिहुंज शैख्या लुकन तान्य वातनावान। अकुय रौतबु
 सारिनुय जीवन मंज आसनस प्यठ ज़ोर दिथ छु महात्मा बुद्ध हिन्दू धर्म
 सँहल तु अर्थस खाँरिथ सारिनुय हुंद दिल मूहित करान। सारनाथ तु
 बोद्ध गयायि छु त्यूत बोड महिमा येति पूजायि तु अर्चनायि सुत्य छि
 पाप तु शाप निशु मुछि रोज़ान। ऑखरस गॅयि गोतम बुद्ध वहिकु जून
 पॅछ्य पुनिम कुशान गढ़ उत्तर प्रदेशस मंज स्वर्गवास।



ज्येष्ठा भगवँती

ज्येष्ठा दीवी हुंद यज्ञ छि अँस्य ज्येष्ठु गटुपछि पाँचम मातायि हुँदि वुहरवादि द्वह करान। दूर दूर प्यठ छि लुख ओत अमि द्वह प्रशाद करनि यिवान। वैसे छु अथ अस्थापनस प्यठ वहर्य वरियस लुकन हुंद युन गछुन जॉरी आसान।

दिवतहन छु श्री पराशर जी सागर मन्दनु किस सिलसिलस मंज यिथु पाँठ्य तँमिच कथ वनान, युस श्री विष्णु पुरानचि नँवमि अध्यायि हुँदिस ग्वडनुकिस अँशस मंज दर्ज छु।

दीवताहव तु दानवव दँस्य क्षीर समन्दर मंदनु सुत्य द्रायि ग्वडु यज्ञ सामग्री हुंज आश्रय रूपा सुर पूजिता कामधीन। चूँकि भगवान ओस पानु तमि सातु कुर्म रूप दारन कँरिथ अकि तर्फु दीवन तु दानवन सुत्य नागराजस खींचान तु दोयमि अंदु ओसुन पहाड़ अथ सुत्य दबॉविथ थोवमुत। अचानक द्रायि दीवताहव तु दानव हुँद्य ओँसु दँस्य आचर्य बँरिथ सँमिथ आवाज स्वर्गलूकस मंज यि क्याह छु ? यि क्या छु ? यिथु पाँठ्य परेशान सिद्धन ब्रोंहकुन गँयि खुमॉर्य अँछव वारुणी दीवी प्रकट तु तमि पतु बेयि मन्दनु सुत्य गव त्रैयलूकी ख्वशबू दिनुवोल तु सुर सुन्दरियन हुंद आनन्द दायक कल्पवृक्ष ति पाँदु। तमि पतु ति गँयि स्वंदर उदार ग्वनव बँरिथ अप्सरायि तमि मंजु पाँदु पतु चन्द्रम युस महादीवन कोर जटि मंज ग्रहन। युस ज़हर तमि मन्दनु अथि आव सु कोर नागव तु शिव जियन ग्रहन। सागरु मंजु गँयि सफेद पलव लॉगिथ पानु भगवान धन्वन्तरि जी अथस मंज अमृत बँरिथ चोड हेथ प्रकट।

येमि सुत्य सारिवुय मुनियव सान सौरिय दुत तु दानव गण सपुद्य
 प्रसन । दपान सोरुय समन्दर मन्दनु सुत्य यस नकारात्मक शस्त्रिय
 द्रायि स्वय छि वारुणी दीवी रूप तैमिसातु प्रकट सपुजमुज्ज । तमि
 पतु सपुज पवलिमृतिस पम्पोशस प्यठ व्यराजमान शान्त प्रजलवुन्य
 अथन मंज पम्पोश हेथ श्री लक्ष्मी दीवी क्षीर समन्दर मंज प्रकट ।
 गर्न्दवव ह्योत गेवुन तु अप्सरायव ह्योत नचुन । गंगा जी तु बाकुय
 नदि आयि पानय सोनु कलशन मंज जल ह्यथ तु कोरहस पूजायि तु
 श्रदायि श्रान । क्षीर सागर गव तस ब्रौहकनि प्रकट तु दिचनस
 फेलिमुत्यन पम्पोशन हुंज माल तु विश्वकर्माहन लॉगिस अंग अंग
 स्वनु लाल जवाहरव सँजिथ वस तु जेवर । यिथु पौठ्य दिव्य श्रानु
 पतु दिव्य वस्त्र तु जेवरव सँजिथ आयि दिवताहन ब्रौहकनि तु बीठ
 श्री विष्णु भगवानस खोवरि तर्फु । ज्येष्ठा गैयि जिठ चूकि यिति
 द्रायि सागर मन्दनु विज्ज क्षीर सागरु मंजु माता लक्ष्मी ब्रौठ, तमि
 किन्य छिनु यि माता लक्ष्मी हुंज जिठ बैनि मानान ।

पदमु पुरान अनुसार येलि सागर मन्दनु आव तति द्राव ग्वडु
 जहरि हिलाल, युस शिव जियन पानस चौव । येमि पतय ज्येष्ठा
 व्वजुल्य पलव लॉगिथ समन्दरु मंज बोठ खँच । येलि तैम्य दिवताहन
 पुछ “बु कमि कारनु द्रायस समन्दरु मंज नेबर ।” दिवताहव वोनस
 जवाबस मंज “चे छुय अशुब जायन वास करनुक हुकुम दिनु
 आमुत, येति मुफलिसी तु परेशॉनी हुंज कॉम छे चेय दिनु आमुच ।
 अँमिस दीवी छु तिमन गरन मंज वास करनुक हुकुम दिनु आमुत
 येत्यन लडायि, जंग, अपज्यारेन हुंघन वुठन प्यठ तलखी, येत्यन
 शैतान तु ग्वनुगार आसन रोजान, यिमन ज्यूठ मस आसि, कलु

ख्वपरि, अँडजि, सूर तु चुनि आसनख गरस मंज मूजूद, येतिक्व
रोजन वॉल्य व्वतुलन नु ज़ांह ति नु आसेख नँसीबस खुशी कांह
लीखिथ ।

लिंग पुरान अनुसार कोर माता लक्ष्मी श्री विष्णु भगवानस
सुत्य तु ज्येष्ठायि कोर दुसाहस रेशिस सुत्य नेथुर । रेशिस बास्योव
सुती जि तसुंज त्रय हैकि नु तस सुत्य वारि यिथ तिव्याजि स्व छि
स्वबावु तरुन्य । रेश्य गव नारायण भगवानस तु मारकन्देय रेशिस
निश तु वोन्नख पनुन हाल । रेशय तु नारायणन दिन्न दुसाहस रेशिस
ऑग्यन्या जि ज्येष्ठा गछि नु रुन्न जायन निन्य । येत्यन कुत माहोल
आसि स्व गछि ततिनुय त्रावनु यिन्य । तँम्य कोर तिय तु त्राँवन तथ
जायि येत्यन वैदिक दर्मुक अभाव ओस । तमिपतु गँयि स्व पानु विष्णुहस
निश तु थँवनस पनुन्य कथ ब्रौहकनि । विष्णु भगवानन दिन्नस ऑग्यन्या
जि ज़नानव दँस्य बोग दिनु सुत्य हैकि स्व येति रूजिथ ।

म.सटैन सुंजि राजतरङ्गी अनुसार छि दँहव महाकलायव
मंजु श्री जेष्ठा डर तु तबौही हुंज भगवँती बलु रूप यस धूमावँती
छि वनान । अमि रूप छु माजि ज्यूठ सफेद चोगु तु यलय मस
दोयव लठरेव बदलु ब्रौहकुन थँविथ आसान । ज्येष्ठाश्वर शिव छु
शंकराचार्य बालस प्यठ यथ इतिहास किन्य गोपाधौरी बाल छि
वनान । तथ प्यठ कनि छु शिव मन्दर ग्वडुन्यथ गोपादित्य राजन
बनोवमुत येमिसुंज जाय बालु दामनस तलु ऑस यथ अज गुपकार
छि वनान ।

शिव पुरान अनुसार :- येलि सती माता छि अँग्नस मंज
पनुन शरीर फना करान । शिव जियस छु मचर यिवान । ख्वनि मंज

पार्वती हुंद शरीर रँटिथ हेतुन अगोरी रूप फेरुन। येत्यन येत्यन शरीरुक्य अंग पेयि तँत्यन तँत्यन आयि माता पार्वती रूप तथ अंगस पूजा करनु। तिम छि अथ तिमवुय आँठव अंगव मंज मातायि हुंद अख रूप ज्येष्ठा मातायि रूप मानान। ज्येष्ठा मातायि हुंद बीज मंत्र छु यिथु पौठ्य :-

ॐ ह्रीं श्रीं ज्येष्ठा लक्ष्मीं स्वयंमेव ह्रीं ज्येष्ठाये नमः ॥

अमृत कौंडस प्यठुक्यन व्यराजमान स्वंदर हरनु चेशमव, लेदुर्य वस्त्र, अथस मंज पम्पोश ह्यथ छि यि पँज्य पौठ्य ज्येष्ठेश्वर सुंजि टाछि पार्वती हुंद दोयिम रूप बासान। यस दुतन संहार छि करान तु बखितस छि भय दूर कँरिथ शख्ती तु ज्ञान दिथ द्वर्गथ तु कष्ट कासान।

वैलिव व्वन्य परव भगवान गोपीनाथ जियिन्यन बैखुत्यन हुंद ज्येष्ठा आँगनुक्य अनुबव तु मेनव अमिच महिमा। यिम छि भगवान गोपीनाथ जियनि जीवनी मंज श्री एस० एन० फोतेदार सुंद अथु लीखमित्य अनुबव। यि पीठ छु श्रीनगर शहर प्यठु लगभग 3 मील दूर, गुलाब भवन पैलस नाव जायि नँजदीक। भगवान गोपीनाथ जी आँस्य अनकथ अथ जायि गछान तु दून त्रेन दूहन तति रूजिथ वापस यिवान। अकि वैरियि वन्दस मंज ओस शीन प्यवान जि अँकिस बखितस सुत्य द्रायि तिम रौच हुंजि देँहि बजि मातायि हुँदिस स्थानस कुन। स्वर्गिया महाराजा हरि सिंहनि आदेश अनुसार आँसुख मातायि निश गछनुचि वति कंड्यदार तार लौज्यमुच, येमि सुत्य तोत गछनुच वथ आँस बंद गौमुच। तिम द्रायि खोखजि खोखजि तु वौत्य तारि अपोर मगर वौनुख जि “महाराजस आसि येति

नेरुन“ अमि पतु कमय कॉल्य 1947 हस मंज द्राव महाराजि
कॅशीरि त्रॉविथ।

तॅमिस सुत्य गौमुत्य बॅखुत्य वोन बबस सुब्हन चोरि बजि
येलि तिम पंचस्तवी हुंद चूरिम तवु परान ऑस्य “बबजी बु ति
करुहा ज्येष्ठा मातायि हुंद दर्शुन।” बब जियन वोनस “वोथ थोद
कर अनुबव माजि हुंद प्रताप। बखुत्य कोर स्यठाहन सिर्यिन हुंदि
तीजु प्रताप रूप माजि हुंद दर्शुन। भगवान जियन वोनस जल,
“बेह पथर नतु पेयिय ओन।” अमूमन छि अथ पीठस प्यठ लुख
तॅहर चरवन निथ माजि पूजायि रूप ख्यावान पतु छि पानस ति
ख्यवान। तमि सातु ति ओस अँक्य पनुन्यन शानन प्यठ यि नॅवीद
ओनमुत। पूजायि पतु दियुत अँम्य भगवान जियस ति। अँमिय
समयि आव अथ पीठस प्यठ ब्याख सादा अख। तॅहर चरवन वुछिथ
ह्योत तॅम्य सारिनुय वोहव कडुन्य। चूँकि भगवान जी ऑस्य नर्म
स्वबावुक्य साद, तिम ऑस्य नु काँसि प्यठ ति कूथ करान। मगर
अमिसातु वोन तिमव सादस कुपित गॅछिथ “गछ पेयनय शुतुल्य
बुड”। अकि गंटु पतु ह्योत शापन असर करुन तु सादस खोत तफ तु
केंह गंटव पतु आयि सादस शुतुल्य नीरिथ। सादस तोर फिक्री तु
पछितॉविथ हेचुन भगवान जियस माँफी। भगवान जियन दोपुस “चु
नेर जल जल पीठु मंजु न्यबर द्रन त्रेन द्रहन मंज सपदिय यि बेमॉर्य
शान्त।” ओत ऑस्य तॅहर तु शिशनोर चोट खारान। पतु ऑस्य तॅहर
चरवन खॉरिथ पानस ति नॅवीद ख्यवान। ज्येठस मंज ऑस्य खासकर
ज्ञाना सतन ब्रसवारन ओत गछान बावु किन्य प्रार्थना तु व्वपासना
करिथ आसख मनोकामनायि पूर सपदान।

शीतला भगवती

सृष्टी प्यठ गॅयि च्वपॉर्य त्राहि त्राहिच आवाज़, येलि ज्वरासोरन दिच शुर्यन तफ, प्येल फेफर तु शुतुल्य बेमार्य दॉरिथ। अमि बेमारि सुत्य मूद्य वारियाह बचि, कैह ऑस्य मरनुसर। च्वपॉर्य हाहाकार वुछिथ अँन्य माजि कांत्यायॉनी नीम लंजि, येमि सुत्य छा़य कँडिथ आपरोवनख नीम पत्रन हुंद रस पनुन्यव कर कमलव सुत्य। तिमन गॅयि अमि सुत्य हना फर्क तु आख आराम। माता कॅर अँम्य ख्यालन स्यठा परेशान जि आरज़ी फर्क बचन सपदिथ किथु हेकि यि बेमार्य नाबूद सपदनुक व्वपुचार बॅनिथ। दीवी ऑस वुनि सोंचस मंज़ुय जि मोकस प्यठ वॉच माता लक्ष्मी तु कॉली तस निश। दीवी हुंदिस प्रछनस प्यठ जि “तुहुंदि योर यिनुक अचानक प्रयूजन क्याह छु”, माता कॉली वोन जवाबस मंज़:- “येमि फिक्कि चु वुन्यक्यन छख यीचाह परेशान कॅरमुच, तथ छु वॉहिद हल यिहय जि चु रठ यि तफ, प्येल, फेफर शुतुल्य बेमार्य पानस मंज़, तमि बदलु त्रावुख शैहजार रुफ रूद। सुय छु अख रुत व्वपुचार येमि सुत्य तिम सपदन स्वस्थ। ब्रोंठ कुन ति येलि काँसि यि बेमार्य नमूदार सपदि कृपायि रुफ, दवा ढंग प्रावन चानि अकि नज़रि सुत्य, येमि किन्य रूगव निश मेल्यख म्वख्ती।” लुकव कोर अथ खुशी मंज़ हवन। मंत्रव तु बावु सुत्य कॅरुख मॉज्य प्रसन्न। मातायि हेच सॉरुय माहमॉरी पनुनिस पानस प्यठ। शैहजारुक्क रूद त्रॉविथ गॅयि सॉरी शुर्य स्वस्थ तु न्यरूग। मातायि दियुत लुकन हुकुम जि येत्यन गछि यिन्य शीतलायि हुंज़ मूर्ती स्थापित करनु, यथ मंज़ बु लुकु ह्यतु बापथ पानु आसु साख्यात

व्यराजमान। ज्येष्ठ गटपछ आठम गछि शीतलायि हुंद दोह मनावनु युन। सतम दोह शामन गछि म्यानि बापथ तुहंजि मर्जी मुताँबिक ख्यन रनु युन, युस सिरिं खसन ब्रोंठ मे अर्पन यियि करनु। पूजायि तु त्वतायि रुफ युस मे प्रसन्न करि, सु प्रावि हर अन्दु शेहजार। येलि काँशिर्यन बटन मंज काँसि शुरिस होलुहँज्य या शुतुल्य बेमॉर्य आक्रमन करि, अँस्य छि सँतिमि या नविमि दोह पोसु कँह दजि गँडिथ तस शान्दस तल थवान। सुब्हन वँथित छि खिर करान तु ग्वडु माजि शीतलायि बोग शीरिथ पतु शुरिस ख्यनु बापथ दिवान। तस माजि भवॉनि जय जयकार योसु बेमॉर्य छि बँलुरावान। यि कहॉनी छि मे त्रेन वरियन माँ नावु प्रोग्रामस मंज टीवियस प्यठ वुछमुच।



सोमावती मावस

अध्यात्मस मंज छु सोम शान्ती हुंद धाम परमात्मा माननु यिवान। संसॉर्य गव सोमुक मतलब वीर्य या जीवनी शक्ती। सोमुक मतलब गव चन्द्र भगवान ति। सोम छि जँड्य ति। यिमन आलुछ छुनु तिम छि हुशार रुजिथ कारन मंज मस्त रोजान। सोम भगवान छु तिमनुय सहायक बनान युस वुछल छु आसान। तिथिस हिविस मनुशस छु सोम यिथु पॉठ्य वनान:- बु छुसुय सुत्य सुत्य अख यार हियुव। प्रभु छि तिमनुय सुत्य यिम कारदार छि आसान, ज़िन्दगी मंज छि तिमय सफल सपदान यिम कामि मंज रत छि आसन। द्वह ख्वतु द्वह ज़िन्दगी मंज सफलता प्रॉविथ यियि नु तिहुँघन दिलन मंज ज़ांह यि व्यचार ज़ि बु छुस बोड मोहन्युव, मे हियुव छुनु

येति कांह ति। चूंकि तिम छिनु पानस कर्ता मानान, तिम छि सोम भगवानुन्य यि सौरुय लीला मानान। तमिकिन्य छि तिहुंज बुदी सॅमत्व यूग प्रावान। यूगीश्वर योदवय एश्वर्य युक्त ऑसिथ शान्त रोज़ि, सुय छु सारिनय टोठ आसान, तसुंद कामि मंज हमेशि मस्त रोज़ुन तु ज़ियुठ लागुन छु तस थोद तुलिथ तिहुंदि बजरुक प्रमान दिवान। आकाशस मंज वुजमल छि तस ब्रोंठ पकनुच प्रेरना दिवान। यिथु वुजमलि सुत्य छु अंधकार दूर सपदान, औबर लँगन छि छलुछांगर गछान, तिथु पॉठ्य पज़ि असि विवेकु क सहारु निथ पनुन पान पानय थोद तुलुन।

सोम गव चन्द्र भगवान। यस मावस चन्द्रवारि द्वह छि यिवान, तथ छि वनान सोमावसी। जूनि हुंजु प्रवु छावनु सुत्य छि शरीरुक्य दूश दूर दफा सपदान। अमि सुत्य छु मन शान्ती प्रावान। जूनु गाशस गछि बिहुन तु आराम करुन, मगर जूनि कुन गछि नु मुदय गँडिथ केंह वुछुन, अँछन पेयि ओन शेहजार बदल।

संस्कार चंद्रिका किताबि हुंदिस सफु न० 162 प्यठ छु लीखिथ ज़ि चन्द्रुक असर छु समन्दर ज़लस प्यठ पेथ पॉनिस हुरेर करान। जडी बूटी तु पोश ति छि गट पछस मंज जूनु गाशि सुत्य मस सपदिश फोलिथ यिवान। सारिनय मनशन छु जूनु गाशि छावनु सुत्य खूनस हुरेर तु अँदरिमेन तानन पोछर मेलान। ज़नानि हुंदिस शुर्य बानस तु खूनस प्यठ ति छु अथ पछस मंज स्यठाह असर पेवान। तमिय शूबि यि मन्त्र येत्यन:-

शं नः सोमो भवतु- सानि बापथ रूज़िन सोम यानि चन्द्र स्वख दायक।
 ॐ चन्द्र प्रायशिचतै त्व देवानां प्रायश्चितिरसि बह्यणस्त्वा नाथकाम

उपद्यावामि । (गर्भादान मंत्र 8)

दिव्य ग्वन पर्दाथिन मंज दूश नेवारक,

प्रसन्न करनवालि चन्द्र भगवान् ।

एश्वर्य यछान छिय फवलनाव दिलुक दूर,

दयि पछि ललवान करान गूर गूर ॥

प्रौन्य आर्य ऑस्य ज्ञानान जि चन्द्रम छु पृथ्वी हुंदिस जलस
प्यठ स्यठाह ज्यादु असर त्रावान । चन्द्रम छु रस पौंदु करनवोल । अमि
सुत्य छुन सिर्फ समन्दर जलस प्यठय योत असर प्यवान, बेल्लिक
जडी बूदियन मंज छु रसस हुरेर सपदान । मनुश शरीरुकिस पौनिस तु
जलस ति छु स्यठाह गँहरु असर त्रौविथ गाहे खूनस मंज कमी या हुरेर
पौंदु करान । मावसि पुनिम गटुपछ तु जूनपछ ऑठुम ति छि खूनस मंज
गलाजत प्रखटान । तमिय ऑस्य प्रौन्य आर्य यिमन द्रहन फाकु थविथ
पनुन शरीर और तु दोर थवनस मंज पौनय पानस सहायक बनान ।



नन्दकीश्वर भगवान

पनुनि किताबि “नन्दकीश्वर दर्शनस’ मंज नन्दकीश्वर
या नन्दीगण संज कहानी लेखान छि श्री पृथ्वी नाथ भक्ति यिहुंद
आसुन यिथुपौठ्य वर्णन करान:

गुलगामि कन थवतम नादन, विलगाम वौतिथ थावुम लादन ।

सीर जाँगीर चोन बोड दरबार, ही नन्दुकीश्वर बोज जारुपार ॥

अमि किताबि अनुसार छि दपान जि पथ कालि आव स्वर्ग
लूकस मंज भृग रेश्य पानु शिव जियुन दर्शुन करनि । तति ओस

चलान नन्दीगणन हुंद सम्मेलन तमि द्वह। तिमव येलि र्योश वुछ
तूर्य कुन पकान, नन्दीगन द्राव पानु तिमन स्वागत करनि। अन्दर
अँचिथ त्रॉवुख रेशिस जाय। रेशिस बास्योव नन्दीगन सुंदि दँस्य
अनादर। तँम्य दियुत नन्दीयस अडुचोट गछुनुक शाफ। नन्दीगनस
वोनून “चे छुय व्वन्य मनुशि रूप मृत्य लूकस मंज जन्म ह्योन।
अकाल मृत्यु बालु पानय
सपदिथ दियिय शंकर जी
चे पानय मूक्ष्य।”

दपान सुबंल्युक
जलवक पंडित ओस दर्म
तु कर्मवान, मगर ओस
नेपोत्र। तँम्य ओस शंकर
भगवान सुंज तपस्या
कँरमुच्च। तपस्यायि प्यठ
प्रसन सपदिथ दियतुस
शंकर जियन दर्शुन तु



वोनूनस “बु दिमय चे अख वर्दान तमिय आसय बु चे निश। चु मंग
क्या छुय मंगुन।” जलवकन मोंगनस “ मे गछि चेय ह्यु संतान,
येमि सुत्य मे नेपोत्र आसनुक होंछ चलि।”

“तथा अस्तु” वँनिथ गव शंकर जी अंतर्ध्यान। तप सपदुस
स्वफल तु दँहमिस रेतस मंज ह्योत अँक्य बालकन जलवक पंडितु
सुंदि गरि जन्म। बालक ओस स्यठा रुपीठ, तीज ओसुस त्यूत
ज्जन ओस सिर्यि भगवान चमकान। लुख आयि गामव तु शहरव

प्यठ बालक सुंद दर्शुन करनि । अमि द्वह कॅर जलवकनि गरुक्वव
 तु गामुक्वव लैदरि रोस तॅहर तु तॅलिथ चरवन मिलाँविथ कोरुख
 ग्वडु अर्पन शंकर जियस तु पतु बाँगरोवुख तु ख्योख पानुवन्य ।
 जेशन ओस च्वपॉर्य नज़रि गछान । मिठायि तु पकवान आयि बनावनु
 तिव्याज़ि तिमन ऑस सॉरुय खबरय ज़ि यि छु पानु भगवान मनशि
 रूप ज़न्मस आमुत । अँमिस ह्योत सारिवुय वुछिथुय नन्दुबब तु
 नन्दुकीश्वर नाव वनुन । अति छि दूरि दूरि प्यठ साद संत तु ब्रह्मन
 आमुत्य । यिम नॅविस नवनिहाल सुंज़ टेकिन्य ऑस्य गंडान । अँथ्य
 मंज़ प्यव अख यूगीश्वर तोत वॉतिथ । अँमिस येलि ततिक्वन
 आमुत्यन व्यदवानन कुन नज़र पेयि यिम सात, राश, नक्षत्र वुछनस
 मंज़ मस्त ऑस्य, अँम्य छुन यकदम वॅनिथ “यिम कथ छि टेकिन्य
 गंडान, अँमिस बालकस छु भृग रेश्यनि शापु किन्य अकाल मृत्यु
 लोकुचारय कर्मस लीखिथ ।” यि पेशनगूयी बूज़िथ गॅयि सॉरिय
 परेशान । सारिवुय ह्योत वदुन तु रिबुन । जलवक पंडित गव दुच्यतिस
 मंज़ तु रूद पानय सवाल ति पृछान तु जवाब ति दिवान । च्वपॉर्य
 युथ वदवुन पशवुन माहोल वुछिथ द्राव अति जूय वापस । लुख
 द्रायस पतु पतु मगर न्यबर नीरिथुय गव जूय अन्तरध्यान ।

जलवक पंडितन हेच व्वन्य नवि सर शंकर जियस आरादना
 करुन्य । वदान वदान शंकर जियस कुन व्यनथ करान ह्योतनस
 ल्वति ल्वति बावुन : “ही शंकर योद यि जूय सुंद वनुन पौज़ छु,
 बु क्याह करु अँमिस नन्दियस रोस । योद च़े पोथुर दान वरदानस
 मंज़ दिच्रोथ तेलि क्याज़ि निहान वापस, अँमिस पोथुरस दितम
 लसनुक तु बसनुक आर्शिवाद ।” यि ज़ॉरी करान करान द्राव पंडित

सुंबलु प्यठु शिलवत गामस कुन पनुनिस इष्ट दीवस ज़ारुपार कॅरिथ
 पनुनिस पोथुरस क्युत ज्यूठ आय मंगनि । पाँचन वॅरियन कोरुन
 नविसरु तप तु तपस्यायि किन्य गव शंकर जी प्रसन । शंकर जियन
 दियतुस वरदान पोथुर सुंजि ज़ेछि वाँसि हुंद । जलवक पंडित द्राव
 गरुकुन वापस । नन्दी गव पनुनिस बबस पनुनिस गरस मंज वुछिथ
 स्यठा प्रसन । खुशी सुत्य तुजेन व्वटु तु वौननस “चु त्राव व्वन्य
 गम चु पुशर दयस सोरुय, बु द्रास चानि खुशी बापथ तप करनि
 जंगल कुन । पनुन आय हेमु लडिथ शंकर भगवानस । मे छि चॉन्य
 स्यठा माय, मे गछि यि अंद वातुन्य चे सीवा कॅर्य कॅर्य । चु बन
 कर्मुयूग किन्य गरसुय मंज वनवॉस्य । त्यागी बॅनिथ ज़प ॐ नमः
 शिवाय मंत्र ।” अॅमिस पाँचु वुहर्य शुर्य सुंद ब्रह्म ज्ञान बूजिथ गव
 जलवक पंडित हर्षस तु मेनान रूद पथुर संघ कदम येम्य जंगल
 कुन प्रस्थान कोर । येति येति नन्दीगन ब्यूठ तति तति बनेयि पतु
 मन्दर । यिमव मंज छि गोशबुगि, सीरजागीर (सोपोर), वनपुह
 अनन्तनाग, विलुगामि, गुलगामि तु गोटेगि वति शारदाहस मंज ति
 यिहुंद दाम येति वुन्यक्यन ति छि लुख यिहुंद आसुन ल्वलुनावान ।
 नन्दीगनन कोर तप यिमन जायन तु भगवान छांडान छांडान कॅरुन
 कॅशीरि हुंदन शहरन तु गामन हुंज यात्रा । आँखरस गव तस तप
 सैद तु म्यूल तस भगवानस । ब्रोंठकनि शंकर जियस मीलिथ प्यव
 तस परन । शंकर जियन दितुस आर्शिवाद तु नाव दियुतनस अष्ट
 भैरव । दपान युस शाप तकसीर रोस दिनु यियि, सु छु दयस शरन
 गछनु सुत्य नेष्फल सपदान । नन्दकीश्वरस ति गव तप सुत्य शाप
 नेष्फल तु अडुचोट गछनु निश बॅचिथ मीज्य तस आँठन भैरवन

मंज जाय। यिमन भैरवन मंज छु लवशकर राज, मींगराज, आनन्देश्वर मंगल ईश, वैताल बहुखातु कीशवर शीतल नाथकु भैरव हटकेश्वर तु ऑठिम भैरव छु नन्दकीश्वर।

गान्दरबलस मंज छु वेगराज, नुनरस मंज देवराज, मालमुहस अन्दर वागेश्वर, वरमुलिस मंज वेतालपति, मटनस मंज गंगाधर भैरव, आनन्देश्वर छु अनन्तनागस मंज, पुलवामि जगरनाथ, बुम्मई मंज जन्कराज भैरव, रत्नपूरिस मंज शेशीकरन भैरव, ब्रारिआंगनस मंज डाबरीश्वर, तुलमुलि बधराज, परशुराम भैरव वडवन, कानिहामि भूतेश्वर बेयि ति सासुबैध्य नावव छु नन्दकीश्वर पूजनु यिवान। यिम मन्दर कॅशीरि मंज यिहुंदि नावु बनेमित्य छि, यिमन सारिनयु छु पनुन पनुन इतिहास। मसलन:

स्वामी आनन्दजी बब ऑस्य अकि डेगिजल गरुक्य श्री रागव रामुन्य तु सरस्वती मातायि हुंघ संतान। यिम ऑस्य विलगाम गामस मंज रोज्ञान तु यिहुंद आश्रम ति ओस विलगामस मंजुय। चूँकि यिहुंद गरु ओस श्वज़र पज़र, व्यशवास तु श्रदायि हुंद थम, तैमिय ऑस्य दयि लोलस नालुमैत्य करान। यिहिंदिस गरस मंज ऑस्य नन्दकीश्वर माहराज बालक रूप यिवान तु ठेकुर कुठिस मंज थैविमितिस बतु थालस ऑस्य साक्षात ख्यवान। अमि बतु थालु मंज हुर्योमुत प्रसाद ऑस्य बाकुय बतस सुत्य रलॉविथ गरिक्य बॉच नवीद करान। यिथ्य हिव्य लालन ओस ऑशदु गटु पछि बॉश आथवारि दोह विलगामस मंज अँथ्य प्वनिवान गरस मंज गाह त्रोवमुत। यिहुज़ मॉज ऑस शुर्य पानु प्यठुय दय लोल ललुनावान। तैमिय कोर अँमिस नन्दकीश्वर माहराजन ग्वरु रूप

अनुग्रेह ।

अज छु यिहुंद आश्रम पुरखू कैम्पस मंज येति बाजॉपित
चित्र जूनपछ पुनिम हवन तु पगाह वहिक् ओकदोह नन्दकीश्वर
भैरवुन द्वह छु मनावनु यिवान । अति ओस ब्रोंठ राजु कठ करनु
यिवान मगर येलि नु येति व्यापेय केंह, आश्रमक्यव अहलिकारव
त्रावि चीरि तु ह्योतुख यि द्वह ति तहर तु वैशनव सिनेव सुत्य
मनावुन । अमूमन छु जेठु गटुपछ मावसि अँम्यसुंद द्वह कुनि अँम्य
संजि थापनायि प्यठ मनावनु यिवान । येति जैमिस मंज छु पुरखू
आश्रम अलावु अकलपुरस मंज नन्दकीश्वर भैरवुन द्वह मनावनु
यिवान ।



जेठु आँठम (खीरभवानी यात्रा)

यि वरियुक बोड द्वह छि अँस्य ज्येठु जूनपछ आँठम मनावान ।


तुलुमुल्य नागुक वर्णन

आभुवनेशाच्च तुङ्गेशा तथा लब्ध वनादपि ।

भागेहादपि वै प्रोक्तं मण्डलं भुवि दुर्लभम् ॥


तुलुमुलि चोरन तरफन छि बोरुस, (भवनीश) अहतुंग (तुंगीश) लोदवुन
(लब्धवन) तु वोकुर (भागेह) नावुक्य चोर गाम । यथ मंजस तुलुमुल
नावुच मातायि हुंज रोजन जाय छि । अथ मुतलक छि भृगींश रेश्य
'भृगींष सहिता' मंज लेखान जि अमि जायि प्यठ जु त्रे मील दूर पूर्व
तरफु छि 'दुग्ध आश्रम' नावुच जाय यथ अजकल छि दोदरहोम वनान ।
बँखुत्य आँस्य अमिय जायि सिन्द नँदि नावि खँसिथ तार दिथ तुलुमुल

वातान। अथ माया क्वंडस
मंजबाग छु मातायि हुंद प्रोन
मन्दर, युस ग्वडुनिचि लटि क्वंड
पॉज़िथ पाज़नवालयव अनुबव
कोर। तिमव दोप ज़ि प्राणि मूर्च
यिम तति मेजि छि अज़ मंदरस
मंज वेराजमान। अमि क्वंडुक
आकार छु मातायि हुंदि बीज
अक्षर 'ए' मंत्र रूप। येलि क्वंड
आसि पाज़ुन तोत छि तिमय
हेकान वॅसिथ यिम माजि भवॉनी



हुंघ येछिमित्य टॉठ्य सीवक छि आसान। अमि खॉतर छु अख गुप्त
तरीकु येमि किन्य तथ 'गंभ गृह' हस निश छि अँछन पॅट यिवान
थवन। अमि क्वंडकि आकारु हिसाबु छि पूरब तरफु मातायि हुंघ पाद।
पतु तोतन वॉतिथ यिम अनुबव बॅखुतिस छि सपदान तिम छि राज
आसन थवन्य।

पथ कालि 1867 मंज ओस तमि समयिक्य दीवान नरसिहं
दयालन क्वंड पाज़नुच कॉम कॅरमुच, मगर कुनि कारनु ऑस मॉज्य
रूशमुच तु क्वंडु चोश्वय तरफव दिचन शुतल्य तु होलुहॅज बेमॉर्य
दॉरिथ। पूजा पाठ कॅरिथ आयि मातायि खिरु रूप अमृत खॉस्य बावनु।
अमि सुत्य ति येलि नु माता शान्त सपदेयि, यि क्वंड बदल्योव वारु
वारु दलदलस मंज। अमि पतु आव 1902 ई० मंज मातायि इजाज़त
हेथ पं० वेदलाल दरनि दॅस्य यि क्वंड पाज़नु। अमि रबि मंज द्रायि



Angkor Temple - Klu Bhaman, (Tumana)

कंह मूर्तिथि, यिम पतु मंदरस मंज थविथ पूजनु आयि। अज येत्यन मातायि हुंद मन्दर छु, यि छि सासुबेद्य वरिय प्रॉन्य जाय। योस वख्तु अकि पॉनिस मंज विलीन ऑस सपुजमुच। अथ अन्दर छि मॉज नागस प्यठ साख्यात वेराजमान। कॉशिर्य पंडितन हुंजि परम्परायि अनुसार छु मातायि हुंद ध्यान स्यठा सोन, योस असि क्वलु परम्परायि किन्य प्रॉवमुच छि। योस यिथुपॉठ्य छि :-

तूलव अतत्यतान्यत्र स्थान्यन्यानि सुन्दरी।

लघु भूतानि मूल्येन तस्मातु तूलमूल्यकम्।।

योस जाय सॉरिसुय ब्रह्मांडस मंज म्वलु रोस छे, यि जाय छि तूल्य-मूल्य-कम याने अथ छि तुलमुल वनान। अमि जायि हुंज मेच छि चोश्वय तर्फव केन्य फम्ब हिश। यि जाय छि अकि फिरि मातायि हुंजि मर्जी अनुसार श्री गूव्यन्द जी गाडरूहन वॅनि कॅडमुच। अमि ब्रोंह

ऑस अमि क्वंडु त्रे मील दूर 'सोलुर' गामस मंज ऑकिस बोनि कुलिस तल बॅनिथ क्वंडस मंज पूजा करनु यिवान। युस वुन्यक्यन ति छु तति बोनि कुलिस तल प्रत्यक्ष मूजूद।

अब फज़ुल सॉबनि 'आईन अकबरी' मंज छु अथ तुलमुल अस्थापनस मुतलिक लीखिथ जि तुलमुलि किस पोन्थ स्थानस छि 100 बीगा ज़मीन ति कागज़न मंज दर्ज।

तुलमुलि त्रे किलोमीटर दूर ब्रोंदुय श्रीनगर तुलमुलि वति प्यठ छि अख जाय येथ सोलुर छि वनान! येलि येलि मातायि हुंद धाम पॉनिस मंज लय ओस सपदान तेलि तेलि ओस श्री गूवन्द जू गाडरू मातायि हुंज पूजा अर्चना सोलरि ऑकिस बोनि कुलिस तल व्यराजमान क्वंडस करान यथ 'दिवतु बून्थ' ऑस्य वनान। अथ जायि छु वुन्यक्यनस ति बोनि कुलिस तल अख क्वंड यथ वुनकेनस ति बॅखुत्य पूजा पाठ कॅरिथ माजि भवॉनि बावु पोश छि लागान। अँथ्य दिवतु बोनि तु क्वंडस ऑस्य श्री गूव्यंद जू गाडरू मातायि पूजा करान तु ऑस्य हर समयि ध्यानस मंज साक्षात मातायि हुंदि तमि क्वंडुच कामना करान युस अज़ क्षीर भवॉनी क्वंड नावु ज़गि मशहूर छु। येलि मातायि अरज़ी दसख्त कोरुस तु होवनस पनुन धाम तमि पतु वोत गोव्यंद जू स्यठा मुशकिल वतु तॅरिथ तथ जायि तु रूदुस अंतिम समयस तान्य द्वद तु कन्द बावान। संस्कृत भाषायि मंज छु कन्द शरीरूक थॅरकॉड माननु यिवान। येमि मँज्य नीरिथ शक्ति छि शरीरस पोछर दिवान। स्यठा थोद बॅखुत्य पंडित कृष्ण जू थपलू ऑस्य कॅहन वॅरियन मंत्रव सुत्य अँमिस मातायि हुंज पूजा करान। माता सपुज अँमि सुज़ि पूजायि तु बावनायि प्यठ प्रसन। येलि थपलू सॉब ध्यानस मंज ऑस्य मातायि

वोनुस जि 'माया क्वंड छुय तँथ्य दलदलस मंज अज ति मूजूद।'
 बँखुत्य कृष्ण जुवन वोनुस 'माता बु किथु हेकु तथ जायि वॉतिथ।'
 मातायि दोपुस 'चु वात शॉद्यपुर गाम नावि मंज, तति प्यठ हाविय
 अख नाग 'माया क्वंडुच' वथ पानय।'

येलि श्री कृष्ण जुव शॉद्यपुर वोत, तँम्यसंजि नावि ब्रोंठकनि
 गव अख नाग प्रकट। तँम्य लॉज्य नाव पनुन्य नागस पतु पतु। केंह
 कॉल्य पतय रुक्योव दलदलस निश नाग तु त्रिकोन रूप दॉरिथ गव
 पॉनिस मंज अदृष्य। अमि जायि हुंज निशानदीही कॅर दुरनव तु लाँगव
 सुत्य थपलू सॉबन। तमि पतु बोखु सर मेजि सुत्य। मन्दरुक नेर्मान
 कोरुन वैदिक तु तांत्रिक तँरीकस प्यठ। येलि पूजा पाठ पूर सपदेयि
 क्वंड जलस प्यठ गव पॉदु अख बुर्जु पॅतर। श्री कृष्ण पंडित गॅयि
 स्यठा हॉरान येलि तिमव अथ प्यठ लीखिथ मातायि हुंद ध्यान शलूकुक
 साक्ष्यात दर्शुन कोर। मंत्र छु :

या द्वादर्शाक परिमण्डित मूर्तिरेका।

सिंहासन स्थितिमतीमुरगैः वृतां च॥

देवीम् अनन्य गतिरीश्वरतां प्रपन्ना।

तां नौमि भर्ग वपुषीं परमार्थ राक्षीय॥

बहाव सिर्यव रूप ताज दिथ मूरत चॉन्य आसान।

शूब्रुन्य हटि नॉल्य नाग छख तख्तस प्यठ वेराजमान॥

पॅरिपूर्ण एश्वर्य बॅरिथ दीवी मॉज चु चमकान।

तीजुवान, प्रकाशवान माजि रॉग्यन्यायि छस परन प्यवान॥

अथ पवेत्र क्वंडकिस दरवाजस प्यठ छु श्री गणेश, भीमराज
 तु कुमार। पूर तर्फु छुस वासुंकी नाग, नील नागराज, तक्षक नागराज,

पध्म नागराज, महा पध्म नागराज, मंजस छु अन्नत नागराज वेराजमान ।
क्वंडस च्वपौर्य छि अख सास करोड़ नागन हुंद पॅहरु, यिमन 2 सास
करोड़ ज़ेवु तु अँछ छि । अँमिस अनन्तनागस प्यठ छि माता सँहस्रदल
पम्पोशस प्यठ वेराजमान । अथ क्वंडस कैह कुह दूर छु मानसबल सर
प्यवान । येति वीदव अनुसार ग्वडुन्युक मानव छु थनु प्योमुत ।

तुलमुलचि माजि भवानी प्यठ ततिक्यन पंडितन हुंज श्रदा
वखनान छस बु तोहि अख मशहूर कथ वनून्य यछान । दपान कॅशीरु
हुंद अँक्य राजु जयपीढन नियि तुलमुलि पंडितन सौरुय ज़मीन । तिमन
पंडितन आँस माजि प्यठ स्यठा श्रदा तु तसुंजि श्रदायि प्यठ चटनोव
खुशी खुशी 99 पंडितव पानस कलु, मगर यि जाय त्रॉवख नु कैह ।
आँखरस द्राव अख पंडित यस 'ईतिला' नाव ओस, बेयि कैह पंडित
पानस सुत्य ह्येथ राजस मेलनि । मँहल वॉतिथ दियुत नु अतिक्यव
पॅहरुदारव तिमन अन्दर कैह अचन । दगु मार कॅरिथ छुनिख वापस
कँडिथ, मगर तिम चायि ज़बरदँस्ती सॉरी अन्दर तु मील्य राजु जयपीढस ।
तिमव वोन राजस 'असि प्यठ सपुद्य स्यठा जुलुम योद असि क्रूध
यियि सॉरिसुय सम्सारस गछि तलुक प्यठ ।' असुना त्रॉविथ करनाँवुख
राज़न लतुमाँड तु दोपनख 'यीत्य नेर्दन आँसिथ ति छिवु रेशन मुनियन
हुंजु हिशि कथु करान ।' ईतिला पंडितन वोनस 'योद अँस्य छिनु तीत्य
ज्ञाँनी यीत्य सौन्य ज़िठ्य पूर्वज आँस्य, मगर अँजिक्य राजु ति छिनु
तीत्य महान कैह ।' राजन दोपुख तेलि क्याज़ि छिवु तोह्य विश्वामित्र तु
अगस्त रेश्य सुंज हिशि कथु करान ।' अथ प्यठ दियुतस सारिवुय
कुनुय जवाब ज़ि 'पंडित हेकन अज़ ति धर्म, सदाचार तु ध्यान ज्ञान
बल, वेश्वामित्र तु बाकुय रेशन हुंद पॉठ्य शख्ती प्रयोगस मंज अँनिथ ।'

युतुय वॅनिथ दियुतहोस शाफ 'हतो बद कुस्मता, सान्यन अँछन ब्रोंहकनि करिय माता रॉग्यन्या चोन नाश।' कल्हन पंडित छि पनुनि किताबि 'राजतरङ्गणी मंज लेखान जि तॅमिय सातु आव तमि दरबारुक अख लॅकरि हुंद थम वॅसिथ तु प्यव राजस प्यठ। कैह कॉल्य पतय द्राव राजु येमि संसॉर्य। वुन्यक्यन ति येमिस श्रदा तु वेशवास आसि तॅमिस छि नाना रंगव अनुभव करनॉविथ मॉज रॉग्यन्या अनुग्रेह करान।

“भृगीष रेश्य छु राक्षा प्रार्दभावस” मंज लेखान जि:- “रावनुन्य बख्ती सुत्य प्रसन्न सपदिथ रूद शिवजी लंकायि मंज व्यराजमान। माता सती यस रावनुन्य इष्ट दीवी ऑस प्यव शिवजियनि वरदान मुताँबिक लंकायि मंजुय वास करुन। रावनुन्य बबन पुलस्य रेशय ति कोर मातायि ज़ारुपार, येमिकिन्य स्व गॅयि मजबूर तती रोजनस प्यठ। रावनन ऑस स्व पनुनि तपकि बलु सुत्य सँतीसर प्यठ पनुनिस कमन्डलस मंज बन्द कॅरिथ लंकायि वातुनॉवमुन्न। रावनुन्य राक्षस प्रकरथ वुछिथ दियुत माता शयामायि तस सर्वनाश गछनुक शाप। मगर यि शाफ पोरिहे नु तोतॉन्य रावनस, योतान्य माता तति वास करिहेस। अमि किन्य कोर मातायि तति नेरनुक संज। तॅम्य दिच परम बख्त ब्रह्मचॉर्य हनुमान जियस ऑग्न्या तु वोनुनस:- “मे वातनाव बेयि सँतीसर दीशस मंज 360 नागव सान। अमि कथि हुंद छु रामायनस मंज ज़िकिर, जि मातायि हुंदि अमि रूपुच पूजा येलि श्री रामन हेच करुन्य, मातायि हुंद दीश त्रावुन बन्योव रावनुनि नाशुक बाइसु। हनुमान जियन कोर तिय, यि मातायि हुंद हुकुम ओस। पनुनिस नखस प्यठ मातायि तु नागन ह्यथ कोर हनुमान जियन कॅशीरि कुन प्रस्थान।

कश्मीरस सॉर करान करान येत्यन येत्यन माजि थख कोर,

तत्यन तत्यन बन्योव अख नाग, यथ मंज अख अख नाग माजि हुंछ
 दॅस्य त्रॉविथ गॅयि यिम दीवीबल नावु किन्य मशहूर । यिमन दीवीबलन
 मंज छि अन्रतनाग, टिकर, लोकट्य पूर, दिवसर वराहमूल, शारदा,
 हरमुख गिरि, ऋषिवन, अँहरबल, क्वंगुवटन, रॉयथन, मंजगाम, कपाल
 मोचन, लुकुबवन बेयि ति वारियाह दीवीबल यिवान यिमन मंज पानु
 माता रॉग्यन्या वास छि करान । यि छि हर जायि नाग रुफ वाहनस प्यठ
 व्यराजमान । यिमन दीवीबल नागन हुंद पोन्थ छु कुनि कुनि रंग बदलिथ,
 यिनु वालि समयुक जान या नाकारु ऑनु बोंठकुन हॉविथ असि च्नेनवुन्य
 दिवान । अँस्य सॉरी छिस ऑरचर बावस मंज शत शत प्रनाम करान ।
 माता बूजिन कॅरिन कबूल । पनुन्य कृपा तु दया दृष्टी थॉविन असि प्यठ
 हर हालस मंज ।



निर्जला एकादशी

जेठ जूनपछि कॉश्य छि निर्जला एकादशी वनान । पूर वरियिचि
 कॉश्य दरनुक पोन्थ फल छु यि काह दरनु सुत्य मेलान । यि काह छि
 अकि दोह सिर्यि खसन प्यठ दोयिमि दोह सिर्यि खसनस तान्य त्रेश चेनु
 रोस थवनु यिवान । अमि किन्य छि अथ निर्जला काह वनान । अमि दोह
 छु फाकु फरि पनुनि मकदूर मूजूब ब्रह्मनन अन्न, वस्त्र, छँतर्य, फल,
 जलु बॅरिथ नोट तु दक्षिणा दिनुक वेदान । लुख छि दोह्य दोहस वतन
 प्यठ त्रेश लुकन चावुनावान ।

भीमसेनस वोथ ख्याल अकि दोह मनस मंज तु द्राव व्यास
 जियस मेलनि । दोपनस “म्यॉन्य बॉय तु माँज माहरा छि रेतस मंज

दोशवय कौश्य दरान तु छि मेति दरनु खौतरु वनान । मगर बु हेकु नु कांह कौश्य हुंद व्रत थैविथ तिव्याजि यि छि भूजनु रोस दरुन्य आसान । व्वन्य वॅनितव मे तिछ वथा युथ बु स्वर्गस गछुहा । व्यास जियन वोनस जि यि निर्जला कौश्य हुंद व्रत थवन सुत्य छु मनुश सारिवुय पापव म्वकुलिथ मॅरिथ स्वर्गस मंज जाय प्रावान । अमि दोह गछि पूर दोहस “ॐ नमो भगवते वासुदेवाय” मन्त्रुक ज़प करुन ।


भीमसेनन थोव व्यास जियनिस वननस प्यठ यि निर्जला एकादशी हुंद व्रत । अमिकिन्य छि अथ कौश्य भीमसेनी या पाण्डव एकादशी ति वनान । स्वर्ग प्राप्ति बापथ थोव बडि बावुनायि सान भीमसेनन यि व्रत ज़लु चेनु रोस अकि दोह प्यठ बेयिस सुब्हस तान्य । दपान योद कांह मनुश अमि कौश्य हुंज व्रत कथा बोजि या परि, पापव मुछि सपुदिथ प्रावि ज़रूर सु स्वर्गस मंज जाय ।

बेयिस अँकिस कथि मतौबिक येलि हनुमान जी गव सिर्थि दीवस निश ज्ञान प्रावनि, वरुन दीवन अँनिस अडचन तिव्याजि सिर्थि दीवन ओस तसुंदिस पथुरस ज्ञान दिनस इन्कार कोरमुत । आँखरस ह्योतुन अख इम्तिहान तिमन द्वश्वनी शुरयन, युस स्यठा प्राण गातक ओस । यि बूजिथ थोव रेश्य सुंदिस वननस प्यठ माता अंजिनायि हनुमान पुत्र सुंदि जिन्दु रोज़नु बापथ अकि दोह प्यठ बेयिस सुब्हस तान्य बगौर त्रैशि नेर्जला एकादशी हुंद व्रत । यि दोर तँम्य फाकय फुकरय सिर्थि दीवस कुन अछैन्य मुदय गँडिथ । येमि सुत्य तसुंदव अँछव किन्य खून वोथ तु प्योस ओन । येलि हनुमान पनुनिस इम्तिहानस पास गव, सु वोत माजि हुंघन चरणन तल । तसुंद हाल वुछिथ अँन्य तँम्य नागमनी, डॉजनस अँछन येमि सुत्य तस अँछन गाश बेयि आव ।

हार सतम

सँतीसर फौडेशन अनुसार छु हार सतम द्वह श्री राम कोशल्य्या मातायि हुँदिस गर्भस मंज हेन आमुत्य तु पतु राम नवम दोह जन्मस येमि संसॉर्य आमुत्य । हार सतम ऑठुम तु नवम द्वह छि माता शारिका अलग अलग रूप दारन कैरिथ प्रकट सपुजमुच । पुनि पुनि रीच किन्य छि यिम दोह अँस्य बडि ठकु ठकु मनावान ।

गरु अचुवुनुय या चौकस मंज गछि सतव रंगव यि व्यूग त्रावुन । यथ अँस्य 'हारमण्डुल' छि वनान । सथ रंग छि सथ सिर्यि जुचुन हुँद्य प्रतीक । यि छु श्वब तु रुत माननु यिवान । अथ हारमण्डलस छि अँद्य अँद्य अख पाँ गिलासु, तोमुलु कवुल्य तु दौन थरि हुँज पोशि लँड थवुनि । तमि पतु गछि शामन पोन्त्य तु यि पोशि लँड दौन कुलिस तल त्रावुन्य । अमि सुत्य छु ऑठुम तु नवम हुँदिस यिनु वॉलिस थजरस स्वागत करनु यिवान ।



मागु सतम तु हार सतम :

यिथु पॉठ्य नीलमत पुरान अनुसार भगवान वुजुनावनुच वथ तु तँरीकु पुनिम हुँद द्वह हावन आमुत छु, तिथुय पॉठ्य गछन बावनायि मंज तु पुनि मकदूर मूजूब दान दक्षिना ब्रह्मनस दिथ यिम द्वशवुय द्वह मनावनु यिन्य । यि सतम हुँज त्रिशक्ती छि स्यठा जरूरी । योद पूजायि पाठु सारेय वरियिचि सतमु यिन मनावनु तिमन यियि सिर्यि लूकस मंज मान दिनु । (नीलमत पुराण 469-470)

हार नवम

माता शारिकायि हुंद वुहरवोद छि ऑशदु जूनपछि नवम
मनावान। यिहुंद दाम छु बालु तेतोलिस प्यठ, हॉरी पर्वत नावु जगि
मशहूर। कॅशमीर देश सॅतीसरस मंज्र येलि जल उदभवन त्रटुबुजुन
तुलमुत ओस, नील राजुन्य व्यनुच प्यठ द्रायि विष्णु भगवान अन्नतस,
शंकर जियस हेथ देवस मारनि। नौबन्दन बालु दख्यनी थोंग रोट विष्णु
भगवानन, ब्रह्मा जियन रोट व्वतर तरफुक थोंग, योरकुन सॉरी दीव तु
असुर ति गॅयि दोरान दोरान। सॉरी येलि मोर्चन प्यठ डॅटिथ रूद्य
तिहुंदि प्रहार सुत्य गव देव अडुमोर।

पनुनि यूग बलु कोर श्री हरियन दोयिम शरीर दारन तु कुल्यव
तु बालु थोंग्यव आव
देवस प्यठ प्रहार
करनु। शिव जियन
तु श्री हरियन
बदलॉव्य पनुन्य
शस्त्र पानुवुन्य।
बॉकी यिम तस सुत्य
ऑस्य जंग करनि
आमुत्य, तिमव ति
कॅर पनुन्य पनुन्य
हक अदॉयी। यिथु
पॉह्य कौरुख



सॅमिथ देव अडुमोर । देव द्राव लिथु ख्वखरि सतीसर किस पोखरिबलस
मंज खॅटिथ रोजनि । माजि दुर्गायि कोर हारि रुफ दारनु । पनुनि तौति
मंज ओनुन मेरु पर्वत प्यठ अख दिव्य कनिफोल (सालिग्राम) तु त्रौवुन
यि देवस प्यठ । कनि फॅल्य कोर पहाड रुफ दारन । येम्य देवस कोर
ब्रोकुस । पोखरिबलुक्य अमृत सुत्य ह्योत देवन ज़न बैयि वाश कडुन,
येमि सुत्य सौरिसुय सतीदीशस अलु अलु वोथ । आँखरी व्वपुचार
रुफ ब्यीठ मॉज्य शरिका पानु तथ पर्वतस प्यठ, युस संसारस मंज छु
'हारी पर्वत' नावु महशूर । माता शारिका छि तथ हॉरी पर्वतस प्यठ
पानु व्यराजमान संसार चॅक्र चलावान । ब्रह्मासरस मंज येत्यन वेशनु
पाद जाय छि तथ पूर कुन बनोव ब्रह्मा जियन पनुन आश्रम, येत्यन
वैष्णु भगवान खडा ओस तत्यन कॅर शिव जियन वैष्णु भगवान सुंज
मूर्ती खडा । दपान यिम शस्त्र शिव जियन तु वेशनु जियन (चॅक्र तु
त्रिशूल) पानुवन्य आँस्य बदलॉव्यमुत्य, श्री हरियन मॉंगुस पनुन शस्त्र
सुर्दशन चक्र वापस । शिव जियन वौनुस जवाबस मंज : "योद बु
दिमय वापस यि चॅक्र, अमि बदलु गछि मे कांह तोफु दिनु युन ।"
दपान वननुच आँस तॉर वेशनु भगवानन कॅर बुंजिस मंज शिव जियिन्य
तु पार्वती हुंज मूर्ती जलउदबवनिस कलस प्यठ स्थापित ।

यिथुपॉठ्य आव मातायि अमि द्वह प्यठ शारिका माता नाव
दिनु तु ज़ा द्वह ति छि यिहय मनावनु ।



देवशयनी एकादशी

हार जूनपछ काँश्य छि ज़्यातुतर लुख देवशयनी या देवसोनी
 एकादशी वनान। अमिय दोह प्यठ छि क्षीर सागरस मंज भगवान विष्णु
 चोरन रेतन बापथ आराम करान। कैह छि वनान ज़ि अमिय दोह छि
 विष्णु भगवान बलि सुंदिस द्वारस प्यठ पातालस मंज चोरन रेतन
 रूजिथ कार्तिक जून पछि काँश्य पनुनिस लूकस बेयि वापस यिवान।
 अमिय छिनु यिमन चोरन रेतन नु खांदर तु न कांह शवब कार्य करनुच
 वथ शास्त्र दिवान। राज़ युधिष्ठिरनिस प्रछूनस प्यठ वैन्य यि कथ श्री
 कृष्णन अथ काँश्य मुतलिख यिथु पौठ्य योसु अमि ब्रौठ नारद जियन
 ब्रह्मा जियस निश बूजमुच आँस।

सत्यायूगस मंज ओस सूर्यवंशी राज़ यस नाव ओस मान्धाता।
 सु ओस पज़ियोर तु स्यठाह प्रतौशी राज़। प्रज़ा तसुंज आँस ख्वश
 ख्वशहाल तिक्याज़ि यि ओस तिमन गोबरु सुंद पौठ्य रखान। तति
 ओस नु तोतौन्य ज़ांह द्राग वोथमुत। येलि लगातार त्रेन वरियन रूद नु
 प्यनु किन्य वोथ तति खतरनाक द्राग, लुख हैतिन ब्वछि ब्वछि करान
 मरुन्य। आँखरस गँयि सौरुय प्रज़ा राज़स मेलनि तु सौरिवुय वनिहौंस
 पनुन्य तु प्रदेशिच हालत। तिमव त्रौव राज़स प्यठ प्रबाव ज़ि चुय योत
 हेकख अमि परेशौनी हुंद हल छांडिथ। राज़न कोर अँछ्य फिर्य
 फिर्य सारिसुय आंकार तु द्राव पनुन केहं फोज हैथ जंगल कुन।
 जंगलन फीरिथ कोर अँम्य वारियाहन मुनियन हुंद दर्शुन येथ मंज यि
 म्यूल ब्रह्मा जियनिस पोथरस अगिरा रेशिस ति। वुछिथुय कोर अगिरा
 रेश्य यिमन प्रशान ज़ि योर जंगलन मंज हटरि हटरि फेरनुक क्या

प्रयोजन छु। राजन वैनिस पनुन्य सौरुय हालात यथ प्यठ अगिरा रेश्य वोनस चॉनिस राजस मंज छु अख बोड दूश ज़ि तति छु अख शुद्र तफ करान। येलि ज़न वेद परनुक तु तफ करनुक हख छु सिर्फ ब्रह्मा जियसुय योत। यिहय छु चोन राज दूषित गछनुक कारन। अति छुन रूद पैवान कैह, युस द्रागुक कारन बन्योव। चूँकि राजु ओस स्यठाह पज़ियोर तु शरीफ तैम्य मोन नु यि शुद्र मारुन कैह। तसुंदिस इन्कारस प्यठ दियुत रेश्य तैमिस देवशायनी एकादशी व्रत दरनुच विदी विदान सान पूजा करनुक सलाह। यिम शब्द रेश्य सुंदि ज़ेवि बूजिथ आव राजु पनुनिस नगरस मंज वापस। तैम्य थोव यि एकादशी हुंद व्रत। अमि फल रूप प्योव अथ नैगरी मंज स्यठा रूद। येमि किन्य लुख गैयि स्वखी। तिक्याज़ि यि व्रत छु येमि ज़न्मु ऐश्वर्य तु बैयि ज़न्मु मूक्ष दिनुवोल माननु यिवान। यि कथा परनु या बोज़नु सुत्य छि सौरी पाफ नाशस गछान।



लुकु भवन यात्रा या हारु बाह

हारु ज़ूनु पछ बौश्य द्वह छि यि दिवय लुकु भवनस मंज प्रानि समयि प्यठ लगान। अमि द्वह छि यात्री कँशीरि हुंदव कूनव प्यठ ओत यात्रा करनि यिवान तु प्वन्य कमावान। अति प्यठु अख किलोमीटर दूर नारायण नाग प्यठु परिसर किस क्वंडस तान्य छि लुख खास कर ज़नानु बाहि लटि श्रान करान। तिक्याज़ि यि तिर्थ छु श्रान करन वाल्यन हुंद पाफ छैलिथ तिहुंदिस नैसीबस प्वन्य दर्ज करान। इतिहासस मंज दर्ज लुकु भवन तिर्थस छि 'लुकु प्वन्य'

तीर्थ ति वनान । अमि तिर्थुक ज़िकर छु राजतरङ्गिणी मंज़, अबूफज़ल
सॉबनि आइनि अकबरि, श्री आनन्द कोल बामज़य, श्री पी.एन.
कोल बामज़िय जियनि किताबन मंज़ ति ।

कँशीरि अनंतनाग प्यठु वेरनाग वति प्यठ लॉरिकपोरि गामु
मँज्य छु अख लोकुट कस्बु यथ लुकु भवन वनान छि । पाँच कनाल
दँहन मरलन हुंदिस अहातस प्यठ मबनी छु अख चुकूँजल नाग
येम्युक पोन्थ ब्रोंठकुन न्यबर नीरिथ छु अख केंचन गामन च्यनु
पॉन्थुक सँबीलु बनान तु दोयिम सासु बघन तु हतुबघन ज़मीनि
कनालन सहराब करान । चूँकि यि छु स्यठा मशहूर तिर्थ स्थान,
लूख ऑस्य 1990 तान्य अमि द्वह होवरेंव होवरेंव यिवान । अमि
दोह ओस अति बोड बारु यज्ञ स्वामी पोशि बबनि रहबरी तल करनु
यिवान । हतु बँद्य लुख ऑस्य रॉन्थ रातस बजन कीतन करान तु
सुबहन हवनुच पूर्ण आहुती दिथ सॉरी प्रशाद ग्रहन करान । 1990
तान्य ओस स्वामी पोशिकर नाथ कौल सॉबन सोरुय अति सॉमिथ
थोवमुत । सोरुय गाम ओस नेन्द्रि वँथिथ मन्दर गछान तु नागु गाडन
हुँदि बापथ केंह नतु केंह निवान । तमिकिन्य ओस तोतान्य नागुच्यन
गाडन ति द्वह पतु द्वह हुरेर पूरेर सपदान । तमि पतु छेनु खबरय केंह
यिमन गाडन क्याह गयोव ।

दन्त कथायव अनुसार ऑस लुकु भवनस मंज़ अख कँज
ज़नान, येमिस “कँज मॉज” ऑस्य वनान । यि ऑस लुकु सीवायि
ह्वन ज़ॉनिथ पनुन द्वह गुज़ारान । लुकु हेतु कर्म कँरिथ गव अँम्यसुंद
तफ स्यद तु अँम्य मॉग पाँ रोस शहुर बापथ पोन्थ वरदानस मंज़ ।
दपान अमिय हार ज़ूनपछि हुँज़ि बॉश्य द्वह येलि अँम्य पनुन ऑद

पोख साफ कॅरिथ तथ प्यठ लिवन फश दियुत, अँम्य त्रोव जानावारन
 तथ प्यठ तोमलु फॅल्य ख्यनु खॉतरु। जानवर आयि दानु खेनि,
 यिमन मंज़ अख कुहुन तु सफेद काव ति ओस। येत्यन येत्यन
 कावन पनुन्य तोंत लॉज, तत्यन तत्यन खोन कजि माजि टोंगरि
 सुत्य तु पाँ प्वारु खँत्य अस्मानन। दपान लुकु भवनु ऑस स्यठा
 जान आबॉदी, मगर पानिच किल्लत ऑसुख स्यठा। कँजि मॉज
 ऑस लुकु गरन दोह्य दोहस पोन्थ सारान। अकि द्वह ऑस पाँ नोट
 फेकिस प्यठ ह्यथ पकान, येलि बुथि अँक्य सुहन दोपनस बु आसय
 चे ख्यनु बापथ। कजि माजि कोरुस ज़ारपार तु दोपनस मे छु यि पाँ
 नोट काँसि हंदि बापथ ओनमुत। बु दिमय यि त्रेशि पाँ नोट तिमन तु
 पतु यिमय जल जल वापस। सुहन कॅरुस व्यनथ कोबूल। तँम्य
 वातनोव तिमन पाँ नोट जल जल तु आयि वापस। सुह ततिनस नु
 वुछिथ लोगुन वदनवान, यि सूँचिथ ज़ि सुह ओस ब्वछि होत। तस
 प्यव म्यान्य किन्य न्यबोखुय नेरुन। येलि अँम्य मस खुंजुन ह्योत
 तत्यन गव अख मनुश पॉदु। तँम्य दोपुस “चु क्याज़ि छख यूत
 पान मारान।” बॉतस मंज़ वॅनिस कजि माजि पनुन्य दॅलील। दय
 आव पनुनिस रूपस मंज़ तु वोननस :- “सु सुह ओससुय बुय। चु
 द्रायख अति ति पास, व्वन्य मंग चु क्या छुय मंगुन।” कजि माजि
 दोपुस “नँज़दीक्य गोछ कुनि जायि वोफूर पान्युक इन्तिज़ाम गछुन।”
 दयन दियुतनस वरदान तु कोरनस आँकार। यिमव सादनव पोन्थ
 नेरिहे, कजि माजि कोर तिय तु पोन्थ द्राव त्यूता ज़ि अति हेँतिन
 तॉमीर ति बन्युन्य।

मुकाँमी राजन बनाँव्य अथ तिर्थस प्यठ मन्दर तु धर्मशालायि।

क्वंडस अँद्य पँख्य लाज्यख गरिमच्चु कनि । यिमन मन्दरन मंज करुख मूर्तिंयि स्थापित । लूकन छु व्यशवास ज़ि कजि माजि ओस स्यदलक्ष्मी नाव । तिक्याज़ि येत्यन पोन्त्य द्राव, तथ छि अज़ ति स्यदलक्ष्मी हुंद अस्थान वनान । अथ जायि ओस रूद्रभवन ति नाव । दपान येति ओस राज़ लूकनाथ राज करान, तमि किन्य छु अथ लुकु भवन नाव प्योमुत । येतिक्य मँज़ीद तीर्थ छि महाकाल भैरव, वामन, गंगा तु नारायण नाग । अति प्यठ ज़ु किलोमटीर दूर शुमालस मंज छु “शारिका लम”, यथ अज़कल “हारिलम” छि वनान । शारिका गँयि हॉर । येत्यन ओस शारिका भगवती हुंद अस्थापन ति, येत्यन अकि मन्दरुच बुनियाद वुनि ति छि बोज़नु यिवान । योद अत्यन खनव, तमि कालुक्य नेरन नाना रँग्य निशानु । यि छु सोरुय देन कजि माजि हुंद, यस मँरिथ गँयि जानावारन हुंद पॉठ्य वुडिथ ।

ललितादित्य मुखता पीडन (695-731 इसवी) कोर अर्पन यि शहर विष्णु भगवनास तु बसोवुन यि शाहर बेयि । राज़ लॉरिकन ओस अख गाम सिर्यि भगवान सुंद्य नॉव्य बनोवमुत, यथ लारिकपूर नाव दितुन । ग्वडु छु लॉरिकपूर गाम यिवान तु तमि पतु छु लुकुभवन यिवान । बोद कालस मंज रूद लुकु भवन बोध केन्द्र । प्रानि वैदिक मूर्तिंयन सुत्य सुत्य द्रायि अति इन्सान सुंदि थज़रु बोधमूर्तिंयि ति । प्रानि वैदिक कालुच मूर्तिंयि यिमु स्यठा कुमतिय आसु, तिम नियख अथव पेठिय थोद तुलिथ तु बाकुय बोद मूर्तिंयि छि होत्यन येत्यन पेयमुच्चु । येतिक्य तॉमीर ऑस्य गाँधार तॉमीरन सुत्य मेलान । अमि पतु रुज़ यि जाय डामर जॉगीरदान हुंद केन्द्र । यिमन डामरन हेतुख वारु वारु डांगर या डार वनुन । अज़ ति छि अति डांगरपूर नावुच

अख बॅस्ती रोज़न। तमि पतु कोरुख अथ लुकु भवनस हमलु,
 राजि हर्षवर्धननिस राजस मंज़। 1947 ई० मंज़ आव मुगल बादशाह
 जहांगीरनि दॅस्य दरबार किस इतिहासकार सुंदिस वननस प्यठ
 अति अख बाग बनावनु। यथ इतिहासस मंज़ जूलता बाग छि वनान।
 बागस मंज़ आयि फ्वांर लागनु तु मॅहलु मंज़्य आयि आबशार
 त्रावनु। पॉतरि कनि, सेरि, चूनु तु लॅकरि सुत्य ऑस सॉरुय यि
 कॉम अन्द वातनावनु आमुच।

लाहोरस मंज़ बगावतुच तैम्बर प्यनु किन्य प्यव राजस तोर
 गछुन। मगर बदकिस्मती किन्य गॅयि तिम वतिय मॅरिथ तु पनुनि
 धर्मु अनुसार आयि तिम पुंछ वति चिंगसस मंज़ दफनावनु। लाहोर
 वॉतिथ आयि राजि सुंज़ मरनुच खबर आम करनु तु शाहजहाँ आव
 तख्तस बेहनावनु। येमिकिन्य लुकु भवनुच कॉम रूज़ अडुलैचिय।
 ओरनज़ेब सुंदिस वननस प्यठ हेचोव गवर्नर सॉफ खानन बेयि यि
 कॉम पूर करनुकि गर्जु कदम तुलुन। मगर सुती बदल्योव गर्वनर तु
 कॉम हेच नु अन्द केहं वॉतिथ!

1990 तुच त्रासदी मंज़ ति वोतुस स्यठा न्वकसान। अज़
 छि तति अख धर्मशाला, त्रे मन्दर तु अख शिवलिंग मूजूद। नागस
 ति आयि लुकव दॅस्य जंगल बन्दी करनु। व्वन्य छु दयस तान्य,
 बुथि क्याह आसि अमि मशहूर तिर्थुक हाल। हारु बॉश्य द्वह छि
 केहं लुख पनुन्यन पेतनर अति श्राद ति हावान। यि छि आम कहावत
 योद नु हारु बाह तिर्थस प्यठ गछि कांह तति प्रुछनस तु वननसः

‘लार लदिन्य बटनेय हारु बाह ति कॅरुथ नय।

पेत्रनु हुंघ नॉव्य अनु दनु दिथ, पनुन पान ति सोरुथ नय।।”

माता ज्वाला जी तु अमिच महिमा तु पूजा

हार जूनपछि चोदशय दोह छु माता ज्वालायि हुंद वोहरवोद यिवान मनावनु । सृष्टि बननु ब्रौठ विष्णु जी तु ब्रह्मा जियस मंज बागं येलि अख नारु मुहुल पाद गव तमिय समयि प्यठ छि स्व जाय हहिरेश्वर नाव किन्य महशूर । तँथ्य प्रज्ञलवनिस थमस हहिरेश्वरस नँजदीक छु तँथ्य बाल थौंगिस प्यठ शक्ति माता अँगु रूप माता ज्वाला जी हुंद स्यद्ध पीठ । अमिय किन्य छु ज्वाला जी, केंचव नावव मंज हहिरेश्वर ति अख नाव । चण्डी, चुल्ली चमत्कार कत्री हहिरेश्वरी ति छि अँमिस वनान ।

श्रीनगर प्यठ तुलमुल छि 14 मील यानि 21 किलोमीटर । श्रीनगर प्यठ खिव ति छि 14 मील यानि 21 किलोमीटर । यि रलावनु सुत्य छि अँमिच शकल यिथुकँन्य बनान :



जाला जी हुंद स्यदपीठ छु श्रीनगर प्यठ 21 कि० मी० खिवस मंज मौजूद । यथ जायि छि लोदव, बालुहोम तु खोनमुह वतव किन्य हैकान वौतिथ । मातायि हुंद यि तीर्थ छु तवौरीखी सिलसिलवार पर्वतन सुत्य गँडिथ या जुडिथ युस ज़न 'वस्त्रवन' नाव किन्य छु मशहूर । अँथ्य जायि छु पवेत्र जल क्वंड अख यथ वासुकि नाग छि वनान । वासुकियन छु समन्दर मंदनु विज़ि रज़ि हुंज कॉम दिचुमुच यैमिकिन्य तस ऑस्य 'नेति' वनान । वक्त गुजर्योव स्यठा त नेति बदल ह्योतुख जल क्वंडस 'नेतनाग' नाव वनुन । संस्कृतस मंज छि नेति रज़ि वनान ।

अमिय छु यिति ननान जि सागर मंथन छुन बेयि कुनि ति जायि आमुत करन, यि छु सेंतीसर किस मँदुरिस पॉनिस या क्षीर सागरस मंजुय करन आमुत।

रेवायच मुताँबिक छु वननु यिवान जि वख्तु वख्तु येलि नारु ब्रेह अति लब्बनु आयि सान्यन व्यदवान यानि बुर्जगन ति गव अम्युक साक्षात्कार।

सासबद्यव वॅरियव प्यठ छि अँस्य मानान जि दोयव दानवव चण्ड त मुण्डन छु दीवी दिवताहन हुज सॉरुय सम्पदा चूरि निथ अँथ्य वस्त्रवनच ग्वफायि मंज थँवमुच। सॉरी दिवता गॅयि शिवजिस निश तु सॉरी हाल तस वॅनिथ दियुत ज्वाला स्वरूप शक्ति दीवताहन तु कोरनख रख्यायि रूप अनुग्रेह।

माता ज्वाला जी कोर तिमन दोनवनी दानवन नाश तु सारिनुय प्रॉनियन कोरुन संकट तु वेग्न दूर। दीवतहन हुंद चूरि न्यूमुत दन तु सम्पदा कॅरुन तिमन वापस। दपान स्व सम्पदा ऑस 'खर्वन' यानि 10 हन खरबन बराबर। अमिय छु अथ जायि खर्वन बदलु वारु वारु नाव खिव प्योमुत।

अँथ्य वस्त्र वनकिस बालस प्यठ छि माता ज्वाला जी पुननिस परिवारस सुत्य शिला रूप रोजान। केह भक्त येलि पुनन्यव अथव बनोवमुत प्रसाद तथ शिलायि तलु कनि छि थवान, तिम छि कांह-कांह यिति अनुभव करान जि नारु ब्रेह रूप माता छि सु भूग लोलु तु मायि सान ख्यवान।

यात्री येलि ज्वाला जी मातायि हुंदिस दामनस तल छि वातान, तिमन पज्जि ग्वंडु वासुकी नागस यथ 'नेत नाग' ति छि वनान, मंज श्रान

कैरिथ मातायि हुंद दर्शन करनु खौतर ब्रोंठ कुन पकुन । मातायि निश वातनु बापथ छु 365 हन हेर पाव्यन ग्वडु प्यवान खसुन तु पतु छि मातायि हुंदिस मन्दरस ब्रोंठ कनि वातान युस ओठ कूनल छु ।

ज्वाला जी बालस पूर कुन छु श्री गणेश जिय कनि रूपस मंज, दख्यनस मंज धर्म राजु, मगरिबस मंज वासुकिय नाग तु वोतुरस मंज छि नरसिंह जिय दरवाजन प्यठ व्यराजमान । यिहुंज पूजा कैरिथ गछि 16 पटल रूपी 16 हन ज्वालायन हुंज पूजा करुन्य । तिहुंघ नाव ह्यथ व्वतर तरफु (1) वरुणी, (2) वात्याली, (3) वाराही, (4) कुलसुन्दरी, (5) कुवेरी, (6) कुलिका, (7) कुण्ठी, (8) कुसिता, (9) कुटिला, (10) कुहू, (11) कुण्ठी, (12) कुम्बेश्वरी, (13) कुन्तकी, (14) कुवेरी, (15) करुन्धी, (16) कृति ।

तमिपतु छे ओठन यूगियन हुंज रोजन जाय यिहुंद नाव छु:

(1) माया (2) मोहनी (3) बाला (4) भगरूपिनी (5) भगवासा (6) भीरण्डा (7) मृडौनी (8) मायान्देश्वरी । यिमन नेमिथ छि ज्वाला जी हुंज स्वख दिनु वाजेन्य मूर्च तु योसु अँकिस सादकस छि प्रथ कुस्मुक स्वख तु सम्पदा दिवान । तिम छि (1) ब्रह्मी (2) शाम्भवी (3) दुर्गा (4) वाराही (5) कुलकामनी (6) नारसिही (7) कौमारी (8) मातंगी (9) भद्रकौली तु (10) उग्रतारा ।

यिम सारेय दीवियि छि माता ज्वाला जी हुंज 10 कलायि तमि पतु पेठकनि त्रैपोरस्वन्दरी तु दक्षिणकालीका जी हुंज गछि पूजा करुन्य । मंजस बासि साख्यात माजि ज्वालायि हुंद दर्शुन तोर आमुत्यन बैखुत्यन तु करन नमन । अँमिस छि चोरव अन्दव ज्वालिनी, जठिनि, जट्टा तु जालंधरी वास करान । ततीनस गछि माजि आलव दियुन तु तसुंघ ग्वन

गेविथ गछि पूजा करुन्य । पोश लागनु विजि गछन यिम मंत्र परुन्य :
 ॐ ह्री ज्वाला मुख्ये नमः शंभायै नमः दुखहारिण्य नमः बलिप्रियौय
 नमः नागकन्यायै नमः मार्तण्ड रूपायै नमः मूलाधारायै नमः दुर्भाग्य
 हरायै नमः षटचक्रस्थायै नमः सुभद्रायै नमः वितस्तायै नमः ताप्यै
 नमः शिवसङ्गायै नमः मलिम्लुच्यै नमः सन्ध्यायै नमः अग्निवाहनये
 नमः अग्नीश्वर्यै नमः बलाकायै नमः स्कन्द मात्र नमः गुप्तायै
 नमः प्रकटांय नमः मनोर भायै नमः वरदायै नमः प्रेतस्थायै नमः
 वहिनलोचनायै नमः अग्निमुख्यै नमः महादीप्तयै नमः सेंद्रायै नमः
 वसुंधरायै नमः सप्त स्वरायै नमः कालरात्र्यै नमः महारात्र्यै नमः
 महाविद्यायै नमः ज्वालामुखीश्रवरी देव्यै नमः ॐ महात्रिपुर
 सुन्दरीयय नमः ॐ ह्री श्री ज्वालामुखि मम सर्व शत्रून् भक्षय
 भक्षस ह्री फट स्वाहा । श्री ज्वाला भगवतयै अर्घ्यो नमः पुष्प नमः ।।

दुप तु दीप जालिथ आलविथ गछि परुन : श्री ज्वाला भगवतयै
 दीप धूप कर्पूर परिकल्पयामि नमः । तमिपतु पोश अथन मंज रँटिथ
 गछि लीला रब्द स्थापित ... गौरी अम्बांम-पाठ परुन ।

ॐ लीलारब्ध-स्थापित-लुप्ताखिल-लोकां,
 लोकातीतै-र्योगिभिर्-अन्तर्-हृदि-मृग्याम्।
 बालादित्य-श्रेणि-समान-द्युति-पुंजां,
 गौरीम्-अम्बाम्-अम्बु-रुहा-क्षीम्-अहम्-ईड्ये॥

आशा-पाश-क्लेश-विनाशं विदधानां,
 पादाम्भोज-ध्यान-पराणां पुरुषाणाम्।
 ईशीम्-ईशाङ्गार्धं हरां तां तनुमध्यां,
 गौरीम्-अम्बाम्-अम्बु-रुहा-क्षीम्-अहम्-ईड्ये॥

प्रत्याहार-ध्यान-समाधि-स्थितिभाजां,
 नित्यं चित्ते निर्वृत्तिकाष्ठां कलयन्तीम्।
 सत्य-ज्ञाना-नन्दमयीं तां तडित्-आभां,
 गौरीम्-अम्बाम्-अम्बु-रुहा-क्षीम्-अहम्-ईड्ये॥

चन्द्रापीडा-नन्दितमन्द-स्मितवक्त्रां,
 चन्द्रापीडा-लंकृत-लोला-लकभाराम्।
 इन्द्रोपेन्द्रा-द्यर्चित पादाम्बुजयुग्मां,
 गौरीम्-अम्बाम्-अम्बु-रुहा-क्षीम्-अहम्-ईड्ये॥

नाना कारैः शक्ति-कदम्बै-र्भुवनानि,
 व्यापत स्वैरं क्रीडति यासौ स्वयमेका।
 कल्याणीं तां कल्पलताम्-आनतिभाजां,
 गौरीम्-अम्बाम्-अम्बु-रुहा-क्षीम्-अहम्-ईड्ये॥

मूलाधारात्-उत्थित-वन्तीं विधिरन्ध्रं,
 सौरं-चान्द्रं धाम विहाय ज्वलिताङ्गीम्।
 स्थूलां सूक्ष्मां सूक्ष्मतरां ताम्-अभिवन्द्यां,
 गौरीम्-अम्बाम्-अम्बु-रुहा-क्षीम्-अहम्-ईड्ये॥

आदि-क्षान्ताम्-अक्षर मूर्त्या, विलसन्तीं,
 भूते भूते भूत-कदम्बं प्रसवित्रीम्।
 शब्द-ब्रह्मा-नन्द-मयीं ताम्-अभिरामां,
 गौरीम्-अम्बाम्-अम्बु-रुहा-क्षीम्-अहम्-ईड्ये॥

यस्याः कुक्षौ लीनम्-अखण्डं, जगत्-अण्डं,
 भूयो भूयः प्रादुर्-अभूत्-अक्षतमेव।
 भर्त्रा सार्धं तां स्फटिकाद्रौ, विहरन्तीम्,
 गौरीम्-अम्बाम्-अम्बु-रुहा-क्षीम्-अहम्-ईड्ये॥

यस्याम्-एतत्प्रोतम्-अशेषं मणिमाला,
 सूत्रे यत्-वत् क्वापि चरं चाप्यचरं च।
 ताम्-अध्यात्म-ज्ञानपदव्या-गमनीयां,
 गौरीम्-अम्बाम्-अम्बु-रुहा-क्षीम्-अहम्-ईड्ये॥

नित्यः सत्यो निष्कल एको जगदीशः,
 साक्षी यस्याः सर्गविधौ सहंरणे च।
 विश्वत्राण-क्रीडन शीलां शिवपत्नीं,
 गौरीम्-अम्बाम्-अम्बु-रुहा-क्षीम्-अहम्-ईड्ये॥

प्रातः काले भावविशुद्धिं विदधानो,
 भक्त्या नित्यं जल्पति गौरीदशकं यः।
 वाचां सिद्धिं सम्पतिम्-उच्चैः शिवभक्तिं,
 तस्या-वश्यं पर्वत-पुत्री विदधाति ॥ गौरीम्-अम्बाम्

तमिपतु गछि ताहरि सुत्य यि रीथ आसि पूजा करनावन्य या
 पानय करुन्य । आँखरस प्यठ गछि मातायि अँद्य अँद्य ओडुय प्रकरम
 दियुन तु गछि मंगुन पाप शाप गाल तु लोतिस गोबिस कर ख्यमा ।



हार पुनिम तु गुरु पूर्णिमा

शारदा महात्मय अनुसार व्यास जियन छिनु कीवल वीद
 लीखमिति योत बॅल्कि छिन जमा कॅरिमुत्य, व्यस्तोरिमित्य तु
 तरतीब दिथ पनुन्य बॅखुत्यन हुंघ दॅस्य पवेत्र रिर्काड रूप दर्ज ति
 करनॉव्यमुत्य । पैला (Paila) वैशमपयाना जैमनी तु सुमन्तु (Jaimini
 तु Sumantu) छि खासकर तिम बॅखुत्य यिमव यि कॉम छि कॅरमुत्र ।

तैम्य छि तिमन बड्यन ब्रह्मन रेशन सुत्य वैदिक महा वाखन प्यठ
स्यठा वार्तालाप कोरमुत, यिमन यिमन उपनिशद, अँरन्यक तु
सम्महितव रूप वीद बाज़रस मंज़ नँन्य ऑस्य कडुन्य।

व्यास जियन यि पानय उत्तर मीमानंसाहस मंज़ ल्यूखमुत
यथ आमतोर वीदान्त छि वनान, छु वुन्यक्यन ति सही त्यूत यूताह
व्यास जियनि समयि ओस। बेयि छु अज़ ति यि बुदि जीवन निश
सु अजूब युस अज़िकिस विज्ञानस सुत्य रलान छु। तैम्य लीछ
महाभारतुच कथ यथ मंज़ रूप बदलावनुच थ्योरी तु अभिमन्यु संज़
अवस्था छन दर्शोवमुत। प्रतीक आत्मक स्वरूप परा तु अपरा
शक्ती हुंद राज आदि पुरानस मंज़ वँनिथ दियुत तैम्य असि सारिवुय
ख्वतु बोड तोफ़।

श्री व्यास जियस छि आदि गुरू रूप तिहुँद्य बजरुच पूजा
यिवान करनु। यिम परातन ग्वर तु सतव चिरनजीवन मंज़ अख छि
गँज़रनु यिवान। हारु पुनिम द्वह छि तिम सॉरी हँद्य तसंज़ पूजा
करान यिगु नु ज्ञानी ग्वरन निश ग्वरु दारन आसि कोरमुत। तिम
ति छि स्यठा बॉग्यशाली यिमन ज्ञानी ग्वर आसन, मगर पूज़नख
व्यास रूपस मंज़। अथ जूनपछि पुनिम छि व्यास पूर्णिमा या ग्वरु
पूर्णिमा ति वनान। अमि अलावु छु व्यास, हेछनुच गँद्य यथ महान
गदेव मंज़ महान, व्यास गँद्य छि वनान। होतार गव सु युस अँगनस
आहोच दिनु विज़ि वीद तु बाकी मंत्र परनस मंज़ सक्षम आसि। तस
छि व्यास गँद्य दिनु यिवान तु व्यास रूप पूज़नु यिवान। तथ किताबि
मि मंज़ मंत्र ज़न शख्ती सरस्वती आवाहन करनु गर्जु परनु या
ग्यवनु यियि ति छि अमि द्वह पूजा करनु यिवान।

हार तु श्रावन पुनिम प्यठ छि हरिश्चर यात्रीयि गछान । पोम्पर
 किस अँकिस मशहूर खेनमुह गामस मंज हँरिश्चर बालस प्यठ छि
 अख अदबुत गोफा । येम्युक आकार छु लुकन हुँदि वननु किन्य यचि
 हियुव । येमिकिस तालवस छु शेशनाग ज़न पानु वैराजमान । बाल
 दामनस तलुकँन्य गामस मंज छु अख नाग, यथ मंज तोर आमुत्य
 यात्री छि ग्वडु श्रान करान तु पतु छि निकि निकि गाशि बालस हेवान
 खसुन । म्यानि बेनि मोहनी मुन्शी यस पोम्पर छि बाल कृष्ण मुन्शीयस
 बागुन्य आमुच हुँदि वननु अनुसार छि यि ग्वफा तकरीबन गाम प्यठ
 आँठ मील दूर । अख अख कदम छु सूँचिथ तुलुन प्यवान । पकान
 पकान छि गुनसु तु सरफ नज़रि गछान । तमिकिन्य आसु ज़नानु तु
 शुरय कमय पहान ओत गँछिथ हेकान । अथ ग्वफि मंज वाँतिथ छि
 शिव, पार्वती, कोमार तु श्री गणेश सुंज मूर्ती व्यराजमान । यिमन हुँद
 दर्शन कँरिथुय छु सोरुय थकुन ज़न गाँब गछान । यात्री छि पतु पूजा तु
 मंत्रव ग्रज तुलिथ पनुन्य यात्रा स्वफल बनावान । ब्रोंठ आँस्य ज़ाँनी
 वनान ज़ि शिव लिंगस प्यठकनि आँस्य ज़ु स्वनु सुँद्य मुहरय वुछान ।
 यिथुकँन्य अमरनाथ छि लुख वुनि ति कोतरजोरि हुँद दर्शुन करान,
 तिथुय कँन्य आँस्य लुख द्वन स्वनु सुँद्यन मुहरेन हुँद दर्शुन करान, यिम
 हंगु मंगु अति शिव लिंगस प्यठकनि प्रकट आँस्य सपदान ।

येलि यथ ज़िन्दगी मंज कांहरुच वथ हावि तस छि वनान ग्वर ।
 यि ग्वर छु तस व्यवहारस सुत्य सुत्य दय सुंज लय करनुच प्रेरना दिथ
 पनुनिस दर्मस तु कर्मस प्यठ पकुनावान । अमि द्वह छु बखुतिस तस
 वतु हावुकस पूजा करुन्य तु पनुनि श्रदा तु वेशवासुक अख इम्तिहान
 पास करुन ।

यि ग्रहस्थ आश्रम छु द्वन बौचन हुंदि खौतरु तपो भूमी, यथ
मंज अँकिस जनि छु पनुन माहराजुय ग्वर आसान, युस तस संसारुव्य
वेग्न तु परेशौनियन मंज शानु बु शानु रूजिथ महाल वतु सँहाल छु
करान। माहराजु छु पनुनि त्रिय हुंदि बापथ पति परमीश्वर बनान।
संस्कार चंद्रिका किताबि हुंदिस 191 वर्कस प्यठ दर्ज यि मंत्र, यथ मे
कौशिर पौठ्य तर्जमु छु कोरमुत। यस माहरेनि हुंज मंगल व्यनथ छि
दयस कुन आसान छि यि वनान जि तसुंद ग्वर छु पनुन पति। मंत्र छि:-
ॐ प्र मे प्रतियानः पन्थाः कल्पतां शिवा अरिष्टा पतिलोकं गमेयम्।।

यस वथ म्यौनिस बरथा सुंज,

तैथ्य प्यठ रोजु बति पकान।

व्यग्नव रोस स्वखुय स्वख बूगिथ,

सारिनुय हुंदिस पालनहारस रोजु प्रावान।।

यिथुय पौठ्य छु माहराजु सुंद ग्वर सुय योनि तु गुरुजी बनान युस
तस नौल्य त्रौविथ छु ख्यनु ख्यनु याद पावान जि चु बन पंडिथ। रत्यव
ग्वनव, रुति अचार व्याचार तु मनोबल सुत्य बन यूगी। येमि सुत्य चोन
मनस मंज बसवुन भगवान गछि प्रसन्न। चु तुल पनुन पान त्यूत थोद
येमिकिन्य चु हेकुहान पनुन आत्मा रूप दय प्रजुनौविथ तु जौनिथ या पनुनि
यूग बलु सादन प्रौविथ बनख कर्मव र्योश। मगर अमि पतु ति योद सानि
जिन्दगी मंज तियुथ ग्यौनी रेशा आव युस अमि ब्रौहकुन ज्ञानु किन्य हैकि
असि प्वखु बनौविथ, सु हेकुहोन तेलि ग्वर मौनिथ। तिहुंघन चर्णन पोशि
रूप हवनु किन्य छु पनुन आत्मा त्रप्त करुन, येमिकिन्य संसौर्य व्यवहार
सौफल सपदनस सुत्य सुत्य गछन दय वतु साफ।



कमला एकादशी

श्रावण गट पछि कॉश्य छि कमला एकादशी वनान । यि दोह छु कमला दीवी हुंद मनावनु यिवान । कॅशीरि हुंदिस त्राल कस्बु किस बगमोर गामस मंज छु अँकिस पहाडी प्यठ अख सोन नाग । यि नाग छु चोपॉर्य यारि मूलव सुत्य वॅलिथ । यि नाग छु अख कूल ह्रुव नज़रि तल यिवान । यथ बुधि अख जोय छि नैबर कुन नेरान येत्यन बखुत्य छि श्रान करान । अथ नागस प्यठ छि अमि कॉश्य दोह दिवय लगान । अमि गामुक्य लुख छि अमि दोह ग्वडु श्रान करान त.पतु पूजा पाठ कॅरिथ पानस क्युत रुचर कांछान । विस्थापनु पतु छि लुख येति प्यठ तोर दिवयि मंज शोमूलियत करनि गछान । दीवी करिन असि सारिनुय बजाह तु बाँगरिन स्वख सम्पदा तु दाद्यन दवा ।



श्रावन बाह तु कपाल मोचन तीर्थ


कपाल मूचन शुपियनस मंज छु तिमन हुंद श्राद यिवान हावन यिम खान्दर ब्रोंठ या लकचि वाँसि मंज मूदिमत्य छि आसान । शंकर जियन छु वरदान दियुतमुत, यिमन अति यियि श्राद हावन तिम छि मुछि गछान । जेमि छि ह्यकान यि श्राद अखनूरस मंज हॉविथ । अथ श्रादस मंज छु (गुन्दुम) कुनक ओट इस्तिमाल यिवान करनु ।

कपाल मोचन तीर्थ :

कहावथ छि इन्सान छु गलित्यन हुंद पुतलु । गलती करनु सुत्य छु अख मनुश हेछान तु स्वफल सपदिथ पनुन्य रुच वथ लबान । मगर

अमि कथि सपदिव तोह्य हॉरान ज़ि सृष्टी बनावन वॉल्य ब्रह्माजियन ति छि अकि दोयि लटि स्यठा बजि गल्ती करिमुच्च येमिच अख मिसाल छि यिथु पॉठ्य : 'दपान अकि सातु गॉयि भगवान शिव ब्रह्मा जियस तु विष्णु भगवानस ब्रॉहकनि प्रचन्डी थमु रूप ट्रेंठमान, यथ नु कांह ग्वडु नु तिहुर ओस नज़रि गछान। दोशवय सपद्य स्यठा हॉरान तु द्रायि अमि थमुक ग्वड तु तिहुर लबनि। विष्णु द्रायि पातॉल्य तु ब्रह्मा जी द्रायि

आकॉश्य थमुक तिहुर या ग्वड लबनि मगर सॉरिसुय फीरिथ म्यूल नु दोशवनी न आदि तु न अंद। येलि दोशवय वापस यिथ अख अँकिस मील्य, ब्रह्मा जियन वोन विष्णु भगवानस अपजुय ज़ि मे वुछ अमि शोलुवन्य थमुक छोर आकाशस मंज़। येमिच शाहदत



छि गाव तु केतकी पोश। गाव आयि ब्रॉहकुन अननु तु येलि पुछ्होस ज़ि चे वुछथा अम्युक छोर आकॉश्य, तँम्य कोर कलु गिलुनॉविथ आंकार, मगर लॅट गिलुनॉविथ कोरुन नकार। ब्रह्मा जियनि अपज़ि सुत्य गव प्रज़लवनिस थमस त्रास येमिकिन्य शिव जी सपदेय स्यठा क्रूदी। क्रूदस मंज़ दियुत शिव जियन शाप। तिमव वोन ज़ि दर संसॉर्य करि नु कांह ति मनुश ब्रह्मा जियस तु गॉव म्वखस पूज़ा। केतकी पोश ति यियि न काँसि ति दीवस पूज़ि लागनु। चूंकि गॉव कोर आंकार कलु सुत्य तु नकार लटि सुत्य तमिकिन्य छि गॉव म्वखुच पूज़ायि ख्वतु लटिच पूज़ा स्यठा परम यिवान माननु। येलि शिव जी सुंद क्रूद अमि

सुत्य ति गव नु शांत, तिमव छुन ब्रह्मा जियन्यव पाँचव कलव मंजु
अख कलु चँटिथ तु थोवुख अथस मंज। युस पतु तस तँथ्य अथस गव
लोरिथ। कूद शांत सपदिथ च्यून शिव जियन जि तिमन खँच अमि
कूदु किन्य ब्रह्म हत्या, येम्युक प्रायाचित करुन छु ज़रूरी। स्यठा यत्नु
सुत्य ति गव नु यि कपाल अथु निश कँह जुदा येमिकिन्य शिव जी
सपुद्य स्यठा दिलमलूल।

शिव जी गँयि बहाव वँरियव पतु वारानसी येति तीर्थस प्यठ
श्रान कँरिथ गव कपाल अथु मंज गौब, मगर वापसी प्यठ गव यि
कपाल बेयि अथस मंज इज़हार। आँखरस गँयि शिवजी नन्दियस
प्यठ सवार तु अम्युक प्रायाचित करनि द्रायि शुपियन गामकिस तीर्थस
कुन। नन्दी सुँदि तेज़ रफतारु किन्य गव तसुँदि पडरु सुत्य अँकिस
बजि कनि चकनाचूर, येमि सुत्य अथ एहातस गव अख बोड त्राग येमि
मंज अख नाग गव इज़हार। अथ नागस मंज अथु त्रॉविथ गव कपाल
गौब तु ब्रह्म हत्या शापु निश गव शिव जी मुछि। अमि पतु गव यि तीर्थ
कपाल मोचन नावु किन्य ज़गि मंज मशहूर। कांह ति कुनि ति जायि
हुंद हैकि पनुन्यन पेत्रन श्राद अथ तीर्थस प्यठ हॉविथ। येमिकिन्य सु
पेत्रर छु मुख्य दामस वातान। अकाल मोत या अडुचँट्य वदल यिमन
ज़ीवन आसि गौमुच, अथ तीर्थस प्यठ श्राद हॉविथ छि तिम मोक्ष
प्रावान।

वननु छु यिवान जि द्विगाम शुपियनस नँजदीक अथ कपाल
मोचन तिर्थस प्यठ छि अकिदोह रेश्यन हुंज रेशिबायि श्रान करनि
यिवान। तिमव वुछ तति अख नेरवस्त्र यूगी। नंगु यूगी वुछिथ गँयि
रेशिबायि रूज़िथ तु कूदु सुत्य गौंडनख नार। कूदस मंज दियुत तिमव

यूगियस लिंगु रोस रोजनुक शाप । यिम यूगी ऑस्य पानु शंकर, तिम
 कति अनुहन तिम दिव्य अँछ येमिकिन्य तिम हेकुहान भगवानस
 प्रजुनॉविथ । चूकि तिम छि दया सागर, पनुनि वरद स्वबावु किन्य
 दियुत दीवन तिमन शापु बदलु वरदान, जि येमि तीर्थुक फल मेलि
 तैमिसुय, युस श्रान कॅरिथ येमि लिंगुच पूजा करि । पनुन आत्म लिंग
 रोटुन अथस मंज, मगर यि प्योस अथु मंज वॅसिथ तु प्योव जमीनि
 प्यठ । शिव लिंग बन्योव निराकार मूर्ति हुंद प्रतीक । बोलेनाथुय छु कुन
 तु कीवल दीव यिहुंदिस लिंगस छि मूर्ती रूप पूजा करनु यिवान । पनुनि
 ऑसु कॅडिमिति शब्दव बनोव शिव जियन पनुन लिंग पूजिमान ।
 रेश्यबायव हुंदि शापु किन्य छि सॉरिसुय लिंगस प्यठ सॅन्य दाग ।
 यिहोय लिंग छु 'हाटकेश्वर' रूपस मंज दुस जगि मशहूर । असि छु
 महिमन्ना स्तोत्रस मंज येमि शलूकु सुत्य अम्युक प्रमान मेलान । युस
 यिथु पॉठ्य छु :-

अपूर्व लावण्यं विवसन तनोस्ते विमर्शतां ।

मुनीनां वाराणां समजनि स्कोप व्यतिकरः॥

यतो भग्ने गुह्येसकृत अपि सपर्या विदधतां ।

ध्रुवं मोक्षोऽश्लीलं किम् अपि पुरुषार्थं प्रसवि ते॥२३॥

वुरियानु वुछिथ चुय शंकर, रूजिथ गॅयि रेश्य बाये ।

कूदस मंज लिंगु रोस रोजनुक शाफ दियुतहय बेवाये ॥

तीर्थ श्रानु पतु लिंगु पूजायि मूक्षुक दितुथ वरदान ।

पाफ शाफ द्वन्द गलन सॉरी लिंग बनोवुथ पूजिमान ।

चानि लिंगु पूजायि ही शंकर, योद बंदनव जीव छु म्वकुलान ।

क्या छु पर तस थ्यरु दयानु युस स्वरूपस चॉनिस पूजान ॥


श्रावन पुनिम

अकि दन्त कथायि अनुसार छु वननु यिवान ज़ि सँतीसर ओस तमि विज़ि मशहूर अख बोड सर माननु यिवान, येलि कश्यप रेशिन्य व्यनथ कबूल कॅरिथ भगवान विष्णुहन, अन्नतन, शिव जी तु पार्वती वरमुलि किन्य पॉनिस खन्न दियुत। बाल तु पर्वत आयि अथि। दपान भृगीष रेश्य छि यि अमरनाथ ग्वफा तमि विज़ि वनि कॅडमुन्न येलि सु हिमालय पर्वतुक ब्रमन करनि ओस गोमुत। येलि लूकन खबर गॅयि तिमव ति ह्योत अमि दिलकश ग्वफायि हुंद दर्शुन करनि युन।

पुरानव किन्य छि यि अमरनाथ ग्वफा 51 शक्ति पीठव मंज़ अख पीठ। सँती हुंदि अँगनस पान हुमनु पतु येलि शिव जियन स्व कोछि बॅरिथ तांडव नचुन ह्योत करुन, तसुंदि शरीरुक अख अख तान येत्यन येत्यन प्यव, तत्यन तत्यन बन्योव अख अख शक्ति पीठ। अथ अमरनाथ ग्वफायि मंज़ ओस सँती हुंद कण्ठ प्योमुत। अमि पवेत्र ग्वफायि हुंद सतह समन्दर प्यठु थज़र छु 3952 कि०मी०। यि छि ज़िलु अन्नतनाग प्यठु 54 कि०मी० दूर।

परिवर्तन छु सृष्टि हुंद नियम तु युस ज़ाव तस छु मरुन। परम ब्रह्म परमात्मा युस आदि तु अंत रोस पोशुवुन तु नाशि रोस छु, छु अँथ्य ग्वफायि मंज़ शिव लिंग अमरनाथ रूपस मंज़ व्यराजमान। अमिय छि अँमिस अमर नाथ वनान। सारिनुय मंज़ आत्मा रूप वास कॅरिथ छु यूगी बॅखुत्यन ति अमर बनावान। दपान पथ कालि येलि कॅह यूगीज़न अँमिस निश अमर रोज़नुक अमृत मंगनि आयि, शिव जी सपदेयि तिहुंदिस तपस प्यठ प्रसन। पनुनि कलु प्यठु तुजिन चन्द्रम

कला तु चीरिथ द्रायि तमि मंजु अमृत दार, योसु असि ब्रोंहकनि अमरावेंती
 नदी रूपस मंज छि। तिमन दोपुन युस अथ मंज श्रान करि सु गछि
 अमर। तिमव कॅर शिव जियिन्य अस्तुति तु व्वपासना। शिव जियन
 कोर तिहुंजन अँछन ब्रोंहकनि लिंग रूप दारन तु वोननख 'तोह्य कोरवु
 मे अमरत्व प्रदान। व्वन्य रोज़िवु नु तोहि मृत्यु बय कॅह। तोह्य सपदिव
 मेय सुत्य लय तु अज़कि प्यठु गछि यि लिंग अमरनाथ लिंग नावु
 मशहूर।' यि वर दिथ ह्योत सदा शिवन अँथ्य ग्वफायि मंज रोज़ुन।
 दपान चन्द्रकला चीरान-चीरान पेयि कॅह छिकु अथ ग्वफायि मंज।
 यस भस्म रूप बॅनिथ तति अमृत लवु छे नेरान। येमि दोह शिवन
 शिवलिंग रूप दारन कोर तमि दोह ऑस श्रावन पुनिम। दपान अँथ्य
 जायि छि शिव जियन पार्वती माता जी अमर रोज़नुच कथा वॅन्यमुच।
 दपान कथा बोज़ान-बोज़ान पेयि पार्वती मातायि नेन्द्र मगर अति ऑस
 अख कोतर जूर्य, यिमव यि सॉरुय कथा बूज तु गॅयि अमर। यिम



अज्ञ ति छि मँज्य मँज्य लूकन अँथ्य ग्वफायि मंज दर्शुन दिवान ।

अमरनाथ यात्रा छि स्यठाह कँठिन । अथ यात्रायि मंज छु लुकन तुर, थकुन तु शाह छोडुन या ग्यूर युन महसूस गछान । मगर यि सोरुय सफर छु अन्तर आत्माहस श्वद तु शक्ति प्रदान करान तु मनुकिस अंदकारस च़टान । अति दर्शुन कँरिथ छु मनुश रुच प्रकृत प्रावान तु दिलचि यछायि छेस पूर गछान ।

बकोलि श्री चिन्दामणी मन्दिर निरंजनी अखाडा, रोड हरिद्वार, मध्यप्रदेश होशंगाबाद ज़िलुकिस अँकिस गामस मंज ओस पथकालि अख महन्त रोप सुद डंडु हेथ यात्रा शोरू करान । यि डन्डु ओस भगवान शंकर सुंद डन्डु माननु यिवान । बेयि दोयिमि मानितायि मुताँबिक ओस यि डंडु पानु भगवान शंकरय माननु यिवान । मगर वक्त गुज़र्योव तु यात्रायि मंज हेतिन स्यठाह मुशकिलात यिन्य । सिखन हुंदि पाँचिम गुरु श्री अर्जन देवन दियुत 'छडी महन्तस' अमृतसरस मंज ज़मीनु टुकरु बतोरि दान ताकि महन्त हैकि अमरनाथ यात्रा अमृतसरु प्यठ शोरू कँरिथ । स्यठाहन वरियन कँर अमृतसरु प्यठय 'छडी महन्तन' यात्रा शोरू । सासु बँद्य श्रदालु आँस्य छडी पतु पतु पँकिथ अमरनाथ वातान । मगर बीसवी सँदी शोरू गछनु सुती हैचुख यि यात्रा श्रीनगर प्यठ शोरू करुन्य । अज्ञ ति छि यि यात्रा श्रीनगर दशनामी अखाड प्यठय शोरू सपदान । यिम छि बाज़ाँबतु पाँठ्य शंकर जियनिस लिंगस (युस पाँचव मोखव अथ अखाडस मंज छु) पूजा करान तु पतु हर कुनि थकुपँजि प्यठ पूजा पाठ कँरिथ छि यात्री यात्रा करान ।

असि छु ज़िठ्यन निश बूजमुत ज़ि अख पंडित ओस येम्य शंकर जी प्रावनु बापथ कँर स्यठाह कँठिन तपस्या । आँखुर तपस्यायि

प्यठ प्रसन सपदिथ तु अँम्यसुंजि दर्शन मांगय प्यठ गव साक्षात अख
 ग्वसौन्य अँमिस ब्रोंठकनि पौदु तु दोपनस 'चोन केशुन वुछिथ हावय बु
 छोट वथ शंकर जी प्रावनुक।' हीमाल पहाडुच निशानदीही कॅरिथ
 पुछनस पंडित जियन 'बु किथु हेकु तोर कुनजोन वौतिथ।' शंकर
 जियन दिचुस र्वपुसुंज छँड्य तु दोपनस यि बनि चॉन्य वतुहावुक तु
 वातनाविय माटालस प्यठ।' बराबर श्रावन पुनिम दोह कोर पंडितन
 तिय तु वोत ग्वफायि मंज येति तस साक्षातकार सपुद। शंकर जियन
 वोनस प्रत्यक्ष जि 'हर वॅरयि गछि यि छँड्य योत वातुन्य।' तनु प्यठ
 रूज प्रथा जि शंकर जियन पुनि अथु दिचमुच छँड्य छि हर वरियि
 बावनायि सान श्रावन पुनिम दोह तोर वातनावनु यिवान तु पूजा अर्चना
 कॅरिथ छि बेयि श्रीनगर अखाडस मंज वापस वातनावनु यिवान।

स्यठाह प्राचीन कथि अनुसार ओस अख मुस्लमान गबरेश
 यस बोटा मलिक ओस नाव ओस पुन्य तीर्य हेथ न्यूर खोतमुत।
 कुसतौन्य साद गव तपौर्य तु अँमिस कुन पिलनोवुन अख चुनि ठेलु।
 येलि मलिक दोह बॅरिथ शामन गरु वोत तँम्य दुन यि ठेलु येमि मंज
 स्वन, लाल तु जवाहर चुन्यव बदलु द्राव। सु ठेलु ति ओस स्वन सुंदुय
 बन्योमुत। तँम्य तुजि वोटु तु द्राव सादस छारनि। येत्यन तँम्य साद
 वुछमुत ओस, तत्यन मीज तस साद सुंदि बदलु अख ग्वफा, यथ मंज
 शीनुक शिवलिंग ओस तु यि वुछिथ गव सु स्यठाह हैरान। अँथ्य सुत्य
 वुछन पर्वती तु गणेश सुंद्य ति लिंग। अमि दोह ओस श्रावन पुनिम।
 जून गाशस मंज ओस्य यिम त्रेशवय लिंग तीत्याह ख्वशडोल तु चम्कवुन्य
 बासान ज़न ति बासेयस त्रेशवय बॉच तिम अख अँकिस सुत्य खिन्दु
 करान। बोटा मलिक आव वापस गरु तु वोनन यि राज सारिनुय। तति

प्यठ अज़ तॉन्य छि सॉरी हार पुनिम प्यठ श्रावन पुनिम तॉन्य शिव जी सुंद दर्शुन करनि बापथ ओर गछान। यि तति चढावु यिवान छु तमि मंज़ छु मलिकन ति पनुन हिसु वातान।

‘दान्यशवर’ यात्रा ति छि श्रावन पुनिम द्वह करनु यिवान। बंडु पूरिस मंज़ छु अख गाम यथ ‘अरयुन’ गाम छि वनान। अमि गाम प्यठ यात्रा शोरु कॅरिथ जंगलव मँज्य स्यठा कुह चॅटिथ छि अँस्य ‘दान्यशवर’ ग्वफि वातान। यि मुशकिल सफर तय करनस छि अरयुन गाम प्यठ सथ गंटु लगान। वति पकान पकान छु अख नाग यिवान, यथ ‘नारान नाग’ छि वनान। यात्रायि गछनु ब्रोंठ छि नारान नागस मंज़ यात्री श्रान करान तु अदु छि ब्रोंठकुन पकान। अथ वति मंज़ छि ज़ु डाय मील तीयत्याह तंग, यथ प्यठ कुन तु कीवल इन्सान छु पॅकिथ हेकान। ग्वफायि मंज़ वॉतिथ ख्वसु स्यठा तंग छि अँस्य हॉरान गछान, येलि अँस्य अख ज़्यूठ कनिव कंज़ तु मुहुल छि वुछान। वननु छु यिवान ज़ि यि छु पार्वती जी हुंद। ख्वरि तरफु छिस भगवान शंकर पानु व्यराजमान। ग्वफायि हुंदि तालवुरु आकार छु शेशनागस ह्युव। यिमन नागन हुंदव चाँट्यव मंज़ छु अख अख पाँ प्योर वसान, यस ज़न साज़ुच आवाज़ हिश छि सान्यन कनन गछान। श्रावन पुनिम द्वह छि दान्यशवर यात्रा करनि गछान। अमि अलावु छि श्रावण पुनिम द्वह केंह लुख थजिवोर, वेजिबोर ति यात्रा करनि गछान। यिथुपॉठ्य अमि द्वह अलग अलग जायन हुंज़ यात्रा कॅरिथ छि लुख शंकर जियस निश दर्म, अर्थ तु कामनायन हुंज़ पूर्ती करनुच आश थावान।



नवदल

बौद्र गटु पछ चोरम छि नवदल यात्रा करान नवदल छु अख लोकुट गाम युस त्रालु वति प्यठ ऊन्त्यपोर प्यठ पाँच.किलोमिटर दूर छु पेवान। अति छि नव नाग लरि लोर, येमि किन्य अथ जायि नवदल छु नाव प्योमुत।

ब्यल पत्रु रूपस मंज छि नववुय नाग यथ अँकिस नागस प्यठ अमरीश्वर लिंग रूपस मंज छु। यिमन नववुनिय नागन हुंज जलु दार छि बुथि कुनिय दार बँनिथ अतिच शूबुन्य महिमा हुरावान।

अमरनाथ यात्री येलि पैदल आँस्य श्रीनगर प्यठ नेरान, रातुच थकु पेंड आँस नवदल आसान। पतु येलि यात्री वापस यिवान आँस्य तिम आँस्य ज़रूरी बेयि नवदल गछान तु पनुन्यन पेत्रन अति श्राद हावान। योद नु कांह तोर यिथ अति श्राद हाविहे, तस आँस्य दपान “अँमिस छु वुम्बरि हून बारि।”

प्रानि समयि प्यठ अजताम छि यिहय प्रथा जि यिम ति चीज यात्रायि मंज प्रयोग करनु आँस्य यिवान मसलन, पुलहोर, छँतरय, डंडु वगोरु तिम आँस्य नवदल ज़लस मंज बावनु यिवान। शुरहन कनालन प्यठ नवन नागन हुंद यि समुह छु आस्थायि हुंज बँड बारु अख निशौन्य यथ अँकिस नागस प्यठ शिव लिंग छु। श्रान करनु पतु आँस्य लिंगस ज़ल तु द्वद बौविथ पूजा पाठु सुत्य तस ख्वश करान। अमि पतु ओस अति श्राद यिवान हावनु तु पुलहोर लूर तु छँतरय यिम यात्रायि मंज प्रयोग करनु आँस्य आमुत्य तिम आँस्य ज़लस मंज बावनु यिवान। पनुनि मकदूर मूजूब आँस्य अति चीज पलव तोमुल तु

दन मनसावनु यिवान । यिम हुर्य छि आम सान्यन माज्यन हुंजन ज़ेवि
पेत्यन प्यठ ।

थजिवारि कलुवन्दु चक्रदरसुय ।

नवदल पान वन्दु अमरीश्वरसुय ।।



चन्दन शेशटी या चन्द्र शेट

भौद्र गटु पछि शैयिम छि चन्दन शेशटी या चन्द्र शेट मनावुन
यिवान । लोकचारु पेटुय आँसु सानि माजि वनान ज़ि यि द्वह गछि दरुन
तु अमि सुत्य छु भगवान सान्यन गलित्यन माँफी दिवान । तिव्याज़ि
कोर्यन येलि माहवौरी छि यिवान, तिमन द्वहन छु छेचर आसान,
संस्कार चंद्रिका किताबि हुंद 166 सफुक दोयिमि मंत्र छु यि व्यछुनवान
ज़ि योद काँसि कोरि या ज़नि अथ छेट्योमुत आसि, तस पज़ि ग्वडुनक्यन
त्रेन द्वहन बिस्तरस मंज रूज़िथ आराम करुन । गरिच काँम, बतु रनुन
तु पूजा करुन्य छि बिल्कुल ममाँनियथ । योद काँसि मजबूरी मंज
यिमन द्वहन रँनिथ पैविथ अयाल आसि ख्योवमुत चोवमुत, तिम छि
पाप तमिसुय बारि । योद यहय कूर शुर्य पानु पेटुय यि फाकु दरन
आसि, दय करि तस माँफ । अमिद्वह सुब्हन वँथित रख्तु (वोज़ुल)
चन्दुन तु सफेद चन्दुन पानस मँथित छि करुन्य द्वहस मंज शेट श्रान ।
दोहस नेबोख रूज़िथ छु शामन चन्द्रुक दर्शुन कँरिथ तथ ग्वडु अर्ग
दियुन पतु छुस आचमन हेथ प्वराटन सुत्य द्वद या चाय चैन्य । दँह
द्वहस छि तिम फाकस सुत्य सुत्य दयस याद करान तु आँही पनुनिस
अयालस तु बरथाहस किच मंगान । यिथुय पौठ्य छि सारिसुय भारतस

मंज कार्तिक गटपछ चोरम ज्ञानानव दॅस्य करवाचौथ फाकु दरनु यिवान ।
 तिम छि सुबहुचि चोरि बजि श्रान कॅरिथ फीनी तु द्दुदक आहार ख्यथ
 दोह्य द्वहस व्रत दरान । दुहचि चोरि बजि छि मातायि हुंज कथा व्यछुनावान
 तु शामन छि चॅन्द्र भगवानस ग्वडु अर्ग तु बर्फी दिवान । परिनि मँज्य
 तॅमिसुन्द दर्शुन कॅरिथ पतु तमिय परिनि मंज्य पनुनिस माहराजु सुंद
 दर्शुन करान । महाराजस बुथ वुछिथ आय तु रुत मंगिथ पाँ रूप अमृत
 माहराजु पनुनि त्रिय दिवान तु तॅमि सुंद दुहुक फाकु खुशी सान अन्द
 वातुनौविथ बाकयन ख्यावान तु चावान ।



जरमु सतम या जन्म अष्टमी

नीलमत पुराण 743-750 अनुसार 28 द्वापर पतु ह्योत श्री
 कृष्णन श्रावन पुनिम पतु जन्म । योद सतम रौच बाहि बजि ह्योतुन
 जन्म, सुब्हन आँस आँठुम तमिकिन्य छि अँड्य ज्ञा द्वह अष्टमी
 मनावान । तमि द्वह गछि दीवी दिवताहन हुंज पूजा करुन्य । माता
 दीवकी तु यशोदा गछि पूजुन्य । तिहुंजि रायि गछि सेंट, पोशिमाल,
 कुनक वुशिक, गोर तु द्दुद सुत्य आँडरिथ बनौव्यमुत्य ख्यनु चीज
 तु नाना रंगुक्य मेव अर्पण कॅरिथ पूजा करनु यिन्य । सुब्हन सिर्यि
 खसनु ब्रौठ श्रान ध्यान पतु गछन गुलि आफताब पोशव सुत्य पलव
 रंगुमित्य लॉगिथ ज्ञानान मूर्त तु नेरमाल ह्यथ क्वलु बैठिस प्यठ
 पॉनिस बावनि गछुनि । वुशिकु आट्यक्य ख्यनु चीज, बतासु, थॅन्य
 तु मर्च गछि अथ द्वहस सिर्फ ख्योन योद ब्वछि लागि ।

श्री कृष्णुन ज्ञा दोह याने जरमु सतम या जन्म अष्टमी छु हर

कांह संसारुक ह्यौद खुशी-खुशी
मनावान । श्रावन पुनिम पतु भौद्र
गटु पछ सतम तु आँठम राँच मंज
ओस यिमव यूगबलु किन्य जन्म
दोरमुत । सँतुम दोह राँच हुंजि बाहि
बजि आँस्य यिम प्रकट
सपदेमुत्य । धारनायि ध्यानु किन्य
आयि यिम प्रखुट नारायण स्वरूप
ब्रौठकनि तु वासुदेवन न्युव यि
जा बालुक राँच पँहरचि दौयि बजि



तु वातनोवुख नन्दुबाबस तु जसदायि निश । अति तुलुन तिहुंद सन्तान
तु थोवुन माता दिवकी सुंजि क्वछि मंज ।

दपान येलि दिवकी तु वासुदीवस नेथुर सपद्यव । कंसन याने
दिवकी हुंघ बाँय तु बबन माजि दितुस वाराह दाज दौवलथ सुत्य । कंस
ति द्राव दिवकी सुत्य तसुंद वॉरिव । दपान वति गव गटाटुट अनिगोट,
वुजमलन्यव तु गगुरायव खोन्नॉव्य यिम स्यठाह । वति अथ आवलुनिस
मंज पकान-पकान गँयि अख आकाश वॉनी जि 'ही कंस । दिवकी हुंद
आँठिम संतान करिय चे खेय ।' ग्वडु गव नु कंसस यकीन तिक्याजि
सु ओस पनुनि जुव ख्वतु टाँठ पनुनि बेनि मानान । मगर असुंद दिल
ओस क्वकोडरव बँरिथ । अँम्य फेरनॉव यि बँग्य वापस तु दिवकी तु
वासुदीव थोवुन कारागारस मंज बन्द । बबु सुंदिस प्रछुनस प्यठ थोवुन
राजु ति बन्द अँथ्य जेलस मंज तु पानु हेतुन राज करुन । समयि समयि
जायि सथ संतान दिवकी तु कंसन कोर जा दोहय तिमन सतवुनी

ब्रांदुकनि प्यठ टास। व्वन्य आयि आँठमिस वॉर्य। यूग बलु किन्य आयि श्री कृष्ण सतम रॉच बहयि बजि ज़न्मस, तमि किन्य छि अँड्य ज़न्म अष्टमी मनावान तु अँड्य ज़रमु सतम। नारायण रूपस मंज़ आव वासुदीवस बोंठकुन तु दोपनस 'चु वातानव मे वुन्य गूकल जसदायि तु नन्दबबस निश। तति थव मे जसदायि हुंदिस हुरिस मंज़ तु तति प्यठ अनुन स्व कन्या रूप यूग माया तु थवुन दीवकी हुंदिस हुरिस मंज़।

यि वेंनिथुय प्यव श्री कृष्ण थनु। पँहरदारस पेयि नेन्द्र तु दरवाज़ ति गँयि पानय यलु। दिव्य कृपायि तुल वासुदीवन श्री कृष्ण अँकिस टूकरि मंज़ तु वोत यमनायि नदि निश। यमनायि हुंद पोन्थ खोत ह्योर-ह्योर तु कृष्ण जियन् न चरनु कमलन स्पर्श कँरिथ दियतुन तस तार तु सँही सलामत वोत वासुदीव गूकल। तति आँस्य सॉरी मस नेन्द्रि। अँम, थोव कृष्ण जसदायि लरि तु तँम्य सुंज़ कूर (यूग माया) अँनिन पानर। सुत्य तु वोत वापस जेलखानस अन्दर। शुर्य सुंज़ि क़कि सपद्य सॉरी हुशयार। कंसस वॉच शेछ तु हसबि मोमूल तुज्य तँम्य यिति तु छॉवुन ब्रांदु कनि प्यठ। मगर यि खँच आकाश तु वोननस 'चॉन्य कालन ह्योत गूकलस मंज़ ज़न्म।' तमि पतु अनुनॉव्य तँम्य गूकलुक्क्य सॉरी ज़ा बचि तु मॉरिन। कम-कम राक्षस सूज़िथ कँरुन स्यठाह कूशिशा पनुन काल मारनु बापथ। मगर श्री कृष्ण ओस पानु भगवान तु मॉरिन तिम सॉरी राक्षस।

अमि दोह छि मँहलु-मँहलु, वानु-वानु, गामु-गामु तु गरु-गरु यि मीठ्य वार्ता तु यिहुंद बजरु गोवनु यिवान। चूँकि यिम छि पनुनि यूग बलु किन्य प्रोखुट सपद्येमुत्य, तमिकिन्य छु तिहुंद असुवुन म्वख, शीतल स्वबाव, सतोगवनी काया, चंचल मन वुछिथ हर कांह तम्बुलान तु ब्रमान।

संसौरस मंज छुन कांह ति स्वखु दोखु रोस। कंसन येलि राक्षस सूज्य, गूकलस मंज मचोव हाहाकार। गूकलक्यन लूकन दियुतुन किशोर अवस्थायि मंजुय नेरनुक हुकम। दपान यिम ऑस्य शु वुहर्य येलि यिमव बिन्द्राबन कुन पलायन कोर। बिन्द्राबन वॉतिथ रॉव ऑमिस ति पनुन्य ज्ञाय, गिंदन तमाशि, गूर्यवान, पनुन्य साज सूंदक तु पनुन्य ज़ेवर। दपान यिम ऑस्य अतिकिस वनस मंज बलबेद्रस सुत्य दोह गुज़ारान। विष्णु पुरानुकि 32 त्रहमि अध्यायि मंज छु वरनन जि तिम दोशवय बारुन्य ऑस्य दोहस पनुन पान गासु तु पोशव सुत्य सजावान। गासस ऑस्य मुरली बनावान तु मोहरु तीरि सुत्य ऑस्य पनुन पान सजावान। अमिय छु मोर पवेत्र पक्षी माननु यिवान। दीवी तु दिवताहन ति छु वावजि वाव मोर पंखव सुती करनु यिवान। पनुन्यन किताबन शूभरावन बापथ ति छि कैह किताबन मंज मोहरतीर थवान। श्री कृष्ण सुंदि मुकटस मंज मोहर तीर ति छु अमि कथि हुंद असि बास दिवान जि यिम ऑस्य परम पिता परमात्मा सुंद स्वरूप। यिमव अपुज फना करनु बापथ ओस पनुनि यूग बलु किन्य कृष्ण रूप अवतार दोरमुत।

असि कौशिर्यन मंज ति छि यि प्रथा जि श्री कृष्णनिस ज़ा दोहस प्यठ छि ऑस्य फलोहारी रोज़ान। पूर दोहस श्री कृष्ण सुंद मंजुल अलुरावान तु मंत्रव तु बजनव सुत्य पूर दोहस तसंजु अस्तुती करान। रॉन्न हुंजि बाहि बजि छि आरती कॅरिथ यि पूजा सम्पन्न सपदान। सारिनुय प्यठ प्रसन सपदिथ खॅसिन पूजा सौन्य रथि तु बैरिन श्री कृष्ण पनुनि कृपायि सौन्य खॉल्य हल्म।

ग्वडनिकिस विश्व युद महाभारतस मंज छि कैह वाकु तिथ्य सपद्यमुत्य यिमन मंज ज्ञान वेग्यानुक्य रहस्य छि मूजुद। महाभारतस

मंज्र छु पूरिपूर्ण दर्म दर्शन समाज संस्कृति युद तु ज्ञान वेज्ञानुचि कथ
मूजद। मगर अज ति छु लुकन हुंघन दिलन मंज्र अमि कथि हुंद शोद
जौरी जि येलि श्री कृष्ण जियस सुत्य छु आँठ अंक जूरिथ यथ योदस
मंज्र क्याजिं छु 18 अंक बराबैरी हुंद राज।

भगवान कृष्ण तु आँठ अंक :- भागवान कृष्णन ह्योत दिवकी मातायि
निश आँठिम अवतार रूप जन्म। यि ओस आँठिम द्वापर बाँद्रु गटुपट
सतम राँच आँठुम दोह 8112 ईसा मसीयस ब्रोंठ ओसमुत। कृष्ण जन्मस
दौरान युस आँठन अंकन हुंद संयोग छु बनान तथ मंज्र छा कांह रहस्य।

18हन हुंद राज :- दपान महाभारतस मंज्र छु अख खास महत्व
अरदाहन अंकन। महाभारतुकिस ग्रंथस छि कुल 18 अध्याय। श्री
कृष्णन ओस अर्जन दीवस कुल 18हन दोहन ज्ञान दियुतमुत। अर्दाहनय
दोहन मंज्र गव महाभारतुक जंग खत्म। भगवत गीतायि मंज्र ति छि 18
अध्याय। कोरव तु पांडव सेनायि मंज्र ति आसु कुल 18 अक्षोहिनी
फोज यथ मंज्र कोरवन 11 तु पांडवन आसु 7। अमि योदुक्य प्रमुख
सूत्रदार ति आँस्य कुल 18। अथ योदस मंज्र बचेयि कुल 18 जंगजू।
वेदव्यास रेश्य ति ल्यूख महाभारतुक ग्रंथ कुल 18 हन पर्वन मंज्र।

कशीरि हुंघ लुख छि अमि दोह फाकु थवनु अलावु सुब्हनस
मंज्रलिस मंज्र त्रॉविथ द्वह्य दोहस भजन कीर्तन रूप पूजा सुत्य सुत्य
कृष्ण जियस ललुनावान। जुलु छु गाहे अँक्य सुंघ दँस्य गाहे बेयि सुंघ
दँस्य अँलरनु यिवान। असि छु गरि अज भगवान ज़ामुत, यि खुशी
प्रकट करनुचि सिलसिलस मंज्र छि बाज़रस मंज्र आमुत्य मेवु अँस्य
पनुन्यन कोर्यन हुंद वॉरिव सोज़ान। अमि सुत्य छि अँस्य पनुन्य
खुशी तस ति डालि तूज़िथ तस क्युत रुत तु ह्योत श्री कृष्णनस मंगान।

द्वापर युगुक कृष्ण ओस विष्णु भगवान सुंद परिपूर्ण अवतार ।
महाऋषि सादीपनि आश्रमस मंज बनोव तिमव पनुनि बानु सुत्य अख
कुंड यथ गोमती कुंड छि वनान । यथ ज्ञन 5240 वॅरी गॅयि । अमि सातु
ऑस्य यिम कुल सत वॅहुर्य । येलि यिम काह वॅहुर्य तु सतन द्वहन हुंघ
वॉत्य यिम गॅयि उज्जैन शोक्षा प्रावनि तु कोरुख कुल 64 द्वहन परिपूर्ण
ज्ञान प्राप्त ।



दर्भि मावस तु पवन संद्या

भोद्र गटुपछ मावसि छि दर्भि मावस वनान । अमि द्वह छु ब्रह्मा
जियस वोहरवोद आसन । दर्भ छि गोडन्य अमिय दोह चटनु यिवान ।
अथ दर्भि छु मंजस ब्रह्म गंड त्रावनु यिवान ताकि पूर वरियस हेकव
यिहय इस्तिमाल करिथ । अमि दोह गछन 14 जेछि दर्भि तुजि ब्रह्म
गंडस मंज इकवटु कॅरिथ दरवाज अचवुन खोवरि तरफु कुजि कुन
अवेज्ञान थवनि । योतान्य यि तत्येन रोजि तोतान्य टिकि नु कांह ति
वेगन, कांह रुकावट करि न गरस मंज प्रवेश । योद नु दर्भ मेलि, द्रमन
गासस मूलव सान गंड कॅरिथ गछि अन्दरु प्यठ गरि नेबर दरवाजु
हगंस दॅछिन्य किन्य थवुन ।

पवन सन्ध्या :-

दपान सथ सन्धायि छि मातायि हुंघ सथ रूप । येत्यन येत्यन
माता छि बीठमुन्न तत्यन तत्यन छि नाग प्रकट सपुद्यमुत्य । यिथु पॉठ्य
छि पवन संध्या वेरनाग कपरन गाम वरनागस मंज । दपान अफगान
सिपह सालार आव मातायि पतु पतु तु हेतुन तसंजि लोचि लमनुक

यत्न करुन। माता चायि अँकिस गोफि मंज, बुथि अख बँड कँन्य
 थवान वोनून ततिक्कन बाशिन्दन, “येलि येलि मे तोह्य नाद आसिव
 लायान, बु आसुहोव तोहि ब्रोंहकुन प्रकट गछान।” श्री पोशकर नाथ
 भट्ट सौकिन या व्वंदुहोम तँहसील गांदरबल सुंदि वननु किन्य ऑस्य
 यिम ति यात्रा करनि गौमुत्य। यिहुंद फोटो छु येथ्य वरकस प्यठ दर्ज।
 अथ मंज छि यिम पानु तु श्री स्व० प्रेयम नाथ शास्त्री सुंद्य पोथुर श्री
 औतार कृष्ण तु बाकय शुर्य बाँच। श्री पोशकर नाथस देंछिन्य किन्य
 छि अख पाँतुर कन्य, युस तमि गोफि हुंद द्वार छु मानुन यिवान। यथ
 मंज मौज्य छि वुन्यक्कनस ति वेराजमान। पोशकर नाथनि वननु मुताबिक
 कँर तिमव स्यठाह पाठ पूजा, मगर मातायि दियुत नु केंह दर्शुन। तमि
 पतु आयि तति गामुक्य शुर्य यिमन वुछनि। अख शुर वोथुस यि
 नेरिवु नु तोतान्य केंह नेबर योतान्य नु अँस्य आलव दिमहोस। मे छु यि
 मौल्य वोनमुत। अँथ्य मंज वँन्य यिम शब्द तँम्य शुर्य तु वुजुन्य द्रायि
 नेबर। शब्द ऑस्य यिथु पाँठ्य :-



“वोथि गँगि नेरि नेबर, बटु हय आयिय हँसिस खँसिय।”

यिम शब्द बूझिथ गँगि वुजुन्य पाँ ग्रटु रूपु प्रकट तु पोशकर नाथन रचि पाँ बोतलु जु त्रे। जल्दुय चायि वुजुन्य बेयि गोफि मंज। 1980 मंज छस ब्रुति ब्याख बेनि हेथ ओत यात्रायि गॉमुच। मे ओस नु तोतान्य त्यूत ग्यान केह। बु ओसस नु सोंचान जि वुजुन्य किथु आयि तु कोत गँगि। पोन्थ ओस फलकन खोतमुत। असि कोर तति ठीख पॉठ्य श्रान। तति ओस बाकयव यात्रियव सान अख डुमटबलुक ब्रह्मन सिर्य नाथ ति। तिमव वोन जि अमि वुजनि हुंजि जोयि मंज योद कांह ति आडु कँन्य फुटराविव, अमि मंज नेरिवु सालिग्राम। असि द्वशवुय करेय स्यठा कूशिश मगर अख ति कँन्य फुटरावनस मंज गँगि नु अँस्य केह स्वफल। पानस सुत्य बतु बानु न्यूमुत खेथ रूद्य अँस्य तति रातस तु दौयमि दोह सुब्हन वॉत्य पनुन गरु।



पन्न दियुन विनायक सुन्ज कथ

भाद्र जूनपछि चोरुम प्यठ छि पन्न साथ शुरू गछान। 4 सत्म्बर 2016 जी निवजि हुंद हवालु दिथ छस बु लेखान जि स्कन्द पुरानस मंज छु श्री गणेशुन्य जन्म जायि हुंद जिक्र किदार खण्डस मंज वननु आमुत। देहरादून प्यठ तकरीबन 160 किलोमीटर दूर गंगोरी उतरकाँशी किन्य संगमचट्टी तान्य छि गॉड्य गछान। तति प्यठ 23 किलोमीटर मंजिल कँडिथ छु पारवती सरोवर यिवान। योत वातनु खॉतर छु अख तंग वतिपोद। यि वथ ति छि जंगलव मँज्य प्यवान।

उतरकाशी मंज संगम चट्टी जायि नँजदीकुय छु डोडीताल

अख ख्वशयिवुन्य जाय, योस शेन रेतन शीनस तल छि आसान । वति
छु डोडीताल वातनु बापथ गुर्यन प्यठ खँसिथ सफर करुन प्यवान ।
तति थख कँडिथ छु बुथि अख तालाब यिवान, योत माता पार्वती ऑस
जया तु वेजया सुत्य ह्यथ श्रान करनि गछान । यि तालाब छु स्यठा
सोन । दपान नेबरिमेव मुल्कव प्यठ ऑस्य अम्युक सनेर मेननु बापथ
साईन्सदान विजि विजि आमुत्य, मगर यि छु त्यूत सोन जि तिमव
ह्योक नु अम्युक सनेर कँह ति मीनिथ ।

दन्त कथायव अनुसार छि मन्दरस मंज अति सिर्फ पार्वती जी
तु गणेश जियिन्य मूर्ती । शिव जी सुंज छेनु कँह ति । दपान शिव जियन
ओस अँथ्य जायि गणेशस हँस्य बचि सुंद कलु लॉगिथ सारिनुय दिवताहन
ब्रोंठ अमिसुंद नाव प्रथ पूजायि ग्वडु हेनुक आदिकार दियुतमुत । दपान
अज ति छि कार्तिक मावसि मनीनाग अथ तालाबस मंज श्रान करनि
यिवान ।



दपान पार्वती जी ओस अकि फिरि हरितालिका त्रैयि हुंद फाकु ।
 स्व चायि श्रान कुठिस मंज, श्रान विजि प्योस याद जि दरवाजस प्यठ
 गोछ कांछा आसुन युस न काँसि अन्दर दियिहे अचनु । तस आव
 ख्याल जि सन्तानुय छु तियुथ अंग युस बरस प्यठ हेकुहोन पँहरदौरी
 करनु बापथ थँविथ । बबु सुंदि रोस (बिना नायक) पनुनिस शरीरस
 प्यठ जेवरव रुफ माँत्रकायि इकवटु कँरिथ कोर पार्वती जी गणेश रुफ
 पोथुर सुंद न्यरमान । आकारस दियुतुन ज़ीवादान । तमि मंज गव पौदु
 अख स्वंदर बालुक, येमिस नाव दितुख विनायक । मातायि दिचु अँमिस
 बरस प्यठ पँहरदौरी करनुच सुती काँम । युस ति बरस प्यठ आव तस
 तस वोन गणेश जियन जि माता छि श्रान करन । अमिपतु आव पानु
 शिवजी । तँम्य हाँव बालकस अन्दर पावती निश गछुनस प्यठ ज़ोर
 ज़बरदस्ती । येलि नु गणेशन केँह मोनुस, तँम्य तुल त्रिशूल तु च़ोटनस
 कलु ।

पार्वती येलि न्यबर द्रायि तँम्य दित्य विनायकस आलव । आँखुर
 वुछुन दरवाजस न्यबर कलु च़ँटिथ विनायक पत्थर प्योमुत । पार्वती
 मोर पान, तँमिस वोथ अँछव किन्य क्रूदु सुत्य खून, सुती वोनन महाराजस
 अगर नु अँमिस ज़ीवादान दिख, बु ति मारय पान । शंकर ओस शरमन्दु
 ति स्यठा, तँम्य दोपुस युस नेन्द्र वँथित ग्वडु बुथि पेयि तसुन्द कलु
 लागोस तु यि गछि बेयि ज़िन्दु । सुब्हन च़ोरुम दोह वँथित वुछुख हँस्यतिनि
 माजि पतिकिन्य हँस्य बचि शौंगिथ । अँम्यसुय च़ोटुख कलु तु लोगुख
 गणीशस । अँमिय छि वनान जि प्रथ काँसि शुरिस पजि पनुनि माजि
 हुंदिस फ़रिस तलुय हर विजि जाय छ़ाँडुन्य न कि पतिकिन्य या रोशि
 रोशि रूजिथ तस निश दूर गछुन येमिकिन्य सु छु संसॉरय, शख्ती

रोस दोह दोह कडान।

चूँकि मॅरिथ म्यूल अॅमिस बेयि ज़ीवुथ अमि चोरुम दोह, तमिकिन्य छि अथ दोहस व्यनायक चोरम वनान तु गणीश सुंद ज़ा दोह ति छु अमिय दोह मनावनु यिवान। दपान पथ कालि येलि आनन्दस मंज शिवजियन ह्योत मस्ती मंज नचुन, तमिच सॉक्षी छि सिर्फ मॉज्य पार्वती, अमिय किन्य आव तस 'महाताण्डव सॉक्षणी' वननु। डमरू मंज द्रामुत्य शब्दन हुंज आव मॉत्रका रुफस मंज माता पार्वती ज़ेवरुव सुत्य सोरुय शरीर वलनु। तमि विज़ि आसिहे तिमन द्वशवनी हुंद ध्यान ॐ शब्दस प्यठ रूदमुत, युस साक्षात गणीश स्वरूप छु। अमूमन छु प्रथ रेतस मंज गणेश चर्तुथी तु चतुर्दशी आसान, मगर भॉद्रनिस रेतस मंज छु ज़ून पछ चोरम प्यठ च्वदुशय तॉन्य गणेश जियिन्य दोह मनावनु यिवान।

गणेश जिय छु च्वशवुय तरफुक्यन दारन हुंद पॅहरदार। तमिकिन्य छु चोरम प्यठ च्वदुश तान्य श्री गणीशस पूजायि रुफ ख्वश करनुक आदिकार दिनु आमुत। शिवजी तु पार्वती जी ब्रोंठुकनि अॅमिस प्यठ ख्वश गळिथ छि माता सरस्वती अॅमिस अमि दोह ब्रह्मांडुक नायक बननुक



आदिकार ति दिवान। अकि दोह छु परशुराम पनुनिस ग्वरस शंकर जियस मेलनि गछान। तॅमिस ऑस तमि सातु ग्वर सुंद दर्शुन करनुच

सख्त कांख्या वेंछमुच । गणेश जी ओस दारस प्यठ बिहिथ पेंहरदौरी
 करनु खॉतरु शंकर जियन थोवमुत । तिम ऑस्य तमि विजि दोशवय
 बॉच विश्राम करान । ऑग्यन्या दिथ ब्यूठ गणेश जी पेंहरदौरी करनि ।
 पोरशुरामन कोर सख्त मजबूर अंदर अचनुक इजाजथ दिनु खॉतरु ।
 गणेश जियनिस नकारस प्यठ गव परशुराम स्यठाह कूदी । तॅम्य युथुय
 तस प्यठ प्रहार कोर तस आव अख दन्द फुटिथ तोतन वॉच माता
 पार्वती तु हेतुन परशुरामस प्यठ शब्दन हुंद प्रहार करुन । सुती आयि
 माता सरस्वती येम्य गणेश जियस यिछु बहादुरी तु सदाचौरी प्यठ
 दियुत वरदान जि ब्रह्मांडस मंज येलि कांह पूजा यियि करनु ग्वडुन्यक
 आदिकार गछि गणेश जियस युन दिनु, यथ पानु शंकर जियन ति
 आंकार कोर । तथ परम्परायि मुताबिक छुन ग्वडुन्यक बूग तस रोस
 काँसि ति दिनु यिवान । गणीश जिय छि श्रस्ठ नायक, तमिकिन्य ति छि
 अँमिस वेनायक वनान । यिमेन दोहन मंज चोरम प्यठ च्वदुश तॉन्य छि
 अँमिस विश्व रूपच पूजा यिवान करनु । काँशिर्य बटु छि अँमिस
 ख्वश करनु बापथ रोठ करान । युस चोरम प्यठ रुत साथ छु वुछिथ
 आसन कडनु आमुत । तथ सातस प्यठ छि रोठ रुफ पूज गणेश जियनि
 वैरि करनु यिवान ।

भीब दर्म मॉज्य:-

पार्वती हुंदिस पोथुरस गणेश जियस सिद्धायक पद मेलनस
 प्यठ तु जिन्दगी मंज असि सॉरी वेग्न दूर गछनु खॉतरु छु भीब दर्म
 मॉज्य यानि माता पार्वती हुंद रोठ बनावनु यिवान । येमि किन्य श्री
 गणेश जी छु असि सारिन्य हुंद टोठ रॉछदर बनान ।

काँशिर्य व्यदवान पंडित छि भाँद्र जूनपछ चोरमु प्यठु रुत्य

साथ वुछिथ कडान तु येमि दोह येमिस वार आसि सु छु तमि हिसाबु
 अख दोह पूर गणेश पूजायि रूप रोठ बनावान। बुडु ऑलु, द्वद, शकरए
 ओट तु ग्यव रलॉविथ मॉडिथ छु रोठ यिवान बनावुन। पतु छुस खशखाश
 तु मेवु यिवान त्रावनु। दोयमि तरफु छु गडु रूप कलशस मंज रछा
 पोन्थ यिवान थवनु। अतीनस छि अँकिस थालस मंज अर्गु बापथ
 हॉबिल गासु या द्रमुन कानुज, वुशकु, तोमुल छॅलिथ पोश रलावनु
 यिवान। बेयिस थालस मंज छि लॉर तु मेवु साफ कॅरिथ चॅटिथ
 यिवान थवनु। गरिच ज़िठ ज़नान छि सारिनुय द्योक तु नॉरिवन
 गंडान। पतु छख अर्गु म्वठा दोन अथन मंज दिवान तु कथ छि यिथु
 पॉठ्य शुरू करान:-

‘यिहय ओस रेतव मंजु रैथा भॉद्रप्यथा वेनायक चोरम तु
 आथवार। अँक्य राजन ओस जहाजन मंज स्वन, र्वफ तु धन बोरमुत।
 राजस ओस अमि बदलु पनुन्थन लुकन हुंदि बापथ ख्यनु ख्वरदनी तु
 बकाया लवॉजिमात पूर करुन्थ। राजुरॉनी तु तसंज कूर ऑस्य पनुनिस
 दर्म तु कर्म अनुसार संसॉर्य व्यवहार करान। तिम ऑस्य पनुन्थ
 बॅड्य दोह बडि चावु तु बावु सान मनावान। अमि दोह ओस यिमन भीब
 दर्म माजि हुंद रोठ करुन। चूँकि राजस ऑस नेरनस जल्दी, रानी
 दियुत हुकुम ज़ि रोठ ति गछि जल जल तयार करनु युन, ताकि राजु
 नेरि रोठ पूजा तु नवीदु कॅरिथ सफरस। रोठ छि वुनि बननय, राजन
 दियुत पनुन्थन वॅज़ीरन नेरनुक हुक्म। रानी वोनुस स्यठा नर्म आवाज़ि
 मंज रछा ठॅहरिव, ‘वुनि छि पूजा करनय।’ यि बूज़िथ खॅच राजस
 शरारत, सु चाव अथु छलनय बूट सान चोकस। अति ना तयॉरी
 वुछिथ द्राव राजु खॅशमु होत सफरस। रानी त्रावुन मछि माज ख्यवान

यानि परेशान। केह वक्त गुजरयोव। शैछ वॉच जि राजु सुंघ द्रनवुय
जहाजु फँट्य माल ह्यथ समन्दरस मंज। यि बूजिथ कोर मँहलखानस
प्यठ दुशमनव कब्जु। मरनुकि बीमु त्रॉव माजि कोर्यव पनुन्य सल्लतनथ
तु रूद्य रोहपोश।

अँकिस दूर गामस मंज वॉतिथ दियुत यिमन अँक्य अमीरन
पनुनिस गरस मंज रोज़नुक इजाज़त। रानी दिचुन तोमुल मुनिथ साफ
करनुच तु कोरि दिचुन गुर्य गान साफ करनुच कॉम। अँमीर ओस
दिवान उजरत रूप तिमन साफ तोमुल येमि सुत्य तिम ऑस्य पनुन्य
यड पॉलिथ हेकान। केह कॉल्य पतु बनाँव यिमव गामस नँजदीक्य
अख जॉफुर रोज़नु खॉतरु। अकि दोह सूज माजि यि कूर काँगरि
तेंगुल अननु खॉतरु हमसाय गरस मंज। माँज्य छि प्रारान कूर आयि नु
केह ति वारियाहस कालस। तिम ऑस्य भीब दर्म माजि हुंदिस रोठस
पूजा करान, अमिय रूकावुख स्व। अमि दोह छिनु प्रॉप्युन अंद
वातुनावनस तान्य तेंगुल कांसि ति हेकान दिथ। तमि पतु पूजा कँरिथ
नवीद ख्यथ हेकव तेंगुल दिथ, नतु छु प्रॉप्युन छेटान। यि छु भीब दर्म
माजि हुंद रोठ, अमिय किन्य गछि नु बूग दिनस तान्य नु काँसि रोठ
दियुन नु तेंगुल। प्रॉप्युन म्वकुलिथ दितुहोस ख्यनु खॉतरु नवीद बेयि
माजि क्युत रोठ तु तेंगुल, अदु कँरुख र्वखसत। माँज्य ऑस तोतान्य
अथ मूरान। डेकि ट्योक तु हचिस नॉरिवन लॉगिथ येलि कूर वॉचुस
ब्रॉहकनि, तँम्य वॅनिस रोठुच सॉरुय दलील। सुती कोरनस ज़ारुपारु
ज़ि अँस्य ति करुहाव यि रोठ। अँछन मंज ओश थँविथ वॅनिस माजि
पनुन्य सॉरुय रोठ पूजायि हुंज कथ। यिहाबि गछि मनस मंज श्रदा
आसुन्य, तँथ्य छि पोन्थ फल मेलान।

पनुनिस दिलस मंज यि ख्याल थॉविथ वॉच कूर गुरय गान
 येति गुरय गुहि मंज तॅम्य वुशकु तु कुनख ब्योन चॉरिथ क्रंजलिस मंज
 कोलि प्यठ छॅलिथ सॉबरावि पाँछ पाव तु अन्यन गरु । पाँचन पावन
 बनोव तॅम्य कनि सुत्य स्यठा मेहनत कॅरिथ ओट । शकुर बदल त्रॉवनस
 मेच पाँछ छटांग । यिहोय गौमुत्र सुत्य रलॉविथ बनॉविन तावि प्यठ
 रोठ, यिम क्रंजलिस मंज थॅविन पलवस तल खॅटिथ । माजि दोपुस
 युस वुछि तिम असन तु दपन यिम छा मॅचु । अँथ्य मंज गव शोर ।
 साज बाजि नगारु वजान प्योव राजु माल ह्यथ सही सलामत पनुनि
 सलतनॅच मंज वातिथ । युथुय राजु जोंफरि नॅजदीक आव तॅम्य प्रजुनॉव
 पनुन्य रानी तु कूर तु वोननख पनुन सोरुय हाल । रानी दोपुस येमि दोह
 तोह्य सफरस द्रायिवु असि ओस भीब दर्म माजि हुंद रोठ कोरमुत तु
 अज तुहुंदि यिनु विजि ति छु असि रोठ कोरमुत । अथ पूजा कॅरिथ
 करव नवीद तु पतु गछव बेयि अँस्य पनुन मँहलखान । युथुय पूजायि
 बापथ यिमव अथ पर्द थोद तुल, तिम अँस्य सॉरी स्वनु सुंद रोठ
 बनेमित्य । तिथय पॉठ्य बनितन असि ति सोरुय स्वनु सुंदुय स्वनु सुंद ।
 सॉरी वेग्न तु व्यॉज गछितन अमिकि फलु रूप नाशस । यि वॅनिथ
 ऑही मंगुन्य ग्वडु भीब धर्म माजि पतु अन्नत भगवानस । यि वॅनिथ
 गछन तत्यन थॅविमितिस गडस मंज ग्वडु गरिक्य ज़िठ्य तु पतु अकि-
 अकि अथिफोल त्रावन्य तु ऑही मंगुन्य । मेवु लॉर तु नवीद गछि
 ख्योन । अमि पतु गछि हखस हमसायस तु ऑशनावन मंज ति यि
 नॅवीद बॉगरावुन ।

पन्न:-

श्री गणीश छु च्वदहन भवनन हुंद आध्यपति बनावनु आमुत ।

अमिय कारनु छि दुनियाहस मंज केँचन जायन 14 दावु वोल पत्र (सूत्र) बनावान, यथ 'अन्नत सूत्र' छि वनान। दपान यि सृष्टी छि बनेमुच च्वदुहाव आवाजव किन्य। 14 दावु छि 14 हन आवाजन हुंज सौक्षी, यिमव मंज सौर्य संस्कृत बूल्य छि द्रामुच, यस असि सारि जगतुच ज्ञानकोरी छि दिवान। चूँकि सारेय आवाजु छि "अ" मंजु द्रामुच, तमिय छु अकि दावि हुंद पत्र ति कारगर स्यद सपदान। अँस्य छि अमि दोह नोव फम्ब अँनिथ अनहेरिशि कोरि हुंदि अथु सुत्य दाव बनावान, यवस ग्वडु गरिच ज़िठ्य ज्ञानान दँछिनिस कनस लागान तु पतु छि कलश रुफ गडस ति लागान। अन्त च्वदुश दोह ओस हर गरु पनुन ब्रह्मन अन्नत अनान। यथ च्वदाह गंड ओँस्य गणीश जियनि मंत्रव सुत्य त्रावनु यिवान, पतु ओँस्य अन्नत च्वदुश दोह स्व कनस लागान। बेयि वँरियि येलि ब्रह्मन बेयि ओस अनान, प्रौन्य बदलिथ ओँस बटुन्य नँव लागान। दपान यि अन्नत लागनु सुत्य ओँस्य गरस मंज वेगु तु व्याँज दूर सपदान। मचि तु कुछि आसु बँरिथ रोज्ञान। ख्वशहॉली ओँस सौरिसुय क्वटम्बस नालुमँत्य करान। पँकिव श्री गणीश सुंद नाव ह्यथ दँरुरावव अँस्य ति पनुन कमर च्वदहान गंडन हुंद पन लॉगिथ। देवु कमर दौद्य गछन दूर दफा।

पनुक दोयिम अर्थ छु माँगय करुन्य। योद काँसि मनशस कांह यछा पूर आसि नु गौमुच, तमि गरिच ज़िठ ज्ञानान यस कनस मंज पन तौरिथ कथ आसि गणेश जियन्य वनान, स्व दियिस कथा मोकुलिथ आशीवाद विज्ञि अख पोश भीबधर्म माजि रूप तु दप्यस "बेयि वरियि अज्ञ आसि मातायि चौन्य यछा पूर कँरमुच। च़ु ति दिख पनु रूप भीबधर्म माजि हुंद रोठ पाँच पावन।" असली छु पाँचन पावन हुंदुय यि

रोठ बनावुन आसान, पतु छि हर बॉच सुंघ नॉव्य अख अख खोस
पनुनि मर्जी यँजमनबाय त्रावान तु पूजा कॅरिथ नवीद बॉगरिथ पानस
क्युत रुत तु ह्योत कांछान।

अथ अन्नत सूत्रस मुतलिक छि अख कथ, यवस अँस्य पनुन्यन
नान्यन निश ऑस्य बोजान। यस यिथु पॉठ्य छि:- “सुमन्तु रेशि सुंजि
कोरि शीलस कोरुख कौण्डिन्य मुनियस सुत्य खांदर। शीलन ओस
भाँद्रप्यथ जून पछ च्वदुश्य हुंद फाकु थोवुमुत तु अन्नत सूत्र ति ओसुन
लोगमुत। तसुंद गरु ओस ख्वश ख्वशहाल, बेयि शॉन्ती तु शोहजारुच
जिन्दु मिसाल। अकि दोह खोत कथतॉन्य प्यठ रेशिस जहाल, तँम्य
दियुत यि अन्नत सूत्र नारस मंज दॉरिथ। येमि किन्य तिमन वोल
दरिद्रतायि तु अशाँन्ती नाल! क्रूद रछा शान्त सपुदिथ गव रेशिस
गलती हुंद ऐहसास तु दोरुख द्वशवुयव यि फाकु बडि श्रदायि सान।
तिमन म्यूल गणेश कृपायि किन्य साख्यात लक्ष्मी नारायण सुंद प्रसाद।
अज ति युस यि फाकु दरि तस छु नेरन रुत तु ह्योत। लक्ष्मी नारायण
छु तस ति गणीश कृपायि सुत्य स्वख तु सम्पदा दिवान। चूँकि अन्नतनाग
नागबलस मंज छु अन्नत भगवान या आश्रम स्वाँमी हेरमिस नागस प्यठ
कनि पाँ आगरस प्यठ व्यराजमान, अँस्य करव तिमनुय व्यनथ तु
असि ति बनि गणेश कृपायि सुत्य स्वख तु सम्पदा।

कन्यक वौर:-

माता पार्वती हुंद पोथुर येलि आदि दीव रूपस मंज संसारस
मंज जन्मस आव, माता सरस्वती बनोव तमि विजि पानय पन्न, अमि
किन्य छि कन्यक वौर रूप अख रोठ ग्वडुन्यथ, कन्यकि रूप लक्ष्मी
यिवान अर्पन करनु। यि कन्यकु वौर ह्यथ गछि मंत्र यि परुन:-

ॐ ह्रीं ह्र सौः ह्रीं श्रीं लक्ष्मी नारायणाय श्री नमः ।

ओं तत सदु ब्रह्म आदि तावत भाद्रपक्ष मासस्य शुक्लपक्षस्य
महापर्वानि परता ।

तिथि वारायां (नाव वारि) हुंद इम्मं अन्न ददामि ददामि ददामि ।

गणेश जी तु चन्द्रम दीवः-

भाद्रप्यथ चोरम हुंद चन्द्रम गछि नु वुछुन । चन्द्र दीवन ओस
गणेश जियस हतख कोरमुत । यथ प्यठ वापस तैम्य दियुतुस शाप जि
यिम ति कलायि चे छय तिम गछिनय नाशस तु युस मनुश चोरुम द्वह
चन्द्रम सुंद दर्शुन करि, तस लागि चूर हाछ । वारु वारु हेचन कलायि
गाँब गछुनि तु तसुंदिस डेकस प्यठ बन्योव अख क्रुहुन दाग । सारिनुय
दीवन हुंदि वेनय प्रनयि सुत्य दोपनस पन्दहान दोहन जून पछस मंज
रोजख चमकुवुन तु सिर्फ भाद्रप्यथ चोरम दोह युस चोन दर्शुन करि,
तस लागि चूर हाछ । योद गल्ली सुत्य अलगफ ति वुछुन यियि, यि मंत्र
गछि परुन :-

सिंहः प्रसेनम वधीत्सिंहो जाम्बवता हतः ।

सुकुमारक मा रोदीस्तव ह्यष स्यमन्तक ।।

दपान श्री कृष्ण जियन ति ओस अमि चोरम दोह चन्द्र दीव सुंद दर्शुन
कोरमुत । येमि सुत्य तस ति लैज्य चूर हाछ । मगर पतु गव जामवन्त
जियनि गुफायि मंज येमिस निश मणि हौसिल कॅरिथ दिच तैम्य सन्नजितस
येमि सुत्य तसुंज चूर हाछ छलनु आयि । येति तैम्य जंग कोर स्व
ग्वफा छि वुनिक्वनस ति जेमिस मंज मूजूद ।



वराह पाँचम

भोद्रपथ जूनपछ पाँचम छि वराह पाँचम मनावनु यिवान । कथायव अनुसार छि विष्णु भगवानन देह अवतार दौर्यमित्य । मत्स्य, कुरमु, वरह, नरसिंह, वामन, परशुराम, राम, कृष्ण, कालनेमि तु बुदा । अलग अलग रूपन मंज छि तैम्य त्रैलूकी हुंछ राख्यस नेस्त नाबूद कैरमित्य । येत्यन करव अँस्य वराह अवतारुच कथ यिथु पौठ्यः-

ब्रह्मा सुंघ चोर पोथुर गँयि विष्णु भगवानस मेलनि । तैम्य सुंदिस मँहलकिस दारस प्यठ अँस्य जु दरबान जय तु विजय । चूँकि तिहुँदि वननु अनुसार अँस्य भगवान आरामस मंज, तिमव दियुत नु तिमन अन्दर केँह अचन । अथ प्यठ गँयि तिम स्यठा क्रूदी तु क्रूदस मंज दितुख जय विजयस शाप जि तिम गछन यि परमपद त्रौविथ पृथ्वी प्यठ जन्म हेन्य । शापु किन्य ह्योत यिमव दशव्यव पृथ्वी प्यठ जन्म । तिहुँदि जन्मक्य समयि वोथ पृथ्वी, आकाश तु पातालस अलजिलु । यिहुँद नाव तवनु हिरण्य कशयप तु हिरण्य कश यिहुँदि ज्यनु लरजयोव जरु जरु । यि बुछिथ आव इन्द्र भगवान विष्णुहस निश तु दोपनस “ही भगवान येलि यिहुँदि ज्यनु यूत अलु अलु वोथ, बैडिथ क्याह आसन यिहुँछ कर्म ।” विष्णु भगवानन वोनुस जवाबस मंज “येलि सु समय यियि बु करु यिहुँद हिसाब पानय ।”

हिरण्यकशन कैर ब्रह्मा सुंज पूजा । कठिन्य तपस्यायि प्यठ ख्वश गँछिथ दियुत ब्रह्मा जियन तस वरदान जि “नु हेकिय दीव, नु असुर, नु दुत, न जानवर तु न इन्सान चे मौरिथ ।” अमि वरदानु गव यि ज्यादुय पहान यलु । अँम्य ह्योत जिलजिल संमदरन, दँरियावन,

क्वलन तुलुन । अमिसुंदि अमि वेरखा बाव सुत्य खूच ज़लुक दीवता वरुण दीव ति । अँथ्य तुमतडाकस मंज म्यूल नारद जी हिरण्य कशस । नारद जियन प्रछुस “वन सा वारय छुखा ?” तँम्य दोपुस “मे क्या छु परवाय, बु छुस त्रेयलूकी मंज सारिवय खोतु बलवान ।” नारद जियनि वौनी प्यठ ओस नारायण सुंद नाव तु असुना त्रॉविथ वोननस “चु छुख नु बलवान त्यूत यूत विष्णु भगवान छु ।” अँम्य तुज धरती बालि रूप अथस प्यठ तु द्राव विष्णु भगवानस छारनि । दीवलूक वॉतिथ येलि नु विष्णु भगवान तति केहं वुछुन, दीव खोचुनॉविन तु दोपनख “मे हेकि नु कांह ति मॉरिथ । म्यानि ख्वतु छुन कांह ति बलवान ।” दीव त्रँहरेयि तु गँयि विष्णु भगवानस निश । अडकजि ज़बॉन्य मंज वोनहस सॉरुय कार्कदगी हिरण्य कशुन्य । फ़टुलॉव्य दीवन हुंज यि दशा वुछिथ कोर विष्णु भगवानन वराह रूप दारन तु कोरुन हिरण्यकशस प्यठ प्रहार । ओरु योरु रूद जंग जॉरी, यथ मंज हिरण्य कशन रँट वराह सुंज गरदन तु दियुतनस हँट्यचीर । भगवान आव पनुनिस रूपस मंज तु पनुनि सुदर्शन चक्रु सुत्य न्यूनस कलु दडु निश ब्योन कँरिथ । अमिपतु आव बेयि वापस वराह रूपस मंज तु तुजिन यि बालि रूप धरती, नियन हँगन प्यठ पाताल प्यठु ह्योर बेयि खॉरिथ तु ठीकरॉवन बेयि पनुनि जायि । यि सफतला सपुज अमिय पाँचम द्वह, येमिकिन्य पूजा तु पाठ विष्णु भगवानस कँरिथ छिन अँस्यु यि द्वह याद करान । सुय रूजिन सारिनय येति योर ति सहायतस । यिथुय पॉठ्य मोरुन नरसिंह रूपस मंज हिरण्य कशप तु अपुज कोरुन फन्ना ।



गंगु आँठम, शारदा आँठम तु लल्लेश्वरी ज्यन्ती

शारदा ऋतुहस मंज प्रकट सपुजमुच वाङ्गदीवी छि शारदा वनान। अँम्यसुंद दोयिम नाव छु सरस्वती दीवी ति।

“श्री शारदा महातम्यम” येम्युक तशरिह तु तरतीब श्री ब्रजनाथ तिवकूहन छु कोरमुत, तमि अनुसार छु शारदा माजि हुंद प्रार्दुभाव यिथु पाँठ्य व्यस्तोरिथ वननु आमुत:- शान्डल्य रेश्य ओस बोड बारु तपस्वी तु ज्ञानी यस शारदा वनस मंजुय कर्म फॅल त्याँगिथ अष्टांग यूगस मंज सेदी प्राँविथ, आव यि नेशकाम सीवा रूप हवन करनुक व्यचार जि आहोच्चव किन्य दीवी दिवताहन खोश कॅरिथ दियिहे नवीद रूप ख्यन तु चेन लूकन। कर्ताहस ओस करुन। अमि हवनु बापथ बुलाँव्य तँम्य स्यठा वीद गायन वाल्य तु व्यदवान पंडित। यँज्ञस आहोच्च दिनुच सामग्री तु ख्यन च्यन सामग्री आयि सौरुय शारदी प्यठय अनुनावनु। शारदा क्षेत्रक्य शुर्य, बुड, ज्ञाननु तु मर्द आयि यज्ञस मंज बुलावनु। महायज्ञ ओस बुनि चलनुय अख स्यठा स्वंदर ज्ञाननु सपुज तँत्यन सादवी रूपस मंज पाँदु तु वोनुन रेशिस “बु छस तपस्वनी ब्रह्मनी, चूँकि चे छिथ योर सॉरी सालस अनिमुत्य बु ति आयस पनुनिस सुत्य बाँजिस गरुडस सुत्य दूरि प्यठ योर सालस। अँस्य छि स्यठा थँकिमुत्य तु ब्वछि हँत्य। असि दितु जलजल ख्यनु खॉतरु बतु।” शान्डल्य वोथ यि बूजिथ थोद तु दोपनस “चे छय खबरुय जि योतान्य नु पूर्ण आहुती दिनु यियि, तोतान्य हेकि नु कांह ख्यथ। पूर्ण आहुती पतु ति छु ग्वडु ब्रह्मनन होतारन (शुग वीद ग्यवन वोल आसि) तु यँजमनन ख्योन



तमि पतु हेकन पॅछ्य लॅछ्य नॅवीद रूप अन ख्यथ।“ अथ प्यठ
 गॅयि तपस्वनी स्यठा कूधी तु ह्योतुन यिथुपॉठ्य पुछुन:- क्या सा
 अॅगुच्यन प्रज्ञलवुन्य चन्ज्यन आव ना मे वीद मंत्रव आवाहन करनु।
 वीद छि परमीश्वर सुंज वॉणी तु वाक छु आत्मा। चे छय ना खबर
 वाक छु आत्मा, दय छु आवाजि रूप तु जगत छु शब्दमयी रूप।
 आत्मा तु परमात्मा छु शब्दस मंज तु शब्दुकुय। यिमव ब्रह्मनव
 दिचन म्यानि नॉव्य या म्यानि दिव्य शख्ती रूपन आहोचु। बुय
 छस काह रूद्र, ऑठ वसु, बाह सिर्यि तु सॉरी ब्रह्मांडुक्य दीव यिम
 म्यानि दिव्य शख्तायव छि पकान।“ यि वॅनिथ सोनु ज़ेवरव सॅजिथ
 कोर तॅम्य नीला सरस्वती रूप दारन। नील कमलस हियुव ओबरु रूप
 दॉरिथ हेतुन वनुन “बु करु ग्रास, जंगलन, सञ्जारन, ज़ीवन तु सॉरी

आहोत्र सामग्री हुंघन कुल्यन तु जडियन। बु ख्यमु औंद पोख सौरुय। “

यि माजि हुंद ग्रजुन वुछिथ खूच शान्डल्य स्यठा। सु प्यव पत्थर तु मूद। तपस्वनी रूज असन खंगालु त्रावान। तँम्य येलि वुछ शान्डल्य खूचिथ पत्थर प्यथ मरान, तँम्य वँन्य पनुनिस सुत्य बॉजिस यिम शब्द “हतो रुत्य जीवा यि ब्रह्मन करुन अमृत फेरि अकि सुत्य बैयि ज़िन्दु।” यि बूजिथ कोर तँम्य तिय यि वाक दीवी वोनुस। शान्डल्य गव पनुन्यव यूग शख्तिव सान बैयि ज़िन्दु। सौरुय मिसमार वुछिथ हेतुन पछतावुन ज़ि येमि सारिकुय ज़िमुदार छुस बुय। तसंज परेशांनी तु दया बाव वुछिथ आयि तपस्वनी पनुन अथु अभया मुद्रायि मंज थोद तुलिथ पनुनिस सरस्वती रूपस मंज तु वोनुन शान्डल्यस “चॉनिस मनस मंज दया बाव वुछिथ गयस बु प्रसन मंगु क्या छुय मंगुन।” दासु बावस मंज दोयव अथव नमस्कार कॅरिथ वोनुस रेश्य “योद ही माँज्य दीवी पॅज्य किन्य मे प्यठ प्रसन सपदेयवु बु छुस चोपौरुय प्रॉन्य पॉठ्य ददुवन बदलु सञ्जार तु यि जाय बैयि तिछुय स्वंदर ज़िन्दु लुकव कुल्यव जंगलव तु जानवरव सान वुछिन्य यछान।”

सरस्वती दीवी वोनुस “म्यानि गोबुर चु त्राव नज़र वोतर पश्चिमस कुन यपौर्य वितस्ता पकान तु बालु ग्वडस प्यठ छि मधुमँती नदि सुत्य मेलान तँत्यन बनाव पनुन आश्रम तु म्योन दाम। अँस्य मेलव वँन्य ततिय। युस मे वुन्यक्यनस सुत्य बोज छु, सु सपदि हरमुख सरस मंज गंगा रूप प्रकट तु बोनकुन पॅकिथ मेलि मधुमँती तु वितस्तायि सुत्य।” मे कर आवाहन तु म्योन आसुन प्रखटाव बालु थॉंगिस प्यठ। बु करय कामना पूर।

यिथु पॉठ्य प्रज्ञलोव बालु थोंगिस प्यठ श्री शारदायि भॉद्र
 जूनपछि ऑठुम द्वह पनुन दाम तु कॅरुन शान्डल्य रेश्य सुंज यछा
 पूर । शान्डल्यन कॅर तसुंज तपस्या लुकु हेतु बापथ । कौशिर पंडितन
 हुंदि गॅनितु हिसाब छि शारदा ऑठुम हर त्रैयि वुहर्य यिवान येलि
 चन्द्रम छु अँकिसुय सिमतस अंदर पकान ।

दोयिम्यन भॉद्र प्यथक्यन द्वन वॅरियन हुंजन ऑठुमन छि
 गंगु ऑठुम वनान, युस महातम्यमस मंज दर्ज छु तिक्याजि कृष्ण
 गंगा वॅछ हरम्बखु सरु प्यठ तु बोनकुन पॅकिथ मीज मधुमँती तु
 वितस्तायि सुत्य अँमिय द्वह ।

शारदा महातम्य छु ब्रौहकुन वनान जि शारदा पीठ बननु
 पतु आव शांडल्यस यज्ञोपवीत संस्कार करनु येमि खॉतरु सु महान
 यूगियन तोत ओस सूजमुत । शान्डल्य रूद माजि हुंदिस सायस
 तल तु प्रॉवन सेदी । श्री ब्रह्मा, विष्णु तु महेश आयि अमि पतु ईशान
 रूपस मंज अथ पवेत्र स्थानस प्यठ तु पञ्चोपचारा पूजा कॅरुख
 वैदिक सूक्त तु मंत्रव यथ मंज प्रार्थना ति आयि करनु । अमि पतु
 आयि इन्द्र दीव लोकपाल रक्षा करन वॉल्य दीव मरुदगन, नाग,
 विद्याधर, यक्ष, गुहक वगारह ति अति पूजा पाठ करनि । तमि पतु
 आयि रेश्य मुनी, कपिल, अँतरी, वसिष्ठ, कश्यप, गौतम, लोमाशा,
 शासटीका देवा शर्मा, उपमन्यु, धयमा, गालव अथ जायि मातायि
 हुंद प्रखुट सपदनुक दाम तु दिव्य स्वरूप पूजायि रूप व्यछनावनि ।

शान्डल्य चरित अनुसार छु शान्डल्यन कृत्यायुगस मंज
 वेदव्यास सुंदि यिनु ब्रौठ दक्षनस या दक्षिन पश्चम भारतस मंज
 जन्म ह्योतमुत युस शारदा तिर्थ महातम्यस मंज ति दर्ज छु । तसुंज

जिन्दगी हुंज सौरुय कथ छि चरित अनुसार माननु आमुच । प्रकाश स्वामी सुंदि वननु अनुसार ओस विप्र शान्दल्य कुनुय । तस ओस नु मेखला उपनयन संस्कार कैह करनु आमुत । कैम्यतान्य दिगम्बरन ओस लडकस काशी विश्वानाथ किस प्रानिस कस्बस बनारस गछनु खौतर वोनमुत । यि लडकु गव बनारस मगर काँसि ति कैर नु तसुंज यच्छा अमिकिन्य पूर जि तिम ओस्य असुंदिस क्वलस गुथरस तु वलदियच निश अंजान । तस ओस सिर्फ पनुन नाव पता । येमि नावु सौरी ओसिस बुलावान । बनारसस मंज अकिस जायि प्यठ बैयिस जायि फेरान म्यूल तस गंगायि बैठिस प्यठ अख साद । येम्य तसुंद डेकु पॅरिथ च्यून जि योद ओम्यसुज उपनयन तु मेखल संस्कार करनुच यच्छा पूर यियि करनु, यि बनि थोद महापुरुश, तिक्क्याजि यि छु अख महान आत्मा । ओम्य स्यद पुरुषन वोन ओमिस कशीरि गछनु बापथ, यस जाय वेतस्ता नदि किन्य स्यठा थैज, पोन्थ तु महान माननु छि यिवान । यि शुर शान्दल्य वोत स्यठा कोह तु बाल चॅटिथ दख्यन कशीरि यथ मराज छि वनान ओज्यकिस अन्नतनाग डिसट्रक्टस मंज । सु रूद केचस समयस अति ति फेरान येलि ओकिस सारस्वत ब्रह्मनस ओमिस प्यठ नजर पेयि तस आयि दया । तैम्य दियुत ओमिस 'पञ्चवर्ण' श्री सरस्वती मंत्र तु हेछनोवुन ध्यान करनुक तरीकु । तैम्य दियुत तैमिस वोतर कशीरि कामराज गछनुक सलाह येति तस मधुमति नदि बठि महा शैलायि दामनस तल, योस हरम्बख बालव किन्य ज्ञाननु छि यिवान तफ सादनु खौतर गछनुक इशारु । अथ शारदा वनस मंज गव ओम्यसुंद तफ सोफल तु बन्योव बोड बार जौनी ।

कौशिर्य पण्डित छि सौरी सारस्वत ब्रह्मन । असि छु विश्वास
 जि अँस्य छि सारस्वत महात्मा कश्यप रेश्य सुँद्य तु सारस्वत मुनी
 सुँद्य वंशज । अँस्य छि असली सतीसरुक्य बस्कीनदर । यथ पोन्त्य
 न्यबर कँडिथ प्यव कश्यपमर नाव । वारु वारु आव सान्यन जेवन
 प्यठ कश्मीर नावु यि हेनु । कौशिर्य सारस्वत ब्रह्मन छि सान्यन
 दर्म किताबन तु शास्त्रन मंज दर्ज । तिम अँस्य सरस्वती नदि हुँद्यन
 बठ्यन प्यठ रोजान, यस क्वल शारदा पीठस नँजदीक्य किष्णगंगाथि
 सुत्य छि मेलान । कल्हन पण्डितुन्य राजतरङ्गी मंज यस 12हमि
 सँदी मंज लेखनु छि आमुन्न छु यि पजर दर्ज, येम्युक पतु कहानी
 कारव तु हेमाचन्द्र कहानी कारन ति आंकार कँरिथ पनुनि किताबि
 मंज दर्ज छु कोरमुत । 13 तु 14 ईस्वी मंज पलटयोव हेन्द्य राजु सुंद
 तख्त । येलि दरबारुक्य अँक्य दरबोर्य राजस दियुत दोखु । दोखुक
 राज लोग तेलि पता येलि सुल्तान सिकन्दर बुतशिकन ब्यूठ तख्तस
 प्यठ । कौशिर्य सारस्वत ब्रह्मन आयि तसुंदिस राजस मंज या
 मारनु नतु चँल्य तिम कशीरि नेबर पनुन पान बचावनु बापथ । वननु
 छु यिवान तमिसुंदि जुल्मु सुत्य रूद्य कशीरि मंज कहाय बटु गरु ।
 दौयिम पलायन गव मुगल शहनशाह औरंगजेब सुंदि वख्त । तँम्यसुंदि
 राजिक्य सूबेदारन करनौव्य जबरन हेद्य इस्लाम कबूल । यि ओस
 सुय वक्त येलि महान सिख जंगजू गुरू तेग बहादुर जियन पनुन
 पान छेपि दिथ फौसलुक दस तुल । कौशिर्य हँद्यन हुँदि गरि नेरनुच
 प्रतिक्रिया सपुदेयि 18 तु 19 बुहिम ईसवी अफगान राजस मंज ति ।

1947 मंज येलि अँकिसुय दीशस द्वन हिस्सन मंज छलु
 गँयि कबौइलव दँस्य आयि बटु मारनु या कँह चँल्य । पतु गव

1990 ईस्वी मंज ब्याख पलायन येलि केंह कॉशिर्य बटु मॉरिख, लूट कोरहख तु चिठि त्रॉविथ चलनॉविख। यिथु पॉठ्य त्रॉव्य कॉशिर्यव बटव वख्तु वख्तु पनुनि ज्यनु जायि तु सौन्य कर्लचल सांपथ रूज तँतिय यथ सौन्य दिल फक्त रूद्य याद करान।

एडवोकेट श्री नंदलाल शाह सुंजि किताबि Kashmir Trika Philosophy and other Thoughts मंज छि तिम लेखान जि योद कॉशिर्य पंडिथ वख्तु वख्तु छँकरनु आयि, तोति छि तिमव पहचान तति ति जिन्दु थँवमुच्च येति येति तिम पलायन कँरिथ बेयि बसेयि। तिमव छु पनुन मान तु शान तति ति कौयिम थोवमुत। तिम छि ब्रौहकुन Walter S. Lawrence दँस्य Vale of Kashmir लेखनु आमचि किताबु हुंद हवाल् दिथ वनान जि कॉशर्य छि पनुनि ख्वदौरी तु कोमियत ह्यथ बेयि थोद व्वथान। कॉशर्य बटु छि स्यठा फखर महसूस करान जि तिम छि माता शारदायि हुंद तु बेयि तँमिस अन्नतनागुकि सारस्वत ब्रह्मन सुंद वंशज येम्य शान्डल्यस ग्वरु मंत्र दिथ सु माता शारदायि हुंदन पद्यन तल वातनोव।

कल्हण छि कँशीरि हुंज कहाँनी वनान राजतरङ्गनी मंज श्री शारदायि हुंद बजर यिथु पॉठ्य लेखान जि स्यठाहव युगव प्यठ ऑस्य कॉशिर्य शारदा दीवी हुंज त्वता करान येति भेदा बाल थौंगिस प्यठु किस सरस (हरम्बख) मंज हंस रूपस मंज ऑस मॉज्य सरस्वती बोझनु यिवान, येमि सरु मंज गंगा आयि बोन वालनु, येम्य मधुमँती तु सरस्वती सुत्य मीलिथ शान्डल्य रेशिस ऑर्शिवाद दियुत। अमि ऑर्शिवाद तु अमिचि महिमा सुत्य आव कँशीरि शारदा मण्डल नाव दिनु।

कल्हणनि अनुसार ओस शारदा पीठुक पॅतिम तु आँखरी पुरोहित पंडित प्रकाश राम। तमि सुंदव ज़िठ्यव ओस महाराजि गुलाब सिंहस निश पीठ शेरनु संबालनु पतु अमिचि पूजायि हुंज ज़िम्मुवॉरी निमुच। पीठस आँस अफगॉनिस्तान क्यन अब्दॉली हुकमरानन हुंदि समयि स्यठा खस्त हालत सपुजमुज। यिमव भारतस मंज मुगल हकूमत खत्म गछनु पतु कॅशीरि प्यठ जंग छीडिथ लुख मुहिथ मॉरिथ कॅशीरु तबाह कॅर।

महाराजा गुलाब सिंहन कॅर स्यठा मेहनत यि यात्रा नवि सरु शुरू करनस मंज। तॅम्य सॉबरॉव्य कॅशीरि तु पंजाब प्यठु पान्डुलिपियि तु प्रॉन्य लाब्रेरी नवि चालू करनस मंज ति कॅरुख स्यठा कूशिश। रजु कॅदुल बनोवुन ताकि यात्री हेकन मुजफराबाद प्यठु त्रिवेणी तॅरिथ। यि चल्थोव 1947 ईसवी तॉन्य योतान्य कबाइलव हमलु कोर। 1947 अक्टूबर आयि पाकिस्तॉनी कबाँइल तु कोरुख मुजफराबादस प्यठ हमलु। लूट खसूट कॅरिथ ज़ोलुख मुजफराबाद येमिकि दहशतु लुख चॅल्य अमि आशायि ज़ि जंगस छेन सपदनु पतु यिन गरु बेयि वापस। शारदी गामस मंज येलि कबाँइल वॉत्य प्रकाश स्वामी ति द्राव पनुन अयाल हेथ श्रीनगर येति रिफूजी रूप बीठ्य सॉरी। कॅह कॉल्य पतु आयि रिफूजी कमराज खितस मंज तु प्रकाश स्वामी ति आव अयाल हेथ क्वपवॉर्य ज़िलुकिस टिकर गामस मंज। तमि विज़ि ओस स्वामी नन्द लाल जी ति शारदी मंज। तिम तुल्य कबाइलव तु त्रॉविख टिकर बालस प्यठ। टिकर बालु वति मंज्य छु अख पल नज़रि गछान यथ शारदा पल छि वनान। यि छि अख बॅड बारु लिहिन्य कॅन्य येम्युक गोल आकारुय

योत छु सारिनय अथि यिवान । यि छु वनुनु यिवान ज़ि येलि स्वामी नन्दलाल जिय न्यरवँस्त्र श्रानुपटस मंजुय योत शारदी गामु प्यठ कबॉलव दँस्य अननु आयि तिम रुकेयि अँथ्य जायि तु अँथ्य कनि प्यठ बनोवुख पनुन चोकु, यथ मंज तिम बतु ऑस्य रनान । भारती फोज यिनु किन्य द्रायि कबॉयिल जल्दी मंज ब्रोंहकुन सफरस, मगर स्वामी जिय रूद्य तँती । तँम्यसुंघव त्रैयव भख्तव बनोव अति आश्रम बालस हेरुकनि, तुलमुल क्षीर भवॉणी हुंद हूबहू अख क्वंड 'तत्सम क्वंड', अथ मंजबाग शेरस सवार माजि दूगार्थि हुंद मंदर यथ मंज मॉज आयि मंत्रव तु तंत्रव स्थापित करनु ।

स्वामी जिय रूद अति दिगम्बर रूपस मंज कीवल श्रानुपट लॉगिथ वुम्बरि । चूँकि शारदायि ओस तिमव तप सोदमुत, तिम रूद्य वॉसि तँथ्य बालस प्यठ येत्यन कबाइलव त्रैवमुत ओस । मँज्य मँज्य ऑस्य अति प्यठु श्रीनगर ति गछान । टिकर बालस प्यठ आव तिहुंद तु तिहुंदन बखुत्यन हुंद आश्रम बनावनु । पनुनि द्यन गुजँरी खॉतरु कँर प्रकाश रामन डाकुवॉल्य सुंज नोकरी । तमि पतु ओस टिकर ति संतन मेलनि द्वहय यिवान । स्वामी नन्दलाल जियन ह्योत प्रकाश रामस प्रकाश स्वामी वनुन ।

प्रकाश स्वॉमी ओस पनुनि समयुक बोड बारु साद तु व्यदवान । तस ओस कौंसि हुँदि ज़ेवि "शारदा" नाव बोजुनु सुत्य दिलस खंजि गछान तु ओस पछितावान ज़ि मे ओन नु बखुत्यन खॉतरु पीठु प्यठु कांह ति पाण्डुलिपि, मगर "शान्दल्य चरित" शलूक ऑसिस दिलस मंज खँनिथ, येमि सुत्य श्री शारदायि हुंज बनॉवमुच मूरत यस शारदा ध्यान मंत्र शलूक तलुकनि ऑस, ऑसुस याद प्यवान ।

कल्हननि राजतरङ्गनी अनुसार Chronicles of Kings of Kashmir यथ M.A. Steinan अनुवाद कोरमुत छु किन्य छि यि सरस्वती दीवी यस वुनि ति छि लुकन हुंजि ज़बॉन्य प्यठ।

चन्द्रपंडितनि वननु किन्य ओस मन्दर सिखु हमलु ब्रोंठ तकरीबन तबाह तमि विजि सपुदमुत येमि विजि तति कर्नवुक्य मोहमन्दन राजि किष्णगंगा वादी प्यठ आज़ाद चीफव रूप राज ओस्य करान। तिमव मंज ओस्य सुंदिस राजस मंज ओस मंदर शोरु स्टोर रूप प्रयोगस मंज अननु यिवान। येमिकि अकि दमाकु सुत्य मन्दरुक छत वुडयोव। योद यि कथ पेंज छि तेलि आसिहे नु मन्दरुक छत कन्यन हुंद केह। सुती आयि मन्दरुच मरमत गोंटेग क्यव ब्रह्मनव सथ रोपयि मज़ूरि सुत्य अंद वातुनावनु। यिमव ब्रह्मनव मंज ओस चन्द्रपंडित ति अख ब्रह्मन युस तमि सातु अमि मंदरुक मिलकियती हकूकन हुंद दावा ओस करान। मन्दरस नेंजदीक्य ओस “शारदी किलु” युस ज़लवुन तु फवलवुन ओस।

जोनराज छु राजतरङ्गी हुंदिस 1057 शलूकस मंज यिथु पौठ्य लेखान जि माजि हुंदिस बुथिस प्यठ ओस्य ओरकु फेर्य प्रजलान। नरि हुंज हरकत तु ख्वरन अथु लागनु विजि ओस्य ख्वर वुशिन्य ओकिस ओरतिस बासान। यिम शब्द पेरिथ वोथ राजि जैनउलाबदीनस ख्याल जि बु ति वुछहा युथ दिव्य नज़ारु। तमि सुंदिस पेंथुरस ओस माजि प्यठ विश्वास, सु गव दास बावस मंज तु बासेयस तोत गेंछिथ शान्ती ज़ोवापौर्य। राजि येलि मातायि ब्रोंहकुन गव तँम्य कोर नु कांह ति अनुबव तँत्यन। पतु शोंग ततिनसुय तु आस मनस व्यचार द्यव स्वपुनस मंज वुछन मॉज

शारदा । मगर यि कूशिश ति गॅयस नाकाम । शाहज़ाद पोथरु संज़
प्रशंनसा करान छु जोनराजन अँमि संज़ि मायूसी सीवकन हुंज़ि
बदज़ॉती तु मलेचन हुंदि जमगटस सुत्य वाठ दियुतमुत । कॉबिल
राजि ज़ैनउलाबदीन संज़ मायूसी बयान करान छु वनान जि माजि
कॅर पनुन्य आस्था पानय चकनाचूर ।

मॉजि शारदायि छि टङ्कधारिणी वनान यस टङ्कर छि लागान ।
टङ्कर या डेजहोर । कलूस बंडुपोरि शारदाबल छि माता शारदायि
हुंज़ि मूर्ती डेजहोर लॉगिथ युस शारदा मातायि हुंदिस सीनस प्यठ
छु प्यवान । कॉशिरि ज़नानु छि वुन्यक्यन किस दमस तान्य डेजिहूर
अटुहूर लागान । “स्वंदर्य लहरी” हुंदिस 28 वुहिमिस शलूकस
मंज़ छु आदि शंकराचार्य यिथु पॉठ्य अथ माजि हुंदिस डेजिहुरिस
मुतलिक वनान जि :-

सुधामप्यस्वाद्य प्रतिभय जरामृत्यु हरिणीं,

विपद्यन्ते विश्वे विधिशतमखाद्या दिविषदः ।।

करालं यक्ष्वेलं कवलितवतः कालकलना,

न शंभोस्तन्मूलं तव जननि ! ताटङ्क महिमा ।।२८।।

अर्थ : ही मॉज्य ब्रह्मांडक्य सॉरी दीवी दिवता तु जीव यिमव अमृत
मंथन विज़ि अमृत चोमुत छु, येमिकिन्य तिम बुजर तु मरनु निश
बचेमुत्य छि, मरन ज़रूर महाप्रलयिकि द्वह, मगर शम्भू येमिसंज़
शख्ती चुय कीवल छख, येम्य अमृत मन्थन विज़ि विशापान कोर,
युस वुनि ति तमिसुंदिस हँटिस प्यठ रूज़िथ छु, तिम रोज़न यि
ब्रह्मांड बेयि बनावनु बापथ ज़िन्दु । यि छु सिर्फ संबव अमि टङ्कर
चानि सुत्य युस कनस मंज़ लॉगिथ ख्यनु ख्यनु अलुरान रोज़ान

छख । यि छि असि सुहागुच निशौन्य । असिय छि यि मान्यता जि डेजहूर लागनु सुत्य छि बरथाहस जीठ वुम्बर दय कृपायि नॅसीबस आसान । अमिसुंद मूल मंत्र छु :

ॐ ह्रीं क्लीं सः नमो भगवत्यै शारदायै ह्रीं स्वाहः ह्रीं ॐ
अमूमन छु असि भारतुक्यन हेंद्यन ज़ेवि पेतिस प्यठ यि शलूक :

नमस्ते शारदे देवि काशमीरपुर - वासिनि ।

त्वामहं प्रार्थये नित्यं विद्यदानं च देहि मे ।।

श्रीनॅगरु प्यठ 130 किलोमीटर दूर छु शारदा गाम यिवान । मुज़फराबद प्यठ छु शारदा 140 किलोमीटर दूर । यि गाम छु मुज़फराबाद किस तॅहसील अट्टमुकामस मंज़ । हेंद्य राजस मंज़ ओस शारदा गाम दोयव कारनव किन्य मशहूर । अख छि यि शारदा मातायि हुंज रोज़न जाय । दोयिम शारदा पीठ (शारदा अध्ययन केन्द्र) ।

प्रोन शारदा दीश छु भारतुक संस्कृतिक केंद्र रूदमुत । येम्युक अनुबव दीशि न्यबर प्रॉन्त ति छि करान । अथ संस्कृतिक, बौद्धिक तु दर्शनिक प्रयोगशालायि पोछर दिनस मंज़ छु दीशिक्यन हर क्षेत्रुक्यन मुनियन, सादन, तपीश्वरन तु व्यदवानन हुंद योगदान । चाहे दखियन केरल तु कर्नाटक्य या पूर्वस मंज़ आसाम तु बंगाल या आसन गंगा यमुना गाटी प्यठ आमत्य लूख, यिम ओत यिथ तपुस्या कॅरिथ ज्ञान प्रॉविथ ऑस्य पनुन्य अनुबव ब्रौहकुन पकुनावान । यिथु पॉठ्य छेनु दीशिच स्व कांह जाय यथ प्यठ नु शारदा खण्डुकि बजरुक प्रबाव छु प्योमुत । अभिनव गुप्त छि पहचानि प्यठ बल दिवान युस अॅकिस जीवस अंदर मूजूद शिव संज़ कथ छि करान । तॅमिय ऑस तिमव अथ ईश्वर प्रत्यभिज्ञा बापथ ब्रह्मन तु शुद्र कुन जीव ज़ौनिथ साधना

करनुच कुन्य वथ गाशिराँवमुत्र । शारदा पीठ्स मंज रूजिथ छि ग्वडुनिच
शेख्या अँम्य मातायि हुंघन चरनन तल प्रावँमुत्र ।

दीशस छलु गछनु ब्रौठ ओस हर वँरियि बौद्र जूनपछि
ऑठुम द्वह अख बोड बारु द्वह अति मनावनु यिवान । येम्युक संज
बौद्र जूनपछि चोरम प्यठुय ओस शोरु करनु यिवान । सासु बँद्य
लूख ऑस्य अखण्ड भारतुक्य हर कून प्यठ यिथ माजि हुंद दर्शुन
करान । अमि द्वह ऑस्य हरमुकुट गंगायि हुंद ति वँरियुक बोड दोह
मनावान । अमि ऑठुम द्वह छि केह लुख श्री कृष्ण जियनि टाछि
राधायि हुंद जा दोह मनॉविथ अथ द्वहस "राधा अष्टमी" ति वनान ।
अमि द्वह छु ललदेदि हुंद जन्म द्वह ति आसान ।

कँशीरि कोपवारि प्यठ लगबग डोड किलोमटीर दूर जु बटु
गाम, यिम हँद्य संस्कृतिक इतिहासकि नजरि मंज लूकन जेवि पेटिस
प्यठ छि । (1) टिक्कर (2) गुशी । टिक्कर प्यठ छु तकरीबन 40 किलोमीटर
दूर शारदा गाम युस किशन गंगा बैठिस प्यठ छु बैसिथ ।

प्रानि समयि प्यठ छि कँशीर ज्ञान, वेद्या तु शास्त्र परनुक
केंद्र रूजमुज । यिहय छु वजह जि कँशीर ऑस शारदा पीठ, शारदा
भूमि तु शारदा नँगरी नावु ति ज्ञाननु यिवान । टिक्कर प्यठ शारदा
पीठ वातनस छि जु वतु । यात्री या बँखुत्य ऑस्य टिक्कर प्यठ
मुरहोम, मुरहामि प्यठ जुमगण्ड तु जुमगण्ड ब्रोंहकुन पँकिथ शारदा
वातान । दौयमि वति प्यठ पँकिथ छु टिक्कर प्यठ बटुपूर, बटुपोरि
प्यठ गुथम डूर, तति प्यठ थैयन तु थैयनु प्यठ ऑस्य शारदा माजि
निश वातान । ब्याख वथ ऑस मुजफराबाद प्यठ अट्टमुकाम तँहसील
मँज्य नीरिथ शारदा गाम स्योद वातान । 1947 ब्रोंह ऑस्य केह

लुख वरमुलि प्यठ उडी, उडी प्यठ मुज़फराबाद किन्य शारदा गाम वातान। शारदा गामस मंज़ माजि शारदायि हुंद मन्दर ओस किशन गंगायि खोवरि तरफु क्वल बँठिस प्यठ प्रज़लान, येत्यन मधुमँती नँदय छि किशन गंगायि सुत्य मेलान।

हँदय हकूमतस मंज़ ओस शारदा मातायि हुंद तीर्थ स्थान पवलुवुन तु चमकवुन। मगर समयिक्यव थपेडव कँर्य ततिक्य बँस्कीनदर ति चलनस प्यठ मजबूर। आज्ञाँदी ब्रोंठ ऑस्य अति केंह पण्डित रोज़ान। केंह परिवार ऑस्य तिमन मंज़ ब्रह्मनाँज़ी तु केंह ऑस्य बापार किस सिलसिलस मंज़ शान्ती सान ततिय मातायि हुंदन पद्यन तल बिहिथ पनुन्य द्यन गुज़ाँरी करान। केंह साद सन्त तु बेयि तिहुंद बँखुत्य तु सीवक ति ऑस्य मातायि हुंदन चरनन तल बिहिथ सीवायि रूप पनुन ज़न्म रथि खारान। आज्ञाँदी पतु गव यि मातायि हुंद शक्ति पीठ लुकव रोस खॉली।

दीशस छलु गछनु विज़ि ऑस मन्दर परिसरस मंज़ अख बँड बारु लयब्रेरी तु गोष्ठी कक्ष ति मूजूद। लायब्रेरी मंज़ ऑस्य वीद, षटदर्शन, शिवमत, ज्योतिश विद्यायि हुंद नायाब ग्रंथ शारदा लिपि मंज़ लीखिथ पाण्डु लिपियि महफूज़। सूंचिथ समजिथ चालि तहत आव यि सासु बँद्य वँरिय ब्रोंठ प्रोन तु परातन ज्ञानु बंडार नष्ट करनु। येमिकिन्य कँशीरि हुंदि प्रानि हँदय इतिहासु निश ऑस्य वंचित करनु आयि। मन्दरुकि चोश्वय तरफव छु काह फुट थोद देवार, युस किशन गंगायि हुंदि बठि खोतु स्यठा थोद छु नज़रि तल यिवान। तिक्याज़ि मन्दर छु अँकिस बालु टेंगरि प्यठ यथ 64 हेरु पाँव्य खसनस छि। स्वामी सच्चिदानन्द पुरी (सन्यास आश्रम बंडपूर)

सुंदि वननु किन्य मन्दरस तान्य वातनस यिम 64 हेरु पॉव्य छि,
 यिमन सारिन्य छि 64 दीवियन हुंघ नाव। मन्दर परिसरस मंज छि
 माजि शारदायि हुंज रोज्ञान जाय, येमिच बनावट कॅशीरि हुंघन
 मन्दरन हिशिय छि। मन्दरुक अचुवुनुय द्वार छु पशिचम कुन।
 मन्दरस अन्दर अचनु बापथ छु हेरु पाव्यन खसुन प्यवान। मन्दरस
 मंजबाग छि अख हमवार शिला, यस सथ फुट ज्यीठ, शे फुट खुलु
 तु शे फुट मोट छि। दपान यिहय शिला छि तथ अमृत क्वंडस प्यठ
 ठानु, यथ मंज माता शारदायि हुंद वास छु। यात्री छि अथ शिलायि
 पोशि अम्बार कॅरिथ पूजा पाठ करान तु शारदा मातायि हुंद दर्शन
 सुत्य शान्ती तु संतूश प्रावान। मन्दर परिसरुक मुख्य द्वार छु दक्षिन-
 पशिचम तरफ। शिला दीवी आँगनुकिस नागस ब्रोंहकनि छि माजि
 सरस्वती हुंज मूर्त क्रेहनि कनि प्यठ गॅरिथ। यस हेंघ राजुच मूर्ती
 शिल्पकॉर। हुंज एतिहासिक धरोहर आसनस सुत्य सुत्य, शारदा
 भूमी हुंज बौदिक सम्पदा तत्त्व ज्ञान, व्यवहार ज्ञान, तर्क तु विवेकुच
 अत्र ज़िन्दु मिसाल छि। मन्दरस मंज छेनु कांह मूर्ती। शिला रूप
 माजे शारदा ऑस्य सॉरी पूजान।

शारदा मन्दर छु शे कूनल। युस माजि हुंदि शेन अलौकिक
 शक्तियन हुंद प्रतीक छु। यिम शक्ति छि यिथु पॉठ्य:-

- (1) मॉज छि सर्वु व्यापक
- (2) मॉज छि परिपूर्ण दिव्य विभूती
- (3) मॉज छि चेतना रूप बुदि हुंज साक्षात रूप
- (4) मॉज छि सर्वु शक्तिमान
- (5) मॉज छि दिव्य शक्तियन हुंद अदभुत बंडार

(6) माँज छि सर्व सिद्धी दायिनी

यिहय छु कारन जि माजि छि शे बोजु आसान । श्वद ज्ञान तु विवेकच दीवी आसनु किन्य छि बँखुत्यन श्वद ब्वदि हुंद वर्दान दिवान, ताकि तिम हैकन पँजिस तु अपजिस फर्क कँरिथ पनुन जन्म रथि खँरिथ । माजि हुंद वाहन छु हंस । रुत्य कर्म करनुच छि स्व बँखुत्यन प्रेरना दिथ तँम्य सुंदिस हंसस पोछर दिवान ।

शास्त्र छि वनान जि दीवताहव तु दानवव दँस्य येलि क्षीर सागर मन्दुनु आव, तति द्रायि सकारात्मक तु नकारात्मक तत्व अलाव कामदीन, येम्य सुंज पूजा दीव छि करान । पतु गँयि खुमँर्य चेशमव वारुणी दीवी प्रकट । तमि पतु गव कामनायन पूर करनवोल तु सँरिसुय ब्रह्मांडस मुशकावन वोल कल्पवृक्ष पौंदु । तमि पतु द्रायि स्वंदर तु वोदार अदबुत अप्सरायि अमि मंजु । अमि पतु द्राव चन्द्रम युस पानु शंकर जियन जटन प्यठ शूबरोव । अमि पतु द्राव सफेद वस्त्र दौरी साक्षात भगवान धन्वन्तरिजी सकारात्मक शख्ती रूपु अमृत चोड ह्यथ धरती प्यठ । अन्तस प्यठ गँयि तीजवान प्रजलवन्य अथन मंज पम्पोश ह्यथ पम्पोशस प्यठ व्यराजमान श्री लक्ष्मी दीवी अमि क्षीर सागरु मंजु प्रकट । सँरी दीवी तु दिवता गँयि प्रसन । क्वलव रूप दीवीयव कोरुस श्रान, गर्न्धवव ह्योत ग्यवुन, अप्सरायव ह्योत नचुन, निश्वकर्मन लॉगिस लाल जवाहरव सान स्वनु जेवर । क्षीर सागर गव पानु साक्षात प्रकट तु कँरनस फ्वलिमुत्व पम्पोशन हुंज माल गुलिम्यूठ । वुछान वुछान आयि यि सँजिथ दँजिथ तु बीठ श्री विष्णु भगवानस खोवरि तरफु । दीवी वुछिथ गँयि दीवता ख्वश तु दानव गँयि दिलुमलूल । यि दिव्य नज़ारु बरदाश नु वँरथ

न्युव दानवव श्री धन्वन्तरि भगवान सुंदि अथु चीरिथ यि अमृत चोड
 तु हेतुख चोन। श्री विष्णु भगवानन कोर मुहनी रूप दारन। पनुन्यव
 वोलव तु छलव तँम्बुलॉविन दानव तु अथु मंजु थपि निथ चोड
 पिलुनोवुन दीवताहन कुन। अथ प्यठ गॅयि दानव कूधी तु हेतुख
 तिमन प्यठ प्रहार करुन। चूँकि अमृत सुत्य ऑस्य तिम स्यठा
 बलवान सपुद्यमुत्य, तिमव मॉर्य स्यठा दानव तु केंह चॅल्य पाताल
 लूक कुन। अमिपतु कोर दिवताहव शङ्ख चक्र गदादॉरी भगवानस
 प्रणाम तु द्रायि पनुनि स्वर्गापुरी राज बेयि करनि। यि कथ पेयि मे
 अमिकिन्य वनुन्य जि योसुहान अथ अमृत चडि मंजु हुरेयि स्व
 नियि सरस्वती रूप पानु माता पार्वती तु थोवुन बालु थोंगिस प्यठ
 शारदा गामस मंजु मेचि तल खॅटिथ, यथ त्रिवेनी हुंद ग्रजुवुन संगम
 शूबरान छु। यि छु प्रकाश स्वॉमी सुंदि वननु येमि शांडल्य चरित
 मंजु येमि शलूक सुत्य ननान :-

श्री श्रीशैलस्थिता या प्रहसितवदना पार्वती शूलहस्ता,
 वह्नि सूर्येन्दु नेत्रा त्रिभुवन जननी षड्भुजा सर्वशक्तिः ।।
 शाण्डिल्येनोपवीता जयति भगवती भक्ति गम्या नतान्नां,
 सा नः सिंहासनस्था ह्यभिमत फलदा शारदा शं करोतु ।।

म्योन अनुवाद छु यिथु पॉठ्य :-

असुवनि म्वखु पार्वती शिलायि प्यठ वेराजमान
 त्रिशूलदॉरी सिरिं रूप नेत्रव प्रज्ञलान
 त्रुभवन जननी शे व्वजु रूप सर्व शख्तिमान
 बख्ती किन्य शांडल्य छु भगवती दारान
 शेरस सवार फलु रूप वर दिवान

बखुत्यन शारदा शान्ती बख्वान ।।

अथ जायि प्यठु थॅवनस पानय स्व हमवार शिला योस 7 फुट ज़ीठ, 6 फुट खुलु तु 6 फुट मोचरु ऑस । अन्दाज़ु छु यिवान करनु ज़ि हेंद्य राजस मंज़ आव अँथ्य अँद्य अँद्य मन्दर बनावनु । यिति छु वननु यिवान ज़ि राज़ु ललितादित्ययिनि समयि ति ओस यि मन्दर बॅनिथ । कॅह नेबरिम्यन लिखार्यन हुंद्यन सफरनामन मंज़ ति छु अमि मन्दरुक व्यछुनुन डींश गछान । चीनी यात्री ह्यूनसांग येलि कॅशीरि 632 ई० हस मंज़ आव, सु रूद अति दोन वॅरियन तु ल्यूखुन शारदायि मंज़ यिम वसीह सोंचुक्य तु तीजुवान प्रतापी पंडित मे वुछ्य, तिहुंद अध्यात्मिक सोच, तुलुत्राव, व्वथुन बिहुन छु स्यठा तॉरीफन लायख । अमि सुत्य ति छु ननान ज़ि शारदा मातायि हुंद यि परमपद छु स्यठा प्रोन तु परातन ।

शारदा मातायि हुंद बजर — वननु छु यिवान ज़ि महारेशी वशिष्टस ओस नु कांह पोथुर । तॅम्य दोप अकि द्वह पनुनि त्रयि ज़ि “मागनिस रेतस पुनिम तान्य योद चु फाकु थॅविथ करख भगवान शिव सुंज़ व्वपासना, चु बनख पोथुर मॉज ।” तत्यन ओस वॅसिथ ज़ॉच हुंद अख नफर बोज़ान । सु गव गरु तु वननु पनुनि त्रयि यि शेछ । माग दॅरिथ बावु सुत्य शिव व्वपसना कॅरिथ प्रॉव तिभव सेदी तु ज़ाख नेचुव । नेचिविस थोवुख शांडल्य नाव । वननु छु यिवान ब्रह्मनव मोन नु तस योनि त्रावनुक संस्कार कॅह करुन । अथ प्यठ वोन तिभन वशिष्ट रेश्य “तोह्य गॅछिव माजि शारदायि निश । तुहुंज़ कॉम नेरि तती ।” तिभ गॅयि क्वपवारि प्यठ गुश । वति पकान बास्योस ॐ शब्द कनन गछान । बटुपोरि वति किन्य गुथमडूर पतु थैयन वॉतिथ वॉत्य तिभ

शारदा गाम। येलि शारदायि नॅजदीक नागस मंज श्रान कोरुन, तस बन्योव ओड़ शरीर स्वन सुंद तु मातायि हुंदि दर्शनि बन्योव सु स्यद पुरुश। युस शांडल मुनि नावु गव जगि मशहूर।

दपान कॅशीरि हुंदिस अँकिस हेंदय राजस आँस्य मॉशि (भैस) हिव्य कन। सु ओस पनुनि अथ बदसूरती प्यठ स्यठा शरमंदु। अव्य नॉविदन फॅहलॉव अम्यसुंदन मॉशि कनन हुंज शोछ सॉरिसुय प्रज्ञायि मंज। राजु ओस स्यठा दमफँट्य तु लाचार। राजस आयि स्वपनस मंज अख दिव्य शक्ती तु शारदा मातायि निश गछनुक दियुतनस इशारु। माजि शारदायि हुंदिस आंगनस मंज अचनुच आँसुस तॉर, तँम्य सुंद मॉशि कन गॅयि अकि दर्शनु मात्र सुत्य गॉब। यि कथ आँस कॅशीरि मंज आम:-

माँकन राजस मॉशे कन,

शारदायि येलि गछि, तेलि बल्लहन

राजन बनोव तति पतु बोड बारु मन्दर। यिथु पॉठ्य छु शारदा तीर्थ स्थान ऋदि तु सेदी प्रावनुक दिव्य स्थान माननु यिवान।

यथ बँठिस प्यठ शारदा तीर्थ छु, तथ छि किशन गंगा नावुक दॅरियाव वनान। युस अख तूफॉनी दॅरियाव छु। पनुनिस सफरस दौरान पनुन पान बड्यन बड्यन पलन तु कन्यन सुत्य छॉविथ याने अँकिस तुगियाँनी दॅरियावुच सूरत पेश करान। मगर हारॉनी छि यि जि शारदा मातायि हुंदिस हदस मंज येलि वातान छु अम्युक रफतार छु त्यूत सुस्त तु नर्म प्यवान जि फिकरि छुन तरान जि पोन्थ कोतन तु कथ अंदस कुन छु गछान। युथुय माजि शारदायि हुंद हद छु त्रावान, दॅरियाव छु बेयि फलकन खसान तु तूफॉनी

सूरत बेयि इखितयार कॅरिथ बेयि ब्रॉह कुन पकान । माजि हुंदिस
अथ रूपस नमन तु जय जयकार ।

8-अक्टूबर 2005 मंज युस दिल लरजुवुन बुन्युल कॅशीरि
हुंदन दोन हिस्सन मंज आव, तॅम्य कॅर माजि शारदायि अहातु
नेबर स्यठा तबहॉयी । मकान लूहरेयि, जॅमीन फॅट तु स्यठा जॉनी
तु मॉली न्वकसान गव, मगर माजि हुंदिस अहातस लॅज नु ज़ीर
ति । प्रथ कांह कॅन्य रूज कनि सुत्य कौयिम ।


जगत गुरु शंकरार्चायि छु (8वीं तु 9वीं) शताब्दी मंज
माजि हुंदि दर्शनु बापथ योर आमुत । कॅशीरि हुंद महाराजि ललतादित्य
तु वैष्णव मतुक गुरु आचार्य रामानुज ति आव त्रुहामि सॅदी मंज
मातायि हुंदि दर्शनु बापथ शारदा तिर्थस प्यठ ।

भृगीष रेश्य छु शारदा तीर्थ स्थानुक प्रथ कांह पहलू
व्यछनोवमुत । दुर्गा सप्तशती मंज ति छि अमिच महिमा बॉनु बानु
दर्ज । अथ मंज छि शारदा मॉज विद्यायि हुंज दीवी, ज्ञानु आगुर,
सर्वसिद्धी दायिनी, महाशक्ती रूप मानुनु आमुच । कॅशीरि मंज
बंडपोरि क्वलसि ति छु शारदा मातायि हुंद मन्दर, येति भॉद्र ज़ूनपछ
ऑठुम ओस बोड बारु ह्वन करनु यिवान । मातायि हुंजि प्रेरनायि
सुत्य, स्वामी गोविन्दानन्द जियनि दॅस्य वॅनिमुच "शारदा सहस्रनाम"
यस क्वलसिक्क्य श्री सर्वानन्द जियनि दॅस्य लेखनु छि आमुच तु
कॅशीरि कडनु पतु 1994 ई० मंज श्री स्वामी सच्चिदानन्दनि दॅस्य
छाप कॅरिथ आयि बाज़रस मंज कडनु ति छु म्वलुल अख खज़ानु ।
यि छु बजर मातायि हुंद ज़ि अज़ ति छि बॅखुत्यव तत्यन तत्यन
मातायि हुंद मन्दर बनॉव्यमित्य येत्यन येत्यन तिम रोज़न छि ।

अमि ज़न्म द्वह छि हर जायि यज्ञ कॅरिथ माजि हुंद आसुन थ्यकुनावान ।

भाँद्र जूनपछ ऑठुम ओस तथ तिर्थस प्यठ पनुन्यन पेटरन
श्राद हावनु तु म्वर्दन हुंज अस्थियि ति बावनु यिवान, तिक्क्याजि यथ
तिर्थस प्यठ छु किशन गंगा तु मधुमति हुंद संगम । शारदा तीर्थ छु
केंचन महान यूगियन, सन्तन तु तपीश्वरन हुंज तपोभूमी रूजमुच ।
स्वामी लालजी महाराज तु तिहुंदिस महान भक्तस श्री स्वामी नन्दलाल
जियस ति छि येतिय सेदी मीजमुच ।

शारदा मातायि निश ऑस्य अँद्य पॅख्य गामन हुंद्य गुजिर्य
तु पहाँडी बॅस्कीनदर हरदस मंज हरुद वॅटिथ माजि शारदायि ब्रोंहकनि



पनुनि पनुनि मकदूर मूजूब तोमुल तु कुनुख त्रावान । किशन गंगायि
ऑस्य गाँवुन हुंद द्वद बावान तु मन्दर परिसरस मंज रोजन वाल्यन
सादन संतन थनु तलुक गाँव द्वद निथ पानस क्युत रुत काँछान तु

पनुन्य कामना पूर करनुच आश थवान। आम मुस्लमानव अलावु
 ऑस्य मुस्लमान संत फँकीर ति शिला दीवी हुंद दर्शुन करनि योत
 यिवान। कुनि समयस ठहरिथ ऑस्य तिम ततिक्कन ज्ञानियन तु
 संतन हुंजि शराफँच तु दासु बावस दाद दिथ थ्यकान रोज्ञान।

माता शारदायि हुंदि वरदान प्रॉव स्वामी नन्दलाल जियन
 सेदी। स्वामी जी रूद्य कँशीरि मंज महान संतन तु महाप्वरशन वथ
 हावान। यथ मंज काल बब जी, स्वामी मस्तराम, स्वामी विभीषन
 जी, स्वामी स्यदुबब, शीलपूर बडुगाम्युक श्रीनाथ जी, तिहुंद पोथुर
 श्री महेश्वर नाथ जी यिवान, यिम्न पतु बादशाह ऑस्य वनान!
 स्वामी हरी कृष्ण जियन वोनस ह्वनस प्यठ अकि द्वह “यि छुन
 बादशाह योत, यि छु कलन्दर ति। कलन्दर गव येमिस अँदरिम्यन
 सिरन हुंद ज्ञान आसि।” तमिपतु गव स्वामी नन्दलाल जियुन तु
 स्वामी हरी कृष्ण जियुन शेश्य बादशाह कलन्दर नावु जगि मशहूर।

येमिसातु कबॉइल हमलु गव, श्री स्वामी नन्दलाल जी ति
 ऑस्य बाकियन सादन संतन सुत्य माता शारदायि तिर्थस प्यठ
 मूजूद। वनुनु छु यिवान जि मन्दरु नेबरु कनि ऑस शारदा मातायि
 हुंज लँकरि हुंज गँरिथ मूर्त। हमल ब्रोंदुय आयि स्व वँसिथ तु गँयि
 किशन गंगायि मंज लय।

कॉशिर्यन पंडितन निशि थनु पेमुच्च अँकिस आज़ाद लिपि
 छि शारदा लिपी वनान। येम्य पोछर ब्रह्मी लिपी दियुत। शारदा
 पीठकिस अच्चुवनिस बरस नँजदीक्य ऑस्य अकि पॉतरु कनि
 प्यठ अमि भाषायि हुंद निशानु मेलान। युस ओत यिवान ओस,
 तस ऑस ग्वडुन्यथ नज़र अमि लिपि हुंद निशानन प्यठ प्यवान।

अथ सुत्य लीखिथ हतु बँद्य ग्रंथ छि अँथ्य लिपि मंज वुन्यक्यनस ति “भंडारकर शोध संस्थान पूना महाराष्ट्रस” मंज मेलान । सासुबँद्य पाण्डु लिपियि आसु गरि चलनस तान्य बटु गरन मंज सॉमिथ तु शीरिथ । चलन विजि त्रॉव असि ग्वडु पनुन्य ब्वद तँती, ग्रंथन हुंज छेनु कथुय कांह । सासु बँद्य पाण्डु लिपियि आयि मुस्लमान हुकमरानव दँस्य पॉनिस मंज वेथि त्रावनु या जालनु ।

एतिहासिक सबूतव अनुसार माहराजा अशोकनि हकूमच पतु 16 वीं सँदी तौन्य ऑस शारदा लिपी कँशीरि मंज आम । मशहूर इतिहासकार जोन राजन छु तमि सम्युक इतिहास शारदा लिपि मंजुय ल्यूखमूत । चूकि यि लिपि ऑस आम, तँमिय ऑस्य परन तु परनावान ति अँथ्य लिपि मंज । युस शारदा यूनिर्वसीटी मंज कँशीरि नेबर कांह ज्ञान प्रावनि यियिहे, तस ऑस्य यि लिपि पनुन्य पतु लेखुन्य हेछिनावान । वीद शास्त्र ज्योतिश तु बाकुय ज्ञानुक माध्यम ऑस शारदा लिपी ।

श्री एस.एन.सुमन सुंदि दँस्य लेखनु आमुत “शारदा तीर्थ” अनुसार छु पाणिनी रेश्य सुंद मशहूर व्याकरण ग्रंथ “अष्टाध्यायि हुंद सँहुल तशरिह” तु “टीका रूप कलाप” नावुक ग्रंथ ति शारदा लिपि मंजुय लेखनु आमुत ।

ऑठ तु नवमि सँदी हुंद सफीर अलबीरुनियन छु पनुनि कँशीरि हुंजि यात्रायि हुंदिस सफरनामस मंज दर्ज कोरमुत जि यात्रियन सुत्य शारदा तिर्थ स्थानस प्यठ गछान म्यूल तस अख ब्रह्मन युस पाण्डुलिपयन ओस नकुल करान । अलबीरुनी सुंदिस प्रछनस प्यठ जि “यि क्याजि छुख नकुल करान ।” ब्रह्मनन वोनस

“क्व वख्त छु यिनु वोल्, तमिय छुस बु यिम यकजा कैरिथ अम्युक नकुल करान, ताकि यिम हेकव कुनि महफूज जायि वातनाँविथ।” अलबीरूनी गव यि बुछिथ स्यठा हॉरान जि शारदा लिपी मंज छु ज़ीरो (0) बदलु प्योर (.) यिवान त्रावनु। 1 छु गोल आकारस (0) मंज लेखनु यिवान। येलि तँम्य सुंघ दँस्य ब्रह्मनस बेयि पृछनु आव, सु वोथुस दरजवाब जि “संस्कृत भाषायि मंज छु ज़ीरो (0) शुन्य यिवान माननु। युस दँछनि तरफु अँकिस थँविथ दँह ग्वनु बल छु माननु यिवान। नतु छुनु अम्युक कांह माने तु मतलब। यि डाट छु पज़रुच पँहचान येलि ज़न 1 छु अजन्मा तु ज़न्म दिनुवोल कुन दय। अमिकिन्य छु अख शुन्यस बराबर ज़ीरो (0)। अलबीरूनी सुंदि वननु अनुसार ऑस शारदा प्वनि तिर्थ स्थान किस एहातस मंज शारदा दीवी हुंज हचि हुंज मूर्त योस हिन्दुस्तानस मंज ऑस स्यठा मशहूर। येमिस सॉरिय दर्म तु ज़ॉच आसु मानान तु मान ति दिवान। अमि बगॉर छुनु कांह ति सबूत जि शे ब्वजु शारदायि हुंघ कँह चित्र ऑस कशीरि मंज। शारदी गामुक्य गुजिर्य छि पछतावान अतिचि सपुत्रमुत्र हॉनी प्यठ। तिम ऑस्य दरवाज़स प्यठ गँछिथ क्रकु दिवान ‘जय शारदा अम्बा, शारदे शारदी दीवी, माता दी शारदी तु दया करो शारदा मा।’ यि छु अँक्य अरब सफीरन पनुनिस सफर नामस मंज दर्ज कोरमुत। यि कथ हदस तान्य छु पोज़ सु वुछव अँस्य शारदा तीर्थ स्थानक्यन लेछुमचन दौयम्यन किताबन मंज ति ताकि सोन पेपास सपदि दूर।

मशहूर फारसी व्यदवान अलबीरूनियन छु पनुनि किताबि “तहकीक-ए-हिन्दस” मंज ल्यूखमुत जि “भारतुक्यन मशहूर

तिर्थन मंज छु ग्वडु मुलतानस मंज मशहूर सिरयि मन्दर, पतु छु शारदा मन्दरुक नाव यिवान। मशहूर अंग्रेज शोधकर्ता सर एम.ए. स्टैन येम्य कलहन पंडितुनि किताबि “राजतरङ्गिणी” अंग्ररीज्यस मंज अनुवाद द्वन हिस्सन मंज *Chronicles of the Kings of Kashmir* नाव किताब सन् 1900 ई० मंज शायी कर, तथ मंज छु तिमव मोनमुत जि शारदा मन्दर पूर कुन लगबग अख मील दूर हमवार माँदानस मंज छि ऐतिहासिक दरोहरुक्य सबूत मेलान। तँतिनुय ओस परनुक तु परनावनुक मशहूर वैद्या केन्द्र हँदय राजस मंज मूजुद, यथ लुख छि विश्वविद्यालय वनान। अति ओस वीद तु शास्त्र ज्ञानुच विदिवत शेक्षा दिनुक पूर प्रबन्ध।

बंगालुक्य गौड ब्रह्मण तु काँशी हुंघ पँठित ब्रह्मन आँस्य धर्म शास्त्र ज्ञान प्रावनि ओत यिवान। विदिवत ज्ञान प्राँविथ आँस्य तिम डिग्री हँथ पनुन गरु वापस नेरान। ताकि तथ इलाकस मंज हेकुहान ब्रौठकुन तिम लूकन ज्ञान दिथ प्वखतु मनुश बनाँविथ। ग्वरुक्वल परम्परायि अनुसार आँस्य तिम शास्त्र शैवमत, ज्योतिश वैद्या, षटदर्शन तु शारदा लिपि परनु खौतर शारदा विध्यापीठस मंज दाँखलु निवान। सेलिबस पूर करिथ ओस तिमन ज़बाँनी इम्तिहानस मंज सफल सपदुन आसान। यिम परीक्षा पास करुहन तिमन आसु सर्तिफिकेट दिनु-यिवान। अमि खौतर ओस दीक्षान्त समारोहुक इन्तिजाम याने Convocation हर वँरियि गौरी त्रितया द्वह करनु यिवान। ज्ञानुवान आँस्य सर्तिफिकेट रँटिथ केँह गरु पनुन गछान, केँह आँस्य लुकु ह्यतु कर्म करनु बापथ ततिय बिहुन पसंद करान। कल्हण पंडितन छु बैहिमि सँदी मंज (1148-49 ई०) अमि

विद्यापीठ तु ततिचि कारकरदगी मुतलिख व्यछनिथ ल्यूखमुत ।

नीलमत पुराण किस 1426 श्लूकु अनुसार जनमीजयनिस वननस प्यठ जि मे वनतु बेयि अकि लटि वितस्तायि हुंदि बजरुच कथ योस बोज़नु सुत्य बु गछुहा पापव मुछि । अथ प्यठ माजि हुंद बजर वखनान वोनुस वैशम्पायन :- ही राजु यि ऑस स्वंदर सती दक्ष प्रज्ञापत सुंज़ कूर तु शंकर जियिन्य त्रय यस वैवस्वतस मंज़ उमा ऑस्य वनान । यिहय हिमादरी सुंज़ कूर ऑस पाप नाश करनावान वाजेन्य यमुना नॅद्य तु अमिसुय छि त्रुजगतुच बॅड बारु नाव ति सृष्टि बारसस अनुनु विज़ि वनान ।

अॅमिस दीवी छि कशमीरा ति तु वितस्ता नॅद्य ति वनान । यि दीवी सपुज़ दरती प्यठ प्रकट नारायण सुंदि अकि नेज़ु टासु सुत्य । यि वितस्ता नॅद्य छेनु गंगा नदि ख्वतु कम कॅह । फर्क छि यिहय योत जि गंगायि मंज़ छि मनशास असरुकन हुंद्य बॅन्य आसान । नतु छु द्वशवनी मंज़ श्रान करनस हिवुय महिमा । (1428-29)

नाना रूपुक्य नाग, नदि, पोन्थ जायि, दीवता, मुनी, गर्न्धव, यछ तु राख्यस छि अमिसुय विज़ि विज़ि व्यनथ करान । दाना पुरशान पज़ि पनुन जन्म रथि खारनु बापथ विज़ि विज़ि नमन तु सुमरण सुत्य स्व प्रसन करन्य । (1435-36)

यि वितस्ता दीवी छि पाप नाशक तु पॉपियन पनुन अथ प्यठु थॅविथ नरकस गछुनु निश बचावान । (1438)

यस दीवी पार्वती छि स्वय छि कशमीरा दीवी ति । यि सतीसर ओस कल्पस ब्रोंठ शेन मनक्नतरन तान्य पॉ बरिथ स्वंदर तु दिलकश सर, युस महाभारतुकि समयि ओस अख स्वंदर प्रदेश बन्योमुत ।

शारदा पीठ नावु कँशीरु हुंजि महान तिर्थ पुरी प्यठ छु कश्यप रेश्य
तु मातायि हुंद आँशीवाद। सती शारदा दीशस अननु खॉतरु वॅर
शारदा वनस मंजुय कश्यप रेश्य तपस्या तु मोंगुन माजि ओत
यिनुक वरदान। अथ थानस छि “शारदा वन” ति वनान।

वीदव अनुसार छु निर्ग्वन आत्मक शिव शक्ति षटचक्रस
मंज व्यराजमान। यि सौरुय ब्रह्मांड ति छु ओमकार रूप। अँथ्य
स्थानस प्यठ आव जटादौरी शंकरजी कैलास कोहु प्यठ हीमाल
पर्वतनि कोरि माता पार्वती वरनि। अँथ्य वनस मंज करि शिव
जियन सहस्रनाम मालु यकजा। तिमय मालु छि छि तस नॉल्य ति।
यि छि स्वय गंगा यस शंकरजी सुंदि मुकटुच शूब छि। दीवी दिवता
गंधर्व राक्षस दानव तु मानव छि सॉरी ओत यिथ पनुनि यछायि पूर
करनुक वर माजि निश प्रावान। येमिकिन्य दिवता अथ थानस
कल्पवृक्ष छि वनान। यिहय छि त्रिवेणी संगमुक आदार। यिहय छि
कृष्ण गंगा, सरस्वती सर तु मधुमती नावु ति ज़गि मशहूर। परम्परायि
अनुसार छि ध्रुव बख्तन येथ्य पूजा वॅरमुच। तमिकिन्य छि अथ
ध्रुवखेत्र ति वनान। विष्णु भगवान सुंजि कृपायि सपुज बख्तस प्यठ
माता प्रसन्न तु तफ गोस स्वफल।

यिहय कशमीरा दीवी (पार्वती) छि नाना रूपन मंज नाना
स्थानन व्यराजमान। यिहय छि दुर्गा ति सरस्वती ति।

बुछन गछ क्या यि वॅछ आकाशवॉणी
सतीसर, शारदा, कशमीर भवानी
स्वग्वन न्यग्वन सकल न्यष्कल निराकार
सदा च़ेय शारदा दीवी नमस्कार

यि चु पौद छु अँक्य शारदा पीठस मंज रोजन वॉल्य बखुत्य
 ल्यूखमुत। तँम्य छु तमि सातु तत्युक व्यवहार ब्रॉहकनि थँविथ
 माजि शारदायि हुंद बजर ल्यूखमुत। तथ मन्दुरकिस परिसरस मंज
 ओस सु सुब्हन शामन यि लीला परान। अँम्य ति छि सतीदीवी
 सतीसर लोल तु मायि वखनॉवमुच। नीलमत पुराण 1278-79
 शलूकु अनुसार:-

कृष्णा वितस्ता संयोगे गोसहस्र फलं लभेत्।

तथा मधुमतीतीरे शाण्डिल्येन निवेशितम्॥

दृष्ट्वा चक्रे शमाप्नोति वहिष्ठोम फलं नर।

दृष्ट्वा दुर्गावाप्नोति काममेव यथेप्सितम्॥

अख सास गॉवन हुंद तोफु मेलि अँकिस मनुशस युस
 कृष्ण गंगा वितस्ता तु मधुमती त्रिवेणी हुंद दर्शुन करि। मधुमँती
 हुंदिस बँठिस प्यठ युस शांडल्यन चक्र छु थौवमुत तमिकि दर्शनु छु
 मनुशस वहिनिसटोमा (Vahinistoma) करनुक पोन्थ फल मेलान।
 दुर्गा माता हुंदि दर्शनु छि सारेय यछायि पूर सपदान।

अमिकिन्य छु पूर पॉठ्य ननान जि माता दुर्गा छि अति पानु
 शारदा रूप व्यराजमान चूँकि गामस ओस शारदी नाव, तमि किन्य
 प्यव मातायि शारदा नाव।

येलि सतीदीवी कश्यप जियनिस तु शंकर जियनिस वनुनस
 प्यठ वितस्ता रूप दारन कोर तसुंज स्तुती करान करान छु कश्यप
 रेश्य तस वनान:-

देवानां त्वं धृतिर्देवि देवानां भारती यथा।

तृप्तिश्च सर्व भूताना निम्नगे त्वं सदा भुवि॥

ही पर्वत पुत्री देवी बोनकुन पकुवुन्य, वेथि रूप दीवी चु छख धैर्य दिवताहन हुंज बेयि छख तिमन दिवताहन हुंज भारती (शारदा) यिम सारिनुय प्रॉनियन तृप्ति बख्खान वॉल्य छि ।

शारदा मन्दुरच पहिचान कॅर सनु 1892 मंज स्ट्राइनन कृष्ण गंगा तु मधुमँती संगम सुत्य बालु टेंगरि प्यठ मन्दुरस सुत्य । यि छु सुय मन्दर यथ नीलमत पुरान किस 819 शलूकस मंज दुर्गागृह वॅनिथ किताबन पूजा करनुच नसीहथ नारायण सुंदि दॅस्य अमि शारदा आँठम करनु छि आमुच ।

“जम्मू के प्राचीन मन्दर” किताबि मंज शीर्षक “मन्दिर सुकराला माता” छु श्री केवल कृष्ण शॉकिर जियन श्री जे० ऐन० गनहारुन हवालु दिथ ल्यूखमुत जि सुक्राला माता छि भगवती शारदायि हुंद अवतार । अँकि दन्तकथायि अनुसार:- गव बसोलि हुंद महात्मा धार्मिक शोक्षा प्रावनि काँशी । पनुन्य शोख्या पूर कॅरिथ वोत सु स्योदुय शारदा मातायि हुंद परम दाम, तिक्क्याजि सु ओस मातायि हुंद परिपूर्ण बख्त । तसंजि बॅख्ती प्यठ प्रसन्न सपदिथ दियतुस माजि दर्शुन तु प्रुछनस “क्या गछिय, येमिकिन्य चु यीच ज़ॉरी छुख करान ।” महात्महान वोननस “म्यॉन्य मॉज, बु गछुहा व्वन्य गरु वापस । तति प्यठ हेकु नु बु द्वहय योर यिथ कॅह । बु छुस यछान जि तोह्य यियतव म्यान्यसुय गामस मंज रोजनि, द्यवु ततिक्यन बाशन्दन ति चोन अनुग्रह सपदिहे तु मेति गछिहे सहूलियत चॉन्य पूजा करनस मंज ।” शारदा माजि मोनुस तु वादु दियुतनस “बु गछु तथ एलाकस मंज चान्यन पोतन हुंजि विजि प्रकट ।” महात्मा जिय सपेदय प्रसन्न तु आयि गरु वापस । पनुनि तपु बलु हॉव्य तॅम्य बसोली तु भडडू

राजस केह चमत्कार । सौरिसुय क्षेत्रस मंज ओस सु वेद्वान माननु
 यिवान । तस ऑस्य जु पोथुर । अँकिस ओस पं० महादेव तु दौयमिस
 पं० मलूक राम यिम बिलावर तु बसोली मंज ऑस्य रोज्ञान ।
 बसोली हुंघन राजन मेदनी पालन दियुत पं० महादेव सुंदिस पोथरस
 सुकराला जंगल बतौरि तोफु । सु ओस अक्सर तथ जंगलस नचान
 तु ईकान्तस मंज ओस इश्वर भक्ती करान । अकि रॉन्न आयि
 मॉज मल्ल दीवी तस स्वपनस मंज तु वोननस “चोन बुडिबब पं०
 त्रिलोचन जी ओस म्योन परम बँख्त । तस ओस मे वादु दियुतमुत
 ज़ि चानि त्रैयिमि पीढि विज़ि गछुय बु प्रकट चॉनिस अलाकस
 मंज । चु दि छॉड सौरिसुय सुकराला जंगलस, बु दिमय चे पिण्डी
 रूप दर्शुन ।” यि वँनिथ गँयि मॉज अदृश्य ।

दौयिमि द्वह नेन्द्रि वँतिथ गव पं० शिवनन्द जंगलस मंज
 मल्ल मातायि हुंज पिण्डी छारनि । ऑखिर वोत थँकिथ फुटिथ
 अँकिस नागस निश, येत्यन चमेली कुलिस तल राज राजेश्वरी
 मल्ल दीवी हुंद पिण्डी रूपस मंज तँम्य दर्शुन कोर । येलि यि कथ
 तँम्य लुकन निश वँन्य, ततिक्क्यन बँस्कीनदरन प्यव पं० त्रिलोचन
 जी सुंद वादु याद युस तँमिस माजि ओस दियुतमुत ! शिवनन्दस
 ओस वेशवास ज़ि माता शारदयि छु पनुनि वादु अनुसार पिण्डी रूप
 दारन कोरमुत, तमिय कँरनस स्थापना ति तँतिनुय । पतु ओस हर
 दोह बिलावर प्यठ पैदल यिथ ओर मातायि पूजा करनि यिवान ।
 अज छु यि मंदर सुकराला माता नावु ज़गि मशहूर ।

गंगु ऑठम :-

भाँद्र जूनपछ ऑठम छि गंगा जी हुंद जन्म द्वह माननु यिवानु ।

अमिय छि अथ गंगु आँठुम वनान । अमि द्वह छि हरमुकट यात्रा गंगुबल करनु यिवान, योसु हंदवारि तहसीलस मंज छि प्यवान । दपान छि सती माता येलि अँगनस मंज पनुन शरीर छि फना करान, शिव जियन ह्योत सारिसुय ब्रह्माण्डस मंज अघौरी रूप फेरुन । अँथ्य रूपस मंज वॉत्य तिम अकि दोह कँशीरि ति गंगुबलु तिर्थ स्थानस प्यठ येति काक भूषणडी आँस्य आँसान । यिम आँस्य स्यठा थँद्य रेश्य, मगर पनुन्यव पोरू कर्मव किन्य आव यि कावु जन्मस । शिव जी रूद्य हंस रूप आँमिस कावस सुत्य वारियहस कालस । दपान अमि काँवु पुनिम दोह छु पानु साख्यात काक भूषण्डी प्रथ कुनि गरस मंज बोग खेनि यिवान ।

इन्द्र संज पूजा कँरिथ कोर भगवान शिवन हंस रूप त्याग तु आव बेयि शिव रूपस मंज । दपान काक भूषण्डीयन छि गंगुबलु अँथ्य जायि शिव जियस निश अमर कथा बूजमुज ।

कशीरि हुँद्य आँस्य अतिच यात्रा स्यठाह अँहम मानान । तिम आँस्य तोत गँछिथ मोदर्न हुँदय फूल तु अस्थी गंगुबल सरस मंज बावान । राजतरंगनी मंज छु दर्ज गंगुबल ओस अख मन्दर, यथ भूतेश्वर या शिव भूतेशुन मन्दर आँस्य वनान । तथ मंज छु नँन्य पाँठ्य लीखिथ जि महाराजा अशोकन छि पुत्र कामना अँथ्य मन्दरस मंज कँरमुच । कठिन तपु सुत्य गव भगवान शिव प्रसन्न तु तस ज़ाव लँड़कु । अति आँस्य साख्यात आँकिस यात्रीयस तिथ्य अनुभव गछान येमि सुत्य तस ओस बासान जि तोत गछुन छुन बेमतलब कैह । यात्री आँस्य तोत वॉतिथ पनुन्यन पैत्रन श्राद हावान । 1990 प्यठु आँस यि यात्रा बन्द गॉमुच । मगर पाँचव शेयव वँरियव प्यठु ह्योत सानेव नवजवानव बेयि ओत गछुन । कँशीरि ओस यि द्वह ब्रारि आँगनु उमादीवी मन्दरस मंज बडि जोशि खरोशि सान


मनावन यिवान । येति जेमिस मंज छु यिहय हवन उमा मन्दर स्यमानन्द
आश्रमस मंज माता अपरणा जिय हुंघ दॅस्य तिथुय पौठ्य यिवान करनु
यिथु पौठ्य अज ब्रोंठ तकरीबन 50 वॅरियव प्यठ स्वामी स्यमानन्दन्य
दॅस्य ब्रारि आंगनस मंज करनु ओस यिवान । यि द्वह ऑस्य तिम उमादीवी
मन्दरुक स्थापना दिवस रूप मनावान ।



गौतम काह तु गौतम नाग

गौतम नागकिस परिसरस मंज छि गौतम रेश्य तपस्या कॅरमुच ।
येति तॅम्य न्याय शास्त्रुच प्रेरना प्रॉविथ न्याय शास्त्र ल्यूख । धनुष
वेद्यायि हुंद ति कोरुन अब्यास । पनुन पान तपुनस सुत्य सुत्य रूद्य तिम
पनुनि त्रयि अहल्यायि सुत्य दयि नाव बजनव दॅस्य वखनान । येमिकिन्य
शिवजी सपुद तिमन प्यठ प्रसन्न । वरदान रूप दियुत साक्षात शिव
जियन तिमन गंगु जल, क्वंडु जलु रूप, येम्य मंज श्रान कॅरिथ छु दय
पापव निश मुछि कॅरिथ श्वब फल दिवान । ब्रह्मांड पुरानस मंज छु
येमि कथि हुंद ति जिकिर जि महाराज इक्ष्वाकु सुंदि वंशुक कुकुंत्स्थ
चक्रवथ राजि मानधातु संज सलन्तनॅच हुंद र्वकबु ओस त्यूताह दूर
तॉन्य फॅहलिथ, युस सिरियि खसन प्यठ सिरियि वसनस तॉन्य मेननु
यियहे । कॅचन वॅरियन पेयि अॅम्य सुंदिस राजस मंज न्यबरिमन व्वपुद्रवन
हुंज तिछ छाय येमिकिन्य अॅम्य संजि प्रजायि ओस हचर तु पीडायि
नाल वोल्मुत । प्रजायि हुंज अरसरु वुछिथ गव राजु मानधातु अंगिरा
रेशिस शरन तु होवनस पनुनि राजुक ऑनु । प्रजायि हुंदि व्वपुकार गर्जु
द्युत रेश्य भौद्रप्यथ जूनु पछ कौश्य दोह गौतम नागस मंज हवन

करनुक आदीश। राजन
कोर अथ परिसरस मंज
हवन तु म्वकुलौवुन
पनुन्य प्रज्ञा द्वखव तु
द्वंद्व निश। दय यछायि
सपुद दुशमनन सम्हार।
ख्वशहाल तु शांत



वातावरनु किन्य रूद्य लूख हर वॅरियि गौतम कॉश्य दोह अथ परिसरस
मंज हवन करान। यि हवन छु वुनिक्क्यन ति बाजौब्बतु हर वॅरियि
सपदान। 1990 ब्रौह ऑस्य ऑस्य अन्नतनागक्य बटु सॉरी अमि दोह
पनुनि पनुनि गरि खिर करान। खिरस पूजा कॅरिथ ऑस्य पतु गौतम
नाग ति कैह निवान, बेयि ऑस्य तति ति हवनुक प्रशाद करान। ऑस्य
छि सॉरी गरि कडनु पतु ति येति गौतम कॉश्य खिरस पूजा कॅरिथ
गौतम रेश्यस याद करान। तिक्याजि यि छि तिर्थुच जाय। शास्त्रन मंज
छि यिथुकॅन्य कॅशीरि मुतलिक लीखिथ :-

“त्रिलोके यानि तिर्थानि तानि कश्मीर मण्डले।”

कश्मीर मंडलस मंज छु ज़्यादु महत्व अन्नतनाग तिर्थस, तिक्याजि
विष्णु भगवान सुंदि हुकमु अनुसार छु सॅतीसरस कश्मीर बनावनस
मंज अन्नतनागुन स्यठाह अँहम योगदान। तिहुंदि वनुनु किन्य युस
मुसलसल भाँद्र जूनपछ कॉश्य गौतम कॉश्य दोह गौतम नागस मंज,
बॉश्य दोह इन्द्र नागस मंज तु अन्नत च्वदुश दोह अन्नतनाग क्वंडस
मंज श्रान करि तस मेलि चोरन दामन हुंदि श्रानुक तु दर्शनुक फल।

दपान गौतम रेश्य ओस स्यठा ज्ञानी, अमिसुंजि त्रुयि ओस

अहल्या नाव यस स्यठा स्वंदर तु पतिव्रता आँस । यिम आँस्य दोह्य
 दोहस दय सुंद आसुन थ्यकान तु व्यवहारस मंज अनान । इन्द्रदीवन
 येमि द्वह यि वुछ तमिय द्वह प्यठ ह्योतुन अँमिस व्यबचार नज़रि
 वुछुन । ब्रह्ममूर्तस मंज येलि गौतम रेश्य अकि द्वह श्रान करनि पनुन
 कमंडल ह्यथ द्राव, तोत चाव इन्द्रदीव । इन्द्रदीवन आँस तँमिस
 स्यठा कालु प्यठ नज़र थँवमुच । अम्य कोर गौतम रेशुन रूप
 दारन । अन्दर अँचिथ प्रछुस अहल्यायि जि त्वह्य क्याजि आयव
 वापस । पनुन्य यछापूर्ती कुन इशारु दिथ कोरुन तस सुत्य वेबुचार
 तु येलि नेरुन ह्योतुन गौतम रेशिस गव नज़रि । अंदर अँचिथ येलि
 अहल्या तस वुछिथ हर्षस गँयि गौतम रेश्य च्यून जि इन्द्रन छु तस
 सुत्य गल्लत कोरमुत । क्रूधस मंज तुल तँम्य कमंडलुक पोन्थ तु लव
 दिथ गँयि अहल्या ततिनुय वटुस्य । दछिन्य खोवरय आयि सॉरी
 रेश्य तु दीव तु कोरुख वेनय प्रनय गौतम रेशिस । पतु शाप वापस
 नु निथ दोपनस राम जी येलि यपॉर्य येमि जंगलु मँज्य नेरि तसुंदि
 चरन स्पर्श सुत्य गछख अमि शापु निश मुछि तु यिख बेयि पनुनिस
 रूपस मंज नविसर ।

राम जी येलि त्रेत्यायुगस मंज चोदहन वँरियन हुंद बनवास
 चटान ओस तिम द्रायि तपॉर्य यि जॉनिथ जि यि छि स्वय अहल्या
 योसु बेतकसीर आयि इन्द्रजालस मंज हेनु । तिमव लोग नु पनुन
 ख्वर तथ शिलायि कुन मगर तिहुंदन ख्वरन हुंदव निशानन हुंजि
 गर्दि कोर हवा सुत्य सर्पश तथ शिलायि सुत्य तु अहल्या आयि
 बेयि पनुनिस रूपस मंज । तँम्य कोर भगवान राम जियस चरण
 स्पर्श तु पूजायि रूप कोरनस पनुन आभार प्रकट ।

व्यथु त्रुवाह

बौद्र जूनपछ त्रुवाह छि वितस्ता हुंद ज़ा दोह मनावनु यिवान । नीलमत पुराण अनुसार सँतीसर दीशिच कोरि माता पार्वती जी कोर कश्यप जियनिस वननस प्यठ वेतस्ता रूप तु विष्णु संजि लक्ष्मी कोर वेशव रूप दारन । 'विसोकाऔ' याने दोखु रोस । लुकन हुंद पाफ छलनु बापथ आयि यिमेन यि बँड ज़िम्बोरी दिनु । दपान युस वेतस्ता तु विसोका नदि मंज श्रान करि तस गछन सौरी दोख तु व्याज दूर । तमि बदलु ओस लुकन यिहुंद ज़ा दोह मनावनुक हुकम दिनु आमुत । युस अँस्य दीशि त्याग करनस तान्य अँस्य हवन रूप वेथु वोतरि वेरनागस मंज मातायि आवाहन करान पतु अँस्य अँनस मंज सारिनुय दीवी दिवताहन हुंद नौव्य हुमान पतु हवन कँरिथ अँस्य तोत आमुत्य सौरी प्रशाद ख्यथ गरु वापस नेरान । अति वेथि हुंदिस आगरस वेथुवोतुर वेरीनागस मंज अँस्य यि वितस्तायि हुंद ज़ा दोह पथ कालि प्यठ शोकुसान मनावान । अति अँस सादन संतन हुंज बेठाल । येति हर सातु बँखुत्य अँस्य हेकान गछिथ तु पूजा पाठ कँरिथ ।

कल्हणन ति छु पनुनि किताबि राजतरंगनी मंज अमि वेथुवोतरुक ज़िक्र कँरिथ वोनमुत ज़ि यि छि स्व पवेत्र जाय येति दिवय छि लगान । अमि दोह ओस बोडबारु हवन गेरि नूरपोरस मंज गोरी शौरी अस्थापनस प्यठ ति यिवान करनु । गोरी मातायि हुंदिस नावस प्यठ छु अथ गामस गेरु नाव प्योमुत । अति छु अख प्रोन नाग तु बेयि अख मन्दर यथ 'गौरी शौरी' अस्थापन छि वनान । अमि वेतस्तायि हुंद वोहरवोद छु येति ति यिवान मनावनु । येति ति छु बोड बारु हवन अमि दोह करनु

यिवान। पतु छि बॅखुत्य प्रशाद ग्रहन करान।

नीलमत पुरानु अनुसार (1438-1450) नरकस मंज फॅटिमित्यन पॉपियन पनुन्यव अथव सुत्य बचावन वाजेन्य वेतस्ता दीवी छि पापन नाश करवुन्य माता माननु यिवान। युस ति कांह तोत यात्रा करनि गछि, तिम छि संसॉर्य यश तु मान प्रावान तिक्याज़ि यि दीवी छि स्वर्गुच हेरु तु कामना पूर्ती हुंद बंडार। यि छि यात्रियन हंसव तु सारसव बॅरिथ वीना तु मुरजन साज़ु सुत्य ग्रज़वुन, स्वर्गुच अप्सरायि ह्यथ सिर्यि रंगु चक्रवकव, ल्वकुचेव गंटी मालव सुत्य सजॉविथ स्वन्दर अस्मॉनी व्यमानु दॅस्य अमरावॅती गछनुक पोन्त्य प्रावनुक हकदार बनावान। स्यठाहव कॅदुलव, नील्य तु व्वज़ुल्यव पम्पोशव सुत्य पवल्लिथ, गाँव गुपन ख्यलन हुंदि आवाज़ुव सुत्य सुत्य क्वलन हुंद दिलकश ग्रज़ुन, गाडु तु कॅछवव बॅरिथ यारुबलन हुंद शोर, येम्युक ज़ल अमृतस ह्युव मज़ुदार, मर्दन हुंजन अँछन वुछुन ख्वश छु करान, अँमिसुय वेतस्ता भगवॅती गछि नमन करुन। माजि हुंद्य पॉठ्य कामनायि पूर करनवाजिनि तस वेतस्ता दीवियि कॅरिव प्रनाम यसुंज महिमा संतव तु महात्माहव हमेशि ग्यवमुच़ तु थेचिमुच़ छि।

सिन्दु नॅद्य, त्रिकोटी, विसोका, पोन्त्य नॅद्य, हर्षपथा पोन्त्य सुखा, चन्द्रावॅती, सुगन्धा, पुण्ययोदका, कूलारानी, पापहरनी, कृष्णा, मधुमॅती तु परोननी नॅद्य छि वरदान दिनु वाजनि महान वरदायनी वेतस्ता नदि सुत्य असि द्वह मेलनि यिवान। बावुसान योद अमि वेतस्तायि हुंज महानता वखनावनु तु बोज़नावनु लुकन निश यियि तिम बावुसान बोज़नवॉल्य रोज़न दीवियि नतमस्तक हमेशि।


पोन्य जायि, तालाब, नदि, सर, नाना रँग्य क्ररीर्य, यिम छि सॉरी अँमिय बॉद्र जूनपछि त्रुवश दोह वरदॉयनी वेतस्ता दीवी मेलनि यिवान । शम्बू भगवानुनि जटव मँज्य वसुवन्य गंगाजी येलि चन्द्र दीवन बुथि छेन दियुत, यि आयि चन्द्रभागा नावु येमि संसॉर्य ज्ञानुन । यि नँद्य ति छि अथ वेशाल नदि वेतस्तायि अमि द्वह मेलनि यिवान । अमिय किन्य छु असि दिलन मंज बेहनावनु आमुत ज़ि येत्यन ति पोन्थ वुज्ञान आसि, तत्यन लगि नु पिशाब या ज़ल करुन तिक्याजि येलि पानु हीमाल पर्वतुचि कोरि पारवती तु माता लक्ष्मी कश्यप रेश्यनिस वननस प्यठ पाप छलनु खॉतरु वेतस्ता तु विसोका नदि रूप दारन कोर पतु कोर केंचव दीवियव ति नाना क्वलव रूप दारन तमिकिन्य छुख वोनमुत ज़ि प्रथ कुनि जायि छु रॉछदर आसान । तमिय गछि यिमन जायन गछनु विजि डॉजरिथ ख्वर त्रावुन ।



अन्नत च्वदाह तु पापहरण नाग

अन्नतनाग कस्बु छु त्यूतांह प्रोन तु परातन यूताह कश्यप रेशिन्य कशीर छि । यि कस्बु छु खनुबलस निश तकरीबन जु मील दूर येति खन्दुपुछ नागुन्य रोज़न जाय छि । वारु वारु प्यव अथ जायि खनुबल नाव । अन्नत ओस नागराज, येम्य पनुनि अल्बानि सुत्य हीमाल पर्वत फुटुरिथ दिच सँतीसर किस पॉनिस न्येबर नेरनुच वथ । तँमी कॅर पनुनि अल्बानि सुत्य क्वलन, दरियावन बेयि वतन हुंज निशान दीही ति । तमि किन्य छु अँसि सारिनुय यि याद थवुन, ज़ि अन्नतनागनि वरॉय ओस कशीरि हुंद आसुन नामुमकिन ।

अन्नत चोदश दोह छि अँस्य अन्नतनागुन दोह मनावान । तिव्याज़ि
 राज़ नीलनि वननु किन्य छि त्योहारन हुंज़ निशानदीही पानु विष्णु
 भगवानन कँरमुच, यिम चन्द्रदीव ब्रह्मनन्य कृपायि वॉत्य असि तॉन्य ।
 दय दियिन असि यिम रीन्न ब्रोंठकुन ति पालनुच प्रर्वथ तु ह्येमथ । अँस्य
 छि अमि दोह ताहरि चोट तु पूर्य पनुनि पनुनि गरि कँरिथ प्रॉपनि पतु
 नवीद करान । अमि दोह अँस्य नोव दाँ ह्योल खलु मंज़ कँडिथ दरवाज़ु
 हंगस कुन लॉगिथ पानस किन्न ख्वशहाली तु रुत काँछान । नोव फसुल
 तैयार गछनु किस सिलसिलस मंज़ अँस्य अमि दोह दीवन तु अन्नतनाग
 राज़स बोग शेरान येमि सुत्य सान्यन दाँ कुछेन अँस बरकथ यिवान ।
 अमि दोह गछि वीद मंत्रव, सत्संग, कीर्तन, बजन, साज़, सेतार, बाज़ि



वर्गेर वॉयिथ माहोल ख्वशहाल बनॉविथ, ब्रह्मा जियस अन्नतनागस तु
 रोजनवाल्थन हुंघन रॉछदरन पूजा तु त्वता करुन्य । ब्रह्मन गछन दान
 दिथ ख्वश करुन्य । अंग ऑशनाव, हख हमसाय तु मोहनिव्य गछन
 ख्यावुन्य तु चावुन्य । अन्नतनागुन बजर:-

श्री विष्णु सुदि हुक्मु अन्नत नौबन्धन वातान ।
 दिव्य सतीसरुक जल कडनुक पॉतव चारान ॥
 छुय औबुर वाहन पबर्तस ह्युव सख्त बलवान ।
 चन्द्रमस ह्युव तीज राख्यस वुछिथय चलान ॥
 यूग बल पान बॅडुरिथ आकाश पृथ्वी वलान ।
 डेकि सोनु ताज नॉल्य वस्त्र नील्य यस दीव पूजान ॥
 पनुनि अल्बानि सुत्य हीमाल पर्वत चटान ।
 निशानदीही कवलन वतन हुंज अलबानि करान ॥
 खन दिथ ब्वनुकुन जलस, जलोद्धवस वनि कडान ।
 श्री विष्णु तु शंकर पतु राख्यसस अडुमोर करान ॥
 हरि रूप माता प्यठु कनिफोल त्रावान ।
 श्री हरी राख्यसस कलस प्यठु पानय बिहान ॥
 रामस सुत्य लक्ष्मण श्री कृष्णस बोय बलराम ।
 खीरु सागरस मंज शेषनाग रूप चु आसान ॥
 तुलुमुलि अन्नतनागस प्यठु श्री रॉग्यन्या वैराजमान ।

प्रशाद ग्रहन करान। दय दियनख हुरेर तु पूरेर।

पापहरण नाग:- डिस्ट्रिकट अन्नतनागस मंज मटनु पतु सीर गामु
प्यठ पैदल पॅकिथ छि पाजमुल नागबल या पापहरण नाग वातान। सीर
गामु प्यठ ओत वातनुचि छि जु वतु, अख ताजमुल गामु किन्य तु
ब्याख वुडरु वति किन्य तकरीबन त्रे किलोमीटर पैदल पॅकिथ। वुडरु
वति पकान छु ग्वडु ईदगाह तु पतु बाइज हायर स्केन्डी स्कूल दछिन्य
किन्य नीरिथ स्योद पापहरण नाग वातान। द्वन कनालन प्यठ फॅहलिथ
अथ परिसरस मंज छु अख मन्दर, अख दर्मसाल बैयि जु नाग। अख
नाग छु स्यठा बोड येम्युक पोन्थ छु बॅन्यमिस दौयमिस नागस मंज
वसान येति बखुत्य अन्नत चोदुश्य द्वह श्रान ध्यान ग्वडु कॅरिथ पतु
हेरिमिस नागस द्वद बाविथ पोशि वथरुन कॅरिथ बावनायि पूजान। अथ
नागस प्यठ कनि छु सारिसुय सब्जा सबुज वथरुन ह्युव कॅरिथ बोजनु
यिवान यथ 'मंगोलु' छि वनान। यि 'मंगोलु' छु स्यठा स्वंदर तु
ख्वशायिवुन कॉलीन ह्युव बासान। युस सान्यन आस्थायन पोछर दिथ
छु बासनावान जि अथ मंज छु साख्यात पानु शंकर व्यराजमान।
अमिकिस मन्दुरस मंज छु तकरीबन डाय फुट शिव लिंग। अति ति
ऑस अन्नतनागुक्य पॉठ्य अन्नत चोदुश्य द्वह दिवय लगान। अमि
द्वह ऑस्य सॉली, पाँजमुल तु अँद्य पॅख्य गामन हुंद्य लुख पूजायि पाठ
सुत्य पापव तु शापव मुछि गछुनच ऑही शंकर जियस मंगान। अमि
अलावु ऑस्य सॉरी नवरेह द्वह ओत गॅछिथ वैशनव बूजन तु तँहरि
चोट नागस प्यठ थवान तु पतु दोह्य द्वहस तति बिहिथ ख्यथ च्यथ
नवरेह छावान। येति जेमिस मंज ति छु ततिक्यव अँद्य पख्य गामु क्यव
बटव अख मंदर के०वी बनतलाब कबीर कालनी मंज बनोवमुत।

येति तिम पनुन्यन बड्यन दोहन प्यठ आस्थायि हुंद चोंग छि ज़ालान ।
 कशीरि चलन पतु ओसुख पापहरण नागुक शिव लिंग खण्डेत कॅरिथ
 नागस बोवमुत, मगर केंचव वॅरियव प्यठु गॅयि ततिक्क्य बटु जेमि प्यठ
 बेयि तोर तु खोरुख शिव लिंग तु थोवुख बैयि पनुनि जायि इस्तादु । यि
 सौरुय शेछ बूज मे सॉल्यिकिस श्री प्यारे लाल राजदानस निश । दय
 दियनख अथ नेशकाम सीवायि रुत्य फल ।



काम्बुर्य पछ पेत्र मावस

ऑशदु गटपछ ओकदोह प्यठ मावसि तौन्य पूर अँकिस पछस
 छु पेत्र पछ यिवान वननु । यिमन द्वहन छुन कांह रुत कार करनु यिवान ।
 युस युस पेत्रु येमि येमि दोह येमि संसार्य आसि द्रामुत, तमिय त्यथि
 छु यिवान तस श्राद हावनु या गरू जियस दान दक्षिणा दिथ सु ख्वश
 करनु । यि ति मोर्दु सुंघ नॉव्य श्रदायि सान गुरू जियस या बैयि ति
 काँसि दिनु यियि, तथ छि श्राद वनान । अथ मोकस प्यठ छि खल तु
 खलियानु बॅरिथ आसान । मेवु डून्य सब्जी तु बाकयन चीज़न हुंज ग्रख
 छि चोपॉर्य बोज़नु यिवान । नोव तोमुल छु यिवान रननु तु पेत्रन हुंघ
 नॉव्य अर्पण करनु । योद पनुनि तैथि प्यठ कुनि कारनु काँसि यियि नु
 श्राद्ध हावन, तेलि छु तिमन पेत्र मावसि द्वह श्राद हावनु यिवान ।



महानवमी तु भद्रकॉली जयन्ती

भद्रं मङ्गलं सुखं वा कलयति ।

स्वीकरोति व भक्तेभ्यो दातुम इति भद्रकाली सुखप्रदा ।।

यस पनुन्यन भक्तन दिनु खॉतरु स्वख तु मंगल छि स्वीकारन, स्वय छि भद्रकॉली नाव सान्यन ज़ेवि पेत्यन प्यठ ।

श्री विष्णुपुरान किस पञ्चम अंक किस ग्वडुनिचि अध्यायि मंज छि श्रीमैत्रयजी श्री पराशर जियस प्रछान “युस विष्णु भगवानन अवतार यदुकुलस मंज ह्योतमुत छु तँम्युक दितु मे व्यस्तार पॉठ्य ज्ञान । अथ प्यठ छुस श्री पराशर जी यिथु पॉठ्य जवाब दिवान ज़ि पथ कालि येलि देवक सुंजि कोरि वसुदीव जियस सुत्य खांदर कोरुख, तँम्य सुंदिस रथस गव कंस सारथी रूप सुत्य । तमि सातु आयि ओबरु लंगुच हिश गडगडाहट करान आवाज़, येम्य कंसस कन फाटुनॉव्य तु दोपनस “हे मूढा अथ रथस प्यठ बिहिथ यस दिवकी चे सुत्य छय, तमि सुंद ऑठिम संतान मारिय चे” । कंसन केंड पनुनि मयानि मंज तलवार तमिय सातु तु हेचुन दीवकी मारुन्य । यि वुछिथ वोथुस वसुदीव तु वोननस “हे महाभाग चु में मारुन यि दिवकी, तस निश युस ति संतान ज़न्म हैयि सु दिमनयु बु चेय, पतु कम्युक छुय चे खतरु ।” कंसन कोर वसुदीवस प्यठ बरोसु तु हेतुन पकुन । पृथ्वी कोर नु यि बार केंह ति बर्दाशत, तँम्य कोर गाँव रूप दारन तु आयि दीवताहन निश सुमेर पर्वतस प्यठ । ब्रह्मा जियस सान कोरुन सारिनुय दिवताहन प्रणाम तु लोति लोति बोवनख सोरुय हाल तु सुती वोननख यिथुकँन्य अँगन छु स्वनस, सिर्यि छु

ज्ञान हुंद परम गुरू तिथु पौठ्य छु सारिनय लुकन हुंद गुरू श्री
 नारायण, म्योन ग्वर ति। यि छु सारिनय ज़ीवन, दिवताहन, असुरन
 हुंद ईश तु अँस्य सॉरी छि अँम्य सुंद अंश। स्यठा प्रशंसा कँरिथ
 वोनन तिमन ब्रौहकनि जि वुन्यक्यनस छि असुर तु महाबलवान
 दैत्यराज तु तिहुंजु सेनायि मे प्यठ कनि राज करान। बु छस नु
 तिहुंद जुल्म केह हेकान चॉलिथ। व्वन्य वँनितव मे तिछ कांह वथा
 येमि सुत्य बु बचिहा। यि बूजिथ ह्योत दिवताहन हुंजि ज़ॉरी प्यठ
 ब्रह्माजियन यिथु पौठ्य वनुन जि “यि छु पोज़ जि पृथवी प्यठ छि
 स्यठा अत्याचार वुन्यक्यनस गछान। पँकिव अँस्य सॉरी गछव
 क्षीर सागर येति श्री हरीयस करव ज़ारु पार।” तोतन वॉतिथ हेच
 सारिवय नमन कँरिथ श्री नारायण सुंज स्तुती करुन्य। यिहुंज
 अराधनायि तु पूजायि प्यठ प्रसन सपुदिथ छि श्री पराशरजी वनान
 जि भगवानन दियुत विश्व रूपस मंज तिमन दर्शुन तु वोननख “हे
 ब्रह्मन तु दीवताहव बु दिमुहोव ति ज़रूर यि तोह्य मंगान छिव, मगर
 युथ वेराट रूप भगवान सुंद वुछिथ त्रहरेयि तिम तु ब्रह्मा जियन हेच
 बेयि त्वता करुन्य। त्वतायि पतु कँड्य श्री हरीयन ज़ु मसवाल
 अख कुहुन तु व्याख सफेद कलु मंजु। यिम मसवाल हॉविथ वोनन
 दीवताहन जि यिम म्यौन्य ज़ु वाल हेन पृथवी प्यठ अवतार येमि
 सुत्य पृथ्वी हुंदि ग्वबिरुक कष्ट गछि दूर। सॉरी दीवगन हेन पनुनि
 पनुनि अंश रूप धरती प्यठ ज़न्म तु ततिक्य वोनमथ दुतन सुत्य
 य्वद कँरिथ करन तिमम फना। पतु सपदन तिम म्यानि अकि नज़रि
 सुत्य सॉरी लूपस। वसुदीव जियिनि दीवी समान देवकी भार्यायि
 निश हेयि म्योन यि कुहुन मसवाल ज़न्म, युस कालनेमि सुंद अवतार

हेथ कंस सुंद वध करि । अमि पतय गॅयि श्री हरि अंतर्ध्यान । भगवानस
प्रणाम कॅरिथ द्रायि सॉरी दीवगन ग्वडु सुमेर पर्वतस कुन पतु गॅयि
धरती प्यठ सॉरी प्रकट ।

अँथ्य समयस मंज आव नारद जी कंसस निश तु वोननस
“दिवकी हुंदि ऑठमि संतान रूप यियि पानु भगवान जन्मस ।” यि
बूजिथ बॅर्य कंससन द्वशवय बॉच बेयि कॉदखानस मंज । यिथु
कॅन्य वसुदीव जियन वादु दियुमुत ओस तॅम्य कोर तिय तु अकि
अकि दितिन सॉरी शुर्य कंसस अथि । वननु छु यिवान जि ग्वडुनुक्य
शे गर्ब ऑस्य हिरण्यकशुपुन्य । भगवान विष्णु सुंजि प्रेरणायि ऑस
योगनिन्द्रा अकि अकि गर्भस मंज तस थावान येमि सुंजि शकलि
सोरुय जगत ओस मूहित कोरमुत । स्व यूगनिंद्रा ऑस भगवान
विष्णु सुंज महामाया येमिस भगवान श्री हरी छि यिथु पॉठ्य वनान
जि “हे निन्द्रे म्यानि ऑग्न्यायि थव चु पातालस मंज रूजिथ शे गर्भ
दीवकी हुंदिस शुर्य बानस मंज । कंसु सुंदि अथु तिम सॉरी मॉरिथ
थव शेष नावुक म्योन अंश दीवकी तु पनुन अंश वसुदीव जियनि
दोयिमि त्रयि हुंदिस गर्भस मंज । अमि सुत्य सोंचन सॉरी जि दिवकी
हुंद सॅतिम गर्भ छु अडुल्योक गोमुत । सु गछि सफेद शैलशिखर
हियुव वीर परुष संसॉर्य संकषण नावु मशहूर । तमि पतु रोज़ बु
पानय दीवकी हुंदिस ऑठमिस गर्भस मंज तु चु गछ्यजि सुती
यशोदायि हुंदिस गर्भस मंज ठॅहरिथ । भॉद्र गटु पछ सतम द्वोह राथ
क्युत हेमु बु जन्म तु चु हेख जन्म नवुम द्वह । म्यानि यूग बलु डलि
श्री वसदीव जियस ब्वद तु वातुनावि मे दिवकी हुंदिस लोसु कुठिस
मंज तु चे वातुनाविय दिवकी हुंदिस फॅरिस तल । ही दीवी फरिस

तल वुछिथुय तुलिय च़े कंस तु कडिय बालु कनि प्यठ टास । तमि
 टासु सुत्य खच़ख च़ु आकाश । तमि सातु कॅरिय सासुबॅद्य अॅछ
 वोल् इन्द्र म्यानि गौरवु किन्य कलु नैमुरिथ भगिनी रूप च़े स्वीकार ।
 शुम्भ निशुम्भ तु सासु बॅद्य दुत पनून्यव अथव मॉरिथ शूबरावहन
 यि सॉरुय पृथवी पनून्यव अनेक स्थानव सुत्य । च़ुय छख भूती,
 च़ुय सन्नती, क्षान्ति कान्ति, च़ुय आकाश, पृथवी, धृती, लज्जा
 पुष्टि उषा । यिमव अलावु संसारस मंज़ बैयि ति कांह शक्ति छे च़ु
 छख तिम सारेय । युस सुब्हन तु शामन स्यठा बावु किन्य आर्या
 दुर्गा, वेदगर्भा, अम्बिका, भद्रा, भद्रकॉली, क्षेमया तु भाग्यदा वॅनिथ
 चॉन्य त्वता करि, म्यानि कृपायि गछ़न तसुंज़ सारेय कामनायि
 पूर । मदिरा तु मांसुक येलि च़े भूग शीरिथ लुख पूजा करनय,
 प्रसन सपदिथ करख च़ु म्यानि कृपायि तिहुंज़ि सारेय कामनायि
 पूर । ही दीवी यिथु पॉठ्य च़े मे वोनमय च़ु कर तिय । येत्यन येत्यन
 मॉज्य बीठ तॅत्यन तॅत्यन बन्योव तसुंद दाम यि मॉज्य छि कशीरि
 मंज़ भॅद्रकल गामस मंज़ भॅद्रकॉली रूप पूजनु यिवान ।

हन्दवारि प्यठ वड्यपूर वति प्यठ 5 किलोमिटर दूर छु
 भद्रकल गाम यिवान । अमि गामु प्यठु डोड किलोमिटर दूर छि
 भद्रकॉली माजि हुंद अस्थापन युस अॅकिस गॅनिस जंगलस मंज़
 छु । यि मन्दर छु स्यठा स्वंदर युस तकरीबन 15/17 फुट छु । अथ
 मंज़ छि स्वंदर श्यामु रंगु माजि हुंज़ मूर्ती । यस सेंद्रि सुत्य लुकव
 छि सिन्दूरी बनॉवमुच़ । अथ मन्दरस मंज़स छु अख स्यठा बोड बारु
 दिवदार कुल । युस अमिच आस्था छि ज़्यादय पॅहन लुकन द्रड
 बनावान ।

श्री ऐ० के पण्डिता यिम भागवतपोरि हंदवारि रोज्ञान ऑस्य तिहुंदि वननु अनुसार ओस भागवत पोरि हन्दुवारिस नॅजदीक दुरशापूरिस मंज अख महान तपीश्वर रेश्य रोज्ञान यस दुर्वासारूकीश्वर नाव ओस । दपान अथ जायि छु अमिसुय रेशिस प्यठ दुरशापूर नाव प्योमुत । अति ओस नु पोन्थ किहीं ति । अँम्य कँर कठिन्य तपस्या तु वरदानस मंज मोंगुन माजि पोन्थ । पनुन दियुमुत वादु पूर करनु गर्जु प्यव माता भँद्रकॉली कलकत्ता प्यठ भागवत पुर गामस मंजुय रोज्ञनि युन । दपान अँम्य रेश्य पँर भागवत सतन द्वहन मॉज्य प्रसन करनु बापथ माजि ब्रोंहकनि । सँतिमि दोह पतु दिन्न माजि अँकिस जायि ज़ीर तँत्यन द्रायि पाँ फंवार । गाम गव हर अंदु बजा । खल तु खलियान आयि बँरिथ । अमि पतय द्रायि आश्रम मंज न्यबर मॉज्य तु कोरुन जंगल कुन प्रस्थान । लुकन निश रछा दूर रँट माजि पनुन्य जाय जंगलस मंज । अति छि समयि समयि अतिव्य तु सॉरिय कँशीरि हुंघ रोज्ञनवॉल्य सँमिथ हवन करान । खास पॉठ्य छु महानवमु दोह वँरियुक बोड हवन करनु यिवान तिक्काजि अमि द्वह छु माजि हुंद जन्म द्वह । जेमि ति छि अमि जायि हँघ रोज्ञनवॉल्य अख बोड बारु हवन करान । माता भँद्रकॉली कँरिन असि सारिनुय प्यठ कृपा ।

“जम्मु के प्राचीन मन्दिर” किताबि मंज छि केवल कृष्ण “शाकिर” यिथु पॉठ्य लेखान:- माजि वैष्णो दीवी छि त्रे रूप मॉज्य सरस्वती, मॉज्य लक्ष्मी तु मॉज्य कॉली । माता काली हुंघ श्रदालु छि मातायि, भद्रकॉली, श्याम कॉली, गुहाकॉली तु रक्षा कॉली नावव पूजान । माजि भद्रकाली छु श्याम रंगु, नॉल्य कलु

मालु तु चोला छुस व्यग्र मुस्लुक, दंद बॅड्य, जेव न्यबर चंचल,
 व्वज्जि अँछ, कन बॅड्य तु ऑस यलय हमेशि ।। चामुंढा रूप
 कोरुन असुर य्वदस मंज चंड तु मुंड असुरन संहार । अमिय किन्य
 छि कॉली माता चामुण्डा दीवी नावु ति याद करनु यिवान । संहार
 करनुच दीवी छि मॉज्य भद्रकॉली । द्वष्टन गॉलिथ छि बॅखुत्यन
 स्वख शाँती, रक्षा तु मनोकामनायि पूर करान । मातायि हुंज मूर्ती
 छि साक्षात वीरता, साहस, एशवर्य रूप तीज तु आलोकिक शख्तिन
 हुंज प्रतीक । मातायि हुंघन देंहन व्वजन मंज छि खडग, चक्र, गंटा,
 बाण, धनुश, त्रिशूल, भुशुंडि, कलु तु शंख । शरीरुक्य सॉरी अंग
 स्वंदर स्वनु जेवरव सुत्य सँजिथ छि माता बॅखुत्यन सुत्य जन कथ
 करान यिम तस बावु किन्य त्वता तु आरादना करन ।



विजयदशमी या दसेरा

विजय दशमी या जेननुच देंहम या दशेरा छु यिमव कारनव
 पथकालि चठु मनावनु यिवान ।

1. ब्रह्मा, विष्णु तु महेशन यिमन त्रिदेव ति छि वनान छु अमिय द्वह
 राक्षसन गालनु खॉतरु शख्ती प्रकट कॅरमुच, येमिस दुर्गा आव
 नाव दिनु ।
2. अमिय द्वह छु माजि दुर्गायि बखुत्यन रछनुकि गर्जु महिषासुर
 रमुत ।
3. पान्डवव छि अमिय द्वह चौसर खेल हॉरमुच ।
4. तिमव येलि वनवास पूर कोर अज्ञातवास विजि थॅव्य तिमव

पनुन्य सॉरी हथियार अँकिस शमी कुलिस तल खँटिथ। तोरु
वापस यिथ ऑस्य हथियार तँमिय आयि येमि आयि तिमव
ऑस्य थँव्यमुत्य। सु ओस यिहय द्वह, तिम सपुद्य स्यठा ख्वश
तु कँरुख अथ शमी कुलिस पूजा। तमिकिन्य छि अज़ ति यि
प्रथा ज़ि भारतस मंज़ छि कँह प्रान्त अथ कुलिस या पँतुरन
पूजा करान।

5. सीमा उल्लगंन ऑस्य राजि अमिय द्वह करान। तिमन ऑस
आश ज़ि अमि द्वह योद दोयिमिस राजस प्यठ आक्रमन करनु
यियि, विजय छि निशचित। छोटिस मंज़ छु यि द्वह डर तु
बुराई प्यठ अच्छाई वनि कडान।



अपिक चैनलि अनुसार छि दपान उत्तराखण्ड मसूरी मंज ओस राजु महिशासुर राज करान । तँम्य आँस पनून्य प्रज्ञा स्यठा हकुनॉवमुच तु लरजॉवमुच । सु ओस नु तिमन कैह रछान, युस ज़न अँकिस राजु सुंद फर्ज छु, बल्कि ओस डर तु तबॉही हुंज अख ज़िन्दु मिसाल । दिवी दिवता आयि यि वुछिथ स्यठा तंग । पनुनि शख्ती सुत्य कॅर ब्रह्मा, विष्णु तु महेशन महिशासुर अत्युक राजु तु राख्यस गालनु खॉतर माता दुर्गा प्रकट । यि आँस यिहय दॅहम येलि मातायि कोर राजु महिशासुर सुंद अंत तु प्रज्ञा गॅयि छ्ऱट छ्ऱटि निशि आज़ाद । यि द्वह याद थवान प्यव अथ जायि मसूरी नाव ।

देरादून प्यठ 12 किलूमीटर दूर मसूरी वति प्यठ कुथल गेटस नज़दीक छु प्यवान प्रकाशईश्वर महादेव मन्दर । अति छिनु यिम कैह दान रटान । कॅडी चावल तु चाय छि यात्रियन मुफत दिवान । यिमन हुंघन दिलन प्यठ छु वुनि ति महिशासुर सुंद खोफ वुनि ति गुरु कॅरिथ ज़ि इनसान क्यव दिवता छि अति रामुन राज अननस मंज पनुन पनुन योगदान दिवान ।

यि दोह छु दुस भारत मंज अपज़िस प्यठ पज़रुच विजय प्रावन रूप मनावान । भगवान रामन येलि लंकायि मंज रावण मोर, लुख गॅयि स्यठाह ख्वश । अयोध्यायि हुंघव लुकव ज़ोल रावणुन पुतलु तु कॅरुख पनून्य खुशी अमि सुत्य प्रकट । तिमव ज़ोल लंकायि हुंद राजि असुर रावुण, मेघनाथ बेयि कुम्बकरुणुन पुतलु अमिय आँशदु ज़ूनपछि दॅहम दोह । तमिय किन्य छि अथ विजयदशमी वॅनिथ पनुनि ज़ेननुच खुशी अमि दोह लुख प्रकट करान । यि रावुण ज़ालनुच प्रथा छि वुनिकेनस ति भारतस मंज चलान । कशीरि मंज ओस रावणुन पुतलु बन्गोल तु

टासवु सुत्य ग्वडु बिमिना चाँद माराहस मंज़ तु पतु आव सनातन धर्म
 सबायि दॅस्य हज़ूरी बाग श्रीनगरस तु जेमि परेड ग्रॉडस मंज़ ज़ालनु ।
 सासु बॅद्य लुख छि यि नज़ारु वुछनि गछान तु याद करान ज़ि राम
 जियन किथुकॅन्य प्रॉव अपज़िस प्यठ पज़रुच जीत । कॅशीरि मंज़
 ऑस्य रावुण जॉलिथ प्रथ कांह अड दॅज लॅकरि प्यूनत या रावणुन
 कपरु प्यूनत अनान तु ऑस्य गरस मंज़ थॅविथ बेफ़ोक रोज़ान । तति
 ओस अख यि विशवास सान्यन दिलन मंज़ त्रावनु आमुत ज़ि यि छु
 नज़रि आतश निश, भूतव निश, जोद तु तॉवीज़व निश बचावान । यि
 दोह छु ऑशदुचि नव दुर्गायि हुंघव नवव दोहव पतु यिवान । व्वन्य छु
 जायि जायि यि द्वह जेमिस मंज़ त्रिकूटा नगर, गांधीनगर तु परेड ग्राउंडस
 मंज़ मनावनु यिवान ।



रमा एकादशी

दीवाली ब्रोंठ च़ोर दोह यस कार्तिक गटु पछ काह छि यिवान
 स्व छि लक्ष्मी जी हुंदिस नावुस प्यठ रमा एकादशी माननु यिवान ।
 अमि दोह छु भगवान विष्णु सुंद अवतार कृष्ण जियस केशव रूप पूजा
 करनु यिवान । यि काह दरनु सुत्य छु ज़िन्दगी मंज़ वेबूत ऐश ऐश्वर्य
 तु मॅरिथ मेल्यस मूक्ष ति । राज़ु युदिष्ठरनिस प्रछुनस प्यठ हेच कृष्ण
 जियन शास्त्रन मंज़ दर्ज यि कथ वनून्य यस यिथु पॉठ्य छि : पथ
 कालि ओस मुचकन्द नावुक अख राज़ु येमिस वाराह दोस्त ऑस्य,
 याने कुबेर, वरुण, विभीषण तु इन्द्राज़ । यिमव मंज़ु ओस तस इन्द्राज़
 स्यठा टोठ यार । राज़ु मुकन्द ओस इन्साफ पसंद धर्मात्मा तु बैयि

पज़रुक व्यवहार करन वोल् इन्सान । यि ओस गटु पछि तु जून पछिच
 सारेय कौश्य दरान । अमि दोह ओस नु पशिस ति इजाज़त कैह ख्यनुक ।
 अँमिस ऑस अख कूर चन्द्रभागा । अँमिस कोरि कौरुख राजु चन्द्रसेन
 सुंदिस पोथरस शोभनस सुत्य खांदर । अकि दोह आव शोबन पनुन
 होवुर सालस । तिमनुय दोहन मंज़ आव रमा एकादशी हुंद फाकु ।
 चूकि तँम्य ओस नु कांह ति फाकु ज़िन्दगी मंज़ थोवमुत, तँम्य वोन
 पनुनि त्रियि योद मे यि व्रत दोर बु मरु ब्वछि सुत्य । चन्द्रबागायि वोनस
 ज़ि यथ राजस मंज़ छि अमि दोह पँश्य ति व्रत थवान तु इन्सानन हुंज
 छेनु कथुय । शोभन गव व्वन्य रज़ामन्द यि व्रत दरनस प्यठ । अँम्य
 ह्योक नु पूर यि व्रत ब्वछि तु बावु रोस थँविथ । सुब्हन गाश यिथु त्रॉव्य
 तँम्य प्रान । राजन कैर तमि सुंज अन्तेष्टि, तु कूर रँटन पनुनिस मँहलसुय
 मंज़ ।

अकि दोह गव मुकन्द राजु सुंदि गामुक अख ब्रह्मुन तीर्थ
 यात्रायि प्यठ । तँम्य वुछ वति पकान पकान लाल जवाहरव सँजिथ
 स्वन्दर मँहलखानु येमि मंज़ राजु सुंद ज़ामतुर शोभन गोस नज़रि ।
 येलि सु नँज़दीक आव सु गव शोभनस निश तु दोपनस चु किथु पॉठ्य
 येति । जवाबस मंज़ वोननस ज़ि यि मँहलु छु अलरवुन्यन कन्यव हुंद
 योद चन्द्रभागायि चु यि म्योन हाल वनुहाख यि मँहल तु म्योन येत्यन
 बेहनुक सबब बनिहे मुस्तकल । मे दँर तति रमा एकादशी मगर लोल
 तु बावु रोस । अगर स्व योत यियिहे तँम्य सुंदन व्रतन हुंदव पोन्वव
 सुत्य बनिहे सोरुय यि स्थिर । ब्रह्मुन गव गाम वापस वोनन सोरुय हाल
 राजु कोरि चन्द्रभागायि । स्व गँयि स्यठा ख्वश तु कौरुन फॉसलु तोर
 गछुनुक ।

मन्दराल पर्वतस नॅजदीक ओस अख ग्याँनी रेश्य, यस वाम देव ओस नाव । ब्रह्मनन नियिय राजु कूर तँथ्य आश्रमस मंज । तँम्य बोव सोरुय हाल रेशिस निश । रेश्य कोर तस मन्त्र पॅरिथ डेकस प्यठ प्रज्ञलवुन ट्योक । येमि सुत्य तमि प्रोव दिव्य शरीर तु मीज पनुनिस पतिदेवस सुत्य । चन्द्रभागायि वोन परन प्यवान पनुनिस बरथाहस जि आँठ वॅरिशि प्यठ वॉत्य तस सारेय एकादशी हुंघ व्रत बडि लोलु मायि तु बावु सान दरान । तमिकि पोनि फलु हैकि यि चोन नॅगर स्थिर बॅनिथ तु प्रलयस तौन्य रोजि दय असि राँछ करान । तमि पतु रूज चन्द्रभागा पनुनिस पति देवस शोभनहस सुत्य रानी बॅनिथ खुशी खुशी राज करान । यिम एकादशी हुंघ व्रत दरनु सुत्य छि पापव म्वकुलिथ मॅरिथ विष्णु दाम मनुश प्रावान ।



आँशिद पुनिम

(नीलमत पुराण शलूक 388-464)

स्यठा पिशाच रेगिस्तानस मंज मॉरिथ छु निकुम्ब आँशिदस मंज वापस यिवान । आशिद पुनिम गछि यिथु पॉठ्य मनावुन्य:- मकान गछन सफेदी कॅरिथ रंगनावुन्य तु पॉरावुन्य । बड्यन हुंद गछि नु दुहस केंह पानस ख्योन शुर्य तु बेमार गछन समयस प्यठ ख्यावुन्य । मकान गछन पनु वॅथरव तु तमिक्यव मेवव सुत्य सजावुन्य । जून खसन पतु अँग्न ज़ालुन तु रूद्र, चन्द्र, उमा, स्कन्द तु नन्दी यिमन गछि ब्योन ब्योन अर्ग तु नाना प्रकार्य ख्यन, मेवु तु मिठाँय दिनु यिन्य । सॉर्य रात्र गछि मर्दन हुंदि दॅस्य शंख वायिन्य तु

अँग्नस ब्रोंहकनि बिहिथ गुज़ारनु यिन्य । निकुम्बस गछि खेचरि हुंद
 बोग दिनु युन । यिमन गुर्य आसन तिमन पज़ि अदिति हुंद पोथरु
 रेवन्तु पूजुन । यिमन गाँव आसन तिमन पज़ि कामदीन पूजुन्य ।
 गबरेशन पज़ि वरुन दीव तु हँस्य थवन वाल्यन पज़ि गणन हुंद दीव
 पूजुन । कैचन ब्रह्मनन पूज कँरिथ पतु अँग्नस आहोच दिनु पतु
 पज़ि मर्दन पनुन आत्मा ति पूजुन । तमि पतु ग्रहस्थक्यन सारिनुय
 सदस्यन तु यारन दोस्तन सुत्य इकवट बिहिथ वैशनव बूजन करुन ।
 राँत्य रातस गछि बाजि तु संगीत ह्यथ बजन कीर्तन करुन ।

सुब्हन वँथित गछि श्रान ध्यान पतु अँग्नस पूजा करुन्य तु
 कुनि रुत्यन चीज़न अथु लागनुक संस्कार करनु युन । तमिपतु यारन
 दोस्तन सुत्य बिहिथ ईकुवट साल ख्योन युस तौतान्य रनुन आमुत
 आसि । अथ रातस गछि आराम करुन तु सुबहन वँथित गछन लुख
 सॉरिसुय पानस ग्वडु रब मथुन्य पतु पनुन्यन यारन दोस्तन तु दँछिन्य
 खोवर्य ति लुकन रब मथुन्य । पनुन्यन ज़नानन सुत्य मसखँरी,
 क्रकु दिन्य, गिन्दुन द्रोकुन गछि अथ पँहरस करुन । अमि द्वह सुबहन
 छि निकम्बस माननवाँल्य खोफ़नाक जायन हुंद पिशाच सारिनुय
 हुंदन शरीरन मंज़ अचान । शामन छि तिम तति पानय नेरान यिमव
 यिथुपाँठ्य यि द्वह आसि मनोवमुत । तिम येलि श्रान करनु सुत्य रब
 छि छलान, पिशाच छि तति नीरिथ दोयमिस शरीरस मंज़ अचान तु
 तिमन वोहवान यिमव नु यि द्वह यिथुपाँठ्य मनोवमुत आसि कँह ।
 तमि पतु पज़ि श्रान पतु तिमन केशव सुंज पूजा करुन्य । ब्रह्मनन
 पूजा कँरिथ पज़्यख गरिक्य सॉरी ह्यथ इकुवट बूजन करुन । तमि
 पतु पज़ि लूकन खासकर ब्रह्मनन शेन रेतन यि अँग्न रातस ज़ॉलिथुय

थवुन । अख चोंग गछि रातस न्यबरु कनि अँकिस रेतस जॉलिथुय
थवुन । कार्तिक जूनपछ पुनिम तान्य गछि यि कौमुदी आनुन्द दिनवेल
रेथ मनावनु युन । पछ तिथय पॉठ्य मनॉविथ गछि स्वख तु आराम
अनुभव करुन । व्वन्य वनय बु कार्तिक जूनपछ पुनिम किथु गछि
मनावुन्य:-

शुर्यन तु बेमारन गछि पनुनिस समयस प्यठ ख्यन दियुन ।
सिरिं लूसिथ गछि लक्ष्मी पूजा करुन्य । गाशिमीनार गछन मन्दरन,
सडकन, शमशानन, कवलन, नालन, गरन, कुल्य मूलन तल गुहि
बन्यन प्यठ आँगनन तु दुकानन प्यठ थवुन्य । अमि पतु तथ जायि
यस सिर्फ चाँग्यव सुत्य चोपॉर्य सजॉविथ आसि, गछन नॅव्य
पलव लॉगिथ मर्द, ब्रह्ममनन, यारन, रिशतुदारन सुत्य बूजन करुन्य ।
दोयमि द्वह श्रान ध्यानु पतु सँजिथ गछि ग्यवुन तु साज़स सुत्य सुत्य
ज़ार मर्द गिन्दुन्य, युस ज़ेनि तस बापथ छु वॅरिय ह्योत तु फ्रूस
नेरान । अमि पतु गछि शॉगुन तथ कुठिसं मंज़ युस सजॉविथ आसि ।
यथ मंज़ अँतरुन्न मुशिकि अदफर यिवान आसि । अमि रॉन्न हेंकि
सु पनुनि त्रयि सुत्य आरन सान शॉगिथ । पनुन्यन गरिक्क्यन,
होवरिक्क्यन, रिशतुदारन, ब्रह्मनन तु सीवकन गछन नॅव्य पलव
तोफु रूप दिनु यिन्य ।





दीपावली

कार्तिक गटपछ मावसि छि अँस्य दीपावली मनावान । यिथुकँन्य
 असि सारिनुय छु अमि कथि हुंद ज्ञान जि माजि कैकी येलि 14 हन
 वँरियन हुंद बनवास श्री राम चन्द्र सुंदिस नँसीबस ल्यूख । तिमव कौर
 खुशी सान आंकार तु द्रायि गीर्य वस्त्र लॉगिथ जंगलन कुन । यि ओंस
 भगवान विष्णु संज सॉरुय लीला युस राम रूपस मंज पानु जन्मस
 ओस आमुत राजु दशरथ तु माता कौशल्यायि निश । अँमिस ओँस्य
 तमि वख्तुक्य राक्षस तु असर नेस्त नाबूद करुन्य । ताकि लुख हैकन
 आजॉदी सान व्यवहार कँरिथ । चूँकि राम रूपस मंज छि तिम पानु
 विष्णु भगवान तिमन ओस असि संसॉर्य लूकन यि हॉविथ दियुन जि
 यथ संसॉर्य व्यवहारस मंज किथु छु पोज वरतॉविथ अपजिस प्यठ

फतह हॉसिल करुन्य। येमि संसॉर्य किथु व्वथुन, किथु बिहुन, कमि आचारु व्यचारु हेकव अँस्य तार लँबिथ। येलि चोदाह वॅरिय बनवासुक्य कॅरिथ राजु राम अयोध्यायि वापस आयि, अमि द्वह सजॉव्य लुकव महारेनि हुंघ पॉठ्य पनुनि जायि, बाग, वतु, कोचि याने रच्चि-रच्चि तु हनि-हनि पनुन सोरुय ओंद पोख। चॉंग्यन हुंद जूल कॅरिथ कॅरुख पनुनि खुशी हुंद इजहार। बंगोलु तु टास त्रॉविथ कौरुख राम जियस आवबगत। पानुवुन्य बॉगरॉविख पूर्य, मिठॉय तु हॅलवु। यि छु तँती प्यठु अजतॉन्य जि अँस्य सॉरी हँघ छि तमी जोशि खरोशि यि दीवाली हुंद बोड दोह मनावान। रामायणस मंज छु यि दरशॉविथ जि तथ कहानी मंज ओस अख असुर रावुण येम्य त्रुभवन ओस लरजोवमुत, राम जियनि दँस्य स्यठा कूशिश करनु पतु आव पानु सीता रूप दुर्गा मातायि हुंघ अथव मारनु। सुय भगवान राम आव अमि द्वह वापस, येमि किन्य यि दोह सानि बापथ स्यठाह पवेत्र तु महान छु।

अँस्य छि यि दोह अँदरिम लोल तु बाव मनावन। कैह दुकानदार छि पूर्य कॅरिथ पनुन्य गरु, दुकान पोशि मालव सुत्य सजॉविथ तु जूल कॅरिथ नॅवीदस पूजा करान। पतु छि सारिनुय हमसायन तु ऑशनावन मिठॉय तु पूर्य बॉगरिथ पनुन्य प्रसन्नता इजाहार करान।

राम जी छु विष्णु सुंद अवतार। सु छु फरमाबरदार पोथुर, शूबिदार हेछिनावन वोल, शूबिदार राजु येम्य सॉरिसुय जिन्दगी पज़र, इन्साफ तु इखलाक वरतोव। अथ बरअकस ओस रावन अपज्योर, बदइखलाक तु अत्याचॉरी। क्वदरती छु तमिकिन्य अख रुत इन्सान इन्साफ तु पज़र सुत्य अन्दकार दूर कॅरिथ पज़रुच्य वथ गाशिरावान। अवय छि अँस्य पनुन्य पनुन्य गरु, दुकान सजावान जि वुन्य नतु वुन्य

वाति राम जी तु रोज़ि असि प्यठ मेहरबान ।

सँतीसर फौडेंशन सफु नं चोर दीवाली पूजा विदी मंज़ छु
 दरज यिथु कॅन्य जि 'प्रानि अकि कथि मुताँबिक आयि माता लक्ष्मी तु
 माता सरस्वती कॅशीरि (सँतीदीश) पार्वती मेलनि । तिमव दोशवय
 कॅर अँती रोज़नुच यछा ज़ॉहिर । ततिक्वयव रेश्व तु मुनियव कोर
 सरस्वती मातायि हुंद स्वागत मगर माता लॅक्ष्मी दियतुख वॅरियस मंज़
 अकि लटि कॅशीरि यिनुक इजाज़थ । मातायि हुंद दोह छु अमी दीवाली
 रूप मनावनु यिवान । तमिय छि अँस्य खास पॉठ्य अमि द्वह माता ।
 लक्ष्मी पूजा तु अर्चना कॅरिथ आवाहन करान । राज़ रावुन अँछन तल
 थॅविथ अमि रॉच पनुनि पानुक मंथन करान तु पानस अन्दर ऑठ अँग
 वुहवुन्य, शान्त करनुक यत्न करान । अथ रॉच छि कालुरात्रि ति वनान ।
 व्वपासनायि तु तप सुत्य हेकव अँस्य अमि रॉच पनुन्य वृथ साफ
 कॅरिथ सेदी प्रॉविथ । अँकिस पूर वॅरियस मंज़ छि यि कुन्य तु कीवल
 क्रुहुन्य राथ यथ मंज़ दय कृपा प्रावुन्य छि सँहल, अँमिय छि अथ
 दीपमालायि पर्बु द्वह मानान ।

दुपमाला छि अमि किन्य ति मनावान जि सिख दर्मुक्क्य शेयिम
 गुरु हरगोबिन्द सिंह जियन छि अमि द्वह जेलु मंज़ु कुद्य यलु त्रावनाँव्यमुत्य ।
 येमिकिन्य यिमन आव 'बन्दी छोड' ति वननु । यिमव छु वारयाहन
 जायन तफ सोदमुत, येमिकिन्य यिम जायि जायि तिहुंद सेदपीठ छि
 मानान । अमृतसरस मंज़ यथ जायि तफ छुख सोदमुत तथ छि गुरद्वारा
 'छहारटा साब' वनान । येति हर द्वह छि ज़न दिवय लगान । सारिवुय
 धर्मन हुंद लूख छि अज़ ति ओर गछान । बावुसान आरती तु अरदास
 कॅरिथ छि यात्री पनुन्य मुराद पूर करनुच आश थवान ।

गौपाल अष्टमी

अमि दोह छु श्री कृष्णन गौवर्दन पहाड किसि प्यठ रँटिथ
 सारिनुय प्रानियन हुंज रख्या कॅरमुच। दपान प्रथ वॅरियि ब्योल वविथ
 ऑस्य इन्द्र दीवस तसुंजि यछायि मुतॉबिक श्रूचि श्रानि गूकल वॉसी
 बोग रँनिथ तसुंजि वेरि थवान। श्री कृष्णन येलि जन्म ह्योत, तॅम्य वुछ
 अँछव वॅरियस मंज अख दोह इन्द्र दीव सुंजि वेरि मनावान। अकि दोह
 बालु अवस्थायि मंज प्रुछ कृष्ण जियन पनुनि माजि जि योद अमि दोह
 यिम बोग रनव नु तेलि क्या सपदि। माजि दोपुस जि योद न यि बोग
 अँस्य रनव, इन्द्रदीव गछि नाराज तु असि यिन कारन मंज वेग्न। अमि
 दोह कॅर श्री कृष्णन जिद तु बूग आव नु कॅह दिनु। यि वुछिथ सपुद



इन्द्रदीव स्यठा नाराज तु मंज दोह त्रैवुन त्यूताह रूद येमि सुत्य जोंफरि
 वुडेय अस्मौनी, हवा तु पानि सुत्य गँयि केंह लुख रबि मंज गॉब।
 इन्द्रदीव सुंज यि शरारत गँयि न्यशफल, येलि श्री कृष्णन थोव गूर्वदन
 बाल पनुनि किसि प्यठ छँतरि रूप सायि लुकन प्यठ। येमिकिन्य रूदु
 पान्युक असर प्यव नु तिमन प्यठ केंह। यि अद्धबुत लीला वुछिथ गव
 इन्द्रदीव शरमन्दु तु हेचनस मॉफी। सुती कॅरनस व्यनती ज़ि कुरुक्षेत्रस
 मंज रछिज्यन म्योन पोथुर अर्जुन पनुनि पखि तल। यि वॅनिथ आव
 बेयि पनुनि प्रानि लयि मंज। अमि दोह गछि गुड ऑटिस मिलाँविथ यि
 मंत्र परान परान गाव ख्यावुन्य :-

सौरभैयाः स्वर्ग हिता पवित्राः पुण्यराशयः।

प्रतिगृह वन्तु मे ग्रांस गावस्त्रैलोक्य मातरः।

अमि सुत्य छि गॉव मॉज तु श्री कृष्ण हमेशि असि प्यठ कृपा करन।



हरिप्रबोधिनी एकादशी

दीवाली पतु कार्तिक जून पछि कॉश्य छि हरिप्रबोधिनी एकादशी
 वनान। अमि दोह गछि गरस सारिसुय सफाई करनु यिन्य। आँगनस गछि
 मेचि सुत्य लिवुन या गेरू रंगुक फश दियुन। पतु गछन गेरू रंगु सुत्य
 वोखलस मंज नकशि बनावुन्य। तमि पतु गछन तथ मंज पूर्य पकवान
 मिठॉय, बेर, सिंघाडे (गारि ओट) बेयि तमि मौसमुक्य फल तु गनु टुकरु
 सजॉविथ थवुन्य। तमि पतु गछि यि सोरुय पहरॉन्न सुत्य डॅकिथ थावुन।
 तत्यन गछि अख दजुवुन चोंग ति थवुन। शामन गछि सोरुय परिवार ह्य
 पूजा भजन कीर्तन करान करान थाल वायुन तु वनुन :-

उठो देवा बैठो देवा, आंगुरिया चटकाओ देवा ।

अमि दोह छि कैह लुख तुलसी तु सालिग्राम सुंद खांदर बडु
दूम दामु सान करान । येमिस नु पानस कूर आसि सु छु तुलसी हुंद
कन्यादान अमि दोह कैरिथ पोन्न्य फल प्रावान ।

नारद जियन पुछ जगत पिता ब्रह्मा जियस: “हे पितामह कार्तिक
जून पछ काँश्य दोह छु भगवान विष्णु चोरि रेत्य पतु नेन्द्रि वोथान । अमि
काँश्य हुंद क्या छु नाव तु अम्युक महिमा क्या छु ।” ब्रह्मा जियन वोनुस:
“देवर्षि नारद अथ काँश्य छि हरिप्रबोधनी काह वनान ।” सारिनुय पापन
हैरिथ छि मुख्ती दिनु वॉज्यन काह माननु यिवान । गंगायि हुंद बजर,
समुन्दरन तु तिर्थन हुंद असर छु तोतुय तान्य रोज्ञान योतान्य विष्णु प्रबोधनी
काह त्यथ छेनु यिवान । अमि व्रतुक फल छु त्यूताह मेलान युस अख सास
अश्वमेद तु हतव बडेव हवनव सुत्य छु मेलान ।

नीलमत पुराण 464-468 शलूक अनुसार गछि कार्तिक जूनपछ
काँश्य द्वह फाकु थँविथ विष्णु भगवान, पनुन्न्यव बाजव तु नचनु सुत्य
वुजुनावुन । हारस मंज गछि कीशव भगवान सुंज शोंगिथ मूर्त, माता
लक्ष्मी हुंजि ख्वनि मंज ख्वर थविथ कनि, मेचि, स्वन, त्राम, सरतल
या चाँदि हुंज बनावनु यिन्य । अमि काँश्य हुंजि रॉच गछि बजन कीर्तन,
नचुन, ड्रामा, पुरानन हुंजु कथ अख अँकिस बोज्ञनावुन्न्य । अँग्नस
आहोन्न दिथ, चोपॉर्य जूल कँरिथ गछि जाय पोशव तु मुशकु तुज्यव
सुत्य मुशकावुन्न्य । श्री हरियस गछि माछ, मिठॉय, क्वंग, दाँन, दछ,
केलु पूरेव, नून, व्वजुल पन (नॉरिवन), सफेद तु रक्त चन्दनुक बोग
शेरुन । युस व्रुक आसि तस पजि पानु ग्वडु कुनि पाँ क्वलि मंज श्रान
करुन तु पतु पज्यस भगवान सुंज मूर्त लोलु तु मायि श्रान कँरिथ

पूजायि किन्य वुजुनावुन्य। श्रान गछि ग्वडु थनि, तीलु, माछि, पतु जामुति द्वद सुत्य बनावमित्यव पाँचव चीज़व सुत्य करनु युन। तमि पतु गछन लाल जवहर, स्वन, दर्बि तुज, पोन्थ मेच दाँदु या हँस्य हँग सुत्य क्वलि बठि खँनिथ कँडमुच मेच सफेद तु क्रहुन तेल, मेवु, इन्द्र सुंद तख्त, कुनि बालुक थोंग बनाविथ ब्रोंहकनि मूर्त थवनु यिन्य या गछि पनुनि मकदूर मूजुब चीज़न हुंद अम्बार थवनु। जाती पोशव दुप दीप तु मुशकि तुजव गछि जाय ख्वशढोल बनावनु यिन्य। ऑखरस गछि खिरुक बोग श्री हरियस दिनु युन। तमि पतु गछि ब्रह्मनन दान दक्षिना पनुनि ताकतु हिसाबु दिथ तिम ग्वडु, पतु पानवुन्य सॉरी ख्याविथ चॉविथ पानस ति असुल पाँठ्य बूजन करुन। कार्तिक जूनपछ त्रुवश गछि पँहलवानन तु तिमन यिमन स्टेजिच रूज़ी छि पनुनि आमदनी अनुसार यज़्जत अफज़ाई करनु यिन्य।

कार्तिक चोदाह गछि कीवल द्वदस प्यठुय दरन यिन्य तु पुनिम द्वह गछि ज़नारदनस दीवन हुंदिस दीवस पूजा करुन्य। पुनिम द्वह गछि नु जून खसनस तान्य कँह ति ख्योन। जून खँसिथ गछि कृतिका, कार्तिक खडग वरुन, हुताशन पोशि मालव, स्वन्दर गाशि जूर, मुशकदार सेंट, खिर, सब्जी गनुक्य बनाविथ बूग, नीजि वुशकु बतासुस प्यठ खशखाश, बूग रूप ब्रोंहकनि थँविथ पूजा करुन्य। तमिपतु गछि सु चोंग युस रेतस शामन न्यबरकनि थवनु ओस आमुत अँकिस बालटीनस मंज़ मेवु तु मिठायि सान थँविथ क्वलि मंज़ बहावनु युन। च्रॉग्य किस चँकिस गछि चन्दन सुत्य फश दिनु युन। क्वलि बठि प्यठ गछि सेकि प्यठ गाडि हुंज शकल बनावुन्य। प्यठ गछ्यस द्वद बावनु, अँच्छन द्वन गछनस जिवेल ज़ु त्रावुन्य

यिम ब्रह्मनस गछन दान करुन्य । तमि पतु गछि पलवव सुत्य, दन,
 अन, दालव सुत्य अख सफेद दाँद ब्रह्मनस दियुन, येमिकिन्य यमराज
 सुंदिस बरस अचनस छि आसौनी गछान । दाँनी छि तीतिस समयस
 स्वर्गस मंज वास करान, यीत्य दाँदस वाल छि आसान । व्वजुल्य
 ग्वलाब मालव श्री विष्णुहस पूजा कॅरिथ पजि द्वद च्यथ शोंगुन ।
 यिथु पाँठ्य गछन यिमु पाँच द्वह भगवान वुजनावनस तु पूजा करनस
 मंज गुजारुन्य । यिमन द्वहन गछि पॅथरिस प्यठ न कि चारपायि प्यठ
 शोंगुन । यिमन पाँचवुनिय द्वहन गछि नु मामस ख्यनु युन, मामस
 ख्यनुवाँल्य दान, यछ, दुत, पिशाच तु राक्षस ति छिनु यिमन
 पाँचन द्वहन मामस ख्यवान । यिथु पाँठ्य दीवन हुंद दीव विष्णु
 भगवान सुंज अरादना, त्वता कॅरिथ गछन सौरी तमह येमि संसौर्य
 पूर तु मॅरिथ वाति विष्णु दामस मंज ।




कार्तिक पुनिम

गुरू नानक देव ओस दहन गुरूहन मंज ग्वडुन्युक सिख गुरू यिम
 15 अप्रेल 1469 मंज माजि त्रिपता जी तु कल्याण दास मेहताहस निश
 तलवदंडी मंज जन्मस आयि, यस जाय पाकिस्तानस किस शेखपूरिस
 मंज छि तु वुन्यक्यनस छि नानकाना साहिब नाव जगि मशहूर ।

गुरूजिय ऑस्य लोकचारु प्यठय स्यठा त्रुक तु हुशार ।
 यिमन सुत्य ति तिम कलाम करुहान तिमन ओस सवालन प्यठ
 सवाल प्रछान तु पनुन शक दूर करान । शुर्य पानय ऑस्य यिम दय
 कथ लुकन सुत्य कॅरिथ तिमन तिहुंद आसुन बासनावान । पनुन्यन

रीचन रेवाजन प्यठ बहस कॅरिथ ऑस्य लुकन हुंद दिल फवलरावान ।
 तिम सूज़िख अमि गामुकिस स्कूलन मंज़ परनु बापथ, येलि तिहुंज़
 वुम्बर शे वैरिय ऑस । तिमव पोर पं० गोपाल पण्डितस निश
 हिन्दी तु फारसी पोरुख मोलवी कुतुबदीनस निश । त्रुवहामिस वैरियस
 मंज़ पोरुन पं० ब्रिज लाल जियस निश संस्कृत । सु ओस अमूमन



सवालव सुत्य पनुन्यन गुरुहन हॉरान करान । दय ज्ञानुक सबक
 ह्योत तिमव पनुन्यन गुरुहन तु ज़िठ्यन शुराह वृहरिय दियुन । ज्ञानियन
 तु पण्डितन सुत्य ऑस्य फुर्सच्च विज़ि बिह्थि पनुन दय पेपास दूर
 करनस मंज़ पानय पानस सहायक बनान ।

गुरू नानक देव जियन करि बजि चोर यात्रायि । अख
 भारतुकिस प्रथ कूनस मंज़, दोयिम अरब तु ईरान बैयि मक्का तु
 बगदाद । यिमन यात्रायन आमतोर ऑस्य “उदासिस” वनान । यिमन

जायन गॅछिथ ऑस्य यिम लुकन निश दय ज्ञानुक तु पज़रुक वाज़
परान। तिहुंघ सॉथी ऑस्य भाई बाला जी ह्यौंद तु बाई मरदाना
अख मुस्लमान, यिम हमेशि यिमन सुत्य ऑस्य रोज़ान।

पॉकिस्तानस मंज़ नानकाना साहब जायि मंज़ छु सिख धर्मुक्य
ग्वडनुक्य गुरु, गुरु नानक साबन ज़न्म दौरमुत। अमृतसर ब्रोंठुय
अख जाय बटालाहस मंज़ ओसुख यिमन नेथुर कोरमुत। यिमन निश
ओस दोयव लॅडकव ज़न्म ह्योतमुत। अख ओस स्यठाह ज़ौनी यिमन
श्री चन्द नाव ओस। शंकर जियिन्य पॉठ्य ऑस्य यिम पानस बस्म
मलान। यिम ऑस्य पानस बस्म, पोशस श्रानुपठ तु अथस क्यथ कमण्डल
ह्यथ जायि जायि तफ कॅरिथ लुकन ज्ञान बॉगरान। बटालाहस मंज़
येति यिमव लॅगनस प्यठ फेरु छि दित्यमुत्य, तत्यन छुख गुरुद्वारा
बनोवमुत। अमिकिस आंगनस मंज़ छु अख अदभुत क्रूर, येम्यकि
पानि सुत्य छि व्याज़ तु रूग दूर गछान। दपान अति सूज़ ज़िठ्यव
अख कोल (Dumb) अकि द्वह यि क्रूर साफ करनि। क्रूल साफ
करान करान युथुय तस पाँ गोल गव अन्दर, सु आव दयगॅच किन्य
गाशिरावन्। तॅम्य ह्योत सुती 'वाहे गुरु' शब्द बोलुन। युस ति तोत
गछि सु छु ख्यथ च्यथ अम्युक जल रूप अमृत बोतलन मंज़ बैरिथ गरु
ति निवान। अमिस स्यद पुरुश सुंद ज़ा द्वह छि ऑस्य अमि द्वह मनावान।
गुरुद्वारन मंज़ गॅछिथ गुरु शब्द तु कीर्तन बूजिथ छि लुख शोहजार
अँन्दुर्य न्यबुर्य अनुभव करान। असि प्यठ ति सपदिन तसंज़ कृपा।

अमि द्वह छु स्वामी तिर्थपुरी जी चंडीगाम महाराजुन ति ज़न्म
घन। यिमव छि नैपालु पशुपतिनाथ पूरब दरवाज़ा मुख्ती मण्डलस
मंज़ तपस्या कॅरमुच। तति प्यठु वॉत्य यिम केदारनाथ येति यिमन

कॅशीरि मंज दुर्गानाग मन्दरुक स्वामी सत्यगिरि जी महाराजस सुत्य
मुलाकात सपुज। येलि पानुवन्य यिमव प्रछगौर कॅर, सत्यगिरि महाराजन
प्रछुख “चे छैथा कॅशीरी मंज अमरनाथुच यात्रा कॅरमुच।” यिमव
दोपुस “बु छुस नु तोर केह गोमुत, मगर व्वन्य छुम यरादु गछनुक।”
श्रावन जूनपछ पाँचम द्रायि श्रीनगर अखाडु प्यठ छडि सुत्य अमरनाथुक
दर्शुन कॅरिथ तिमु सत्यगीरी साँबस मेलनि। पाँचन द्वहन रूद्य द्वाशव्य
यकजाह। अति प्यठ द्रायि तिमु दुर्गा गिरियस सुत्य वरमुल कुन।
ग्वडुन्यथ गॅयि तिमु शिला भगवती हुंदिस मन्दुरस मंज, तमि पतु गॅयि
तिमु कूटी तिर्थ या करोड तीर्थ गंगनोरुच यात्रा करनि। गंगनोर वाँतिथ
गॅयि यिमन द्वाशवन्य पानुवाँन्य लडॉय तिक्याजि बाबा जी आँस्य अख
कीर्तन करान, दोयुम बंगु पकोरि ख्यवान तु लूकन ति ख्यावान।
क्रूदस मंज यिथ दियुत बाबाजियन पनुनि कमण्डलुक जल दोनि मंज
दोरिथ तु पानु द्रायि लंगेट कुन। लंगेट दितुख थोडा तम तु वाँत्य स्वामी
नन्दुलाल जियस निश टिकर तु टिकरु प्यठ त्रिहगाम। येलि नु तति ति
करार आख यिम वाँत्य लालपोर गामस मंज। चर्तुमास ओस चलान।
लाल पोरिक्यव लुकव रॅटिस पाद तति कयाम करनु खाँतरु। मगर
काँसि हुंज ति व्यनचु सुत्य रुक्योव नु केह। तिमु द्रायि तति प्यठ जन्मु
अष्टमी द्वह येमि विजि श्री कृष्ण जूला नेरन वोले ओस तु वाँत्य तिमु
सोगामस नॅजदीक चँडीगोम। यिमन ओस पानस सुत्य अख कमण्डल,
चुमट, जूल्य, खप्पर तु छँतर्य। चँड्य गामु बीठ्य यिम छतरि तल
आँकिस कुलिस तल। केह काँल्य पतु कोडुख अँथ्य कुलिस तल
पोन्य पनुनि चुमटुक्य अकि दनु सुत्य। जमीन खँनिथ द्रायि तत्यन
चण्डी मातायि हुंज स्वंदर मूर्ती, यवसु तिमव तति आँस वेराजमान

थवमुच। पोन्थ द्राव त्यूताह येमि सुत्य खाह हेतिन सॅहराब गछुन्य।
थानुदार पृथ्वी नाथ पंडित तु लाल जियन दोर स्वामी जियुन ग्वर
म्वख। थानुदार सॉबनि वननु अनुसार वोनन अकि द्वह लाल जियस
“यि फटु तुल तु त्राव दोनि मंज। यि छु वुहन रोपयन हुंद। फटु योद
अथ अॅग्नस मंज त्रावव, यि दजि तु गछि न्वकुसान। लिहाजा थव
अॅकिस अन्दस कुन।” मगर येलि चूरिमि फिरि फटुक नाव हेतुख,
लाल जियन तुल तु त्रौवन दोनि मंज। बाबा जियन त्रौव यि वुछिथ थदि
थदि असुन। तमिपतु वोननस “महाकाल आसि व्वन्य शान्त सपुदमुत।”
तमिपतु वोननस “कोपवारि मन्दुरुक रमेशानन्द बेहनॉव्यज्योन यथ
गदि प्यठ। 7.45 मिन्ट त्रौवुख अमिय द्वह यि शरीर। तिमव ऑस
पानस किच पानय समाद्य बनॉवमुच। तथ मंज त्रावन वाज्यन सामग्री
ति ऑसुख पानय अॅनिथ थॉवमुच। 16000 रोपयि द्रायि सामानस
सुत्य यिम तिमनुय थिय आसन गॅजरिथ थाविमुच। तिमव ओस तिमन
यि वॅनिथ थोवमुत जि शुरहाव द्वहव पतु गछि द्वन द्वहन हवन करुन।
सदाहिमि द्वह बेहनाव्यज्योन रमेशानन्द यथ गदि प्यठ। ग्वरस पतु
आव रमेशानन्दस ‘पुरी’ नाव ति तस जोरनु। स्वामी रमेशानन्द पुरी
जी माहराजन छु जन्म कन्याकुमारी मंज ह्योतमुत। यिम ऑस्य हमीरपुर
हिमाचल प्रदेश राजिक्य राजु गुरू सुंघ सन्तान। तिमव ओस तथ
जमानस मंज बी०ए पास कोरमुत। राजु गॅयि अॅमिस प्यठ स्यठाह
प्रसन्न तु बनॉविन यिम जज। दपान अकि द्वह दियुत अॅम्य गलत
फॉसलु तिक्याजि गवाह ऑस्य मल्य हेनु आमुत्य। येलि यि नेबर द्राव
अॅम्य बूज लुकन निश जि जजन कोर बेग्वनाहस खश। बेयि द्वह
कुरसी प्यठ बिहथ्य छुनुन पनुन न्योठ जॅटिथ तु त्रॉवन नोकरी।

आध्यात्मस मंज रुचि आसनु किन्य द्रायि यिम पैदल तु वॉत्य कराची। समुन्द्री जहाजन हुंद सामानु वालनु खारनु खॉतुर बीठ्य यिम कराची बन्दरगाहस प्यठ तु कॅरुख मज़ूरय। तमि पतु बीठ्य यिम कमसुय कालस पेशावरस मंज। अति प्यठु वॉत्य यिम नैपाल येति तीर्थपुरी माहाराज सुंद ग्वरु मोख रोटुख। तमिपतु कॅर यिमव ग्वरु सीवा 27 वुहन वॅरियन। अमिपतु द्रायि यिम ति वॉत्य ग्वडु कोपवोर तु पतु चंडीगोम आश्रम तु बीठ्य तिर्थपुरी जी माहाराजनि हुक्म अनुसार तसंजि गदि प्यठ। चूँकि म्यानि सीवायि प्यठ ख्वश सपदिथ बनॉवहस बु कूर तु वोननम “आज से तुम भी मुझे अपना पिता समझना।” तमिय रॉच ओस सत्संग चलान मे दितुन वरदान चु लेख। पूर अकि रेत्य पतय ह्योत मे लेखुन। अज ति छि अँस्य उधमपोर देवकायि निश चंडीगाम आश्रमस मंज वॅरियस मंज त्रे हवन करान। यिमन द्वहन छि कालु हवनस बिहिथ पगाह पूर्ण आहुती दिथ ग्वडु बाबा जी 60, 70 नॅवीदु करान तु पतु छि आम लुख ख्यावनु यिवान। अमि आश्रमुक ज्युठ छु श्री दुर्गापुरी जी माहाराज यिम ततिकिय पॉठ्य सॉरी कार पानय छि अँजरान। यि दुर्गा पुरी जी ऑस्य स्वामी जियस सीवक चंडीगाम आश्रमस मंज। यि सॉरुय कथ स्वामी तिर्थ पुरी जी महाराजिन्य तु स्वामी रमेशानन्द पुरी माहाराजिन्य छि मे लीछमुच, स्व छि मे दुर्गागीरी माहाराजन वॅनिमुच, यिम हैदराबादुक्य ऑस्य रोजनवॉत्य। तिम छि योर रावलपेँजि वति किन्य दाँदु गाडि खँसिथ आमृत्य। पतु कौरुख अलग-अलग जायन मंज तफ तु वुन्यक्यन ऑस्य “चामुण्डेश्वरी आश्रम” पुरखू कैम्पस मंज वास करान। मगर मे बूज अख वॅरिय ब्रॉठ जि तिम ति छि स्वर्गवास सपद्यमृत्य।

महाकाल भैरव अष्टमी

यि महाकाल भैरव अष्टमी छि मौंजहोर गटुपछ ऑठम आसान ।
अमि दोह छु महाकालुन ज़ाह दोह आसान । योदवय अँस्य महाकाल
मंत्र सुत्य यि दोह गरिक्य बाँच ह्यथ मनावव, सान्य ज़िन्दगी छि मंगल
मय बनान मंत्र छि :-

कल्पांत कालग्नि चतुर्भुजम् काय कोपं-जुष्ठम्
कपाल खटवाँग, वराभयाध्यं
कांत, महाकाल अनन्त ईडयै
ऊ ह्रीं श्रीं महाकाल भैरवाय मम गृहस्थस्य
आयु आरोग्य ऐश्वर्य जन्माते देहि देहि नमः ।



उत्पन्ना एकादशी

पौरानिक कथव मुताँबिक छु द्वापर युगस मंज युदिष्टर श्री
कृष्णस प्रछान ज़ि 'मे वनतु कस दीवस गछि एकादशी व्रतस मंज पूजा
करुन्य ।' तिमव वौनुस जवाबस मंज ज़ि शास्त्रव अनुसार छि हरदस
मंज मौंजहोर गटु पछ काँश्य उत्पन्ना एकादशी बनान । सत्यायुगस
मंज ओस मुर नावुक खतरनाक राख्युस मत्योमुत । तँम्य अँस्य ताकतवर
इन्द्र आदित्य, वसु, हवा तु अँगु सान साँरी दिवता हारनॉव्यमित्य तु
स्वर्गु मंज नेबर कँड्यमित्य । स्यठा परेशानी मंज गँयि साँरी दिवता
भोले शंकर जियस निश तु वोनहोस सोरुय पनुन हाल । सोरुय हाल

बूजिथ वोननख तॅम्य जि तोहि गछिवु यिमन दोखन हुंद नेवारन, योद
 तोहय खीर सागरस मंज शेशनागस प्यठ बिहिथ विष्णु भगवान सुंघन
 चरनन तल बिहिथ वेनथ कॅरिव। तिम सॉरी द्रायि इकुवट सॅमिथ तु
 भगवान विष्णुहस कोरुख रक्षायि बापथ वेनय प्रनय। तिहुंज वेनथ
 बूजिथ प्रछनख विष्णु भगवानन जि यि कत्युक छु, कस छु ज़ामुत,
 कमि क्वलुक छु तु क्युथ छुस खतखाल। अथ प्यठ वोनस इन्द्राज्ञन
 जि पथ कालि ओस नाडीजंघ नावुक अख राख्युस। युस महाबॅली तु
 महापराक्रमी राख्युस ओस, यि छु तसुंदुय पोथर। यि छु सॉरिसुय
 सम्सारस मंज स्यठा मशहूर। यि छु चन्द्रावॅती नॅगरस मंज रोज़ान तु
 सॉरी दीवी तु दिवता छिन खोत्यन चॉन्यमुत्य। सु छु गाहे हवा, कुबेर,
 यम अॅग्न, वरुण, चन्द्रमा तु सिर्यि रूप दारन कॅरिथ पनुन्य पध्य हर
 कुनि जायि ठीकरान। यि बूजिथ दियुत विष्णु भगवानन दीवन दिलासु
 तु द्रायि चन्द्रावॅती नॅगरस कुन दुतस मारनि। येलि तिम तोत वॉत्य युद
 भूमी प्यठ ओस यि दुत ब्रोंडुय पनुन फोज हैथ वोतमुत। राख्युस ओस
 कूदस मंज दंद टकान। दैत्य राज़ 'मूरन' ह्योत भगवानस सुत्य सोंचनय
 जंग करुन। भगवान युस ति तीर रूदुस त्रावान, तिमव कोर सर्पव रूप
 तमि सुंदिस शरीरस पर्युन मगर तस ऑस्य पानस पोशि रूप यिम
 तीर बासान। यिथ पॉठ्य ह्योत व्वन्य यिमव अथव सुत्य जंग करुन
 युस सासन वरियन तान्य रूद चलान। येमि विज़ि भगवान स्यठा थोक
 तिम गॅयि बद्रि आश्रमचि हेमवती नावु ग्वफायि मंज येति तिमन स्यठा
 मीठ तु मस नैन्द्र पेयि। स्व ग्वफ ऑस 12 योजन ज़ीठ यथ अख
 दरवाज़ु ति ओस। मूर ति वोत भगवानस पतु पतु लारान तथ ग्वफि
 मंज। मच्चि नैन्द्रि मंज भगवान वुछिथ येलि दैत्य राज़न तस प्यठ प्रहार

करुन ह्योत, विष्णु भगवान सुंदि शरीरु मंज गॅयि तीजवान तु स्यठा
 प्रबावशाली अख कन्या अथन मंज अस्त्र शस्त्र ह्येथ पौदु। यि वुछिथ
 सपुद मूर स्यठा हॉरान तु हेतुन तॅस्य सुत्य जंग करुन। तसुंज अदाकाॅरी
 वुछिथ ह्योत दुतन सौंचुन जि यिछ बलशाली तु निपुन अस्त्र शस्त्र
 चलावनस मंज क्वस दीवी गछि आसुन्य। सु आवरोव ख्यालव तु
 कन्यायि कोर तसुंद रथ पुन्यव तीरव सुत्य तानु तानु। ज़ोरु सान दकु
 लौयिथ दितुन अकि अन्दु दौरिथ, येमि सुत्य तस गश आव। येलि
 बेहेशी पतु होशस मंज आव तमिय विजि कोरनस कन्यायि कलु दडु
 निशि ब्योन। तसुंद युथ मोत वुछिथ चॅल्य सॉरी राख्यस तु वॉत्य
 पाताल। येलि भगवान नेन्द्रि हुशयार गव तॅम्य वुछ पानस ब्रोंहकनि मूर
 सुंद चॅटिथ कलु तु बेयि तरफु दौयव अथव नमस्कार कॅरिथ अख
 कन्या। भगवानन पुछ तस कन्यायि जि यसुंद यि कलु येत्यन चॅटिथ
 छु, तसुंदि बयि सुत्य आॅस्य सॉरी दीवी दिवता स्वर्गु मंजु चॅलिथ खॅटिथ
 रूद्धमित्य। यि कॅम्य ह्योक मॉरिथ। कन्यायि वॅनिस सॉरी दॅलील। यस
 बूजिथ भगवान गव तस यि वननस प्यठ मजबूर जि च़े कोरुथ मे प्यठ यि
 व्वपुकार। चु मंग कांह वरदान। आॅम्य कोरि वोनस योद ही भगवान तोह्य
 मे यनामय छिवु दियुन यछान तोह्य दियिव मे यिहय वर जि युस ति कांह
 म्योन व्रत दरि तसुंछ पाफ गछन सॉरी नाशस तु अंतस प्यठ मेलि तिमन
 मूक्ष। युस दोहस मंज अकि लटि भूजन खेयि तस मेलि ओड फल। मगर
 युस बक्ति बावु सान नेराहार रोज़ि तस मेलि दनु तु मूक्ष। भगवानन वोनस
 चूकि चु गॅयख काॅश्य दोह पौदु तमी यियि च़े उत्पन्ना एकादशी नाव
 करनु। मे छि 'काह' त्यथ स्यठा टाँठ तवु किन्य यियि अमि व्रतुक फल
 सारिवुय तिर्थव ख्वतु फलदायक माननु।

मोक्षदा एकादशी या गीता जयन्ती

मोंजहोर जून पछ एकादशी हुंद व्रत छु मूक्ष दिनुवोल व्रत माननु यिवान। महाभारत योदस मंज छु भगवान कृष्ण अर्जन दीवस अमि दोह गीताजी हुंद व्वपदीश दिवान। अमि किन्य छु अमिय दोह गीता जी हुंद ज़ा दोह ति मनावनु यिवान। अमी दोह छु दामोदर रूप भगवान कृष्ण पूजायि ख्वश करनु यिवान। दूप दीप तु नॅवीदु सुत्थ

गछि दामोदर
करुन्य तु यि
फाकु बावु सान
मनुश छु यि
पनुन पान
सुत्थ पनुनि
ति हीतू बनान
अथ प्यठ वॅन्य
युदिष्ठरस



भगवानस पूजा
काँश्य हुंद
दरुन। अख
व्रत दरनु सुत्थ
तारनस सुत्थ
क्वलस तारनुक
तु मूक्ष प्रावान।
श्री वृष्णान
अख कथ यस

यिथु पाँठ्य छि जि : गूकल नावु नॅगरस मंज ओस वैखानस नावुक अख राजु राज करान। तॅम्य सुंदिस राजस मंज ऑस्य चोन वीदन हुंद जानकार चोपॉर्य रोज़ान। अकि दोह बुछ राजन स्वपुन यथ मंज तॅम्य पनुन मोल बुछ नरकस मंज छट्ट छठ करान। “ येलि तस राजु म्यूल तॅम्य दोपुस : “म्यानि पोथरा मे कड तु कुनि ति तरीकु येमि नरकु मंज। नेन्दु वॅथित बुलॉव्य अॅम्य कॅह व्यदवान यिमन निश पनुन यि स्वपुन बोवुन। स्वपुन बूज़िथ द्रायि यिम साँरी भूत भविष्य वर्तमानुक

ज्ञान्यकार पर्वत रेश्य सुंदिस आश्रमस कुन । तोत वौतिथ प्यव राजु
 तस परन तु वौननस पनुन स्वपुन । यि बूजिथ दिन्न रेश्य समौद्य तु पतु
 दोपनस परूजन्मस मंज आसु चॉनिस मॉलिस जु रानियि । पनुनि अँकिस
 त्रियि हुंदिस वनुनस प्यठ दिन्न नु तँम्य दौयिमि त्रियि मंगिथ ति तँमिस
 कांह खुशी । येमि सुत्य तमि पापु फलु कारनु प्यव तस नरुक बूगुन ।
 अथ छु कुन तु कीवल अकुय समादन सु गव यि जि मोक्षदा एकादशी
 हुंद व्रत गछि दरुन । राजु येलि वापस पनुनिस मँहलस मंज वोत तँम्य
 दोर पनुन अयाल ह्येथ मोक्षदा एकादशी हुंद व्रत पनुनिस बबु संजि
 वेरि । तमि व्रतुक पोन्थ फलु किन्थ गव राजु सुंद मोल नर्कु निश मुछि
 तु प्रोवुन स्वर्ग । यि फाकु ति छु बूजनु वरॉय दरुन येमिकिन्थ प्रथ कुनि
 पापु निश मेलि नजात तु यितु गछि बन्दनव निशि ति मेल्यस म्वकुजार ।



मौजहोर पुनिम

नीलमत पुराण 471 अनुसार गछि मौजहोर पुनिम शामन
 बतु ख्यथ रातस चन्द्र भगवान सुंज अरादना करुन्थ । सफेद पोशिमाल,
 दालु, तोमुल, मेवु, लम्प नून ब्रॉहकनि थँविथ अँगु पूजा, ब्रह्मनन
 तु ज्ञनानि हुंज पूजा करुन्थ । तस ब्रह्मन ज्ञनानि गछि व्वजुल पोशाक
 बतोरि तोहफु दिनु युन । येमिस पतिदेव तु पोथुर ति आसन । योद
 यि द्वह अमि तँरीकु यियि मनावनु, ज्ञनानन छि यिवान रूप, रंग तु
 खुशहाली । ज्यादु पजि श्रदायि सान ज्ञनानन वँरियिच पुनिम दरनि
 तु चन्द्र भगवान सुंज पूजा पाँठ कँरिथ पनुन जन्म रथि खारुन ।



मौजहोर तँहर

चंद्र दीवनि व्यनत्र यज़्ज़त थँविथ कोर राज़ नीलन कशमीरस
मंज़ हमेशि खॉतर लुख बसावनुक आंकार। येमि दोह यि आंकार
गँछिथ लुख बसावनु आयि। सु दोह ओस मंजहोर ज़ून पछ पुनिम
पगाह पोह गटु पछ ओकदोह। तमिकिन्य ह्योत बटव कशमीरा दीवी
हुंद यिहय ज़ा दोह मानुन। अमि दोह छि अँस्य कौशिर्य बटु चोरि बजि
वँथित तँहर बनावन तु पतु छि माजि कशीरि बोग थँविथ सुब्हन
अम्युक नवीद करान। अथ दोहस छि अँस्य 'मौजहोर तहर' दिन्य
वनान।

नीलमत पुरान अनुसार छु कशमीरा दीवी हुंद द्वह कातिकर्
पुनिम पगाह मुंजहोर गटुपछि ओकदोह मनावनु बापथ वननु आमुत।
किताबि हुंदिस 465-466 शलूकस मंज़ छु वननु आमुत ज़ि यि छु सु
द्वह येमि द्वह महात्मा कशायप रेश्यनि दँस्य कशमीर बनावनु आव।
अमि द्वह गछि श्रान ध्यान पतु नँव्य पलव सारिनुय हुंद लगवुन्य।
खुशी खुशी ब्योन ब्योन पर्दार्थव ख्यन च्यन कँरिथ गछि यि द्वह बडु
ठकु ठकु सान मनावनु युन। बजनव कीर्तनव गछि माहोल सोरुय
ख्वशहाल बनावुन, चूँकि जनथरी प्यठ छु रेतुक पँतिम द्वह हावन
आमुत, तमि द्वह प्यठ छु हमेशि पूर वँरियस कशीरि हुंदन तति बेहनुक
हुकम जौरी करनु आमुत। तमिकिन्य छि अँस्य सुय द्वह मंजहोर तँहरि
रूप मनावान। यिम शराब च्यनुक्य आँदी आसन, तिम हेकन अमिद्वह
शराब च्यथ। दपान सिरि दीव छु तस प्यठ प्रसन सपदान।




दयत राजुन बतु या गाडु बतु

यि गाडु बतु छि अँस्य पोह गटु पछस मंज बटवारि या बोमवारि दिवान। वनन छु यिवान जि वास्तु छु परातन हेन्धन हुंद साईनस युस तकरीबन 6000 वॅरिय प्रोन छु। युस चोपॉर्य तमि जायि हुंद वातावर्न छु शान्त तु सोम थवान। युस राजु अथ साइन्सस पोछर छु दिवान, तस छि वनान वास्तु पुरुष या दयत राजु। प्रथ कुनि जायि या गरस मंज रुजिथ छु वॅरियस मंज अकि लटि पनुनि पनुनि मिज़ाजु मुताँबिक रोजन वाल्यन हुंद आवाहन स्वीकारान। केँह छि श्रूच्य पॉठ्य बतु तु रॅनिथ मुजि गाडु थालस प्यठ थवान, केँह छि हॅलव बनावान, केँह छि पोलाव तु पूर्य कॅरिथ दयत राजस रंजुनावान। मगर असली छु यि अँकिस वॅरियस जलस मंज रोजान। तमिकिन्य छु शंकर जियन अँमिस पाँ जीवव मंजु गाडु हर गरु वॅरियस मंज अकि फिरि ख्यावनुक वादु दियुतमुत।

वास्तु शब्द छु असली वेदु मंज द्रामुत। वास्तु साईन्स छु असि यि हेँछिनावान जि प्रथ काँह चीज गछि संतुलनस मंज आसुन। येत्यन अँस्य रोजन आसव, येमि सुत्य तम्युक औंद पोख रोजि शान्त तिथु पॉठ्य गछि गरस कुन दिनु युन।

मतस्य पुरानस मंज छु लीखिथ जि अन्दुकासुर राख्युस मारनु खॉतरु येलि शिवजी माँदानस वोथ, शिव जियस वॅथ्य तस सुत्य लडान लडान ऑरकु फेर्य। तिमन ऑरकु फेर्यन बन्योव अख इन्सान, युस ज़न स्यठा बदज़ाथ ओस बासान। तस लॅज्य ब्वछि तु तॅम्य हेत्य त्रेशवय लूक चापुन्य। सॉरी दीवी दिवता बेयि दानव ति खूच्य स्यठा।



सारिवुय दीवी दिवतहाव कोर सॅमिथ यलगार । तमि सातु रोदुख तु
 थोवुख बुथ बोनकुन कॅरिथ अवेज्ञान । वननु छु यिवान जि सु रूद प्रथ
 त्रैयि रेत्य पनुन्य दिशा बदलावान । अमि सुत्य स्यठा तंग यिथ गव शिव
 जियस निश शिव जियुन अंश तु रॅटिन तस पाद । तनु प्यठ ह्योत अँम्य
 शिव जियनि हुकमु मुताँबिक पॉनिस मंज़ वास करुन तु रूद यि यड
 बॅरिथ दोहस रातस पाँ जीवन गॉब करान । सुती द्युतनस वरदान जि
 वॅरियस मंज़ अकि लटि पोह गटु पॅछस मंज़ बोमवारि या बटवारि करि
 हर कांह गरु श्रोत्रि श्रानि गाडु बतु तैयार तु करनय च़े आवाहन । यि छु
 तिमनुय तान्य जि कमि कुस्मुक ख्यन दिनय च़े अथ पछस मंज़ अकि
 लटि ।

पलाटस या गरस मंज़ छु ज़रूर गरु दिवता रोज्ञान यस वास्तु
 पुरुश छि वनान । चूँकि यि गरु दिवता छु पनुन्यन अहलिकारन अमि
 दोह सुत्य अनान, तमि किन्य छु ताँकीद करनु यिवान जि बतु थाल

थॅविथ गछि नु सुब्बस गाश फोलनस तान्य तथ जायि फीरिथ कैह गछुन । कुनि खिचखिचि रोस छि तिम ति बतु थाल स्वीकारान । ख्वश सपदिथ छु गरस बापथ ओही आनन्द तु सन्तुष्टी कांछान । सुब्बन वॅथित थाल वुछिथ छु असि पूर पौठ्य बासान ज़ि तॅम्य छु अख म्योड ख्योमुत । प्रसन्न सपदिथ छि अॅस्य यि कावन त्रावान । गरु दिवता रूज़िन सारिनुय सहायतस ।



खेचि मावस

पोह गटु पछि च्वदुश तु मावसि छि यि द्वह मनावान । यछ, गन्दर्ब तु दिवता छि वॅरियस मंज़ अकि लटि पनुन बोग निनु खॉतर सोन द्वार पवेत्र करान । अॅस्य छि अमि दोह श्रोचि श्रानि महा खेचर अकोर गेव त्रॉविथ गासु आरि प्यठ पनुनिस गरुकिस देवारस प्यठ यछन हुंदि बापथ थवान । दपान अमि दोह छि यछ यलु गछान तु हेरुच मावसि दोह छि यिम बेयि पनुन्यन पनुन्यन जायन प्यठ वातान । येलि अॅस्य श्रदायि सान अमि मावसि दोह तॅमिस सालु रूप थालु शेरव, तेलि करन तिम अॅसि रॉछ यिनु वाजन्यव बलायव निशि ।

मृंगीष रेश्य छु रॉज़ी प्रार्दुभावस मंज़ लेखान:- रायथन येति मातायि हुंद प्रोखट स्यद पीठ छु तथ नॅज़दीकय छु अख गाम यथ 'यक्ष' छि वनान । तथ गामस मंज़ ओस्य यछ रोज़ान । यिमनुय हुंद कमांडर ओस स्वामी कुबेर जी, युस तिहुंद ओस वतुहावुक । अमिसुय कुबेर जियस ओस तपु बलु किन्य लंकायि हुंद मॅहल वर्दानस मंज़ म्यूलमुत । अमिसुय यछ राज़स दनु किस स्वामियस कुबेर जियस छि

ऑस्य खेचि मावसि दोह माह खेचरि रूप बोग दिथ पानस किच ऑही कांछान। ब्रोंठ ऑस्य यि परम्परा बोद तु जैन समाज ति मनुवान।

दर असुल ओस ईसायन ब्रोंह असि पनुन "Santaclaus" कुबेर सुंदिस वरुनस मंज। सुति छु तुरि मंज असि निश यिथ नाना प्रकार्य तोफु दिथ असि क्युत रुत कांछान। कुबेर जी छु "सन्ता" कॉशिरयन पंडितन हुंद या तिमन लूकन हुंद यिम वैदिक रायि प्यठ छि पकान।

सान्यन गरन मंज छु साख्यात कुबेर जी काजवट किस रूपस मंज आसान। वनुनु छु यिवान ज़ि काजवटच शकल छि कुबेर जियस सुत्य रलान। हेरि हन्ना नियुक, यड स्यठा बॅड तु कदु किन्य छोट। कुबेरस छि ज़नि किहो मर्दु सुंज शक्ति थवन वोल् मानान। यिम छि संतन, मात्रकायन तु पानु दुर्गा मातायि हुंद अकि तरफुक्य पॅहरदार तु दोयमि तरफु छि यिमन हुंद पॅहरदार श्री गनीश। अनकथ छि असि



गरिव्य बुजुर्ग वनान जि फुटमुत काजवठ गछि नु गरस मंज थवुन ।
चुनाचि अँस्य अँस्य बेखबर तमिय छि तिहुंद वनुन गालखातस करान ।

काँशिर्यन बटन हुंघ माहरेन्य माहाराजु छि लँगस प्यठ काजवट
धनुक स्वामी कुबेर जी मॉनिथ तस ब्रोंहकनि कस्म द्रुय करान जि
अँस्य रोजव द्दशवय बॉच अख अँकिस व्वाफादार तु यिनुवाज्यन्य
जिन्दगी बनावव स्वर्ग । माहरेन्य छि मालिनि प्यठ यिहय काजवट धन
ध्यार रूप पनुन वॉरिव निथ चोकस मंज थवान । चूँकि यि छु वीदव
वोनमुत मंगर असि छेनु अँज्युकतान्य ति अमि कथि हुंज खबरुय ।
खॉर ब्रोंहकुन थवव याद । ताकि दनुक स्वॉमी कुबेर करि असि ति
अनुग्रेह । अँस्य छि दहिमि द्दह यारबल खँसिथ ग्वड सलय काजवटस
प्यठ दछिन्य किन्य थवान । युथुय यज्जमन यारबल खसि, सु छु काजवटस
ख्वरु सुत्य दकु दिथ पतु अंदर अचान । पतु छि तमि गरिच अनुहरिश
कूर नून श्राद हावान । यिहोय छु वजह अँस्य काँशिर्य बट छिनु पनुनि
गरियुक काजवट काँसि दिवान न छि काँसि हैवान ।

कुबेर छिनु अँस्य व्वजुल्य या गुलॉब्य रंगु मानान । जंगली
जानवर सुंद पॉठ्य छु यि डायि क्रकु दिवान तु अगर असि मंज काँसि
तसंज टूप्य अथि लागि यथ 'यछि फुस' छि वनान, स्व फुस ग्रटस
तलुकनि थँविथ छु सु गरु माला माल सपदान । मान्यता छि यि जि सु
छुनु ग्रट तलु यि वापस कैह कैडिथ ह्यकान ।

वास्तु पुरुश नमस्तेहस्तु, भूशययानिरत प्रभो ।

मदगशहं धनधान्यादि समशब्दं कुरु सर्वदा ॥

खेचरि चोट बावु सान थवनु विजि गछि यि हैरिम मंत्र पुरन्य ।

कुबेर जी बनावि असि परिपूर्ण दनॉदय ।

शिशर संक्रात या मकर संक्रान्त

स्वर्ग लोकेचिरं वासो येषा मनसि वर्तते ।

यत्र कवापि जले तैस्तु स्नातव्यं भृगु भास्करे ॥

याने यिम्न स्वर्गस मंज वारियाह कालु रोजनुच यछा आसि, तिम्न
तिम्न पजि माग मासस मंज मकर संक्राच या शिशर संक्राच दोह श्रान
करुन । अमि दोह

भगवान मकर
प्रस्थान त्रावान ।

काँशिर्य बटु
कांगुर तु दक्षिना

पेतुरन याद
मतलब छु अथ

मंज पलव, कांगुर,



छु सिरयि

राशि मंज

अमि दोह छि

पेतुरन हुंघ नॉव्य

दिथ पनुन्यन

करान । अम्युक

तुरि कठकारस

दन तु दान काँसि

दि तसुंद कष्ट दूर करुन । यि दान दिवान गछि अथस मंज पाँ कतरु
रैतिथ यि मंत्र परुन :-

हिम शीत समीरानां हसन्ती च हसन्ति का

उज्जूलाडगार संयुक्ता स्वान्पितृथ ददाम्यहम ॐ तत सत
ब्रह्मः माघमासस्य कृष्ण पक्षस्य (कुस दोह, क्वस वार) श्री पित्रं
(येम येमि संसारुय आसन द्रामुत्य तिहुंघ नाव तु गुथुर) पितामह
(बुडि बब - बडु बुडबब, माँज्य, नान्य, बुडिबब या येमिस मूदय सुंदि
नॉव्य दान आसि दियुन) श्री गुरुवे समस्त माता पितृणा तेषां परलोके
शीत पीडा निवारणार्थं यमं अग्नि माण्डं अन्नं फल मूलादि वस्त्र

दक्षिणादि लवण सहितं ददामि-ददामि-ददामि ।

यि मंत्र पेरिथ गछि अथ सौरिसुय दानस प्यठु स्व पाँ लवु दिन्य
योसु मंत्र परनु ब्रोंठ मंज अथस मंज आसिवु रटिथ थोवमुत । मकर
सक्रांच दोह प्यठ छु सिरयि नार्थस कुन ह्यवान फेरुन । मॉज्ये ज़मीन
छि अमि दोह पेटुय बैयि ख्यनु खोर्दनी हुंद संज लुकन क्युत करुन
ह्यवान । अँस्य छि सुब्हन वँथित वुज ब्रांद छँलिथ मकानस च्वपॉर्य
चून रुख त्रावान । अथ चून रुखि छि मरेदु रुख मानान । यथ अन्दर नु
कांह नेबरिम दुशमन अन्दर हैकि अँचिथ । पतु छि तोमलु थालस प्यठ
पोसु तु सुत्य कांगुर थँविथ पेत्रन हुंद नॉव्य गुरू जियस या मन्दरस
दिवान ।



पुत्रदा एकादशी

पोह ज़ूनपछ काँश्य हुंद व्रत थवनु सुत्य छु निसन्तानस स्वन्दर
पुत्र ज़ेवान । अमिदोह छि चक्रदोरी भगवान विष्णु संज पूजा यिवान
करनु । अमि काँश्य हुंज महिमा प्रछनस प्यठ वँन्य भगवान कृष्णन
राजु युदिष्टरस अख कथ योस यिथु पॉठ्य छि: “भद्रावती नंगरस
मंज ओस सुकेतुमान नावुक अख राजु रोजान । युस नेपोत्र ओस । तमि
संजि त्रिय ओस शैब्या नाव । निसन्तान आसन किन्य ओस राजु दोहय
गमगीन आसान । तस आँस स्यठा परेशॉनी जि मँरिथ कुस हावि तस
श्राद या कुस दियस पेंडदान । तसुंघ पेत्र ति आँस्य परेशान जि राजु
मँरिथ कुस दियि तिमन पेंड । अँथ्य परेशॉनी मंज गव राजु अकि दोह
जंगल येति तँम्य वुछ जानवरन हुंद वारया झुंड यकजा पनुनिस अयालस

सुत्य जंगलस फेरान। राजु गव यि वुछिथ बडु दिलमलूल। हना थख
 कँडिथ बासेयि तस त्रेश। सरोवरस मंजु ऑस्य पम्पोश फोलिमुत्य।
 सारस, हंस तु मगरमछ ऑस्य अथ अँद्य पँख्य आराम करान। सरोवरस
 चोश्वय तर्फव ऑस्य रेशन हुंद आश्रम। राजस हैतिन दछिन अंग
 फोरुन्य। यि रुत शोगुन मॉनिथ वोथ राजु गुरि प्यठु बोन तु प्यव रेशन
 परन। आर्शिवाद दिथ तुल रेश्यव थोद तु प्रछहोस यिनुक प्रयोजन।
 राजन वनिनख पनुन्य नेपोत्र आसनुच सौरुय शेछ। रेश्व दोपुस अँस्य
 छि विश्व देव तु अज छि पुत्रदा एकादशी। अँस्य छि आमुत्य येथ
 सरोवरस प्यठु श्रान करनि। पुत्र यछा करन वॉलिस छु यि व्रत दरनु
 सुत्य पोथर ज़ेवान। योद राजु च़ुति यि व्रत दरख, त्रै दियिय भगवान
 सन्तान। अमि दोह प्यठु ह्योत यि पुत्रदा एकादशी हुंद व्रत राजन दरुन।
 रेशन इजाज़त हैथ द्राव पनुनिस मँहलस कुन वापस। तमिय दोह कोर
 रॉनी शैव्यायि गर्भ दारन तु नवि रेत ज़ाव तस अख स्वन्दर बालुक।
 युस बडिथ स्यठा वीर बन्योव।

भगवान कृष्णन वोन राजु युदिष्ठरस ज़ि पोथुर प्राप्ति बापथ
 गछि पुत्रदा एकादशी हुंद व्रत थवुन। अमि व्रत थवनु सुत्य छि यशस्वी
 तु फरमाबरदार पोथर ज़न्म हैवान। अमिच महिमा बोज़नु सुती छु
 मनुश स्वन्दर सन्तान तु मूक्ष प्रावान।



नव शीन

येमि द्वह शीन पेयि, सु ग्वडु शीन गछि द्वन ऋतूहन हेमन्तस
 तु शिशरस पूजा कँरिथ मनावुन। नीलनागुन्य तु पनुनि बसन जायि

हुंज पूजा गछि करुन्य। मेवु तु पतुर मेरू पर्वतुक्य गछन कुनि बालस पूजि लागुन्य। थदि ख्वतु थँज अतुर गछि पोशव सान अर्पन करुन्य। अडपेप वुशिकव सुत्य गछन अँगनस अहोचु दिनु यिन्य। अडपेप वुशिकि हुंद बूजन बनाँविथ गछन ब्रह्मन ख्यावुन्य। यि बोड द्वह गछि बजनव बाँतव तु नचनु गिन्दनु सुत्य खुशी सान मनावुन। अमि द्वह गछि माता शयामायि पोश अँतुर, रंग, दानि तौमुल, नाना रंग बूजन, मेवु तु मुशकिदार कुलिक्य पोश पूजायि रूप अर्पन करुन्य। यिम शराब चेनुक्य आदीन आसन, तिम हेकन पनुन तमह पूर करनु गर्जु शराब च्यथ। गर्म पलव लॉगिथ गछि सॉरी यार, बाय बान्दव ह्यथ शीनस प्यठ बिहिथ ग्यवुन गिन्दुन नचुन तु आँखरस मुखतँलिफ रनिमुचु ज़ियाँफचु खेन्य।



मागनि रेतुक बजर

दपान माजि पार्वती छु भगवान शंकरस ख्वश करनु बापथ मागनि रेतु तुरनिस पॉनिस मंज रूजिथ तफ कोरमुत। तमिय छु वननु यिवान ज़ि मागनिस रेतस मंज छि सॉरी पाँ आगर स्यठा पवेत्र सपदिथ गंगुजलस बराबर माननु यिवान। संसारस मंज युस ति कांह मनुश मागनिस रेतस मंज श्रान करान करान छु प्रयाग तु बाकयन तिर्थन हुंद नाव हेवान, तिमन छु गंगायि मंज श्रान करनुक फल मेलान। युस स्यठा श्रस्ठ छु माननु यिवान। दपान श्रान करिव या न करिव, मगर मागनि रेतु गछि न वुशनेर करनु बापथ कांगुर केंह तुपन्य तु नँ कुनि गर्मी वातनावनु किस सादनस काँम हेन्य। काँशर्यन पंडितन मंज छि

यि आम कहावथ 'येम्य कोर मागु श्रान तैम्य पूज सालिग्राम।' यि मागुक श्रान छु साक्षात विष्णु भगवान सुंजि पूजायि बराबर माननु यिवान।

युस दियि मागु मासु काँगुर शिशरस।

ईश्वरस निश वाति राजु कुमार।।

युस करि मागु श्रान न्यथ पूजि सालेग्राम।

सुय करि सतु बुहर कन्यादान।। (काँशुर हँजे वनुवुन)

अथ रेतस मंज छि स्यठा फाकु ति यिवान। यिम वुन्युखतान्य छि सारी काशिर्य बटु मायि तु लोलु सानु दैरिथ रुत्य फल प्रावान। अथ पूर रेतस मंज छि सौरी बटु मन्दरन तु दीवी बलन मंज सुब्हन तु शामन पनुन्य होंजरी दिवान। गरन मंज छि शामन कीर्तन बजन ति करनु यिवान। केह गरु छि मागुन पूर रैथ दैरिथ मागु पुनिम दोह हवन रूप पानस क्युत रुत काँछनुक सादन पानय बनान।



मौनी मावस या छोपु मावस

मागु गटुपछ मावसि छि मोनी या छोपु मावस ति काँशिर्य बटु वनान। दपान वरियस मंज योद अमि दोह मोन व्रत थवव, शरीरस छु स्यठा ताकत मेलान। शरीरस छु हर तरीकु पोछर मेलान। अमि दोह गछन शक्करस तेल मिलौविथ लँड्य बनावुन्य तु पतु तिम व्वजल्य वस्त्रव सान दान काँसि ब्रह्मनस दियिन्य।



माता र्वपु भवौणी

माता र्वपु भवौणी ह्योत मादव जू धरनि गरि ज्येठु जूनपछ पुनिम 1677 ईस्वी मंज खानकाहि सोख्ता सफाकंदल जन्म तु मागु गटपछ सतुम 1777 मंज प्रोवुन न्यरवान। अमिस थोवुख सोंदरि प्यठ 'र्वप' नाव। चूकि अम्य ओस डेगिजल तु ज्ञौनी गरस मंज जन्म ह्योतमुत तमिकि प्रबावु आँस यि सुशील।



मादव जू धर ओस माजि शारिकायि हुंद बैखुत्य । सु ओस सुब्हन हॉरी पर्वतस प्यठ गॅछिथ माजि शारिकायि हुंदिस आंगस डुवन तु लिवन फश दिवान । माता सपज्ञ तसुंदिस प्रेयमु बावस प्यठ स्यठा प्रसन्न तु दोपनस मंग कांह वर । मादव जू धरन दोपुस चु दार तु म्यानि गरि अवतार । मातायि ह्योत वरदानु अनुसार अँम्य सुंदि गरि अम्य सुंजि कोरि रूप अवतार । मादव जू धर ओस स्यठा ज्ञांनी । येलि यि कूर त्रुवरिश आँसस, सु गव हेरच त्रुवश द्वह अँकिस संतस निश, येमिस 'मला आखून' ओस नाव । तति ओस सत् संग चलान । संतन दोपुस चु अछ कमरस मंज तु बेह । तँम्य कोर तति साक्षात शिव जी तु पार्वती सुंद दर्शुन । मादव जू धर गव ध्यानस मंज लीन । सादन दिनुस जीर तु दोपनस व्वथ गछ गरि आसनय हेरच पूजायि प्रारान । सुत्य द्युतनस तेल थाल । दोपनस यि दिजि पनुनि कोरि । स्व करि अथ साफ तु पतु लॉग्यज्यव यिहय हेरच पूजायि । येलि गरु वॉतिथ अँम्य ठुक ठुक कोर, तति द्रायि माधवी तु दोपनस कति थोववु तेल, बु चारु । गव यि आँस पानु ज्ञांनी तु अंतरयाँमी साक्षात माजि दीवी हुंद रूप ।

अँम्यसुंज व्वथु बेठ, आचार व्यचार तु शवद मन ओस अँमिस दय ध्यानस कुन प्रेरित करान । शुर्य पानु प्यठय आँस्य अँम्यसुंजु अदबुत लीलायि वुछिथ कम कम दुरन्दर दम फँट्य गछान । अमिसुंघ बबन श्री माधव जू धरन द्वियुत अँमिस ग्वरु म्वख येमि सुत्य दय ध्यानच प्रवृथ अमि सुज हेचन फोलुन्य । अध्यात्मिक दीक्षा प्रावनु किन्य ह्योत अँम्य गरिय पनुन पान तपुन । यि आँस न्यथ प्रबातन सुब्हन हारी पर्वतस खँसिथ माजि शारिकायि हुंद दर्शुन कँरिथ यिवान । रुत वेलु वॉतिथ कोरनस पनुन्य बबन हब्बुकँदलु सपू खानदानस मंज पं० हीरानन्द

सपू हस सुत्य नेथुर। यि रूज़ तति ति पनुनि हिसाबु पनुनिस आत्महस
 पलालु रूप अध्यात्मिक सादनायि हुंद ख्यन दिवान। न्यथ प्रबातस
 येलि वॉरिवि प्यठ ति हेतुन माजि शारकायि निश गळुन, हशि माजि
 साँपुकुजि तु बरथाहस बास्योस यि स्यठा व्यखुत। तिमव कोरुस मार
 गंड तु ताडना। दपान अकि दोह वोत तॅमिस मालनि प्यठु हवनुक
 नवीद रूप खिर दीगचि। माता साँपुकुजि वोनस “यि क्या छुय वोतमुत।
 बु कस बॉगरावु यि। यि कस पोशि।” अथ प्यठ दितुस मातायि जवाब
 “तोह्य बॉगराविव पतु वनख बु बेयिहन सोज़नु खॉतर।” हशि माँज
 रूज़ बॉगरान, तॅम्य सूज़ खिर अुनि नावि हंघन च़ुनि ऑशनावन तान्य,
 मगर ऑखर येलि माजि सारिनुय खिर मोकुलोव बॉगरिथ तु दीगचि
 गव खॉली। र्वपु भवानि त्रोव यि खॉली खिरुक दीगचि क्वलि, सुती
 दोपनस “गळ म्योन बब छुय क्वलि बॅठिस प्यठ च़ेय प्रारान।” दीगचि
 वोत क्वलि क्वलि तु गाठस प्यठ रोट श्री माधव जू धरन।

तिमव दिच़ु अॅमिस मानसिक तु शरीरिक यात्नायि यिम अमि
 ग्वडु ग्वडु बरदाशत करि, मगर पतु येलि सॅर्य पेठ्य सॅहलाब गोस
 यि च़ॅज तु गॅयि फीरिथ पनुन माल्युन येति अॅम्य पनुन्य तपस्या बेयि
 हेच़ करुन्य। कैह कॉल्य पतु कुनि कारनु किन्य द्रायि स्व अति तु वॉच़
 ‘चेशमा साहिबी’ वस्तरवन योस जाय परी मॅहल बालस सुत्य राज
 भवनस नॅज़दीक चेशमा शाही निश जीलि डलु बॅठिस नॅज़दीक़ुय छे।
 साड बाह वॅरिय अतिय तफ सॉदिथ वॉच़ स्व गांदरबल तॅहसील किस
 वोतशन गामस मंज़।

यि ऑस पानु माता शारिकायि हुंद रूप। अॅमिस ऑस अथ
 व्वतुशन मनिगामु ग्वफि न्यबरकनि दोहय अख गाव यिवान। योस

पानय ऑस गडस मंज़ द्वद त्रॉविथ वापस नेरान। लुख ऑस्य यि वुछिथ हॉरान गछान मगर अमि सुंज़व करामचव ह्योत लुकव अँम्य सुंदिस थानस प्यठ युन गछुन, यिमेन मॉज ऑस व्वपदीश दिथ दय वतन कुन लागान।

तति प्यठ गँयि स्व मनिगाम येति स्व लाल चन्दनि गरि ग्वडु ठँहरेयि तु पतु बीठ अतिय अलग अँकिस कुटियायि मंज़। अज़ ति छि स्व कुटिया लार क्वलि बँठिस प्यठ मूजूद, योस स्यठा लौकुट आसनु किन्य माता पानय योत आसिहे वातान। यि कुटिया छि बोनि कुलिस तल। लार क्वलि हुंद ग्रजुन छु त्यूता दिलकश ज़ि दिल छु ब्रमान ज़ि अँस्य ति बेहमव येतिनुय अँथ्य जायि ज़िन्दगी हुंद बाकय द्वह गुज़ारनि। स्व० डाक्टर भूषण लाल कोल सुंदि 'कश्मीर की संत परम्परा' किताबि मंज़ लेखनु अनुसार वुछ मातायि क्वलु बँठिस प्यठ अकि दोह लार क्वलि मंज़ अडु दँज़ बोनि लँड वसान। तँम्य खॉर ह्योर तु दिचुन तिहुर व्वन कुन कँरिथ ज़मीनि मंज़ लँड। दैवयोग किन्य लँज यि लँड



जमीनि मंज यस अज विशाल बून्य बनेमुच्च छि । मनिगामस मंज ओस
 अँम्य अख आश्रम बनोवमुत । येति प्यठ द्रायि भवौन्य तुलमुल नँजदीक
 लार येति स्व साडन बाहन वॅरियन रूज । अति कॅर्य अँम्य स्यठा
 चमत्कार, येमिकिन्य सौरिसुय कशीरि मंज यि गॅयि मशहूर । लार पतु
 गॅयि माता सुम्बल नँजदीक 'वासकुर' येति तँम्य अख आश्रम बनोव ।
 हतु बँद्य बनेयि अँमिस अति शेश तु बखुत्य, यिहुँदिस आत्म बलस
 पोछर दिथ पुशरुन तिमन ज्ञानु बल । तिमन दितुन ज्ञान येमि सुत्य तिम
 ति रूद्य सादनायि मंज मस्त ।

दपान वासकोरि कोर मातायि त्युथ चमत्कार येमि सुत्य सौरी
 वासकोरिक्व अँमिसुय शरन आयि । मातायि वोन बाल जू दरस युस
 अँमिस बापोथुर ओस "चु हे लेखुन ।" बाल जू दर ओस अनपढ,
 तँम्य तुल कलम तु हैतुन पनुन व्वंदु बावुन । अँमिस ओस पानस
 संस्कृत, फारसी, हिन्दीयुक परिपूर्ण ज्ञान । उपनिशद, यूग सादना तु
 शैव दर्शनुक ह्यु अँम्य सुँद्यन अमृत बॅरिथ वाखन तु शलूकन प्यठ
 खास असर । पनुनिस रहस्य उपदेशस मंज ह्यु अँम्य कर्म, ज्ञान तु
 व्वपासना बखुत्यन हुँदि बापथ व्यछुनोवमुत । यि ज्ञानु गुंठर ओँस संस्कृत,
 फारसी तु शारदा लिपि मंज युस अँम्य सुँद्यव बखुत्यव केंचस समयस
 व्वपदेश रूप व्यछुनोव । तमि पतु नियि यिमव व्वपुदीशव ग्रंथच जाय ।

दपान वासकुरि गामस मंज ओस मलिकन हुँद अख लॅडकु,
 युस ओन ओस । अँम्यसुँजि माजि येलि सु मातायि निश नियुव, तँम्य
 दोप शुरिस "चु खन येत्यन अख कूर, योतान्य तमि मंज पोन्त्य नेरिय
 तोतान्य रोज़ खनान । पतु लाग सुय पोन्त्य अँछन ।" लॅडकन कोर तिय
 तस आव अँछन गाश । तनु प्यठु अजताम छि तिम मातायि मानान । सु

कूर छु वुनि ति तति मूजूद । तथ मंदरस छि तिमय मलिकन हुंद वंशज देख रेख करान । सुब्हन शामन छि तिमय तति चोंग ति ज़ालान ।

बेखुत्य छि अमिस अलख ईश्वरी र्वपु भवौणी या र्वपु द्यद नावु ति सुमरन करान । अलख ईश्वरी छु दोन शब्दन हुंद कुन शब्द । अलख तु ईश्वरी, याने माता छि सूक्ष्म अलोकिक शख्तिन तु एश्वर्युच मालिख । यि अम्य सुंद न्यरवान दोह छु मागु गटपछ साहिब सतम द्वह मनावनु यिवान । धर ज़ौच हुंद युस ति छु सु छु अम्य सुंद फाकु थवान । धर यिमन ति आँशनाव छि तिमन छु यि फाकु खसान । यिहुंज ज़ाथ छि साहिबि धर, तमिकिन्य छि साहिबि धर ज़ौच हुंद लुख द्वशवय द्वह मनावान ।

माजि र्वपु भवौनि छु वोतशन, मनिगाम, वासकोरि, लार, चेशमे साहबी साडन बाहन बाहन वॅरियन पनुन पान तोपमुत । यिमन वॅरियन छु अम्य ज़ल, कंदुमूल तु हंदि प्यठ गुजारु कोरमुत । माता आँस हमेशि दय ध्यानस मंज लीन रोज़ान । यि आँस शारिका मातायि हुंद अवतार रूप येमि सम्सार आमच ।

वीद छि वनान ज़ि व्यवहारिक ज्ञान ज़िन्दगी मंज यस ति आसि तस मनुशस छि रुति संसॉर्य व्यवहार दय वतु पानय साफ गछान । यिथुय पॉठ्य येमि संसॉर्य कूठ वॉरिवियुक व्यवहार चॉलिथ गनेयि मातायि ध्यानुच ज़्यादय पहान कल । येमि किन्य तफ तसुंद स्यद सपदिथ तॅम्य मूक्ष प्रोव ।

डॉ० बी० एल० कौल सुंदि लेखनु अनुसार येलि मातायि न्यरवान प्रोव तॅम्य सुंद शव ओस अंतोष्ठी संस्कार करनु खॉतरु निनु यिवान, तमिय विजि आव वासकोरि प्यठ तिहुंद अख शेश येम्य यि वॅनिथ

शव रुकोव जि मातायि वोनुम शहर प्यठ अनिजि कैह चीज यिम मे
अँन्यमित छि। येलि अर्थी ब्वन कुन वॉजिख, चादर तुजुक थोद, तति
ऑस्य सिर्फि पोशिय योत। माजि ओस येमिय दिहि यि संसार त्रॉविथ
पर्म पद प्रोवमुत।

मगर अँड्य छि वनान जि तथ पचि प्यठ आसु सिर्फि तसंजु
जटु य्वसु वुनिक्यनस ति छि शारदा पटोली जेमि अवतार कृष्णनि गरि
मूजूद। म्यानि प्रुछनु जि जटु किथु पॉठ्य आयि योत, अवतर कृष्ण
जियन वोन यिथु पॉठ्य:- जि माता येलि लारु ऑसमुच्च छि तसुंद
सीवक अनंतराम साहिब धर ओस सोन पूर्वज। सु ओस मातायि हुंद
ज्ञानु रहस्य सोरुय ज्ञानान। तथ अस्थापनस सुत्य ऑस मुल्लाह शाह
सॉबुन्य रोजन जाय ति। दपान येलि माता मनिगामु ऑस रोजान, स्व
ऑस तति प्यठु क्वलि क्वलि चाँगिजि प्यठ ओततान्य पनुन सफर
तय करान। अकि दोह वुछ यि अँम्य सुंघव चेहलव तु वोनुख शाह
सॉबस जि “क्वसतान्य बटुन्या छि दोहय योततान्य क्वलि क्वलि
चाँगिजि प्यठ वसान तु पतु छि बेयि ह्योर कुन खसान।” शाह सॉबन
दोपनख “पगाह येलि स्व बेयि यियि, तमिय विजि वनिज्यव मे।”
येलि शाह सॉबन माता वुछ तु वोननस “बटुनी नाव क्या छुय?”
तँम्य दितुस जवाब “रूप”। संतन वोनस “तरख ना योर स्वन
करथ।” मातायि वोनस दरजवाब “चुय तर योर, म्वख्तु करथ।”
स्वनस तु म्वखतस छि येत्यन जु जु अर्थ। तसंजुय ज़बॉन्य जवाबस
मंज म्वखतु शब्द बूजिथ गव शाह सॉब ध्यानस मंज। ध्यानस मंज
वुछिन महादीवस नखु। माननु छु यिवान जि महादीवन्यव दोयव क्वंडलव
मंज छि माता तसुंदि खोवरि कनुक कुंडल ‘अलख’ याने सूक्ष्म,

आलोकिक शक्तियन हुंज मॉलिख । देंछनि कनुक कुंडल 'निरजजन'
 याने मायातीत, माया ज़ालु रोस ग्वनव रोस ग्वनुवान श्री भगवान गोपी
 नाथ बबजी । तवय द्राव हुकु शाह सॉबनि म्वखु मंज "आफरन मंज
 छख अलख अवतॉरी ।" आफर छु अरबी शब्द येम्युक अर्थ छु
 स्यठा ज़्यादु या वॉफिर । यि मुल्ला शाह ओस सुय युस औरंजेबस,
 तसुंदिस बॉयिस दाराशिकोहस तु बेनि जहाँ आराहस ओस ग्वर । शाह
 सॉब ओस इस्लाम धर्म फॅलावनु बापथ कॅशीरि सोज़नु आमुत । अमि
 अलावु ओस पंडित राज जगरनाथन दाराशिकोहस तु जहां आराहस
 संस्कृतच ज्ञान दिथ उपनिशदन हुंद ति ज्ञान दियुतमुत । येमिकिन्य
 यिमन उपनिशदन फारसियस मंज दाराशिकोहन तर्जुम ह्योक कॅरिथ ।

यि नज़ारु वुछिथ मुचरावि शाह सॉबन अँछ तु हेचन अँम्य
 सुंदि शानुच तु मानुच बखान यिथु कॅन्य करुन्य:-

म्यानि ख्वतु थँज छख भवॉनी,
 आफरन मंज छख अलख अवतॉरी ।
 चु छख महान तु म्योन छुय नमस्कार ॥



दोपनस व्वन्य बेह प्यठु कनि चुय,
 अज़िकि प्यठु बेहमय व्वनु कनि बुय ।
 बीठ भवॉन्य कॅह काल अति प्यठ लार ॥



लारु ति बनोवनय अख मकाना,
 शूबि स्वंदर ऑसिस तोशिखाना ।
 अँन्द अँन्द ऑसिय देंरिया चिनार ॥

शाह सौब ऑस्य कोबलु प्यठु आमृत्य तु लार गामस मंज क्वलि बँठिस प्यठ ऑसुन पनुन्य बिहिन्य जाय बनावमुच। यिम बंद तमि विजि तसुंदि म्वखु मंजु द्रायि श्री रघुनाथ कौल ईशर कौलुन्य पोथुरन, यिम हबुकंदल बानु मँहलु रोजन ऑस्य छि यिम बंद तरतीब दिथ लीखमुत्य। बँखुत्य छि यि किताब सुबहन तु शामन परान।

अँथ्य जायि थंजरस प्यठु कनि बनाव मातायि पनुन्य रोजन जाय। अथ जायि मंज आसु माजि हुंजु जटु यथ लुख पूजा ऑस्य करान। दपान येलि मातायि दिह त्रोव, शाह सौब आयि तमि विजि पचि बुथि तु दोपनस “मे चुय मॉन्यमुख पनुन्य सरकार, म्यानि खॉतरु क्याह थोवुथ येति।” येलि शाह सौब वापस फीर्य तँम्य वुछ मंदरस मंज भवॉनि हुंजु जटु। सॉरी गँयि यि वुछिथ हॉरान। तिमन खोत ओश ह्योर तु हेचख अथ मंदरस मंज बेयि प्रॉन्य पॉठ्य पूजा करुन्य।

1947 मंज तुजि यिमु जटु चलनु ब्रोंठ सुमावँती, अवतार कृष्णनि नानि तु हँलिस गँडिथ वॉच गाश फवलवुन शहरि श्रीनगर सोरुय गाम हैथ। स्व बीठ पनुन अयाल हैथ तति त्रकुर्यन हुँदि, युस तस जॉम हुंद गरु ओस। द्वन वॅरियन रोजु यिम जटु तिहुँदिस ठोकुर कुठिस मंज। तमि पतु आयि यिम दोयि वँहुर्य सरकारु सुंदि हुकमु अनुसार बेयि गरु वापस। ग्वडु बनोवुख कन्यन हुंद पानय मातायि हुंद मंदर यथ कबॉयलव समसोतुर ओस कोरमुत। पतु थँवुख यि जटु रूप माता बेयि प्रॉन्य पॉठ्य अतिय व्यराजमान। येलि 1990 मंज सॉरी कौशिर बटु चॅलिथ आयि, अवतार कृष्णन वोद स्यठा तु सूंचुन जि बु थवना मॉज येतिय तु पानु चलु। पनुन ब्याख पेतुर ह्यथ तुज्यन यिम जटु तु थव्यन कालय अलमारि सान नवि चादरि मंज बंद। यि अलमॉर्य

छि डून्य लॅकरि हुंज मोहम्मद छानन लूट पतु दौयि वॅहुर्य बनॉवमुच्च,
 योसु नखशि निगॉरी कॅरिथ छि स्यठा स्वंदर। येलि यिम गरि द्रायि
 सुब्हन तुज्यख यिम जटु पानस सुत्य। दपान अमिय दोह प्यव रूद तु
 शीन त्यूत जि शेर बीबी आयि पसि वॅसिथ। वथ गॅयि बंद तु बचनुच
 रूज नु कांह व्वमेदा। म्याँन्य जिठ्य तु लोकट्य गरुक्य यिम ति ऑस्य
 तिमन वॅछ कांख्या तु वोनहम “यिम जटु अन्यथ च़े पानस सुत्य,
 तमिय मा गॅयि असि यि दुरदशा ?”

अवतार कृष्णस ओस व्यशवास जि यि छु त्युथ खज़ानु युस
 पथर पेयिमतिस ति थोद तुलि। यिमव कॅर सॉरिवुय वति मंजुय हेरथ।
 येलि बु तिमव स्यठाह तंग कोरुस, बु द्रास शेरबीबी प्यठ यि अलमॉर्य
 ख्वनि क्यथ ह्यथ तु पोकुस ब्रॉहकुन। म्योन मोल ओस म्यानि लोकचि
 जु बेनि हेथ ब्रॉहय जोम वोतमुत। यिथु तिथु वोतुस सही सलामत बु
 छेनीरामा जोम। जेमि डेरस नखु ओस अख शिव मन्दर येति मे तमि
 किस बाबा जियस व्यनती कॅरिथ यि अलमॉर्य मन्दरस मंज लोब
 कुन ठीकरॉव। यि ओस माजि हुंदुय चमत्कार जि अँम्य बाबा जियन
 ति हेत्य अथ दौयमि द्वह प्यठुय पोश लागुन्य। म्याँन्यव सारिवुय
 रिशतुदारव बनॉव्य मकानु, मगर यि धनु ह्योत नु काँसि ति मटि। तिम
 ऑस्य खोचान जि असि तग्या माजि हुंद आसुन ललुनावुन। यि ओस
 मातायि हुंदुय अनुग्रह जि 2000 ई० ज़ेठु रेतस मंज बनोव मेति मकानु
 तु सुती दितुम मंदरस ति कुन।”

यि सॉरुय दॅलील बूज़िथ चायस बु ति तथ मन्दरस मंज तु
 बुछिम स्व जटन हुंज अलमॉर्य शूबिदार थज़ुरस प्यठ व्यराजमान।
 अवतार जियन वोननम जि सिर्फि अनन्तच्चदश द्वहय योत छि माजि

हुंजुन जटन हुंद दर्शुन लुकन करनावनु यिवान । अथ मंदरस लरि छु
अख कमरु, आंगनस मंज छु हवन क्वंड येमि किन्य सौरी हवन करनस
छि सहूल्यत वातान । मागु जून पछि सतम तु काम्बुर्य पछि सतम छि
बैड्य हवन करनु यिवान तु जेठ पुनिम छुस वोहरवोद मनावनु यिवान ।
अथ मंदरस मंज छि अज ति प्रथ बटुवारि लुख कीर्तन कैरिथ प्रशाद
ग्रहन करान ।

श्रीनगर वेथि बैठिस प्यठ ओस दीवी रूप भवौणी हुंद श्राद
तथ जायि यिवान हावन येथि अलख साहिबा ट्रस्टुक कार्यालय ति
ओस । अथ जायि छि नोव कैदल द्येदमर वनान । जेमि किस आश्रमस
तीर्थ नगर तलाब तिलूहस मंज छि अलख साहिबा ट्रस्टस तहत अँमिस
माजि भगवती हुंघ सौरिय हवन बावनायि तु लोलु सान करनु यिवान ।
हथ वैरिय वॉन्सि हुंघ यथ दरती प्यठ गुजौरिथ द्युतुन पनुन्यन बैखुत्यन
येमि सम्सौर्य तार । सोन छु शत शत प्रणाम ।



षटतिला काह या एकादशी

मागु गटु पछि काँश्य छि षटतिला इकादशी ति वनान। अमि दोह छु शेयि कुस्म तेलुक इस्तिमाल करनु यिवान। अमिय छि अथ षटलिता वननु आमुत।

तिलस्नायी तिलोदृती तिलहोमी तिलोदकीं

तिलभुक तिलदाता च षटतिला : पापनाशना :

अमि दोह गछि तेल त्रॉविथ पानि सुत्य श्रान करुन, तेलुच उबटन, तेलु सुत्य हवन, तेल त्रॉविथ पोन्थ चोन, तेल बतस मंज त्रॉविथ ख्योन, तेलुक दान करुन। योद अमि दोह व्रत दॅरिथ यिम शे चीज अमलि मंज अनव तेलि सपदि प्यतुरन तृप्ति। शरीरच्यन व्याँजन सपदि नाश तु भगवान श्री कृष्णन्य लोलुक मेछर यियि महसूस करनु।



शिव चर्तुदशी हुंघ त्रे दोह

मागु गटु पछि छि यिम द्वह दरनु यिवान। यि व्रत छु त्रेन दोहन थवनु यिवान। अथ छि काँशिर्य बटु महाशिवरात्री हुंघ पर्व मानान। योद मागनिसु रेतस कुनि ति कारनु श्रान यियि नु करनु। यिमन त्रेशवनी दोहन गछि श्रान ध्यान कॅरिथ फाकु थवुन। साँरी वेग्न तु व्याँज छि दूर सपदान।

(1) दशमी-दहम (2) एकादशी काह (3) द्वादशी बाह। यिमन त्रेशवनी दोहन छि शिव चर्तुदशी हुंघ त्रे दोह दॅहम, काह, बाह वनान।

अथ मंज्र छु चोदुश दोह बाह तु तमि ब्रोहिम ज़ु दोह दहम काह मौनिथ
त्रे फाकु दरनु यिवान। योद ज्यनु दोह या मरनु पतु बौश्य हुंद दोह
आसि, यि छु त्यूत जौव्युल वेग्यान जि सौन्य शाह ति छि द्वादशान्त
यानि 12 हन यूनिटन तान्य खसान वसान रोज़ान।

“दशमे दिनमारम्भे रात्रि नृत्य क्रीडा”

यि सोरुय ब्रह्मांड छु अकि नृत्य क्रीडायि किन्य बनान ति तु
लय ति सपदान। जगत दारन या लय सपदनुक मूल कारन छु पानु
भगवान शिव, सुय छु सारिवुय खोतु बडि बोड नृतक। तमि किन्य छि
अँमिस 'नटराज' ति वनान।

दहम दोह छु शिव जियन अमि नचनुक सुंज कोरमुत। कौश्य
हुंज राथ ति नँच्य नँच्य कँडिथ, शामन संध्या वख्तस थख कँडिथ
वातुनोवुन यि पनुन नचुन अन्द। काशिर्य बटु छि मागुन्य शिवचर्तुदशी
महाशिवरात्री वनान तु फाल्गुनचय शिवरात्री छि हररात्री या हेरत वनान।

कैह बटु छि शिवचर्तुदशी हुंज काह योत दरान, योसु सिर्फ
फलहार खेनु सुत्य छि दरनु यिवान। देहम तु बौश्य दोह अकि वख्तुक
बतु ख्यथ फाकु दरुन छु नेम। यिमन त्रेशवनी दोहन सुलि वँथित दय
पूज कँरिथ व्रत दरनु सुत्य छु वँहर्य वँरियुक दय पूजि हुंद फल अख
मनुश प्रावान। यि छि सौन्य शास्त्र वनान।



गोरु त्रय

गोरु त्रय या गौरी
त्रितिया छि मागु जून पछि त्रय
दोह मनावनु यिवान। वननु छु
यिवान ज़ि माता गौरी छि शारदा
या सरस्वती हुंद रूप। माता
गौरी (पर्वती) हुंद पोथुर गणेश
जी तु कुमार जियन छि अमिय
दोह पनुन्य शेख्या पूरु कॅरिथ
प्रमाण पत्र प्रोवमत। चूँकि
विगुहर्ता तु कुमार जी छि ग्यान
पूर्ती हुंद प्रमान पॅत्र अमिय दोह



प्रावान, तमिय छि तनु प्यठ कौशिर्य बटु ति यि परमु पदा अज्ञतान्य
पकुनावान। अथु सुत्य बनाविथ कागज़ वर्कन प्यठ सरस्वती मातायि
या बाकयन दीवन हुंद तस्वीर, मंत्र लीखिथ छि ब्रह्मा जी सोन गरु यिथ
सान्यन शुर्यन मंजु बाँगरावान। अमि गरुच कूर योद वॉरिव गॉमुच
आसि, यिहय गुरु जी ओस खान्दुरक्य ग्वडुनकि वॅरियि तस ति सरस्वती
हुंद फोटो ह्यथ तसुंद वॉरिव गछान। ताकि अमि प्रथायि सुत्य रोज़िहे
तस कोरि, मॉज्य सरस्वती म्वखस प्यठ येमि सुत्य तसुंदि नवि गरयुक
व्यवहार सपदिहे सफल तु प्वखु। तिम ति ऑस्य गुरु जियस दान
दख्यना दिथ प्रसन करान। अज्ञ ति छि पनुन्य पनुन्य गुरु जी यि रीथ
ब्रोंठ कुन पकुनावान। मगर कागज़ुच गोरु त्रय बदलु छि यिम कुनुय

फोटो अँनिथ सरस्वती शुर्यन मंज बॉगरावान ।

सासुबँद्य वॅरिय ब्रोंठ ऑस्य कॅशीरि मंज शारदा युनिवरसिटी ति सालानु इम्तिहान पूर कॅरिथ अमिय दोह तति विद्याथियन प्रमान पॅत्र दिवान । तमिय छि अज्युकताम सौन्य गुरू जी फोटो प्रमान पॅत्र रूफ गरु यिथ दिवान । अमि दोह छि सॉरी कॉशिर्य बटु सुबहन नेन्द्रि वॅथित श्रान द्यानु पतु ग्वडु तँहर बनावान तु पतु तहारि प्रॉप्युन हॉविथ छि सॉरी अम्यक नॅवीद करान ।

यि संसार छु स्वख द्वखुक सागर । अथ मंज रूजिथ छि गरिक्यव जिठ्यव पनुनि समयि संसॉर्य व्यवहार करान करान हालातव रूप थपेडव सुत्य पनुन पान पोयिमुत आसान । अमिय छि यिम व्यदवान यिवान माननु । यिम ऑर्शिवाद रूप पनुन्य तजरुब बॉविथ छि ह्यकान पनुन्यन पोथरन, नोशन, कोर्यन हुंघ कार स्यद करनस तिहुंघ सहायक बँनिथ । ग्वडुन्युक ग्वर छु बचस बब तु मॉज्य आसान । कोताह जान गछिहे योद अँस्य सॉरी ज़ियिठ्य या बब तु मॉज्य पनुन्यन शुर्यन तु जुर्यन ऑर्शिवाद रूप अख अख माता सरस्वती हंद फोटो गोरु त्रैय दोह तोफु रूप दिमुहव, द्यव सारिन्य टोठिहे माता सरस्वती । योसु म्वखस प्यठ रूजिथ बनाव्यख ग्याँनी तु कर्मु यूगी ।



त्रिपुरा चर्तुथी या तिक्य चोरम

वेद्या शुरू करनुक दोह तु रुत वेलु छि तिक्य चोरम माननु यिवान । अमिय दोह ऑस शारदा युनिर्वसीटी मंज कॅन्न नव्यन जमॉचन हुंज पडॉय शरू करनु यिवान । अमि दुहुक बजर छु यूताह जि युस ति

कांह मंत्र या सबक बचि हेछिनावनु यियिहे, तिमन ओस नु सु मरनातस
 तौन्य मॅशिथ गछान। तिमन ओस अमि दोह गायत्री हुंद मूल मंत्र दिनु
 यिवान। व्यनती छि यिचुय येमि ब्रोंहकुन ति गछि परुन शुरू करनु
 ब्रोंह, येमि मंत्र सुत्य दस तुलनु युन।

ॐ भूर्भुवः स्वः तत्सवितुर्वरेण्यं भर्गो देवस्य धीमहि, धियो यो नः
 प्रचोदयाय्।



नाव दयि चोन जगथ ॐ सुत्यन स्वरान
 छुख पौंदु जगतस करन वोल चृ आसान
 तस जगत ईश्वरस छुस पान पुशिरान
 द्वख दूर वॅगरिथ युस स्वखी बनावान
 तस जूत्यस्वरूपस छुस लोंचि तल यिवान
 युथ दानस मंज लय रोज़ सपदान
 दीवन हुंदि दीवु बु व्यनथ छुसुय करान
 रुचि नेक वति ब्वद मे रोज़ पकुनावान

यि मंत्र दिथ गछि अम्युक मानि ति शुर्यन फिकिरि तारुन, तिव्याजि
 अथ मंत्रस सुत्य छि तिहुंज यिन वाज्यन ज़िन्दुगी वाबस्त।

शिव नचुन (नृत्य) योद आत्मा छु अमिच आवाज छि स्वरूप।
 त्रिपुर स्वन्दरी छि अमि शब्दमय संसारुच जननी। अम्युक राज़ छु
 स्यठा कठ्युन ज़ानुन। व्वन्य हेकव अँस्य यिथु पौठ्य समजिथ,
 त्रिपुरस्वन्दरी या त्रे आयाम यिम त्रे दुनिया छि भूः भुवः स्वः, याने स्व
 छि त्रेन दुनियाहन हुंज मौलिख।

दपान रावनुन्य भख्ती सुत्य प्रसन सपदिथ रूद्य शिव जी लंकायि
 मंज। असुंदि वरदान सुत्य रूज महामाया ति इष्ट दीवी रूप लंकायि
 मंज। तमि सातु ओस रावनन माता सँतीसर प्यठु गडस मंज बैरिथ
 निमुच। पुलस्य रेश्य युस राज़ रावनुन बुडिबब ति ओस तँम्य कँर
 व्यनथ मातायि येमि किन्य मातायि प्योव लंकायि मंज रोज़नि युन।
 मगर रावनुन्य राक्षस प्रवृथ बुछिथ दियुत माता शायामायि तस सर्वनाश
 गछनुक शाप। चुनाचि योतान्य माता तति रोज़िहे शाप लगिहे नु केंह
 रावनस। अमिय कोर मातायि अति नेरनुक संज। परम बख्त बह्मचार्य
 हनुमान जियस दिचुन ऑग्यन्या ज़ि मे तु म्यौन्य 360 नाग वातुनावुख

सँतीसर काश्मीर । रामायणस मंज्र छु जिकिर येलि मातयि हुंदि अमि रूपच पूज हेच श्री राम जियन करुन्य, माता द्रायि तमिय विजि तु बनेयि राजु रावनुनि नाशिच बाइसु । तिव्याजि इष्टदीवी आसनु किन्य योद माता तति टिकिहे, रावनुन सर्वनाश ओस ना मुमकिन । श्री हनुमान जियन कोर तिय यि ज्ञन मातायि हुंद हुकम ओस । कशीरि हुंद भ्रमन करान करान येत्यन येत्यन मातायि थख कोर, तत्यन तत्यन छि तसंजि ऑग्न्यायि मुताँबिक दीवीबल बनेमित्य । यिमन दीवीबलन मंज्र छि अन्नतनाग, टिकर, तुलमुलि, दिवसर, बाला त्रिपुरस्वन्दरी, खनँबरन्यन मंज्र माता प्रोखुट अँछन तल अँस्य महसूस करान ।

यि माता छि तिकेन, मुनशन तु बाकयन ज्ञाँचन हुंज इष्ट दीवी । दुर्वीसा रेश्य छु पानु शिवजी पार्वती जिय निश शैव तु शाक्त ग्यान प्रोवमुत तु बैयि ति स्यठहान वेद्यायन हुंद दस तुलमुत । अथ मंज्र छु अख हिसु त्रियेम्बक शास्त्र माननु यिवान । युस शैव सुंद त्रिकु सिद्धांतुक ग्वड छु । अमिय त्रियम्बक शाखायि हुंद पुजॉर्य छि केह केह काँशिर्य पंडित, यिहुंज इष्ट दीवी छि त्रिपुर सुन्दरी ।

माघस्य शुक्ल पन्चम्याँ विद्यारम्भ दिनेऽपि च ।

पूर्वऽहि संयमं कृत्वा तब्राहि संयतः शुचि । ।

माग जून पछ पाँचम छि माता वागीश्वरी याने सरस्वती मातायि हुंद प्रादुर्बाव सपुदमुत । यि माता आयि जन्मस चोरमु दोह न्यसफ राँच मंज्र । अमिय किन्य छि यि पूजा चोरमु दोह शुरू करनु यिवान । तमिय छि अहमियत चोरमु यिवान दिनु तु दख्यन भारतस मंज्र छु दोयिम दोह बसन्त पाँचम रूप यिवान मनावनु ।

त्रिपुर स्वंदरी हुंज थापना छि दिवसर कुलगाम डिस्ट्रिक्स

खनुबरन्यन मंज तनु प्यठु स्थापित यनु प्यठु माता पार्वती आयि हनुमान जियनिस फेकिस प्यठ 365 नाग ह्यथ लंकायि प्यठु वापस । स्व ऑस रावनन पनुनि तपु बलु सुत्य पनुनिस कमण्डलस मंज लंकायि अमि गर्जु निमन्न जि योदवय सु पाप करान करान कुल्यन ति खसि तोति रोज्यस मॉज सहायितस । तिव्याजि सु ओस पाप करान करान ति माजि तु शिव जियस पूजा कॅरिथ गलती करनुच तिमनुय ऑग्न्या ति हेवान । यि हाल वुछिथ द्रायि अकस्मात मॉज बेयि सतीसर कुन येति प्यठु स्व आमुच ऑस । येत्यन येत्यन माजि थख कोर, तिमय थकुपेंजि गॅयि दीवीबल नावु कॅशीरि मंज मशहूर । यथ मंज दिवसरुक त्रिपुरस्वंदरी हुंद दाम ति छु स्यठा महान अस्थापन माननु यिवान ।

त्रिपुराहस मंज छविमुडा गामस मंज छि माता त्रिपुर स्वंदरिय लुख पूजान । अति छु छविमुडाहस अँचिथ अख लोकुट मंदर यथ मंज माता छि व्यराजमान, यस कलस प्यठ नाग छु तु नागस प्यठ छि व्यराजमान ति । ग्वडु ओस अथ जायि देवता मुडा नाव पतु प्योस छविमुडा नाव । येत्यन मन्दर छु तत्यन छु अख दिवदार कुल ति । कुल छु तिथु पॉठ्य वॅहरिथ यथ मंज पानु मॉज छि व्यराजमान । ब्रोंहकुन हना पॅकिथ छि बालस प्यठ त्रिपुर स्वंदरी हुंज जु मुर्ती खॅनिथ । अमि ब्रोंहकुन पॅकिथ छे रहस्यमय जाय योत वातुन छु स्यठा मुशकिल । अथ जायि प्यठ वातनु बापथ छु गामाती क्वलि अपोर तरुन आसान । यि छि स्यठा साफ, शफाफ तु रफ्तार छस स्यठा तेज । नावि मंज अथ क्वलि तरनु खॉतरु येलि मनुश बेहान छु, तस छि वालिंज अथस क्यथ आसान मगर क्वलि तरनस सुत्य सुत्य छु मनुश हॉरान सपदान येलि सु बालस प्यठ खॅनिथ शिव जी, विष्णु भगवान, गणेश, पार्वती तु

कार्तिके सुंजु स्वंदर मूर्च तंदलि वुछान छु । ब्रोंहकुन ति छि नाना प्रकार्य
 दीवी दिवताहन हुंज कुल 37 मूर्तियि बालस प्यठ गॅरिथ तु चॅरिथ ।
 यिमन मंज महारेन्य, महाराज तु अप्सरायि ति छि नचन नचन तु कैह
 डोल बाजि वायान असि नजरि गछान ।

अकि दंतकथायि अनुसार छि वनान जि अकि दोह ऑस्य
 शंकर जिय अख करोड दीवी दिवताहन सुत्य कोटीतीर्थ यात्रायि गछान ।
 येलि राथ आयि यिम शोंग्य सॉरी गाश फवलनस ताम । शंकर जियन
 ओस यिमन कालय वोनमुत जि सुब्हन ब्रह्ममूर्तस मंज छु ब्रोंहकुन
 यात्रायि प्रस्थान करुन । चूंकि सारिनुय पैयि नेसर, शंकर जी पोक
 ब्रोंहकुन कुनुयजोन । तॅम्य दियुत यिमन सारिनुय वटस्य गछनुक शाफ ।
 अँथ्य मंज ओस अमि स्थानुक मशहूर शिल्पकार युस शिल्पकॉरी
 सुत्य सुत्य दयि नाव ति ओस क्रेयि लरि लोर थवान । यि गव शंकर
 जियस ब्रोंहकनि पौदु । शंकर जियन दोपनस “बु गोस चॉन्य शिल्पकॉरी
 वुछिथ स्यठा प्रसन । चु मंग क्या गछिय त्रे वदीनस मंज ।” शिल्पकार
 गव प्रसन्न तु पनुन्य यछा प्रकट करान वोननस “बु गछुहा तौहि द्वन
 सुत्य कैलास पर्वतस प्यठ ।” शंकर जियन दोपुन “ यि छु तेली
 सम्भव येलि च्च अँकिस रॉच मंज करोड दीवी दिवताहन हुंज मूर्तियि
 यथ बालस प्यठ बनावख ।” शिल्पकारन कॅर स्यठा मेहनथ तु करोड
 दीवी दिवताहन हुंज मूर्च बनावनस मंज गव स्वफल । येलि तिम सुब्हन
 गँजरनु आयि तिम द्रायि अकि कम करोड । अथ जायि प्यव ऊन कोटि
 तीर्थ बदलु कोटितिर्थ नाव येम्युक मतलब गव अकि कम करोड ।
 दपान यिम मूर्तियि छि तिमय, यिम तॅम्य शिल्पकारन बनाविमचु आसु ।
 अँथ्य तीर्थ स्थानस प्यठ छु चोर म्वखु वोल शंकर पूजनु यिवान । चोर

म्वखु वोल् शंकर छुन अमि जायि वरॉय कुनि ति लबनु यिवान । सुती
छु अतिक्यन आदिवाँसियन हुंजन ज़बॉन्यन प्यठ त्रेपुरस्वंदरी हुंद नाव
ति आम यिम शंकर जियस तु मातायि छि चिह्य चिह्य पूजान ।



सिरियि सतम तु मार्तण्ड तीर्थ

यद्यज्जन्मकृत पांप मया जन्मसु ।

सप्तसु तन्ने रोगं च शोकं च माकरी हन्तु सप्तमी ।

यिम यिम पाफ मे सतन ज़न्मन छि कॅरिमुत्य तिम सारी पाफ
रूग तु शाप गछिन मागनि सिरियि सुतम दोह नष्ट । अमि दोह योद मंत्र
परान परान कलस प्यठ दॅज थॅविथ चोंग थवनु यियि, तस सपदन
शरीरुच सारेय व्याज़ कमसुय कालस नाशस । मंत्र छि :-

(1) ॐ मित्राय नमः (2) ॐ रवये नमः (3) ॐ सूर्याय नमः (4) ॐ
भानवे नमः (5) ॐ खगाय नमः (6) ॐ पूष्णे नमः (7) ॐ हिरण्यगर्भाय
नमः (8) ॐ मरीचये नमः (9) ॐ आदित्याय नमः (10) ॐ सवित्रे
नमः (11) ॐ अकाराय नमः (12) ॐ भास्कराय नमः ॥

यि दोह छु मागु ज़ूनपछ सतुम मनावनु यिवान । अमि दोह गछि
पनुनिस चोकस मंज सिरियि मण्डुल त्रावुन तु सिरियि ज़ुचन आवाहन
करुन । दपान छि येलि भगवान कृष्णनिस पथरस दुर्वासा रेशय संदि
शापु किन्य रूगन नाल वोल्, सिरियि भगवान आव तस निश पानु तु
दोपनस “सिरियि दीवस कुन मंत्र परान परान कलस प्यठ चोंग थॅविथ
गछि अर्घ पोश सिरियस लागुन । चु गछख अमि कष्ट निशु आज़ाद ।”
श्री कृष्णन्य पथरन साम्बन कोर तिय तु रूगु निशु गव मुछि । वॅलिव

अस्य ति परव साम्बुन्य सिरिथि दीवस कुन व्यनथ।

सूर्याष्टकम् “साम्ब” उवाच

आदिदेव नमस्तुभ्यं प्रसीद मम भास्कर।

दिवाकर नमस्तुभ्यं प्रभाकर नमोऽस्तु ।।

सप्ताश्व रथमारुढं प्रचण्डं कश्यप आत्मजम्।

श्वेतपद्म धरं देवं तं सूर्यं प्रणमाम्यहम् ।2।

लेहित रथमारुढं सर्वलोक पितामहम्।

महापापहरं देवं तं सूर्यं प्रणमाम्यहम् ।3।

त्रैगुण्यं च महाशूरं बहाविष्णु महेश्वरम्।

महापापहरं देवं तं सूर्यं प्रणमाम्यहम् ।4।

बृहत्तं तेजःपुञ्जं च वायुमाकाशमेव च।

प्रभुं च सर्वलोकानां तं सूर्यं प्रणमाम्यहम् ।5।

बन्धूक पुष्प सहकाशं हारकुण्डल भूषितम्।

एकचक्रधरं देवं तं सूर्यं प्रणमाम्यहम् ।6।

तं सूर्यं जगत्कर्तारं महातेजः प्रदीपनम्।

महापापहरं देवं तं सूर्यं प्रणमाम्यहम् ।7।

तं सूर्यं जगतां ज्ञानविज्ञान मोक्षदम्।

महापापहरं देवं तं सूर्यं प्रणमाम्यहम् ।8।

इति श्री शिवप्रोक्तं सूर्याष्टकं सम्पूर्णम्।


तमि पतु करव अज अँस्य ति तहिया, जि सिरयि सतम दोह त्रावव हारु
मन्दुल तु करव सिरयि दीव सुंज पूजा । अँस्य ति रोजव सिरयि भगवान
संजि कृपायि नेरूग ।

सँतीसर फौडेशन कि लेखनु मुताबिक येलि बाह सिर्यि बनेयि,
अख त्रुवाँहिम अण्ड ओस सोबूत युस न फोटमुत ओस केँह । यि
वुछिथ दियुत माजि अदितियि गान्दु ठूल सँतीसरस मंज दोरिथ, येति
चोपॉर्य पोनिय पोन्थ ओस । केँह कॉल्य पतु येलि कश्यप सुंजि
व्यनुच अनुसार विष्णु भगवान, शंकर जी अन्नतनाग तु ब्रह्मा जियनि
दँस्य यि सँतीसरुक पोन्थ (वरहमुल) वरमुल बालु किन्थ न्यबर कडनु
आव । यि अण्ड आव टाकारु सारिनुय बोजनु । कश्यप रेश्य ति योछ
वुछिथय अथस मंज यि अण्ड रटुन । अथ तसुंद लगिथुय फोट यि ठूल
येमि मंज स्यठा बँड नार वुजमल हिश द्रायि, ज़न तु ओस माजि धरती
प्यठ सिरयि वोथमुत । यिथुय पॉठ्य सपुद बैयि अकि सिरयुक ज़न्म ।
गांदु ठूल मंज सिरयि यथ जायि द्राव तथ जायि प्यव नाव मार्तण्ड यानि
'मृत अण्ड' मंज द्राव सिरयि यानि सिरयि दीव सुंज ज़न्म जाय छि
मार्तण्ड ।

मार्तण्ड क्षेत्रक इतिहास छु १० सास वॉरिय प्रोन येलि काशमीर
ओस अख सर । यि जाय ऑस रेशन तु मुनियन हुंज तपोभूमी । नीलमत
पुराण अनुसार ऑस्य अथ जायि रेश्य जाय मानान । दपान देवासुर
जंगस मंज यिम वीर अपमृत मूदय, तिहुँदि मुख्ती बापथ छि दीवताहव
तु रेश्व स्यठाह कँठिन तपस्या कँरमुच । येम्युक नतीजि मार्तण्ड तीर्थ
छु । दपान भगवान विष्णुहन कोड पनुनि सुदर्शन चक्र सुत्य अति पोन्थ,
युस क्वलि रूप चक्रेश्वर प्यठ गौतम नाग तान्य ओस चाका नदि हुंद

हिस्सु माननु यिवान। भगवान शंकरन दियुत मशवरु जि बाह सिरिं
 करन व्वन्य पानय फॉसलु जि त्रुवाहमिस क्वसु कॉम यियि दिनु। सारी छि
 फॉसलु सॅमिथ निवान जि अँकिस दोहस मंज छि 30 गरि आसान। यिमेन
 पूर पॉठ्य सिरयि छुन वातान। यिथुय पॉठ्य छु हर दोह अख गॅर बचनु
 सुत्य रेतस मंज बाह दोह बचान। युस 32 रेथ 16 दोह तु 4 गरेव पतु अख
 पूर रेथ छु बनान। यथ अँस्य मलमास या बानुमास छि वनान।

तिमव न्युव दिवतहाव सान यि फॉसलु तु औनुख कश्यप
 रेश्य अँमिस पोथरस ताज पूशी करनि तु सुत्य दितुहोस वरदान जि
 येमिस मनशास व्वदार कुनि ति सपदिनु, सु योद अथ तिथर्स प्यठ पूजा



तु व्यनथ करि, सु प्रावि थँज गथ। अडुचँट्य वदल या अकाल मोथ
 यस हादिसु सुत्य गछि, तस योद श्राद अथ तिर्थस प्यठ हावनु यियि,
 तस मेलि मुख्ती तु शान्ती। सारिनुय दिवताहन हुंज कृपा दृष्टी छि अथ
 अवसरस प्यठ मटन तिर्थ राजस प्यठ आसान। अथ रेतस मंज योद
 अथ तिर्थस प्यठ पनुन्यन प्यतुरन श्राद हावनु यियि, दिवता तु सिर्यि
 दीव पूजायि तु लोलु ख्वश करनु यियि, तस मेलि संशय रोस येमि
 संसोर्य तार। प्राणि समयि प्यठ दियुत श्राद तु आस्थायि किन्य अथ
 तीर्थस सामनस तु बनावनस मंज राजव माहराजव स्यठाह मदद। यिथु
 कँन्य भागीरथन पनुन्यन पूर्वजन हुंदि उद्धारु तु मुख्य बापथ गंगा जी
 पृथवी प्यठु अँन्य तिथुय पौठ्य पनुन्यन ओरु बायन हुंदि व्वदारु तु
 मुख्य बापथ बडाव कश्यप रेश्य चाका दीव नदि दँस्य अमि तिर्थच
 महिमा। सिर्यि मन्दुरुक दर्शन मटन नागुबलस कँरिथ छु अँथ्य चाकायि
 प्यठ मोरदन श्राद हावनु यिवान।

श्रादं दानं तथा जपं स्नान होमं तथा अर्चनम्।

सर्वमक्षयतां याति यत कृतं तथा पार्थिवैः॥

बँखुत्य छि काम्बुर्य पछस मलमासस तु बानुमासस मंज श्रदायि
 सान पनुन्यन पेत्रन हुंद्य नॉव्य श्राद अति हावान। दान दक्षिणा पलव,
 बानु तु बिस्तर दिथ तिमन क्युत मुख्य तु पानस किच शॉंती तीर्थ राजस
 तु दीवन मंगान।

अर्गु पोश बर्गु शिखा पूजा करसुय।

मटन वॉतिथ हटन अपराद॥

मुख्य पेत्रन गछि क्षनु मात्रसुय।

सिर्यि भास्करसुय छि पोशि पूजा॥ (कृष्ण जू राजदान)

भीष्माष्टमी यानि भिष्म आँठम

भीष्म पितामहन ओस नु पनुनिस मॉल्य सुंजि खुशी बापथ
खांदर केहं ति कोरमुत। मगर मृत्युहस प्यठ विजय प्रावनच ओसुस
तमिय वरदान द्युतमुत। सोरुय संसार खासकर कौशिर बटु छि पनुनि
पननि जायि अमि दोह तस त्रेश दिथ तृप्त करान तु पानस क्युत रुत रुत
काँछान।

गंगा पथुर भीष्म ओस कोरवन मंज ज्युठ, येमिस भीष्म पितामह
ऑस्य वनान। महाभारतस मंज ओस यि कोरवन हुंदि तर्फु तिहुंजि
सेनायि हुंद कमांडर। माग जूनपछ आँठम छि भिष्म आँठम वनान।
अमि दोह गछि दर्ब, तेल तु जलु सुत्य भिष्म पितामहस त्रेश दिन्य।
अमि सुत्य छि गवनवान तु कर्मवान संतान नेरान। योनि गर्दनि नॉल्य
दछिनिस अथु किस न्यठस मंज थॉविथ गछि त्रेश दिवान दिवान मंत्र
परुन। मंत्र छु:- ॐ तत सत बह्मा माघ मासस्य, शुक्ल पक्षस्य
अष्टभ्यां (दुहुक नाव हेथ) वासरां व्याग्र पदगोत्राये संक्राति प्रवराय
च अपुत्राये ददामि तत सलिलं भीष्म पर्वने भीष्मपितामह गांगेय
भरद्वाज स्वधा नमः तृष्यतां तृष्यतां तृष्यतां।।



मागु पोह गटपछ आँठम

नीलमत पुराण 485-86 अनुसार, कांह ति चीज श्रदायि
सान दान दिनस छि श्राद वनान। पोह गटपछ आँठम गछि वैशनव

चीज़व सुत्य तु मागु गटपछ ऑठुम गछि मामस बनोंविथ श्राद
हावुन। फाल्गनु जूनपछ ऑठुम गछि पूर पौठ्य स्यठा ज़ियाफज़
बनोंविथ पूज़न्य। यिमन त्रेशवनी नवमन गछि जनानन हुंघ नौव्य
श्राद हावनु युन यानि तिहुंदि नावु गछि श्रदायि सान दान दिनु युन।



भीम सेन एकादशी - बुमसिन दँहम हुंज़ काह तु बाह

मागु जूनपछ काह छि बुमसिन काह नावु काशिर्य बटु मनावान।
माननु छु यिवान ज़ि पांडव बायन मंज़ ओस अख बोय भीमसीन,
येमिस ज़्यादु खे तु खे ओस। तस ऑस ब्वछि तीच सतावान ज़ि तँम्य
ओस नु तौतान्य कांह ति फाकु दौरमुत। पानस गोस ऐहसास, सु गव
आरुहोत भगवान कृष्णस निश तु दोपनस 'ही भगवान, मे किथु गछि
ज़ांह व्वदार, तिव्याज़ि ज़्यादु ब्वछि लगनु किन्य छुम नु ज़ांह कांह
फाकु दौरमुत। मे वन तु कांह तियुथ व्वपाया येमि किन्य मे व्वदार
सपदिहे।' श्री कृष्णन दियुत तस मागुच काह दरनुक हुकुम। भीमसेनन
मोन तु थोवुन यि व्रत। दयस ओस करुन कौश्य हुंज़ि नेस्फ रौंच लँज्य
भीमसेनस स्यठा ब्वछि। ब्वछि प्यठ कोबू न करनु किन्य ओन तँम्य
बनावैटी गाश जंगलस मंज़ नार ज़ालनु सुत्य। तँम्य बैर पनुन्य यड
नानाकार बूजनव सुत्य, मगर असली दौर नु तँम्य पूर द्वहस फाकु
कैह। तँमिस छेट्योव फाकु अडुवतिय। ब्वछि हुंद ओसुस कारन। नारु
किन्य सपदेयि माजि ज़मीनि हुंज़ लोल वुशान्य तु तुरि गव अमिय दोह
पतु ठँहराव। अँस्य कौशिर्य बटु छि मानान ज़ि कौश्य हुंज़ि रौंच छि
ज़मीनस तेम्बुर प्यवान तु तुरि छु रवखसत सपदान। कशीरि प्यठ

न्यबर नीरिथ छि सॉरी तबकु ति मानान 'माघ आया आग आया' । येमि कथि किन्य छु असि यि ति ननान ज़ि सोन अख दोह छु सिरयि खसन पुठ बेयि दोह सिरयि खसनस तान्य माननु यिवान ।



लोहरी

यिथुपॉठ्य मान्यता छि बुमसिन काँश्य द्वह राथ क्युत छि तेम्बर प्यवान । चूँकि भीमसेननि राथ क्युत नार ज़ालनु सुत्य छि पृथवी हुंज ल्वल वुशिन सपदान । यिथय पॉठ्य छि यि लोहरी हुंद बोड द्वह मनावन बॉल्य अथ अँगनस तु सिरियि दीवस सुत्य जोरन । यिहय छु समय येलि सिरियि छु मकर राशि मंज़ नीरिथ नार्थस कुन पकान यथ ज्योतिश ज़ानु किन्य उतरायन छि वनान । यि नोव मेल छु धरती प्यठ वुशनेर अँनिथ रछा तुरि पथ करान । शामन छि गरुक्य तु ओंद पोखुक्य शुरय बँड्य यिवान तु नार ज़ॉलिथ अँगनु

राजस काजू, रेवडी, गचक, मूंगफेंली तु लायि हुमान। तोमुल
छॅलिथ पोहा, डून्य गोजि, मूंगफली हुंद छि अलग थाल बनावान,
येमि सुत्य ग्वडु अँगनस अर्ग दिथ पतु नॅवीद रूप पानस ख्यवान तु
हकन हम्सायन ति बाँगरावान। पतु छि साँरी नञान नञान अथ
अँगनस त्रे चक्कर अँद्य अँद्य दिवान तु पानस किच ओही तु शाँही
अँगु राजस तु सिरिं दीवस मंगान। ज्ञानु छि अँथ्य सुत्य जूरिथ
नान रंगव बाँथ वनान, कुनक तु तिलग्वगल ब्योल छु आसान अमि
विजि मेच हेथ खँसिथ आमुत यि पनुन फसल डारन मंज बुछिथ ति
छि यिम यि द्वह खुशी हुंद द्वह मनावान। अथ सुत्य छि ब्याख लुकु
कथ यि जि दपान राजु अकबर सुंदि समयि ओस पंजाबस मंज
डुलु भाटी नावु अख मनुश रोजान युस अँमीरन ओस चूरि निथ
गँरीबन दिवान तु तिमन हर रंगु सहायता करान। धन तु बाकुय
चीज यिति बुथि पेयिहेस ओस चूरि निथ गँरीब कोरेन समयस प्यठ
खांदर करान। यथ मंज मशहूर जु कोरि सुंदरी तु मुंदरी छि यिवान।
यिम जु छि सुंदर मुंदरिये नावु यिहुंदन अमि द्वह क्यन लुकु बाँतन
मंज द्रींठ गछान। यि ओस अनकथ गँरीब कोरेन गुंडन निश बचाँविथ
तिमन गुलाँमी करनु बापथ कुननु निश बचावान। सु ओस राबिन
हुड सुंद पॉठ्य अँमीरन हुंद चन्दु खॉल्य कॅरिथ गँरीबन हुंद चंदें.
बरान। येमिकिन्य सु गँरीब वर्गुक्यन लुकन हुंद हीरो ओस माननु
यिवान। यि बनेयि तमिसुंदि गछनु पतु प्रथा अख जि यिमन तँम्य
सहायता कॅरमुच ओस तिम ओस्य पनुनि कथु बाँतस मंज वॅनिथ
अमि द्वह तँम्य सुंजि प्रशंसायि दँस्य तस याद करान।





काव पुनिम

मागु पुनिम या कावु पुनिम दोह छि अँस्य कावन साल करान तु
पुनि पुनि बावु किन्य दाल बतु तु वैशनव सिन्य रँनिथ तिमन ख्यावान ।
अँस्य छि अमि दोह श्रोत्रि श्रानि रँनिथ कावु पोतुल्य बनावान । त्रुशि तिकून
आकारस मंज थवन पतु छि यिम गास तुल्यव सुत्य यिथु पौठ्य गंडान,
येमि सुत्य यि त्रिकूजल थाल ह्रुव बनि तु यथ मंज बतु ह्यकव शीरिथ । यि
छु काक भूषण्डी असि विजि विजि याद पावान जि त्रिग्वनी माया जालु मंज
ह्यकिव तेलिय नीरिथ, येलि तस कुनिस परमात्माहस थफ कँरिथ येमि
संसॉर्य पकिव, तुहुंद जन्म सपदि स्वफल । अथ प्यठ बतु शीरिथ, यीत्याह
शुर्य गरिक्य आसन, तिम छि तुलन अख अख अथन मंज तु पशस प्यठ
वौतिथ दिन कावन यिथु पौठ्य नादः

कावु बटु कावो खेचरे कावो, गंगु बलु श्रानाह कँरिथ, गुरे मेँरे
द्योंका कँरिथ, वलु सा साने नवे लरे बेह, दाला बता ख्यने ...

काव छि यिवान तु खेवान यि बतु स्यठा टाव टाव कँरिथ ।
अकि दन्त कथायि अनुसार छि दपान सती माता येलि अँग्नस मंज





कावु पोतुल्य

पनुन शरीर छि फना करान, शिव जियन ह्योत सारिसुय ब्रह्माण्डस
मंज अघौरी रूप फेरुन। अँथ्य रूपस मंज वॉत्य तिम अकि दोह
कँशीरि ति गंगुबलु तिर्थ स्थानस प्यठ येति काक भूषणडी ऑस्य
ऑसान। यिम ऑस्य स्यठा थँद्य रेश्य, मगर पनुन्यव पोरू कर्मव
किन्य आव यि कावु ज़न्मस। शिव जी रूद्य हंस रूप अँमिस कावस
सुत्य वारियहस कालस। दपान अमि काँवु पुनिम दोह छु पानु साख्यात
काक भूषण्डी प्रथ कुनि गरस मंज बोग खेनि यिवान।

इन्द्र संज पूजा कँरिथ कोर भगवान शिवन हंस रूप त्याग तु
आव बेयि शिव रूपस मंज। दपान काक भूषण्डीयन छि गंगुबलु अँथ्य
जायि शिव जियस निश अमर कथा बूजमुज। तनु प्यठ छि कौशिर्य
पंडिथ कावु पुनिम दोह तस आवाहन करान तु बाँथ वँनिथ छिस पनुन
द्वार पवेत्र करनु खॉतरु व्वलसनस अनान।



विजया एकादशी

फाल्गुन गटु पछि कौश्य छि शास्त्र 'विजया एकादशी' वनान ।
 भगवान श्री राम जियन छु रावणस प्यठ जीत प्रावन बापथ विजया
 एकादशी हुंद व्रत थोवमुत । सौरी दोख दूर कॅरिथ तु सारिनय कारन
 मंज सेदी दिनु वाजेन्य विजया एकादशी दोहु छि भगवान विष्णु संज
 पूजा करनु यिवान ।

अमि सर्वसिदि प्रदायक एकादशी छु विजया नाव । यि व्रत
 थवनु सुत्य छु मनुश सारिनय कारन मंज विजयी सपदान । यि व्रत
 थवनु सुत्य या अम्युक महिमा कीवल परनु सुत्य छि सौरी पाफ नाशस
 सपदान ।

अमि कौश्य मुतलिख नारद जियनिस प्रछनस प्यठ वोन ब्रह्मा
 जियन : “येलि त्रेतायुग मंज मर्यादा पुरूषोत्तम श्रीराम चन्द्र जी चोदहन
 वॅरियन खौतरु बनवास आवु सोजनु, तमि सातु ओस सु सीता जी तु
 लक्ष्मण जियस सुत्य पंचवटी मंज रोजान । येति सीता जी कॅर रावणन
 हरन । श्री राम तु लक्ष्मण जी येलि सीता जी छारनि द्रायि तिमन म्यूल
 अडुमोर जटायु येम्य सीता जी हुंज शेछ वॅनिथ प्रान त्रौव्य । तमि
 ब्रौहकुन पॅकिथ म्यूल तिमन सुग्रीव येमिस सुत्य अथु मिलाव्विथ कोर
 तिमव बाली सुंद वद । हनुमाण जियन कोर लंकायि गछिथ सीता मातायि
 हुंद पता तु तोरु वापस यिथ वोनून सोरुय हाल श्री राम जियस । श्री
 रामन कोर वानर सेना ह्यथ सुग्रीव सुंदि इजाजतु पतु लंकायि कुन
 प्रस्थान । येलि तिम मगरमछव तु बाकय जलचरव बैरिथ समन्दरस
 नॅजदीक वौत्य राम जियन पुछ लक्ष्मण जियस, जि अँस्य किथु हेकव

यथ खुंखार समुन्दरस अपोर तॅरिथ। श्री लक्ष्मण जियन वोनसु ज़ि
 “येति प्यठ नॅज़दीकुय कुमॉरी द्वीपस मंज़ छु वकदालभ्य नावुक मुनि
 रोज़ान, चु छुख पानु ज़ाननवोल ज़ि तस निश गछ्छिथ नेरि जल अपोर
 तरनुक व्वपाय।” श्री राम गव लक्ष्मण जी हेथ वकदालभ्य रेशिस
 निश तु वनिनस पनुन्य परेशॉनी : “हे ऋषिवर बु छुस पनुन फोज हेथ
 आमुत तु राक्षसन प्रहार करनु खॉतरु छुस लंकायि कुन दवान। कृपायि
 किन्य वॅनिव मे तिछ छोट वथ येमि सुत्य बु हेकु आसानी सान समुन्दर
 तॅरिथ, युस लंकायि गछ्छनस मंज़ वेग्न छु त्रावान।” वकदालभ्य रेश्य
 छुस दम दिथ वनान ज़ि “फाल्गानु गट पछ कॉश्य हुंद व्रत थवनु सुत्य
 हेकव यकीनन रावणस प्यठ अख विजय प्रॉविथ तु बैयि आसॉनी सान
 समुन्दरस तारु तॅरिथ।” अमि पतु थोव विदि पूर्वक यि व्रत श्री राम
 जियन सॉरुय सेना तु लक्ष्मणजी हेथ। येमिकि प्रबावु सुत्य तॅम्य प्रॉव
 लंकायि मंज़ राख्यसन प्यठ विजय।




हेरथ या शिवरात्री

सॅतीसर कौंडशन छु पनुनि किताबि मंज़ ल्युखमुत ज़ि “सृष्टि
 येलि गवड लोग महादीवन कोर पनुनि परम शक्ति हुंद ध्यान तु वुछुन
 स्व छि पनुनि दॅस्य पॉदु कॅरिमॅचु स्यठा दीवियि (योगनी) तु मनुश
 सुंदि ज़िन्दगी बापथ बकार यिनु वॉल्य चीज़ पॉदु करनस कुन लॅजमुच।
 भगवानन कोर भैरव रूप दारन येमिस पाँछ मोख, अरदाह ब्वज़ु तु
 पंदाह नेथुर ऑस्य। भैरव रूप येलि यि माता पार्वती ब्रोंठकनि खडा
 गव दीवियि खोचु स्यठाह। परमशक्ति महामाया गॅयि कूधी तु तॅम्य

त्राँव पनुन्य नज़र पाँ
 नॅटिस कुन। तमि मंज़
 द्राव आयुधव सान अख
 भैरव। महामायायि च्यून
 ज़ि महादीवस हेकि नु यि
 वटुक भैरव केँह पूशिय
 तॅम्य त्राँव दोयमिस पाँ
 नॅटिस कुन नज़र येमि मंज़
 ब्याख गण (राम) द्राव।
 वटुक भैरव ओस
 रजूग्वनी, राम या रमण
 ओस सतोग्वनी। यिम
 सॉरी गण ऑस्य शिवस

VATAK POOJA वटक पूजा



प्यठ प्रहार करनु बापथ स्यठाह उत्सुक। मगर शिव सपुद्य अर्न्तध्यान।
 सॉरी गण आयि दोरान दोरान परमशक्ति निश तु वनिहस सॉरुय दॅलील।
 दीवी दियुत यिमन वरदान तु दोपनख 'चूँकि तोह्य गयिवु म्यानि नज़रि
 सुत्य वटु (ब्रह्मचॉर्य) रूपस मंज़ पॉदु, तुहुंद नाव छु वटुक। हेरच
 त्रुवश्य दोह यियवु तोहि ति सारिनय गणन सुत्य पूजा करनु। तिहुंज
 मनो कामनायि गछन सारेय स्यद यिम फॉलगनु त्रुवुश दोह तुहुंज पूजा
 करुन, तिम प्रावन दर सम्सॉर्य सॉरुय सिदी।' यि वॅनिथ दोप मातायि
 रामस (रमण) 'ही पोथुर चूँकि च़ु गोख म्यानि श्वब नज़रि सुत्य पॉदु
 चोन रूप छु दिव्य। च़े वुछियथ छु मन प्रसन सपदान। चोन नाव गव
 अज़िकि प्यठु 'राम'। तिक्याज़ि चॉनिस दिव्य तीज़स मंज़ छि यूगी

ब्रमन करान । वटकु पतु यियि चान्य पूजा करनु । वटुक तु चु राम छिवु
अजिकि प्यठु म्योन्यन गणन हुंघ कमांडर । तोह्य छिवु म्योनिस हुकमस
पालन करान । तुहंजि पूजायि सुत्य गछन मनशस आपदायि दूर तु तिम
प्रावन सारेय सेदी यिहंज कामना आसेख ।'



© PRAKASH PUBLISHERS

यि वरदान दिथ वोन भगवँती यूगियिन ज़ि 'यिति कांह पदार्थ तोहि छुव बनोवमुत सु प्रथ कांह पदार्थ कॅरिव यिमन गणन अर्पन।' भगवँती हुंदि वननु तु हुकमु अनुसार कोर तिमव तिय। अँथ्य प्रदोष कालस मंज गँयि भगवान महादीव ज्वाला लिंगस मंज प्रकट। सु वुछिथ खूच साँरी गण तु आयि वटुक तु रमणस शरन। वटुक तु रमणनन दियुत तिमन तसलाह तु दोपनख तोह्य मु खूचिव। पानु द्रायि अमि लिंगुक आदि तु अन्द वुछनि। वटुक खोत ह्योर तु रमण वोथ वोन। मगर आदि तु अंत नु डीशिथ आयि दोशवय वापस। दीविय गँयि सारेय महामायारि मंज लय तु परमशक्ति गँयि पानु अँथ्य ज्वाला लिंगस मंज लय। वटुक तु रमण गव ज्वाला लिंगस ब्रौहकनि ज़न ति रुज्जिथ तु पतु हेचख तँमिच पूजा करुन्य। अमि दोह आँस फाल्गानु गटु पछ त्रुवाह। अमी दोह गँयि भगवान शिव ज्वाला रूप प्रकट तु नेस्फ राँच हेतिन शान्त सपदुन्य। चूँकि प्रदोश कालस मंज गव शिव ज्वाला लिंगस मंज प्रकट केंचव हेच तँथ्य कालस मंज पूजा करुन्य। मगर केंचव हेच पूजा नेस्फ राँच करुन्य येलि शिव शान्त हेतुन सपदुन। अमी कारनु छि कुनि कुनि विजि ज़ु शिवरात्रिय मनावनु यिवान।

अँस्य कौशिर्य छु महाशिवरात्रि हुंदिस बँडिस दोहस 'हेरथ' वनान। युस संस्कृत शब्द हर रात्रि मंज छु द्रामुत। अमि दोह छु असि वननु आमुत ज़ि यि बोड दोह गछि हुर्य ओकदोह प्यठु तीलु आँठुम तान्य मनावुन। तवय छि अँस्य हुर्य ओकदोह सुब्हन वुज ब्रांद छँलिथ तोमलु चोचिवोर करान। यि छि अँस्य गरनावय मौनिथ करान। तमिपतु छिस डून्य गूज्य रलौविथ माता हुंघ नाव्य पूजा करान। अँकिस दोन चोचिवरेन छि सथ हिसु करान। सथ हिसु डून्य गोजि सुत्य थौविथ छि

ग्वडु सनिवार्यन दोन त्रॉविथ दानस प्यठ थवान तु पत छि बाकय चरेन हारेन त्रॉविथ दीव यॅग्य तु बूत यॅग्य करान। पतु छि हुर्य ऑठुम दोह हुर कडान याने अमि दोह छि सफाई पूर कॅरिथ बेयि चोचिवोर करान तु तिथुय पॉठ्य ग्वडु सनिवारेन, दानस तु पतु जानवरन त्रावान। अँथ्य सुत्य छि ध्यारु दॅहम दोह सारेय कोरि पनुन वॉरिव बोड दोह मनावनि गछान। काँश्य दोह छि दिवगोन रूप मनावान। अमि दोह छि पनुनि-पनुनि रीन्न हिसाबु वागुर बरान, यथ गासु आरि प्यठ थॅविथ छिस हटिस गासुक तु पोशन हुंद हार बनॉविथ नॉल्य त्रावान। पतु वैशनव सिन्य रॅनिथ तथ मंज त्रावान तु सॉरी गरुक्य बॉन्न छिस पूजा पाठ कॅरिथ बाहि बजि रॉन्न कुलिस तल त्रावान। अमि पतु छु हेरथ हुंद दोह यिवान।

अमि दोह छि अँस्य ठोकुर कुठ सतव या नवव बानव सुत्य सजावान यिमन वटक बानु छि वनान। यि वटक बानु छि शिव, पार्वती तु तॅम्य सुंघ बरॉत्य रूप माननु यिवान। यिमन मंजु सारिय बॅड्य बानु (याने गागुर तु गडु) गॅयि शिव तु पार्वती। अख बोड डुल गव भैरव तु बाकय गॅयि रेश्य, बूत प्रीत तु नॅन्दी गन। यिमन बानन सुत्य छि अँस्य सनिवारि तु दुप दीप ति थवान। यिम सॉरी बानु छि सॉंदरवार पानि सुत्य बॅरिथ आसान। शिव तु पार्वती हुंघ बानु छि डोन्यव सुत्य बॅरिथ आसान तु बाकियन मंज छि ज़ु ज़ु डून्य थवान। यिम सॉरी बानु छि गासुचि रज्जि याने वुसरि तु पोशव सुत्य सजावनु यिवान। पनुनि पनुनि रीन्न अनुसार छि अँस्य यिमन रेश्य प्यालन मंज वैशनव सिन्य तु डुलिस मंज मामस तु बतु त्रावान। पतु छि शिव पार्वती हुंद लॅग्न मॉनिथ यिमन पूजा पाठ करनु यिवान। अथ पूजायि विदि छि अँस्य हेरथ पूजा वनान। अँड्य लुख छि पानुय यि पूजा करान, अँड्यन छि

ब्रह्मन तु अँड्य छि कैस्ट क्यव सी० डीयव प्यठ करान । यि पूजा छि
 अँस्य सॉरी खास पॉठ्य तु लोलुसान करान । येमि दोह डून्य मावस छि
 आसान तमी दोह छि अँस्य वटुक परमूजन । अमि दोह छि वटक राजु
 क्वलि बँठिस या गरिकिस आंगनस मंज कँडिथ अकि खास पूजायि
 सुत्य चोचिव्वरेन तु डून्यन पूजा करान । पूजा म्वकुलॉविथ यि गागर
 ह्येथ गरुकि स दरवाजस निश खडा गछान । अमि विजि छु यि दरवाज
 अँदिर्य किन्य कांह नफर बंद करान । गांगरि वोले नफर छु ठुक-ठुक
 करान । अँदुर छस आवाज यिवान 'कुस छुव' । जवाबस मंज छु
 वनान 'राम ब्रोर' । अँदुरिम नफर छुस वनान 'क्या ह्येथ' । गागरि वोले
 नफर छु सारिनय हुंदि बापथ रुत मंगान तु रुत कांछान तु सारिनय
 ओही करान । पतु छु दरवाज खुलान तु सारिनय अमि गागरि हुंज पाँ
 लवु दिथ नँवीद रूप च्वचिवोर तु डून्य दिवान । पतु छि सॉरी पनून्यन
 हकन हम्सायन तु ओशनावन नँवीद रूप डून्य बाँगरावान ।

अमि पतु छि तीलु ओठुम दोह सुब्हन बतु रँनिथ ओठ चाँग्य
 अँकिस थालस मंज ओठन गासु आरेन प्यठ थावनु यिवान । जु-जु बतु
 मेचि दँछनि तरफु थँविथ छि यिम चाँग्य जालनु यिवान । अँथ्य थालु
 क्यन दजुवन्यन चाँग्यन ब्रोंहकनि छि प्यालस मंज बतु येथ प्यठ लटि
 सान व्वजुज गोगुज थावान । योसु 'महा पिशाचनी चण्डालनी' त्रप्त
 करान । दपान अमि दुहच क्रेय छि पेतुरन हुंद्य नॉव्य करनु यिवान ।
 यिम हेरच प्यठ सालस यिथ छि अमि दोह तृप्त गँछिथ बेयि वापस
 पेतुर लूकस मंज गछान । तिहुंदि वति सफरु खॉतरु छु अन्न तु दीपुक
 दान यिवान करनु ।

किशतवाडु प्यठ आमुत्य अँक्य वाजन येमिस तुलसी नाव छु

वोन अथ शिवरात्री मुतलिक यिथु कॅन्य : “अमि दोह छि सानि बरादॅरी हुंघ लुख किशतवाडस मंज़ सॅमिथ बराबर पोंसु चन्दु कडान तु अलग तीर्य अॅनिथ मारान । दोहस छि छडी रूप जांकी सॉरी मील्लिथ बजनव तु कीतनु सुत्य शंकरस ख्वश करान । शामन छि श्रोत्रि श्रानि बतु तु सियुन रॅनिथ ग्वडु बुर्जस प्यठ रछा बतु तीर्य सुंदि रतु सुत्य रलॉविथ दारु हंगस प्यठ लागान, पतु रथ बांट, अॅन्दरम तु माज़ु सुत्य यिहय बतु रलॉविथ कुनि श्रोत्रि जायि थज़रस प्यठ कनि प्यठ खॅसिथ डॉनन तु राख्सन हुंदि नावु त्रॉविथ तिमन नाद दिवान तु वनान : “वॅलिवु बूतव, खेयिव चेविव गॅछिव वापस पनुन गरु ।” तमि पतु छि गरि शंकर जियस पूज़ा कॅरिथ नवीद ख्यवान ।



डून्य मावस या वटुक परमूज़ुन

हेरुच पतु फागुन गटपछ मावसि छि डून्य मावस या वटुक परमूज़नुक द्वह मानान । अॅस्य छि शामन सन्धा समयि ब्रोंठ वटक राजु यथ असि हेरुच द्वह पूजा ऑस कॅरमुच, वारु वारु थोद तुलान, बानु अकि अकि साफ कॅरिथ छि क्रॅजलिस या चिलमची मंज़ सु गडु थवान, यथ असि पूजा ऑस कॅरमुच । पतु छि माज़न दिथ या लिक्विथ साफ करान । वटुक तुलनु ब्रोंठ छि अॅस्य तोमलु चोचि वॅर्य करान । तिम ह्येथ श्राकपुछ, तील, चोंग गन्दुकडॅब्ब न्यबर पूजा करनि नेरान । अॅस्य ऑस्य गरि कडनु ब्रोंठ कॅशीरि मंज़ आरपति या क्वलि प्यठ गछान । अकि अन्दु पोश तु वुसर्य तरीकस मंज़ थविथ, चोंग ज़ालान । चोचि वॅर्य जु त्रे तुलिथ जु त्रे डून्य फुटरिथ, सतन जायन गोल दायिरस

मंज़ चोचि टुकरन प्यठ डून्य गोजि थवान। अमि पतु ऑस्य श्राकपुछि सुत्य सति फिरि क्रासस मंज़ पोन्थ चटान। सति लटि थोद वेंथित दछिनि तरफु शुरू कॅरिथ गोल आरस मंज़ नचान। अमिपतु ऑस्य यि दजुवुन चोंग क्वलि मंज़ त्रावान। युस अथ मंज़ त्राविहे तमिसुंद नाव हेथ ऑस्य वनान हुमि सुंद या येमि सुंद चोंग छु प्रज्ञलान। योतान्य नज़र पिलिहे तोतान्य ऑस्य अथ चाँगिस नज़र थेंविथ सारुय आरपथ शोरु सुत्य थोद तुलान। यि ओड गंट ओस स्यठाह ख्वशयिवुन तु दिलकश सॉरी महसूस करान। पूजायि सुत्य सुत्य ऑस्य दयस मंगान योद कांह गल्ली आसि गॉमुच तथ लोतिस गोबिस गछि क्षमा बख्चुन। यि पूजा छि यि डून्य गूज्य तु चोचिवोर नॅवीद रूप तिमन सारिनुय बोंगरान यिम तत्यन सॅमिथ आसन तु पानस ति छि ख्यवान। अन्दर गरस मंज़ बॉचन ब्रोंठ छु गरुक दरवाज़ु बन्द करनु यिवान। दरवाज़ु मुचरन बापथ येलि ठुक-ठुक छि करान, तोरु छु सवाल यिवान “कुस छुव?” जवाब छुख मेलान “रामबोर।” सवाल छि बेयि करान “क्या हेथ?” जवाब छुस मेलान “अन्नु दनु हेथ, गुर्य गुपन, शुर्य बॉच, नोशन कोर्यन हुंद रुचर, फोलमुत बाग हेथ।” अमि पतु छु दरवाज़ु यलु गछान तु अन्दर अँचिथ पाँ लवु दिथ छि नवीद सारिनुय दिवान। तमिपतु छि चोचिवॅर्य तु डून्य ग्वडु हखन हमसायन, पतु बाज़रुच चोचि अँनिथ ऑशनावन सोज़ान। येमिस कोरि ग्वडुन्युक वरिय आसि, तॅमिस छि द्रठपोंचुक नीरिथ रुचि वारि डून्य सासा, चोचि (लवासु), ट्रंका, हेरुच खरुच, ग्वडु वारिवि क्यन शुरेन, पतु कोरि ज़ामतुरिस, युस अज़ सासन मंज़ छु आसान सोज़ान, बेयि नवीद रूप चोचिवॅर्य अख ज़ु वटक राजुन नाबद, बादाम नॅवीदु तोमुल तु पोंसु

यथ बतु सियुन छि वनान, सोज़नु यिवान। यिम डून्य चोचि तु नकदी
 छि प्रथ वॅरियि सोज़न्य आसानं अमि पतु यस अमि गरुच नोश छि
 आसान तसंज़ि मालिनिचि चोचि तु डून्य छि यिथुय पॉठ्य ग्वडु मोहलस
 पतु अंगन ऑशनावन सोज़ान। अमिपतु छि यि वोसुद्रोसु पूर ऑठुन
 द्वहन तीलु ऑठम तौन्य रोज़ान। अमि द्वह छि दपान यिम पेत्र हेरच द्वह
 सालस ऑस्य आमत्य तिमन छु र्वखसथ करनु यिवान। युस सौरुय
 छु तीलु ऑठम टोपिकस प्यठ किताबि मंज़ दर्ज।



तील आठम

दपान हेरच दोह छि सारी गरिक्य पेटुर पनुन भूग निनु खॉतरु यिवान।
 तिम छि सारी तीलु ऑठम दोह वापस पेटुर लूक गछान। तिहुंदि वति
 सफरु खॉतरु छु अन्न तु दीपुक दान यिवान करनु।

यस्मिललोके, निरालोके न सूर्यो न अपि चन्द्रमा

तमंह तर्तुमिच्छामि दीप दवा जर्नादनः

प्रेतस्य शून्य रूपस्य यामे मार्गे प्रयासंतः

तमो अन्धकार सन्दोहं नाशयाशु जर्नादनः

प्रेतस्य वाय रूपस्य यामे मार्गे यियासतः

क्षिप नाशय मोहान्ध्यं भाल नेत्र नमोस्तुतेः


यामै पाशैर्विकृष्टस्य पितृना पयि यास्यतः

ज्वाला संस्थ महालक्ष्मि तमोन्ध्य नांश याशुमे

तत सतु बह्य अद तावत-मासस्य-पक्षस्य वासरायां

समस्तं माता पितृनां तैषा पर लोके प्रकाश वृद्धिं

घोर अन्धकार निववारनाथ ज्योति रूपं दीप राजं परि
कल्पयामि नमः



अख चोंग या आँठ चोंग्य जॉलिथ गछन गासवि आरि प्यठ
चोकस मंज अकि अंदु थवुन्य बेयि अँकिस बजि आरि प्यठ गछि बतु थाल
नाना सब्जियव सान थवुन, तथ प्यठ गछि वोजुज गोगुज्य लटि सान थँविथ
लोट ह्योरकुन कँरिथ परन प्योन। यि गोगुज्य छि महा पिशाचनी चडांलनी
तृप्त करान। हैरिम मंत्र परान परान गछि श्रदायि सान तीलु चोंग्यन मंज तेल
रछा रछा त्राँविथ ज़ालुन्य। येलि चोंग्य सुबहुक्य जॉल्यमित छेतु गछन, पतु
गछन नवि सरु बेयि शामन ज़ालुन्य तु थाल नेबर कुन कँडिथ गछन सॉरी
चोंग्य अकि अकि ब्योन ब्योन जायन प्यठ थवुन्य। सूर बनि प्यठय शुरू
कँरिथ गछि आँद पोख गाशिरावुन तु थालुक बतु ति गछि जानवरन हुँदि
खॉतर नेबर त्रावुन युन।


होली होलिका दहन

फागुन जूनपछ पुनिम छु होली हुंद उत्सव मनावान । यि छु रंगन हुंद त्योहार युस बिला मज्जहबो मिल्लत छि तकरीबन साँरी मनावान । साँरी छि अख अँकिस प्यठ गुलाल त्रॉविथ होख या अदुरेव रंगव पनुन्य खुशी जॉहिर करान । दुशमनुथ मँशरिथ छि दोस्ती हुंदव रंगव अख अँकिस रंगनावन । माय मोहब्बतुच कस्तूर छि चोपॉर्य अमि द्वह गेवान, साख्यात छु बासान जि यि उत्सव छु साँनिस पथकालस सुत्यन वाबस्त । अमि किन्य छु कुलहुम भारत जोकु तु शौक सान यि बोड दोह मनावान ।

अँस्य क्याजि छि यि मनावान ?

दन्त कथायव अनुसार छि जु त्रे कथु यिम अथ उत्सवस सुत्य वाबस्त छे ।

1. पुनिसुय पोथरस प्रहलादस मारनु बाबथ सूज राजु हिरण्यकशयपन पनुन्य बेनि होलिका अमिय पुनिम द्वह । राजु हिरण्यकशयप ओस पुनि प्रजायि हकुनावान । सु ओस चोपासे पनुन्य पूजा यछान । तिव्याजि सु ओस पुनि बजरुक डंडूर दिथ पानसुय भगवान मानुनस प्यठ लुकन मजबूर करान । तँमिस द्राव पुनि डंम्ब्युक फेल येम्य सु त्रेशि पोव । प्रहलाद ओस नारायण सुंद बँखुत्य । सु ओस तमिसुंज आरादना कँरिथ तँमिसुय जरस जरस मंज बुछान । हिरण्यकशपन करेयि वारयाहव रंगव यि पुनिय दारुक पौन फुटरावनुच कूशिश । मगर गव नाकाम । आँखरस प्यठ दोपुस पुनि बेनि होलिका जि बु रटन यि पुनि खोनि मज्ज दजुवनि जिनि बनि प्यठ । आसुरी



शक्ति किन्य ओस तस अंहकार जि नारस मंज दजि सिर्फि प्रहलादुय
 योत, स्व नेरि न्येबर शूश टोट हिश। मगर दय सुंजि दयगॅच किन्य
 दॅज स्व पानय योत तु प्रहलाद द्राव नारु मंजु ज्ञन स्वन। सु ओस
 पजरस प्यठ तु अपजिस दिचुन मात। अमि द्वह छि केंह लुख नार
 जॉलिथ होलिकायि हुंद पुतलु ति जालान।

2. राजु कंसन सूज पूतना राख्यसेन्य श्री कृष्णस मारनि। पूतनायि
 थोव पनुन्यन ममु टेंड्यन जहर मॅथित। असुर शक्ति किन्य न्यून श्री
 कृष्ण मंजुलि मंजु कॅडिथ तु दियुतनस पनुन मोमु चोन। श्री कृष्ण ओस
 पानु नारायन सुंद अवतार। तॅम्य दितुस दाम तु अँकिय दामु न्यूनस
 जुव कॅडिथ। नवनिहाल पेव हेरि प्यठ बोन पॅथरिस। यि अदबुद नज़ारु
 बुछिथ कोर लुकव अख अँकिस प्यठ रंग छँकिथ पनुनि खुशी हुंद
 इज़हार। अज़ छु यि गूकल, बिन्दराबन, मथुरायि स्यठहान द्वहन स्यठाह
 थदि शानु तु मानु मनावनु यिवान। गूर्पा तु गोपा छि ज्ञन कृष्णस सुत्य

अज्ञ ति रास खेलान बासान, येलि तिम नचान नचान रंग ति छि अख
अँकिस प्यठ छकान ।

3. शास्त्रव अनुसार छु अमि द्वह पानु विष्णु भगवानन नरसिंह
अवतार दौरमुन, युस औड ओस सुह तु औड ओस इन्सान । चूँकि
हेरिम हिस ओसुस सुह सुंद तु नमुव सुत्य कोडुन जुल्मी हिरण्यकशपस
जुव तु छुनुन अहंकार तु अपुज फना कँरिथ । सु मँरिथ मनोव लुकव
यि खुशी हुंद द्वह अख अँकिस प्यठ रंग त्रावनु सुत्य । यथ मंज पानु
नारायण संजि पछि मंज रंगनोव सारिवुय पनुन पान ।

4. चूँकि यि छि फाल्गान जूनपछ पुनिम तु दोयिम द्वह छु चित्र
ओकदोह पेवान । वरियस मंज छु त्रेन त्रेन रेतन हुंद चोर मोसम आसान ।
यि छु यिमन चोन मोसमन हुंद पँतिम द्वह । दोयिमि द्वह छु नविसर
वरियुक ग्वडन्युक मोसम बैसाख शुरू गछान । अँस्य छि अथ मौसमस
मंज ब्योल ववुन हेवान । रंग बा रंगी पोश छि चोपॉर्य फोलिमित्य
आसान । संजि फूलय यानि तिलगोगुल फुलय छि बरजस्त आसान ।
कुल्यन कट्यन छु सब्ज पनु तु फुलय बरजस्त आसान । अमिकिन्य
छि अँस्य कालुकिस द्वहस अलविदा करनु खॉतर रंगन हुंद यि त्यौहार
मनावान ।

5. दपान राजु प्रिथू सुंदिस राजस मंज ऑस अख मँच । योस
शुर्यन ऑस लरज़ावान तु हकनावान । भगवान शंकर ति ओस अँमिस
प्यठ अमि व्यवहारु किन्य स्यठाह नाराज । शुर्य यिमन यि सतावान
ऑस, ऑसिस वुहव कँडिथ कनि कबर करान । मगर स्वति ऑस नु
कँह पथ हेवान । अज्ञ ति छि ज्ञनानु मर्द तु मर्द ज्ञनानन लोर्यव सुत्य
टास लायान तु सुत्य-सुत्य रंगव सुत्य अख अँकिस रंगनावान ।

ऑस्य ति ऑस्य कॅशीरि मंज अमि द्वह वति वति नचान, गरव मंजु नीरिथ वति-वति नचान-नचान रंगव सुत्य अख अँकिस रंगुनॉविथ सारिनुय दर्मन हुंदिन लुकन सुत्य अथवास कॅरिथ पनुन्य खुशी प्रकट करान।

येति जेमिस मंज ति छि जु द्वह ब्रोंठ यि उत्सव लुख मनावान। लोकुट्य-लोकुट्य शुर्य छि अख अँकिस रंग बाल, पाँ बाल लुकन प्यठ फाटुनावान। मगर कुनि-कुनि जायि छि ठूल अख अँकिस त्रावान, युस स्यठाह गलत छु। अमि सुत्य छु अम्युक असली मकसद गॉब गॅछिथ लुकन हुंघ मुशकिलातुक कारण यि द्वह बनान। मगर योद यि द्वह प्रॉन्य पॉट्य लेदरि या पनु वथरव तु पोशव हुंघव रंगव सुत्य मनावुन यियिहे, दुहुक गिन्दुन अख अँकिस रंगुनावुन, लोल बरुन खसिहे रथि।

ऐकसेलशर 2 मार्च 13, 2016 वर्क ऑठ:- प्रो० केसर आर० डी० गुप्ता सुंदि लेखन अनुसार ऑस्य डूगर राजुक त्रैयिम राजु महाराजा प्रताप सिंह पनुनि रियाया सुत्य जेमिस मंज होली गिन्दान। माहराजि ति ऑस्य हॅस्ति स खॅसिथ रंगन सुत्य शीशि रलाविथ होली गिन्दान यथ 'अल्टा' ऑस्य वनान। लुख ऑस्य हस्यन खॅसिथ सिरिंजव सुत्य पॉनिस सुत्य रंग छॅकरान। यि जलूस ओस मुबारक मण्डी प्यठ गुमट दरवाजस तान्य रंगव सुत्य रंगिथ तु रंगुनॉविथ आसान।


तिहुंदि वननु अनुसार श्री बख्शी गुलामु मुहमद यिम रियासत जोम तु कॅशीरु प्यठ रूद्य 1953 प्यठ 1963 तॉन्य बहिसति वॅज़ीरि आजम राज करान, ऑस्य पनुनि गरि न्यबर नीरिथ श्रीनगर रेज़िडॅंसी रोडस प्यठ लुकन सुत्य रंगन हुंघ यि त्योहार मनावान। तिम ऑस्य

लुकन सुत्य अमि द्वह रॅलिथ मीलिथ पानुवन्य रंग छकान। काम क्रूध
लूब मुंह अंदकार फन्ना करनुक यि द्वह ऑस्य बडि शोकु तु ज़ोकु सान
मनावान। असि ति येछिन हर हमेशि पनुनिस पतिमिस प्युर दिथ श्वद
मनु पनुन पान दय रंगस मंज रंगनावुन।



सोन्थ

फुचिमचु वारि, नॅट्य, जंदु अँक्यसुय रज़ि सुत्य गँडिथ छि
अँस्य कॉशिर्य बटु शिशर मासस खखुर दिवान तु सोंतुक इंतज़ार
करान। पोह तु मागुचि तुरि छु आसान अथन ख्वरन सान्यन कोवुड
कोरमुत। तमिकिन्य छि अँस्य वाश कडनु बापथ रुति मोसमुच आश
पालान। शिशरस खखुर दिथ छि अँस्य यि दूर क्वलु बँठिस प्यठ



त्रावान तु तोरु सोंतु च्रचि बापथ गासु अनान । यि सोंतु च्रॅट ऑस्य अँस्य तति आरुपति प्यठु अनान । गरि प्यठ ऑस्य दजि मंज तौमुल तु मोदरेर निवान । यथ जायि गासु ऑस्य कडान तथ जायि ऑस्य तौमलु तु मोदरेर मोठा त्रावान । स्व तौमलु दँज ऑस्य क्वलि मंज अँदरावान तु पतु ऑस्य गरु वॉतिथ सारिनुय अम्युक नँवीद दिवान ।

काँशिरि गणित हिसाबु वरियिकि बहिमि रेतु चित्र ग्वडनिकि दोह छु सोंथ मनावनु यिवान । फाल्गुनक रेंथ म्वकुलिथ छु शामन तिथय पॉठ्य तौमलु थालस मंज चीज थवनु यिवान यिथुकँन्य नवरेह मावसि छु थवनु यिवान । 'सोंतु च्रॅट' बनाविथ छि स्वति थालस मंज सजॉविथ थवनु यिवान । सोंतु च्रॅट छि त्रै डून्य सीदस मंज थँविथ ग्वडु अँकिस पतु दोयमिस पतु त्रैयमिस होबुल्य गासस मंज गंड कँरिथ सजावनु यिवान । सुब्हन येलि सॉरी बुथ वुछन, यि सोंतु च्रॅट तु डून्य छि क्वलि त्रावान या गरि नेबर नीरिथ काँसि दिनु यिवान । गाश फोलिथ छि तँथ्य तौमलस तँहर बनाविथ ग्वडु भगवानस च्रोठ थवान तु पतु पानस प्रशाद करान । अथ थालस प्यठ छि केंह र्वपयि थवनु यिवान । पतु युस यि थाल हावि तस छि सॉरी पनुनि मकदूर मूजूब पोंसु दिवान । यि दोह छु तुरि अलविदा तु बहारुक आगाज रूप मनावनु यिवान । अमि दोह योद रुत ख्यमव, चेमव, रुत लागव, रुत वर्तावव, सु छु वरियस पोशान लिहाजा छि सॉरी यि दोह खुशी खुशी मनावान ।

नीलमत पुराणस मंज शीर्शक "व्रतों और उत्सवों का विवरण" दिवान छु ईरामंजरी पूजनस मंज यिथु पॉठ्य लेखान जि चित्र पुनिम छु पिशाच सुंदि मरनुक्य उत्सवुच शुरूआत करनु यिवान । अथ मंज छु निकुम्ब सेंकि माँदानन मंज रोजवुन्य पिशाचन सुत्य

खद करान करान मारनु यिवान। सारिनुय गरन मंज आँस्य पथ कालि मेचि या गासुच पिशाच मूर्ती बनावनु यिवान तु दुपहर या चन्द्र खँसिथ तथ पूजा करनु यिवान। पतु ओस बाजि तु नाना रंगु साज वॉयिथ बॉतव तु ब्रह्मनव दँस्य तस अलविदा करनु यिवान। दौयिमि द्वह आँस्य लुख नजदीकुय बालस प्यठ खँसिथ पिशाचन अनुसरण कँरिथ संगीत उत्सव मनावान।

पिशाच सुंदि मरनु पतु “इरापुष्प” यिरकुम पोश फवलित्थ ओस यिरकुम पोशन पूजा करनु यिवान। यथ “इरामजंरी” पूजन आँस्य वनान। वननु छु यिवान जि येलि “इरा” नावुच अप्सरा इन्द्रदीव सुंदि शापु इन्द्र सभायि मंज कँडिथ छुननु आयि, तँम्य कोर हिमाचल पर्वतस प्यठ जडीबूटी रूप दारन। पिशाच सुंदि मरनु पतु गँयि तसुंदिस शरीरस स्यठा हिस्सु। तँम्युक उत्सव छु यिथु कँन्य मनावनु यिवान जि ज़नानु तु शुर्य हेथ गछि तथ बागस मंज गछुन यथ यिरकुम पोश फवलित्थ आसन आमुत्य। दीपव पोशव बेयि अन्न सुत्य गछि ब्रह्मनव दँस्य पूजा करनु यिन्य। तमि पतु गछि अँथ्य बागस मंज सारिनुय हुंद बूजन करन। ज़नानु, ब्रह्मनन, मित्रन तु बंदव बांदवव सान गछि इरकुम पोशि मालव यज्जत दिनु युन। यिम पोश ज़लस त्रॉविथ गछि त्रेश चैन्य। कीश्व भगवान, रूद्र ब्रह्मा, सिर्चि, चन्द्रम, लक्ष्मी, दुर्गा, नाग तु नागराज नीलुन्य गछि यिमुवय पोशव सुत्य पूजा करनुय।

अँस्य छि यि सोंत मनावान मगर बुथ वुछनुकिस थालस प्यठ आँस्य बकायहव चीज़व अलावु र्थिकुम पोशि लंजि तु भेद मुशक तुतलायि बालु अन्नतनाग प्यठ वॉलिथ थवान। बुथ वुछनु

विजि ग्वड़ यिर्कुम पोशस माह कॅरिथ अँछन लागान तु पतु बाक्य
चीजन बुथ वुछान । कोरि लॅगु विजि छि यिरकुम पोशस यिथुक्कन्य
वननावानः

चित्री फोलहम विरिकुम पोशो, गोशस रॅटथम जंगलय जाय ।
सोंतस नवरेहस आहम ख्वशो, स्वरिव तपु रेश्व सदाशिव ।।



पिशाच चतुदर्शी

चित्र गटपछि चोदुश्य छु पिशाचन हुंद लीडर निकुम्ब पनुन्यन
बॅखुत्यन सुत्य शंकर जियस पूजा करान । असि छु अमि द्वह निकुम्बस
तु शंकर जियस पूजा करनु खॉतरु नीलमत पुरान अनुसार वननु
आमुत जि पिशाचन हुंघ बापथ गाडु तु नेनि रॅनिथ बतु गछि चु
वॅतिस प्यठ, क्वलु बॅठ्यन प्यठ, बालु तेंतॉलिस प्यठ, शमशानन,
सूर बन्यन तु लछि बन्यन प्यठ त्रावनुक विदान । रॉत्य रातस गछि
जागरण कॅरिथ निकुम्ब तु शंकर जिय भजनव किन्य याद करुन ।



नवरेह मावस

नवरेह मावस छि चित्र गट पछ मावस वनान । यि द्वह छु नवि
वरियि ब्रोंठ अख द्वह येमि द्वह अँस्य शामन थाल बॅरिथ नवरेह मावसि
राथ क्युत सुबहन तकरीबन चोरि बजि बुथ छि वुछान । येमि सुत्य
अँस्य स्वख तु श्वब वहरय वॅरियस डेंशनच आश छि थवान ।

प्रॉन्य निशानु याने मँहल, किलु मन्दर तु बाकय दर्मुच जायि छि तमि जायि हुंज या तमि दीशिच कहानी असि ब्रोंठ कनि थवान। यिमन योद वारु पॉठ्य सनव या तति क्यन बाशन्दन दछिन्य ख्वुर्य प्रछव, ततिक्यन राजन महाराजन हुंद राज, लुकन हुंज व्वथु बेठ तु तोर तरीकु, रीच रेवाज तु आर्थिक हालातन हुंज ज्ञान छि असि ब्रोंठकुन यिवान। यि बूजिथ छु असि पनुन्यन अँतीतुक्यन आस्थायन तु वेशवासस पोछर लगान। अँस्य छि ब्रोंहकुन यिम रीच जॉरी थवान तु कामना करान जि सौन्य नँव पुय ति पालि यिम रीचु ब्रोंहकुन।

नीलमत पुरान अनुसार अँस्य यि द्वह वेच्चारनाग श्रीनगर परिसरस मंज मनावान। तिक्याजि प्राणि समुयिक्य राजि, माहराजि अँस्य अमि द्वह व्यदवानन, ज्योतशन तु खलाह बाजन अँथ्य परिसरस मंज इकुवटु सोंबरानँ। सॉरी इकुवटु सँमिथ वेच्चारिथ, समय गँडिथ अँस्य दोयिमि वुरियुकु हँद्य कलन्दर तु नेशिपतुर बनावान। चूँकि वेच्चार छु संस्कृत शब्द तमि किन्य ओस अथ जु नाग वॉलिस परिसरस 'वेच्चारनाग' नाव प्योमुत। अथ नेशिपतुरि प्यठ छु वरियिक्यन बड्यन द्वहन हुंद समय, साथ, नक्षत्र, ज्यन, मरन द्वह बेयि ति सोरुय रिर्काड पूर पॉठ्य दर्ज। चूँकि यि कॉम आस मावसि द्वह यिवान करनु तमिकिन्य अँस्य लुख सुबहय यिथ नागन मंज नेबरिम मल छँलिथ अँदरिम श्वदी करनस कुन फेरान।

अँस्य अँस्य कँशीरी मंज अन्तनाग रोज्ञान। तति ओस 'मँद्य कँदुल' बस अडस निश यिवान। अमि मावसि द्वह अँस्य सॉरिय बटु शुर्य, ज्ञनानु किहो मर्द अथ कँदुलस तल श्रान करान। माननु ओस यिवान जि अमि पानि श्रान करनु सुत्य छि संसॉर्य द्वख तु दौद्य खत्म

गछान । अमि पानि सुत्य अमि द्वह श्रान करनु सुत्य छु म्यौंद तान्य मैद्य
लदस चलान । अथ द्वहस मुतैलिक प्रछान प्रछान समख्योव मै हानन्द
चवलगाम्युक श्री बृजनाथ कौल । यि ओस जौनुपोर कँशीर मंज स्यठा
कालस बहिसति जिलुदार नोकरी करान । यिम छि स्यठा पाठ पूजा
करान । यिमव वोन मे जि जौनुपोरस मंज छु अख नाग यथ 'वरनाग'
छि वनान । 24 कनाल जँमीन छि अथ नागस सुत्य कागज्जन मंज दर्ज ।
वरनागच कथ छि यिथु पौठय:-

जन्मीजय ओस अख बोड बारु राजु । सु ओस पनुनि दुर्म
अनुसार कर्म करान । अँम्य सुंदिस मॉलिस ओस 'विहानागन' टोफ
दिचमुन्न, येमि सुत्य सु छोरु छोरु करान मूद । तँम्य सुंज छूट छूट
बुछिथ गव राजु स्यठा क्रूदी । तँम्य कोर तहिया जि सौरी नाग छुनख
बु गौलिथ । अँम्य कोर हवन तु अकि अकि छुनिन यिम अँगनस मंज ।
स्वाहा कैरिथ नैगलौव्य यिम अँगु राजन । व्वन्य वौन्न विहानागन्य
वौरय । सु ब्यूठ इन्द्रदीव सुंदिस तख्तस तलु कनि खँटिथ । येलि
जन्मीजयन आवाहन कोरुस, यि पलंग वोथ इन्द्राजस हेथ थोद । इन्द्राजन
वोन विहानागस चु गछ ब्रह्मन बँनिथ तोर तेलिय बचख । चु रोज
ब्रह्मनन मंज बिहिथ प्रशाद करान, येलि राजु चे ब्रौठकुन गुत्य गौडिथ
प्रछुनि यियि 'क्या महरा अनहोव ।' चु तुलिजि कलु थोद तु दँपिज्यस
'चु छुख बख्खानहार, मे ति बख्खा ।' तँम्य कोर तिय यि इन्द्राजन
वोनस । राजु छु अत्यन मजबूर, यि मोंगनस नागन ति दियुतनस । सुत्य
दियुतनस वर जि येत्यन चु बेहख, तत्यन वुजि अख नाग । तथ नागस
मंज युस नवरेह मावसि श्रान करि, सु म्वकुलि कष्टव निश । नाग
ब्यूठ तति वास कैरिथ । दपान तमि नागुक आकार छु सर्प कलस ह्युव

तु पानुक आकार छुस यपौर्य पोन्त्य छु ब्रोंहकुन नेरान। चूकि राजन
 दियतुस वर तमि किन्य प्यव अथ 'वरनाग' नाव। दपान राजन हुम्य
 तीत्य सर्प अथ अँगनस, युस सोथ ह्यु बन्योव। 'वरनाग' प्यठ ओड
 मील दूर छु सु सोथ येत्यन राजन सर्प हुम्य, यथ सर्पु सोथ छि वनान।
 यि कहोनी छि विष्णु पुराणस मंज ति दर्ज।



द्रठ पोंचुक (पंचक)

वासवोत्तरदलादि पन्चके याम्यदिग्गमन गेहगोपनम।

प्रेतदाह तृण काष्ट सन्चय शम्यका वितरण विर्वजयेत।

धनिष्ट नक्षत्रच उत्तरार्ध प्यठ रेवती तान्य पोंचन नक्षत्र छि द्रठ
 पोंचुक वनान। अथ मंज छे दक्षिण यात्रा, लकरि कॉम, चारपाय पतुज
 तु दाह संस्कार, मकानुक छत त्रावुन ममानियत। यिम छि दृड नक्षत्र।
 यिम पाँच चीज छि दृड या सख्त माननु यिवान। तमि किन्य छि यिम
 वर्जित। द्रठपोंचकि पतु छु करपोंचुक यिवान। करपोंचुक गव करत्रेयम
 हस्त, चित्रा, स्वाती, विशाखा, अनुराध। यिम पाँच द्रह छि स्यठा जान
 माननु यिवान।

दपान सृष्टि बनावनु विजि नक्षत्र मण्डलुक नेरमान करनु विजि
 छु ब्रह्मा जियन पनन्यन 27 वुहन कोर्यन चंद्रमस सुत्य खान्दर कोरमुत।
 यिमन मंज आसु न चन्द्रमस सुत्य पाँछ कन्यायि केह ति वारि यिवान।
 तिमन ओस नु तस सुत्य प्रेयम नु ओसुख केह श्रेह। अमिकिन्य ओस्य
 5 नक्षत्र, जिनि बनि मंज, अख दक्षिण तरफ, अख पशस (छतस)
 प्यठ, चारपायि दन्दरि तु शमशानस प्यठ मोरदस निश चूरि रूदिमुत्य।

अथ प्यठ दियुत चन्द्रमन तिमन पाँचवनी शाप जि यिमन पाँचन नक्षत्रन
मंज छु यिमन पाँचन चीजन हुंद व्यवहार करुन ममॉनियथ ।

अज ति छु आकाश मणडलस मंज चंद्रम 27 वुहन नक्षत्रन
मंजबाग तु यिमन पाँचन नक्षत्रन हुंद आकार छु तिथुय युथ वननु छु आमुत ।



मलमास तु बानुमास

आदितियिनि डम्बि फॅट अख प्रजलवन्य नार बाल । येमि मंज
त्रुवाहव सियिर्व ह्योत जन्म तु काल चक्रुक (समयुक) नेरमान ति गव ।
अथ काल चक्रस मंज बनेयि 12 रेयथ 6 मौसम (उत्तरायन त दक्षिनायन)
बेयि चंद्रुक लोकुट तु बोड बननु ।

दपान येलि 12 सिरिय बनेयि, अख अण्ड ओस यिथय पॉठ्य
युस नु फोटमुत ओस केह । यि वुछिथ दियुत माजि आदिति यि गान्दु
ठूल सतीसरस मंज दोरिथ येति च्वापॉर्य पोनिय पोन्थ ओस । केह
वॅरियव पतु येलि कशायप रेशिन्य वननु दॅस्य यि सॅतीसरुक पोन्थ
(वराहमुल) वरमुलि बालु किन्थ नेबर कडनु आव, यि अण्ड आव
टाकारु सारिनुय बोजनु । कशायप रेश्य ति योछ वुछिथय अथस मंज
यि अण्ड रटुन । अथु तसुंद लगिथुय फोट यि ठूल येमि मंज स्यठा बॅड
नार वुजमल हिश द्रायि, जन तु ओस माजि धरती प्यठ सिरयि वोथमुत ।
यिथुय पॉठ्य सपुद बेयि अकि सिरयुक जन्म । गांदु ठूल मंज सिरयि
यथ जायि द्राव तथ जायि प्यव नाव 'मार्तण्ड' यानि 'मृत अण्ड' मंज
द्राव सिरयि यानि सिरयि दीव सुंज जन्म जाय छि 'मार्तण्ड' ।

ज्वाला या नार ब्रेह मार्तण्ड बालस सुत्य लगिथुय बन्योव

जालायि हुंद आकार तथ बाल थौगिस प्यठ ति । तथ बालस छि अज
ति भर्गशिखा या सिरियि जट वनान । भर्ग छु सिरयि दीव सुंदुय व्याख
नाव । यि छि करोर बदन सिरयन बराबर प्रजलवन्य मौज्य भर्गशिखायि
हुंज अदभुत जाय । अथ मार्तण्डस छि अजकल मटन या बवन ति लुख
वनान तिक्याजि यि छु सिरयि दीवुन दाम तमिय छि बवन वनान । यि जाय
छि अन्नतनाग प्यठ शे मील दूर पूर्व तु वोतरु दिशायि मंज वाका ।

कश्यप रेश्य गव अम्युक तीज वुछ्थि हौरान । ब्रह्मा जियन
तोरुस फिक्रिय जि यि छु तसुंद पोथुर । व्वन्य ह्योत सौंचुन सारिव्य
दीवव जि बाहन सिरयन छि अकि-अकि रेतुच कॉम, अथ त्रुवाहमिस
सिर्यस क्वसु कॉम यियि दिनु । भगवान शंकरन दियुत मशवरु जि बाह
सिरियि करन व्वन्य पानय फॉसलु जि त्रुवाहमिस क्वसु कॉम यियि दिनु ।
सारी छि फॉसलु सॅमिथ निवान जि ऑकिस दोहस मंज छि 30 गरि
आसान । यिमन पूर पॉठ्य सिरयि छुन वातान । यिथुय पॉठ्य छु हर
दोह अख गॅर बचनु सुत्य रेतस मंज बाह दोह बचान । युस 32 रेथ 16
दोह तु 4 गरेव पतु अख पूर रेथ छु बनान । यथ अँस्य मलमास या
बानुमास छि वनान ।

दिवस्य हरत्यक षष्टि, भाग मृतोगतः ।

करोत्येकमहच्छेद तथैवेच व चन्द्रमा ।।

येलि सिरयि भगवान अकिसुय राशि या 30 डिगरी मंज रूजिथ
जु मावसु छि अँक्यसुय रेतस मंज यिवान, तेलि छि बानमास वनान ।
येलि दोन मावसन मंजस जु साँकराँच यिन, तथ छि क्षयमास वनान ।

दपान सासु बद्यव वॅरियव ब्रोंठ येलि कॉशुर पंडित कशीरि
नेबर आव कडनु, तिम बीठ्य ज्यादु वेन्दयाचल पहाडस अँदय पँख्य

पनुन डेरु जमॉविथ। केह कालु पतु येलि तिम कशीरि पनुन गरु वापस आयि, तिम आयि ततिक्य तोर-तरीकु, रीच तु रेवाज ह्यथ गरु। येमि किन्य कशीरु मंज छि केह गुथर मलमॉस्य तु केह छि बानुमॉस्य। मगर द्वशवय छि असली कशीरि हुंघ बैस्कीनदर या मूल छिख कशीरि हुंदिय।

यिमन द्वशवनी मल तु बानु मासस मंज गछि नु ज़ांह रुच कौम करनु यिन्य। यिम छि द्वशवय रेथ पेत्रु कामि श्राद वगौरु खॉतरु श्रुष्ठ यिवान माननु। अँस्य छि अक्सर यिमन रेतन मंज मटन पनुन्यन पेत्रन श्राद हावनि गछान। कुनि पूजायि मंज येलि पेत्रन हुंघ नॉव्य श्रदायि सान दान दिनु यियि तथ छि श्राद वनान। येमि सुत्य अँस्य छि पापव तु शापव मुछि गँछिथ पेत्रन ति त्रप्त करान। अथ छि पुरषोत्तम मास ति वनान।



सन्धा चोंग क्याज़ि छि ज़ालान

विष्णु पुरान 198 वर्क अनुसार गछि शामन सिरयि वसनु विजि तु चमकुवुन तारख नब आसिथुय सुब्हनस ठीक पॉठ्य आचमन कैरिथ संघा पूजा करुन्य। संघा गव दोन शब्दन हुंद जोड, याने 'सं' 'ध्या' सु ध्यान युस शाँती बखचि। सुब्हन ति सिरयि खसनु ब्रोंठ बाह मिनट तु सिरयि खसनु पतु बाह मिनट योस कुल अख गँर छि बनान, तथ छि ब्रह्ममूर्त वनान। यिथुय पॉठ्य शामन योद सिरयि वसनु ब्रोंठ बाह मिनट तु सिरयि वसनु पतु बाह मिनट विधि पूर्वक संघा करनु यियि, सु गरु रोज़ि रूगव निश मुछि। अथ समयस दोरान योद पूजा शोरू करनु यियि, पतु लँग्यतन सिरयि खँसिथ ति स्यठा समय, तथ छुनु केह परवाय, शोरू गछि समयस प्यठ करनु यिन्य।

युस सिरयि वसनु या खसनु विजि शौंगिथ रोजि, सु छु प्रायाचितुक
बौगी बनान। युस पुरुश सुब्हन तु शामन संद्या करि नु, सु दुरआत्मा छु
मैरिथ नरकुह हकुदार बनान।

वीदव अनुसार छि सर्वशक्तिमान, सर्वव्यापक नेराकार परमात्मा
सुंदि पूजायि हुंघ त्रै हिस्सु, स्तुति, प्रार्थना तु उपासना। ईश्वर सुंघ दैस्य
बनौवमुच स्वन्दर सृष्टी वुछिथ छु
असि ग्वडु आशचर्य सपदान, पतु
छि तसुंघ बजर वखनान या ग्वन
ग्यवान। तथ मरहलस छि स्तुति
वनान। तमि पतु ईश्वर ज्ञान रछा
ज्ञाननुच छि प्रार्थना वनान। यूत
यूत ईश्वर ज्ञान प्रावव अँस्य छि
तसुंद आसुन ब्रह्मांडस मंज बेयि



पानस मंज ति अनुबव करान। अँथ्य अनुबवस छि व्वपासना वनान।

सफाटिके प्रतिमा - रूपं दृश्यते दर्पणे यथा।

तथात्मानं चिद् आकाशे संस्मरेत् सोहं इत्युत॥

यिथु अँनस मंज सूरथ पनुन्य हू-ब-हू डेंशान।

तिथु आत्मा रूप दय पानस मंज लबनुक कर ध्यान॥

(गुरु गीता शलूक 116)

व्वपासना गव ध्यान करुन युस नु कांह छु वुछान, न छु काँसि
हावनु यिवान। व्वपासना शब्द छु सादकस ब्रोंठ पकनुक व्वपदीश
दिवान। यर्जुवीद अनुसार छि प्रथ कांह दिशा सादकस पनुनि जिनंदगी
हुंज दिशा। तिक्याजि पूर्व दिशा छि ब्रोंठ पकनुच दिशा या पानस मंज

अन्दुकार बदल प्रकाश अनुभव करनुच दिशा तमि किन्य पज़ि आसनस
 प्यठ मन वशस मंज़ अँनिथ शरणागती मंज़ बिहिथ सादकस सिर्युक
 तीज़ मनस मंज़ अनुभव करुन तु यिथु पौठ्य मंगुन:- ही दयि पनुनि
 तीज़ प्रकाश बनाव मेति तीज़वान। युस चोन सार्मथ्य छु तमि सुत्य
 गँछुस ब्रुति सार्मथ्य वाज्यन बनून्य। दृष्टन गालनुचि शक्ती बलु बनाव
 मे शक्तीमान। ज्ञान यन्द्रेयन हुंज़ शक्ती कर मे प्रदान। सादक छु पतु
 ईश्वर बजिरुच कैह मंत्र पॅरिथ पानस दछिन्य खोवर्य पतु ब्रोंठ दयि
 सुंद आसुन कैह कॉल्य पतु अनुभव करान। अमि इश्वर ध्यानु सुत्य
 छि यन्द्रेय श्वद, मानसिक तु शरीर बलस हुरेर सपुदान। श्रदा, व्यशवास
 तु अब्यास यूग सुत्य छु सादक द्वह ख्वतु द्वह आत्मा रूप दय पानस
 मंज़ लबनुकि ध्यानुक यत्न करान रोज़ान। यिथय पौठ्य छि पशिचम
 दिशा वापस फेरनुच, यन्द्रेय वश करनुच तु एश्वर्य छि दख्यन दिशा,
 उत्तर दिशा छि तरक्की हुंज़ दिशा याने ध्यानस मंज़ छि सारेय दिशायि
 सहायतस रोज़ान। अमि अलावु छि पृथ्वी यथ प्यठ अँस्य बिहिथ पूजा
 छि करान, स्व छि असि सयम तु समयूगच शक्ती दिवान। यि छि
 असि पालनु खौतर ब्योन ब्योन रंगव बूग पदार्थ व्वपुदावान। मगर
 पनुन पान पानय थोद तुलनु खौतर छु असि सारिनुय हुंद कर्तव्य ज़ि
 पनुनि यन्द्रेय तु नप्सु रूप मदहस्य गंडस मंज़ थवून्य तु ध्यान दियुन ज़ि
 यिम सौरी धरती प्यठ फवलिमित्य पदार्थ छि परमात्मा सुंघ देन। पकुवन्य
 क्वलु, सँन्य समंदर, थँद्य कोह तु बाल, सिर्य चन्द्रम छि सौरी दयि सुंघ
 निशानु या जंडु। यिम थदि थदि छि बारव दिवान ज़ि सोन राजि छु
 ब्याखुय कुसतान्य। अथ पूर पौठ्य सँनिथ छु सादक पानस कुन फीरिथ
 पानस मंज़ बसवुन आत्मा रूप दय छारुन हैवान। युस तसुंद परम

लक्ष्य छु। संद्या करनु सुत्य छु बँखुत्य ध्यानस मंज्र यिम जंडु बैयि
वुछान, यिम ब्योन ब्योन रूपव दीवी तु दिवता छिस बासान। यिमन
मंज्रस श्री कृष्ण भगवान छु रास खेलान बासान। युस सारिनुय हुंद ब्रह्मा
रूप पाँदु करनवोल, विष्णु रूप पालन तु पैत्रनवोल तु महेश रूप
समहार करनवोल छु। अमि अलावु योद आसनुस प्यठ बिहिथ सादक
भगवत गीतायि हुंद श्री कृष्णन्य म्वखु द्रामुत्य यि शलूक मनस मंज्र
थँविथ ध्यान हैयि करुन, तस क्या छु म्वलुवुन:-

सर्वधर्मान्परित्यज्य मामेकं शरणं व्रज।

अहंत्वा सर्वपापेभ्यो मोक्षयिष्यामि मा शुचः॥

सौरी कर्तव्य कर्म कर म चय अर्पन।

कीवल म सर्वादार दयस गछ शरन॥

ब पापव सारिवय म्वकलावथ चय।

फिक्र त्राव सारय म कर शूक चय॥

वीद धर्म अनुसार छु पाँचि प्रकार्य यँग्य करनुक इशार दिनु
आमुत। येमि सुत्य अँकिस मनशस कल्यान हैकि सपदिथ। यथ मंज्र
ग्वडुन्युक बोड हवन छु ब्रह्म यज्ञ या संद्या।

यि संद्या गव क्या ?

तस प्रकाशक परमात्मा सद ध्यान करनस छि सन्ध्या वनान।
संद्या छि पनुनिस पानस साम हेनुच सारिवय खात आसान तु थँज
विदि! यि छे पनुनिस अन्दरूनस मंज्र रुत्य संकल्प वुजनावनुक व्वत्यम
सादन। परमात्मा छु स्यठाहन शख्तियन हुंद बंडार ति तु आगुर ति।
पूजायि दँस्य, ध्यानु किन्य हैकव तिम शख्ती कुनि हदस तान्य प्रावनस
मंज्र स्वफल सपदिथ। मगर यि छु तेलि मुमकिन, येलि मंत्रन हुंद पाठ,

चिन्तन तु मनन कॅरिथ दयि सजि शक्ती हुंद अनुभव करव । यि छुन मंत्र परनु सुती सम्भव । मंत्रन हुंद मानि समजिथ तु जॉनिथ, मनस मंज बावन जाय दिनुच छि यि अख लोकुट कूशिथ । शरीरस श्वदी करनु ख्वतु छि अंतःकरनन हुंज श्वदी ज़्यादु लॉजमी, युस पूजायि सुत्य छु सम्भव सपुदिथ हेकान । शरीरुक पलालु छु रुति ख्यनु चेनु सुत्य तु आत्माहुक पलालु छु दय ग्वन ग्यवनु तु ध्यान सुत्य करनु यिवान । हर द्वह पूजा करनु सुत्य छि अंतःकरन साफ तु व्यचार श्वद सपदान । दय मानुनुक सकल्प दद सपदनु सुत्य छु अबिमान दूर सपदान । म्पीठ तु ज़्यीठ वुम्बुर छि व्वापासकस बॉगिस मंज यिवान ।

मनुशि सुंद मन छु चॅन्यचल । सु छुन धर्मस तु कर्मस मंज टिकिथ केह रोजान, बॅल्कि छु होर चोर वान्दुर संघ पॉठ्य व्वटु तुलान । अमिय पजि पनुन्य वृथ तिमन बावन कुन लागुन्य, यिम मंत्रन हुंघ शब्दन मंज वूनिथ छि आसन । केह कॉल्य पतु बनि अब्यासु सुत्य यि मनुश सुंदि स्वबावुक हिस्सु । मनुशस पजि पनुनि मनु मंजु राग, द्वेश, काम, क्रूध, मुह, लूब हिव्य व्यकार दूर कॅरिथ पजि व्यवहारु सुत्य मन श्वद कॅरिथ पूजा शरू करुन्य । अथ संघा करनस छि त्रे हिस्सु या समय : (1) ब्रह्ममूर्तच संघा (2) मध्यानच (3) शॉमुच यथ प्रदूशकालुच संघा छि वनान ।

ब्रह्ममूर्तच संघा : यि संघा छि सिर्यि खसनु ब्रोंठ 12 मिनट तु सिर्यि खॅसिथ 12 मिन्ट कुल अँकिस गरि दरमियान शोरू करनु यिवान । मनुसुमृती मंज छु दर्ज जि मनश ास पजि ईकांत जंगलस मंज पानिस ब्रोंहकनि बिहिथ पूजा यि रूप अँगनस हुमान-हुमान गायत्री हुंद ध्यान करुन । अजकल छुन यि केह सम्भव, तमिकिन्य

गछि गरस मंजुय बिहिथ ठोकुर कुठिस मंजुय दय गारुन। सुब्हन
 नैन्द्रि वेंथित जल मल तु श्रान कॅरिथ मन मंज सॉरिय वेचार ओंक
 ओंद थॅविथ गछि आसनस प्यठ बिहुन तु ॐ मंत्र मनु मँजिय ज़पुन।
 मनु माहराजनि आज्ञा अनुसार पज़ि मनुशस मन थ्यर बनाँविथ
 सुब्हन तु शामन पूजा या दय ध्यान करुन तिव्याज़ि छ्यनु रोस
 पूजायि सुत्य छि वाँसि हुरेर, ब्रह्मतीज़ तु संसॉर्य स्वख प्रावान।
 ग्वडुन्यथ आसनस प्यठ बिहिथ आलुछ दूर करनु बापथ गछि आचमन
 हैन्य। आचमन हैवान गछि मंत्र परुन। मंत्र छुः

ॐ शं नो देवीरभिष्टय आपोभवन्तु पीतये।

शंयोरभिस्रवन्तु नः॥१७॥ य. अ. ३६। मं. १२॥

इष्ट स्वख सेदी बापथ दिव्य व्वत्यम जल स्वखदायक दयि ऑसिन
 च्वशवुय अंदव यि जल दयि स्वख काँगुरि रुफ वुशनेर दियिन

पतु छु अंग सर्पश करुन! शरीरक्यन सारिनुय अंगन पाँ
 लवु दिथ तिमन हुंदि पोछरु बापथ व्यनथ करनु यिवान। पतु छु
 प्रानायमु सुत्य च्यथ थ्यर करनु यिवान। मंत्रव दॅस्य सृष्टी तु प्रलयिच
 वखनय कॅरिथ बख्तु सुंदि हृदयि मंज अहंकार तु संश्य रूप वेग्न
 दूर करनु यिवान। तमिपतु गछि पनुनि नेमु अनुसार ध्यान करुन,
 वैसे गॅयि स्वय पूजा योद हर कारस सुत्य दय सुंद आसुन अनुबव
 कॅरिथ सॉरी कार अंद वातनावनुक यत्न यियि करनु।

दुहुक तु राँत्र हुंदिस मिलनस छि संद्या वनान। शास्त्र छि वनान
 जि दुहुक स्वामी छु दिवता तु रातुक स्वामी छु दानव आसान। मगर
 सन्धा कालुक स्वाँमी छु पानु शिव जी आसान। अमि किन्य छि सन्ध्या
 कालुच पूजा तु अरजथ सारिनुय पापन या वेग्नन नाश करनुक अख

छोट व्वाय मानन यिवान । योद अमि वक्तु चोंग ज़ॉलिथ मंत्र यियि परनु, शिव जी छि प्रसन सपदिथ सौन्य व्यनथ कोबूल कॅरिथ व्यवहार सेद करान । मन्त्र छु यिथु पौठ्य :

दीपो ज्योतिः परं बह्यं दीपो ज्योतिर्जनादन
शुभ करोतु कल्याण आरोग्य सुख सम्पदम्
दीपो हरत मं पापं सांध्य दीपा नमोऽस्तुते
शत्रु बुद्धि विनाशं च दीपं ज्योतिः नमोऽस्तुते ।

या

स्वप्रकाशे महा दीपः सर्वतः तिमिरोऽपहः ।

प्रसीद मम गोविन्द दीपोऽयं परिकल्पितः ।।

हे गोविन्द तोह्य छिवु ज्यूत्य रूप यथ शरीरस मंज व्यराजमान । युस अज्ञानुक अंदकार छि चटान । बु छस येमि नेबरिमि चोंगिच रेह अँदरिम ज्यूत्य ज़ॉनिथ तोहि व्यनथ करान जि चानि आसनुक व्यशवास रूज़िन मे बरकरार ।



पाँचन कन्यायन हंज त्वता

खराब स्वपुन नु वुछनु बापथ येलि अख इन्सान बिस्तरस प्यठ बेहि, तस पज़ि पनुनि पानुक मंथन करुन तु पनुनुय ज़मीर बेदार करनस मंज सहायक सपदिथ छु मनुशस वनुनावान जि 'म्यान्य शरीरन कॉच्चाह गल्ली छि दोहस करिमचु, ताकि दोयिमि दोह हेकव नु तिमन गल्लितयन मंज बेयि कॅह पान आवुरौविथ । तमि पतु अँछ बन्द थवान-थवान येमि मंत्रुक उच्चारण कम्न । मन्त्र छु :-

अहल्या, द्रोपती, तारा, सीता, मन्दोदरी

तथा पँचकन्या स्मरेत्-नित्यं महापातक नाशनम् ।

अमि मन्त्र परनु सुत्य छि दय कृपायि त्रख शैंगान तु खार नेन्द्रि वोथान ।



कुम्भ क्याज़ि छि दिवान

गर्भाशये अल्प प्रमाणम् अपि बीजं

कालतो वीर रूपताम् आप्नुक्तु ईश्वरानु

कम्पया जगति महाकार्य-करण समर्थ

यथा जायते तथैवाल्प प्रमाणम् अपि

कुम्भस्थम् इदं जलं मन्त्र श्रद्धा अतिशयं

महिमना परिलोके के शतधार जल प्रवाहं

भूत्वा प्रेतादि पितृणं कामन्त्र

पूर्य तत्तृप्तये स्वधा भवतु इत्यर्थः

माजि हुंदि डम्बि मंजु हेनु आमुत बचि येलि गर्भु न्यबर छु
नेरान, यि छु बँडिथ दोह ख्वतु दोह बँड्य बँड्य कार करान । तिथय
पौठ्य कुम्भ गडुक पोन्थ योदवय कम छु आसान यि छु मन्त्र तु श्रदायि
किन्य परिलूकस मंजु वारियाह पानिचि दारायि बँनिथ सारिनुय पेतुरन
हुज कामनायि पूरु कँरिथ परा तृप्ति बापथ अमृत बनान । तिम् छिनु
त्रैशि त्रैशि करान सोतान यि छु सोन शास्त्र वनान ।



दोह कति प्यठ छु गंजरनु यिवान

कौशिरि मतु मुतौबिक छु सिरयि खसनु प्यठ दोयिमि दोह सिरयि खसनस तान्य अख पूर दोह यिवान माननु । योदवय कांह फाकु आसि सु छु सिरयि खसनु प्यठ दोयिमि दोह सिरयि खसनस तान्य माननु यिवान । रौच हुंजि बाहि बजि हैकव नु फाकु केह ति छेटुरौविथ । केह पर्व छि तिथ्य आसान यथ मंज भगवानस भोग दिनुस तान्य छु फाकु थवनु यिवान । मसलन हेरथ या केह छि नवदुर्गायि फाकु थविथ पूजायि तान्य फाकु थविथ फाकन रवरखस्थ करान ।



श्राद तु जन्म दोह कमि तेथि गछि मानुन

दोन दोहन योदवय अकुय तेथ छि आसान, ग्वडुनिच तेथ छि श्रादु फाकु या पेत्र कारुक दोह मानान, दोयिम दोह छु देवकार्य या जन्म दोह मनावनु यिवान ।



आचमन

प्रथ कुनि बतु ख्यनु विजि गछि त्रैय लटि आचमन करुन्य ।
मंत्र छु: ॐ केशवाय नमः ॐ नारायणाय नमः, ॐ माधवाय नमः ।। यिम छि सौरी श्री कृष्ण सुंदर रूप तु नाव ।

याः क्रिया करुते अनाचन्यैव नास्तिकः ।

भवन्ति हि वृथा तस्य क्रिया सर्वान सशयः ।।

योस ति क्रैया छि आचमनि रोस करनु यिवान । स्व क्रैया करनवोल छु
 नास्तिक माननु यिवान । तसुंज क्रैया छि तसुंज वृथ बनान । अथ मंज
 छुन कांह संशय आसान । साइन्सी तोर आचमनि प्यठ शोद करनु
 सुत्य छि साईन्सदान ति यि मानान ज़ि आचमन हेनु सुत्य छु हँटिस श्रेह
 करनु यिवान । कफ गॉब सपदिथ छु शाह खसि वसि मंज तु परनस
 मंज मदद मेलान । यि ज़ल छि अँस्य मंज अथस मंज रटान । हना त्रे
 मजिमि ओंगजि नोमरॉविथ, किस तु न्योठ अलग थँविथ तमि पतु दय
 सुंज सुमरनि सोरुय पुशिरान । येमि सुत्य असि छु सु सोरुय श्रपान यि
 अँस्य ख्यवान छि । तसुंद मन, शरीर तु वॉनी, पाप तु क्वकडर छि
 सॉरी नाशस सपदान, युस आचमन छु हेवान । आचमन हेवान हेवान
 योद अँस्य श्रीमदभगवद गीतायि हुंद चूरमि अध्यायि हुंद 24 बुहिम
 शलूक परव, कांह दुशमन पोरि नु तेलि । युस यिथु कँन्य छु:-

ब्रह्मार्पणं ब्रह्म हविर्ब्रह्माग्नौ ब्रह्मणा हुतम् ।

ब्रह्मैव तेन गन्तव्यं ब्रह्मकर्मसमाधिना ॥

ब्रह्म रूपु अँग्नस आहोच तु सामान ।

कर्ता कर्म क्रैया तस ब्रह्म छु बासान ।

ब्रमु कर्मस मंज ब्रह्म ग्यॉनियस ज्ञान ।

फल ह्यथ छु सोरुय ब्रह्म बासान ॥



ऑठम गछन दरनि

नीलमत पुराण 724-726 अनुसार, ज्येठ पुनिम पतु हारु
 गटुपछ ऑठम गछि वेनायक तँमिसुंद गण ह्यथ पूजन्य । मिठायन

हुंघ अम्बार ब्रोंहकनि थेंविथ गछन बजन तु साजव सुत्य तिम ख्वश करुन्य । योद वरियस मंज सारेंय ऑठुम फाकु थेंविथ दरनु यिन, व्यनायक सपदि प्रसन तु मनुश सपदि दन तु दान्य समपन्न ।



ऑठुमावसु तु पुनिम दोह व्याजि गछि व्रत थवुन

संस्कार चन्दिक्रायि हुंदि व्याख्या भागु अनुसार छि फिजिकल जोग्राफी हुंघ मगरिबी वेद्ववान यि सिद्धान्त मानान जि चन्द्रुक खास असर छु प्रथ्वी हुंदिस पॉनिस प्यठ पेवान अमि किन्य छु पुनिम तु माविस संसार्य जलुक समुन्दर किस बँठिस प्यठ स्यठाह उभार आसान । गटु पछ तु जून पछि ऑठुम छुन तिथुय हुरेर कैह आगान । युस असि पानु ति हैकव वुछिथ । पश्चिमी व्यदवान छि यिय मानान जि चन्द्रमुक छु जलस प्यठ पुनिम, मावसि यि असर ज्यादु पहान आसान । गटु पछ तु जूनपछि ऑठुम छु अम्युक असर कम पहान आसान । प्रॉन्यन आर्यन ऑस अमि कथि हुंज पूर ज्ञान, जि चन्द्रम छु रस व्वपदावान येम्युक जलस प्यठ छु खास असर प्यवान । अम्युक असर छुन कीवल समन्दर जलस प्यठुय योत प्यवान, बल्कि जडियन मंज छु रसुक हुरेर सपदान । शरीरचि नमी, खूनस तु जलस प्यठ ति छु खास प्रभाव त्रावान । पुनिम तु मावसि छु मनुशस शरीरस मंज नमी तु खूनस मंज हुरेर या छुरेर पॉदु सपदान । गटु पछ तु जून पछि ऑठुम रस तु खूनच कमी सुत्य छि कमजूरी मनुश अनुभव करान । या यिति हैकव वेंनिथ जि पुनिम मावसि गटु पछ तु जून पछि ऑठुम छि खूनस मंज गन्दगी पॉदु सपदान । अमिय बापथ ऑस्य प्राणि समयक्य आर्य अन्न रोस

रोज़ान। दुकानदार ऑस्य दुकान बन्द कॅरिथ यिमन दोहन फाकु थवान येमिकिन्य तिम ऑस्य रूगव निश हमेशि बॅचिथ रोज़ान। शुक्र तिमन सान्यन पूवर्जन यिमव अँसि छि मावस, पुनिम, ऑठुम तु काह दरनुच वथ हॉवमुच। युस अँस्य छि अज़्युकताम ति ज़रूरी समजान। योदवय असि छेनु अम्युक कारन ति पता ज़ि असि क्याज़ि छुख यिमन दोहन फाकु दरनु खॉतरु वोनमुत, अँस्य छि यिमन दोहन पर्व दोह मानान, मगर प्रॉन्य आर्य ऑस्य च्वदिश सान शे पर्व दोह मानान। चूँकि यिम छि पर्व दोह बेयि हेरि लीख्यमुत्यो कारनव किन्य गछिनु ब्याखकांह रुच कॉम यिमन शेन दोहन मंज़ शुरू करुन्य।



सौंदब्रार या त्रिसंध्या यात्रा

कोकरनाग प्यठ तकरीबन चोर किलोमीटर जलनगाम नॅज़दीक सौंदब्रारि मंज़ छु लोकुट अख नाग युस पूर खोशक छु आसान, मगर येलि यात्री छि तोतन वातान, तिम छि छोपु दोपु कॅरिथ बावसान पूजा कॅरिथ दर्शनुच कामना करान। दय सुंज़ दयगॅच किन्य छु पाँ ग्रटु हियुव इज़हार गछान तु ब्रुजिस मंज़ छु नाग बॅरिथ यिवान। यात्री छि जल जल श्रान कॅरिथ दयस शुकरानु रूप पोशव सुत्य अम्बार करान। अँथ्य मंज़ छु पोन्थ बेयि बन्द गछान तु नाग छु प्रॉनिस रूपस मंज़ बेयि यिवान। पूजायि अर्चनायि किन्य छि यात्री पनुन ओत युन स्वफल बनावान। 1968 मंज़ ऑस अथ परिसरस मंज़ अति अख त्वकुट जोफर तु न्यब्रु कनि ओस बोड अख पल, यथ नागुक पोन्थ यिथ ऑस्य पोन्थ बावान। दन्त कथायव अनुसार ऑस्य ज़िठ्य वनान ज़ि

वासुकी नाग येलि कश्टुवार प्यठु कॅशीरि तरिहे, सु काल ओस सोंतु
 काल यिवान, तमिय किन्य ऑस तिहुंदि यिनचि खुशी मंज़ अथ वुज़ुन्य
 यिवान तु लुख ऑस्य अमि ज़लु सुत्य श्रान कॅरिथ तिहुंदि यिनुच खुशी
 प्रकट करान। अज़ ति छि वहिक् ज़ूनपछि प्यठ ज्येठु ज़ून पछ किस
 ऑखरस तान्य लुख सोंदबोर यात्रा करनि गछान। यि छि मान्यता ज़ि
 अथ नागस योद पेठ्य किन्य व्वठ कांह तारि, त्रिसंध्यायि हुंज वुज़ुन्य
 यियि नु ज़ाह। तमिय किन्य छि नागस बुथि कनि दासु बावस मंज़ सौरी
 बिह्थि तथ वुज़नि हुंदिस दर्शनस प्रारान।



अख ज्ञान

विष्णु पुरान अनुसार समेयि अँक्यसुय जायि अकि फिरि स्यठा मुनीश्वर तु तपीश्वर । तिमव कोर पानुवँन्य अँक्यसुय प्रशानस प्यठ स्यठा बँहस युस तिहुँदि मनुक संकल्प ओस । सु ओस यिथु पौठ्य जि कमि समयि छु अख ल्वकुट प्वन्य ति महान फल दिवान । तिम द्रायि अमि प्रशानुक जवाब छांडनि व्यास जियस निश । व्यास जिय ओस तमि सातु श्रान करान । ओडुय डुंग दिथ वोनून यि जौनिथ जि मनीश्वर छि कैह प्रछनि आमत्य “कलियुग्य छु श्रेष्ठ, शुद्र छु श्रेष्ठ” । यि वँनिथ दियुत तँम्य पौनिस मंज ब्याख ग्वतु तु न्यबर नीरिथ वोनून “शुद्र त्वहि छिवु थँद्य, तोहि छिवु दन्य” । पतु ब्याख श्रानु ग्वतु दिथ वोनून “ज्ञानानय छि साद, तिमय छि बाग्यवान । तिहुँदि ख्वतु बाग्यवान कुस छु ।” तमिपतु येलि व्यास जी श्रान कैरिथ आव तिमव पुछ मुनियन यिनुक प्रयूजन । मुनियव दोपुस युस असि संकल्प ओस सु त्रौवि व अतिनय, असि वँन्यतव यि क्याह वोनवु तोहि जि कलियुग्य छु श्रेष्ठ, शुद्रय छु श्रेष्ठ, ज्ञानानय छि साद तु बाग्यवान ।” व्यास जियन वोन असुवनि बुथि “ही मुनियन मंज श्रेष्ठ पुरुशव, मे वोन यिमन बारम्बार सादु सादु । तँम्युक कारन बूजिव । युस फल सतियुगस मंज दँहन वँरियन हुँदि तपु सुत्य छु मेलान, सु हेकि मनुश त्रेतायुगस मंज अँक्यसुय वँरियस, द्वापरस मंज अँकिस रेतस तु कलियुगस मंज अँकिस द्वहस तु रातस प्रौविथ । युस फल सतियुगस मंज ध्यान सुत्य, त्रेतायुगस मंज यँग्य सुत्य, द्वापरस मंज दीव पूजायि सुत्य तु कलियुगस मंज श्री कृष्ण चन्द्रनि नाम कीतनि मेलि सुय फल अँकिस द्वहस रातस मंज । कलियुगस

मंज मेलि कमय परिश्रम सुत्य मनुशस महान दर्मच गथ । अमिकिन्य
छुस बु कलियुगस प्यठ संतुष्ठ ।

व्वन्य छि शुद्रन हुंज कथ यिथु पौठ्य ज़ि द्विजन छु ग्वडु वेद
परनस सुत्य सुत्य ब्रह्मचार्य वृतुक पालन करुन । पतु छिख स्वर्दम
किन्य ज़ीनिमुत्य धन सुत्य यॅग्य करुन्य प्यवान । अथ मंज छि फज़ूल
बहस, फज़ूल बूजन तु फज़ूल यॅग्य तिहुंदि पतनुक कारन बनान । तिम
छिनु पनुनि मर्जी अनुसार बूग ति बूगिथ हेकान । येमिकिन्य तिम छिनु
पूर पौठ्य सारेय कामि अँजरिथ हेकान । यिथु पौठ्य छि तिम स्यठा
कलेश बदार्शति कॅरिथ प्वनि लूक प्रावान । युस मंत्रहीन शुद्र आसि सु
छु द्विजन सीवा कॅरिथ सदगथ प्रावान । येमिकिन्य तिम बाक्य ज़ाँचव
खवतु बाग्यवान छि ।

ज़नानन क्याज़ि वोनुम श्रुष्ठ, पनुनि दर्मु अनुसार धन ज़ीनिथ
पज़ि मर्दस हमेशि स्वपात्रस दान दियुन तु यॅग्य करुन । यिम कामि
करनु सुत्य छि तस स्यठा कलेश बुथि प्यवान । योद खराब काम्यन
मंज यि धन लागि, सु ति छुन जान । अथ दुविदायि मंज ज़िन्दगी
गुज़ाँरिथ छु सु ब्रह्मलूकस वातान, मगर ज़नानु छि तनु मनु तु वचनव
किन्य पति संज सीवा करान, स्व छि स्वतासेद बरथा सुंदिसुय लूकस
वातान । यिमव मर्दव ग्वनु रूप ज़लु सुत्य पनुन्य दूश छलिमित्य आसन,
तिहुंजि स्यठा कम मेहनुच सुत्य छि तिम दर्म सेदी प्रावान । तमिकिन्य
वोन मे तिम ज़नानु छि साद तु बाग्यवान यिमन यिथ्य मर्द बागि यिन ।

युस संसौरिस कनु बल दियि,

युस अशांतस शांती दियि

युस संसौर्य व्यथा प्रभु संजि कथायि मंज बदलावि स्व कथा

छि श्री कृष्ण जियिन्य ।

दर्मुच वति प्यठ पॅकिथ अँदरिम शैतान खत्म करनुय गव दर्म । मगर अँस्य छि दर्मुकिस नावस प्यठ मनुशस ह्यौंद, सिख, मुस्लमान तु ईसाय बनावान । दर्म येलि नासमुज लुकन हुंघन अथन मंज़ लगान छु, तिम छि दर्मस समस्यायि हुंद रंग दिवान । बहकावुन छु आसान मगर फवलरावुन छु कठयुन । दर्म गव नु सु युस असि नफरत बाँगरावि, दर्म छि हेरपौव्य, तस कुनिस दयस प्रावनुक्य । सीडी छे सादन असि छुन ततिनुय रुकुन कैह असि छु अँकिस अँकिस पौविस खँसिथ अध्यात्मिक मंदरस तान्य वातुन ।

ज़िन्दगी छि हेछनुच प्रक्रिया, अँस्य छि अमि मंज़ सबक हेछान । तमिकिन्य छि यिमन कथन हुंज़ ज़रूरतः

1. मनुशस मंज़ ज़ियछर वतीवनुच हेमथ ।
2. बोलनुच हेमथ ।
3. सु लक्ष्य युस बेयिस दब दियि गछि नकारुन ।
4. युस नेशकाम कर्म करि ।
5. पनुनिस अंदरूनस साम हेथ ध्यान दारनायि मंज़ मस रोज़ि ।
अमि खौतर छ अँमिस पाँच चीज़ पानिरावनुक ध्यान थवुनः-
1. दयस प्यठ विश्वास ।
2. दय छु रचि रचि मंज़ व्यराजमान ।
3. पनुनि इन्द्रिय गंडस मंज़ थँविथ पनुन बविश बनावुन ।
4. व्वपुरीत हालातन मंज़ पनुन पान व्वपुरावुन ।
5. जन सीवा दय सीवा मानुन्य ।
दयस प्यठ विश्वास तु श्रदायि कर्म कैरिथ छु संसॉर्य व्यवहार

स्यद सपदान । प्रथ कर्मस सुत्य भगवान थवन सुत्य छि अँस्य ज्ञौन्य या अनज्ञौन्य मंज त्रैयि कुस्मुक्य तप करान:- (1) मानसिक तप (2) शरीरक्य तप तु (3) वौणी तप ।

मानसिक तप:- मनु किन्य सारिनय हुंदि खौतरु रुत यछुन । रुत्य व्यचारव तु अंताःकर्णन हुंदि श्वदी सुत्य व्यवहार करुन । योद अमि वेपरीत सोचव, पाफ तु वेग्न छि ब्यौल्य रूप पानय जेवान तु इंसान छु क्वव्यचारव क्वकार करान ।

शरीरक तप:- अथव सुत्य लुकन हुंदिस दौदिस दगि स्वखस द्वखस मंज पलजनस छि शरीरक तप वनान । अथव सुत्य रुत करुन, कामि सादुन, नेशकाम कर्म कैरिथ लुकु सेवा करुन्य । यि करनु सुत्य छु मनुश आदरनीय माननु यिवान । मगर अथ वेपरीत छु मनुक पाफ वँसिथ, वौणी पाफ मध्यम तु शरीरक्य पाफ व्वत्यम अवस्थायि हुंघ गँजरनु यिवान । अमि खौतरु गछि ज्ञान आसुन । इन्सान हैकि कर्मव पुनन पान थोद ति तुलिथ तु लछि ति त्रौविथ ।

वौणी तप:- कथव किन्य लुकन पल्लुन । शिहिज तु मेछि वौणी सुत्य लुकन शेहजार तु स्वख वातुनावुन । मनस मंज पाफ ज़विथ छु लंजव रूप वौणी दँस्य न्यबर नेरान । तिम पुरूश छि शब्दव रूप लुकन ख्वश करान ।

चन्द्र भगवानस छि शुराह कलायि । योद अँकिस अँकिस कलायि मंज पूर चन्द्रम आसि, 16 चन्द्रम नेरन अकिय सातु तु तारख नबस ति सपदि 16 ग्वन हुरेर । सारिनय पहाडन योद यियि नार दिनु, येमि सुत्य च्वपौर्य प्रकाश बासि, तोति हैकि नु यि प्रकाश राँच हुंदिस अनिगोटिस कैह दूर कैरिथ । राँच हुंद अनिगोट गछि सिर्यि खँसिथुय दूर । यिथुय पौठ्य छि कर्मकाण्डात्मक व्वपासनायि हुंघ यिम सादन यने यज्ञ, दान, तप कैरिथ ति

योतान्य नु भगवत कृपा आसि अग्यान रूपी राँच हंड नाश गछि नु कैह ति ।
 भगवत कृपायि रोस हैकन नु ज़िन्दगी हंड कलेश तु वेन कैह नाशस
 सपदिथ । यि राँच हंड अंदकारय छु कलेश रूप, युस दय सुंदि वेशवास
 श्रदायि रूप प्रकाशि सुत्य फना हैकि सपदिथ ।

वीदव अनुसार युस कर्मकाण्ड छु सु छु पज़र तु ज़ानुक मूल ।
 यि छि असि सर्वहित कर्मन हंड ज़ान दिवान । यिमनय सर्वहित कर्मन
 छि वीद यज्ञ वनान । यर्जुवीद किस ग्वडुनिकिस मंत्रस मंज छि श्रेष्ठतम
 कर्मनय यज्ञ वनान । छोटिस मंज हिंसा तु चूरि रोस सारिनय हंडि ह्यतु
 खॉतर युस ति कर्म यियि करनु तँथ्य श्रष्ट कर्मस छि यँग्य वनान ।

शास्त्र छि असि पाँछ यँग्य नेन्द्रि वँथित करनु खॉतर वनान
 यिम यिथुपाँठय छि:-

1. ब्रह्म यज्ञ:- परमब्रह्म परमात्मा कुस गव, मुक्ती क्या गँयि, ज्योन तु
 मरुन क्या गव, महान आनन्द क्या गव, अम्युक जवाब छु दय ज्ञान
 प्रावनु सुत्य मेलान । येमि रोस अँस्य परम तत्व हैकव नु कैह ज़ॉनिथ ।
 द्वख हमेशि खॉतर दफा तु हमेशि खॉतर महा आनन्द प्रावुन, अम्युक
 राज ज्ञाननुच कुंज छेनु अज्ञॉन्यन निश आसान कैह । लेहाज़ा छु मनुशस
 व्यवहार ज्ञानस सुत्य सुत्य दयि ज्ञान ति प्रावुन ज़रूरी । प्रथ कुनि
 कर्मस सुत्य योद दय थवोन, संसॉर्य व्यवहार करनस मंज सफल
 सपदिथ गछन दय वतु पानय साफ तु रटि दय पानय असि नालु यने
 पानस कुन फेरनावि सु पानय । सानि बुर्जग माजि नानि या तमि ब्रॉहमि
 ज़नानु ति आसु सुब्हन नेन्द्रि वँथित अथु बुथ छँलिथ ग्वडु सिर्यि रूप
 ब्रह्मस अथु जूरिथ नमन करान तु मंगान अज़्यकि दुहक्य कर्म छसय
 च़ेय पुशिरावान तु रातुक्यन छस शुक्र गुजॉरी करान । तिहुंद ब्रह्म यँज

ओस सुय । तिम आंस्य पूर दोहस सम व्यवहार किन्य पनुन्य कर्तव्य कर्म करान रोजान । अगर अँस्य यिचुयहान करव सु ति छु स्यठा ।

2. देव यँज्ञ:- दीवन याद करुन, अर्ग पोश लागुन, दुप जालुन गव देव यज्ञ । येति गव यि आम अँस्य ज्ञानु तु मर्द छि अलग अलग नारयण सुंज पूजा ब्योन ब्योन रूपस मंज करान । कशीरि आँस ज्ञानु ग्वडु ठेकुर लिवान, तमि पतु पाँ गडु तु पोश चौरिथ तस मर्दस खाँतरु ठेकुर कुठिस मंज थवान युस पूजा करान आसिहे । मर्द ओस तमि पतु शंख, गंटा वाँयिथ मंत्रव पोश तु अर्ग सुत्य ठेकरस पूजान । तँमिस आसिहे तति कैह लारान, सु ओस सुय ज्ञानान येलि तस तम्युक फल ओस ब्रँहकुन वातान । मगर ज्ञानान हुंज दीव पूजा आँस सीवायि सुती रथि खसान ।

3. ब्रांदु फश:- खांदुर पतु कमय कॉल्य पतु ओस अँमिस न्वशि सुब्हन ग्वडु नेन्द्रि वँथित ब्रांदु फश दिनु खाँतरु वनुनु यिवान । येमिकिन्य स्व प्राविहे पनुनिस शेरस ब्रोंठ मोत । चूँकि तेलिचि ज्ञानु आसु अनपढ़, तस ओस अथ वारिविस मंज सुय अख 'केन्द्र बिन्दु' यसंजि खुशी खाँतरु स्व औत आमुच आँस आसान । येलि न्वश ब्रांदुफश आँस दिवान, तस आसु ल्वकुटिस, बँड्य सुंज चपनि खाव ओर योर तुलिथ ब्रांदु फश दियुन आसान । येमि सुत्य बार बार यि कर्म करनु सुत्य ओस तिमन अहं दूर गछान, युस अनुहरिथि तस मालिनुकि लोलु तु रछनु सुत्य फब्योमुत आसिहे । यि आँस सोचान जि बनय छस किहीं व्वन्य येलि मे सुब्हनस यि ब्रांदु फशुक कर्म करुन ज़रूरी छु । यि ओस ग्वडुनुक कदम युस अँमिस पानय पनुन बविश बनावनस मंज बकार ओस यिवान । तिम आसु कलु ब्वन कुन थँविथ ति सौरुय हेछान यि तिमन वनुनु ओस यिवान । तिमन ओस अँमियकिन्य ग्रहस्तुक व्यवहार

स्यद गछान तु वख्तु अकि आसु तिम ति गुंगराय करुन्य हेवान । पाठ तु मंत्र आसु तिम दानस तलय परान । वय त्रावनु ब्रोंठु आसु तिम अँगु राजस तौमुल हुमान तु तँस्य पनुन बाग फवलनुच ओही मंगान । अँगु राजु ओस तिमन मंत्रन दस्खत करान । यिम तिम दिल फुटिथ बावुसान मंगान ओसुस । दय छुन साक्षात काँसि वुछमुत, मगर सौन्य अनुबव छि असि तसुंज सर्वु व्यापकता मानुनावान । येमि संसौर्य छु अँगु राजु साक्षात परमेश्वर सुंद रूप यस निश अँस्य यि मंगव ति बनि । फर्क छि बावुच तु नज़रन हुंज ।

4. भूत यँज़ :- यिति ज़न सुब्हन गरि चोकस मंज़ बनि सु गछि चरेन, हारेन, गौवन गुपनन ग्वडु त्रावनु युन पतु पानस ख्योन । अमि बापथ ओस सान्यव ज़िठेव चोकस मंज़ असि सनिवारि रूप मातायि हुंदि आसनच शोक्षा दिचमुच । यिमन सनिवारेन ओस न्यबरकनि छँलिथ छुकिथ ग्वडु पोन्थ बरुन आसान, पतु ब्रांद लिविथ या छँलिथ सनिवारेव मंज़ रछा रछा पोन्थ अथस मंज़ रँटिथ द्वारस लवु दिनि आसान तु परुन “सन्य दि द्वारस, ओही पानस, चे भगवानस नमस्कार” । यि वँनिथ ओसु यिम सनिवारि चोकस मंज़ थवनु आसान । अज़ ति छि यिम सनिवारि सानिस चोकस मंज़ सौन्य देव यज़ अंद वातनावान । ग्वडु चोट तैयार गँछिथ छि यिमन चायि कतरु तु चोट त्रावुन्य आसान । तमि पतु ग्वडु चरेन हारेन पतु पानस खेन्य छु प्वन्य माननु यिवान । अज़ कल छेनु अमिच कांह कथुय । राजमाह योद रनुनि आसन, अथस प्यठ छु तिमन सति लटि नून वुछनु यिवान । अंतस प्यठ छु राजमा ओडकिलो पावुय मोचेमुच आसान । तमि सातु ओस गंड चोकस मंज़ ख्योन ओस्य पाफ मानान । यि ओस अथ सनिवारि बतु ग्वडु त्रावुन पतु

बतुफोल चरेन हारेन त्रॉविथ ग्वडु परिवारस ख्यावुन, पतु ऑस्य हुर्योमुत नवीद रूप पानस ख्यवान। येमि सुत्य दय ओस तिमन अँदर्य स्वख तु शाँती बख्शान।

5. **पेत्र यज्ञ:-** यिम स्वर्गस गॉमुत्य छि तिमन हुंघ नॉव्य अन दन तु त्रेश दिन्य। माजि हुंदि डम्बि मंज़ हेनु आमुत बचि येलि गर्भु न्यबर छु नेरान सु छु द्वह ख्वतु द्वह बँडिथ बँड्य बँड्य कार करान, तिथय पॉठ्य कोम्ब ग्वडुक पोन्थ योद कम छु आसान यि छु मंत्र तु श्रदायि किन्थ परिलूकस मंज़ वारियाह पानिचि दारायि बँनिथ सारिनुय पेत्रन हुंज़ कामनायि पूर कॅरिथ परा तृप्ति बापथ अमृत बनान। पेत्र छिनु त्रेशि त्रेशि करान स्वतान, यि छु सोन शास्त्र वनान अमि अलावु गछन पेत्रन हुंघ नॉव्य श्राद हावन्य। यिति कॅह श्रदायि सान तिहुंदि नॉव्य दिनु यियि तथ छि श्राद वनान। श्राद हावनुक मानि गव तिम याद करुन्य यिहुंदि बरकतु अँस्य संसॉर्य ज़न्मस आयि तु योततान्य वॉत्य।

6. **मनुशि यज्ञ:-** लुकु हेतु कर्मन छि मनुशि यँज्ञ वनान। मनुशस सुत्य लोल तु माय वरतॉविथ छु ज़न्म रथि खसान। यिम गरुक्य ज़िठ्य आसन तिमन यज़्जत दियुन तु तिहुंज़ सीवा करुन्य। योद तिम अनपढ़ ति आसन तिम छि व्यदवान माननु यिवान, यि छि वीद वनान। यिमव छि पनुन्य ज़िन्दगी बसर करान करान स्यठा कठिन्य अनुबव हॉसिल कॅर्यमुत्य आसान। तिमन अनुबवन हुंद सँही फॉयिदु तुलिथ गछि हर कदमस प्यठ तिहुंद मॉनिथ पनुनि यिनु वाजनि ज़िन्दगी सुत्य इन्साफ करुन। यिमन मंज़ दय सुंद रूप अनुबव करुन गव दय प्रावुन या दय लबुन। कांह ति पर्व व्यछुनावनस मंज़ योद कांह कमी अनुबव कॅरिव, चिठ्यव ज़ॅरियि गछि मे आगाह करुन। सु यियि तुहुद बजर माननु।



SAIEN PRAZNATH

(Rituals of Kashmiri Pandits)



Smt. Santosh Shah 'Nadaan'

List of Books published :

1. **Vena Posh** (Kashmiri Bhajans) : 1987
2. **Poshgond I** (Kashmiri Bhajans) : 2005
3. **Smd. Bhagwad Geeta** (Kashmiri Translation of Smd. Geeta) : First edition 2007 and 2nd edition in 2016
4. **Poshgond II** (Kashmiri Bhajans) : 2009
5. **Mahimna Satottram** (Kashmiri Translation of Mahimnapar) : 2010
6. **Guru Geeta** (Kashmiri Translation of Guru Geeta) : 2010
7. **Sanskar Chandrika** (Kashmiri Translation of 2nd Form of Sanskar Vidhi of Swami Dayanand Saraswati in Nastaleeq/Devnagri) : 2012
8. **Satisar ta Anantnagun Nagbal** : (2014)
9. **Shatnam Satotram of Anand Jee Bab** : (2014)
10. **Shatnam Satotram of Badshah Kalandar** : (2014)
11. **Moktas Kareim Malleh** (Translated Rare Shruks of Nund Reshi) : 2015
12. **Nund Rashin Shruk** (Tashreh te Tarteel) : 2015
13. **Naqoosay Dil** (Urdu Ghazlas) : 2016
14. **Trika Philosophy and other Thoughts** (by Sh. N.L. Shah, edited by Santosh Shah Nadaan) : 2012
15. **Zetin** (Kashmiri Bhajans) : unpublished